

桂隱先生文集序

嘗讀危大樸名士傳人詳其事大抵吉水
為多是人一邑則紀載重在一家則閱
閱重蓋百十年不一見而一時滄集豈不
異哉向非其人即數千里內不異荒野是
重紀載與閱閱者重人品而區區尋常富
貴起滅不與也吉水中危所甚慕而又推
其心事尤異於當時諸公稱許其父子祖
孫皆守節義則莫有過於桂隱劉公當元



NATIONAL CENTRAL LIBRARY, TAIWAN, R.O.C.

初時廢科舉抱所長無所於洩於是尚行
誼盛文墨自任斯文之重與宋遺老上下
徜徉屢為文集賢陞鄭尚書鵬南蕭御史
泰登力薦不屈既卒賜謚文敏元雖廢科
舉而謚不為限故公以布衣得之我


朝法度明峻非五品不得謚即隆貴無問也
其異如此公之平生詳著元史儒學傳中
世出南嶺與秀川為婚姻余譜秀川得據
所言為證七世孫湛為高州郡守郡守與

先大夫同事

武宗號莫逆故予得以異姓昆弟交三德用
敦公所著有桂隱集已梓行今多散逸永
新山田志孔重入梓而節推君方興與弟
子員子武天律索予為叙謂之曰公之平
生與詩文元史諸集已詳可無俟區區也
惟其聞當時垂來世而為人重者固必有
在然布衣也非世所謂富與貴也其在公之
後自布衣以上必有樹立始不辱公能不

辱公始不辱吾吉亦此則若與洪先所共
也然世之言紀載閱閱者或不~~在~~是嗚呼
曷亦就斯集觀之

明嘉靖癸亥季秋同邑晚學生羅洪先撰



文敏先生文集序

余家文敏先生宋人也文章道德著于海內當
時人士從先生遊者皆能砥礪名節以聖賢之
教嚴夷夏之防先生一布衣耳身繫綱^常嘗如此
其重也蓋先生未嘗仕宋而耻于仕元非獨先
生一人不仕元也嘗考家譜先世最盛于宋文
信國起義兵予家義士公昭子父子從公殉難
宋亡聚族而隱著述躬畊科舉之學遂廢至

國朝永樂間予祖邨鄆公始舉進士以前凡數世無一人仕元者又考邑志歐陽文忠公生于吉水逮既仕宦而後折其地于永豐忠襄文節諸公皆立大節文章節義最盛于宋宋亡知名之士無一人仕元者先生之教在家而家之子孫不仕元在郡邑而郡邑之賢者不仕元故曰先生一布衣而身繫綱嘗如此其重也且夫仕宋而又仕元不足比數者也五代馮道宋初范質王溥魏仁浦諸人不足論先生不仕元無難也不仕宋而仕元恒情如是然亦祖父未仕宋朝者也劉更生忠于漢而子歆仕莽其人又不足論予家先輩公鶚大宗召對問以治道搯溪公才邵權吏部尚書擊秦檜去官載宋史列傳祖孫父子兄弟叔姪同朝舉進士高第在宋稱世臣矣不顧先世君臣大誼而屈膝虜主有血性者如是乎先生不仕元無難也當元之世虜

主慕用中華仕而屈節者無論其不仕者南人
教虜主求才江南高不屈之節弓旌往往及之
先生爲科舉之學則以聞達徵先生廢科舉之
學則以不求聞達徵况先生之友若偁奚公斯
歐陽公玄虞公集皆知名之士日求先生北肩
事主同處卿相之位屢徵屢辭先生老于衡泌
難矣夫士而悃悞無華一丘一壑自謂過之不
爲當世所物色斯已矣先生文章警策類南豐
詩篇簡峭似臨川負用世之才卒能藏其無用
之用抑又難矣惟先生全于道術斯不見爲難
耳猶記兒時侍先文節府君見

文淵閣書目有桂隱文集稍長得于家藏中讀
之族兄湘陰令廷諫存舊刻梨棗歸之南嶺則
予曾祖平樂公手較讐者也同升乃序而行之
庶幾後世知先生爲宋人也先生諱詵字桂翁
吉水人學者稱桂隱先生家世南嶺避亂居郡

城以布衣謚文敏祀郡邑鄉賢元史有傳裔孫
謹弘治壬戌進士爲高州太守著廉聲
南嶺二十三世孫同升謹序

桂隱存稿舊叙

前奎章閣侍書學士翰林院侍講學士通奉大夫知制誥同脩國史雍虞集撰

昔者廬陵歐陽公秉粹美之質生熙洽之朝涵淳茹
蘇作爲文章上接孟韓發揮一代之盛英華醲郁前
後千百年人與世相期未有如此者也蘇子瞻以不
世之才起於西蜀英邁雄偉亦前世之所未有南豐
曾子固博攷經傳知道脩己伊洛之學未顯于世而
道說古今反覆世變不失其正亦孰能及之哉然蘇
氏之於歐公也則曰我老歸休付子斯文雖無以報
不辱其門子固之言曰今未知公之難遇也後千百

世思欲見公而不可得然後知公之難遇也然則二君子之所以心悅誠服於公者返而觀其所存至於歐公則闇然而無迹淵然而有容挹之而無盡者乎三公之迹熄而宋亦南渡矣乾淳之間東南之文相望而起者何啻十數若益公之溫雅近出於廬陵永嘉諸賢若季宣之竒博而有得於經正則之明麗而不失其正彼功利之說馳騁縱橫其間者其鋒亦未易嬰也文運隨昔而中興槩可見焉然余竊觀之朱子繼先聖之絕學成諸儒之遺言固不以一藝而成名而義精理明德盛仁熟出諸其口者無所擇而無不當本治而末脩領挈而裔委所謂立德立言者其此之謂乎學者出乎其後知所從事而有得焉則蘇曾二子望歐公而不可見者豈不安然有拱足之地超然有造極之時乎而宋之末年說理者鄙薄文辭之奪志而經學文藝判爲專門士風頽弊於科舉之業豈無豪傑之出其能不浸淫汨沒於其間而馳騁凌厲以自表者已爲難得而宋遂亡矣中州隔絕困於戎馬會聲氣習多有得於蘇氏之遺其爲文亦曼衍而浩博矣

國朝廣大曠古未有起而乘其雄渾之氣以爲文者

則有姓文公其人其爲言不盡同於古人而伉健雄偉何可及也繼而作者豈不矍然其後矣乎當是時南方新附江鄉之間逢掖縉紳之士以其抱負之非常幽遠而未見知則折其竒傑之氣以爲高深危險之語視彼靡靡混混則有間矣然不平之鳴能不感憤於學者乎而一二十年向之聞風而倣効亦漸休息延祐科舉之興表表應時而出者豈乏其人然亦循習成弊至於驟廢驟復者則亦有以致之者然與於是執筆者膚淺則無所明於理蹇澀則無所昌其辭徇流俗者不知去其陳腐彊自高者惟傍竊於異

端斯文斯道所以可爲長太息者嘗在於此也往年集承乏禁林陪諸公奉詔讀進士之策於南士得劉性粹衷而奏之嘗與論及此事後十年而遇集于雲峯下又嘗及之而思見乎有以相發者又後二年以書來告曰我鄉先生劉桂隱氏有學有行文章追古作者而年亦七十有四矣屹然山林其書滿家而遠方無盡知之者因以得先生之書焉集執書而嘆曰余知之舊矣而未獲與之游也先生之言曰弱冠時猶及接故宋之遺老旣內附猶用力於已廢不用之賦論視儕輩無已及者國家以進士取人未能忘情

於斯世乃益究乎名物度數之節註牋訓釋之辭以從當時之所爲而志大言高不爲有司察識又十年廸爲古學而用意於歐陽子焉四方之求文者隨而應之不知其沛然而無窮也此雖先生之謙詞要其大槩不我欺也嗟夫以文應時者雖有古今所取以爲文者古今無有異也以高才博識專業而肆志求諸昔之人者五六十年其應於今者合否不足論也吾故曰山林之日長得以極其力之所至學問之志專則有以達其智之所及知其背於塗轍之正者即有所不爲知其可以傳諸方來者則言之而無隱論

古今成敗無所蹈襲而出人意表觀乎瀧岡之麓青原之波不亦善於達本而溯源者乎集故極道夫歐陽子之未易知而善乎先生之有以知之而輒及於余之所欲求知於歐陽子者而著之篇也先生之文凡若干卷詩若干卷已刻雜著記序銘說等若干卷方將刻焉而先生耳聰目明心識精敏出其所新得以爲言者猶未有止也集小於先生四歲相望不遠安敢以齒髮之不足而自棄於先生乎姑書此附諸篇末使觀先生之文者或有取於區區之言而有所感發也夫

桂隱存稿舊叙

翰林學士資善大夫知

制誥兼修

國史渤海歐陽玄撰

廬陵劉桂隱先生以文集寄余京師余爲之言曰士
生數千載後言性命道德如面質古人言成敗是非
如目擊古事其間命意脩詞則欲求古人之所未道
而又欲不背馳古人其事可謂難矣或曰難可但已
乎曰不然有一定之灋而蔑一定之用者聖人之於
規矩也有無窮之言而懷無窮之巧者造物之於文
章也是故巧能爲文章不能爲規矩倂故常而爲規
矩者狂之於巧者也法能爲規矩不能爲文章守故

常而為文章者狃之於法者也今余讀劉先生之文
溫柔敦厚歐也明辨雄雋蘇也至論其妙初豈相師
也哉又豈不相師也哉或曰妙可聞乎曰妙可意悟
耳試從先生求之有不可得傳以言者矣而况余乎
雖然余所謂規矩蔑一定之用文章懷無窮之巧者
庶乎近之先生文傳世可必尤長於詩詩五言古體
短篇尤佳因書以為之序至正七年七月日

桂隱文集目錄

卷一

賦

聞角

有序

蜂

有序

蘭亭

有序

銅雀臺

有序

端溪石

有序

聞鶯

瑞蓮

記

吉安府興學

扇

詠歸亭

棲深

白雉二篇有序

歌風臺

芳草

螺川重脩馬驛

廬陵重脩水驛

二程先生祠堂

吉安重脩三皇殿

悠然堂

虛緣

吾峰

秋江亭

勤成堂

麗澤齋

山田亭

壽齡堂

玄妙觀經壇買田

佑聖觀殿宇題名

靈巖寺重脩藏殿

卷二

序

送僉事李彥古赴南臺

送蕭克有偕曾從吾赴永平

送賀元忠赴越州廟山

送楊廷章往旌德

送蕭煥有入京

送艾用濟歸河南鄉試

送達子通

送歐陽可玉

送延平楊上人歸閩求師

送子靜遊武昌

贈張漢鼎赴南嶺

贈姜行所遊五羊

贈邵以和

贈林可翁談地理

贈醫士王宇春

郭劉二君邂逅詩

夏道存詩

劉梅南詩

九日登鹿角山

附詩

龍溪魯氏族譜

塵外流芳集

李伯玉大素脉

蔬筍詩集

彭翔雲詩

遊興善寺詩

百詠梅詩

張子靜詩詞

誌銘

建昌經歷彭琦初

高師周

仲子尚文

墓表

蕭德翁

胡稷


張性善

兄子古臣

蕭以吾

故宋張伯儀

桂隱文集目錄終



國家圖書館, NATIONAL CENTRAL LIBRARY, TAIWAN, R.O.C.

桂隱文集卷一

元 謚文敏桂隱劉

詵

著

元 賜進士門人羅

如篴

顏成子編刊

明 曾孫 三德

用敦

炳 重編

族孫 方興 天健 志孔 較刊

賦

聞角 有短序

予父客城中朝暮聞角念歲月易徂有感而賦

孤城始秋涼月流夜懸葉鳴空踈螢入樹雲鱗鱗而不風漢耿
耿以西下鼓屢急而遙絕鍾漸遠而欲罷有聲鳴噫非咽非吃
節迭轉而愈長衰一送而如瀉於是劉子喟然嘆曰茲非羗人
所以愁予焉者耶鰲極四立物象兩數肇帝鴻之智創忽幾閱

於朝暮天沄沄而如輪人擾擾以俱驚年逾年而遞新日復日以猶故春花沄暎寒鳥栖露青山淡而無言去軌盈而成路蛾眉變而垂霜華屋鬱以爲墓譬栖塵之寄轍倏東西而不悟嗟此殼之何情送萬化以終古是以漢武欲求於飛仙秦皇行樂而無度皆無可於柰何知不可爲而弗顧予欲破形息聲蕩制除故使斯人無所晦之懷忘陰陽之節莽莽而行怡怡而寤可乎客有笑之曰子惟多感不求其端夫規之以龍門之相引之以淇水之竿飾藻繪之徽異託奴隸之所刊此天地之委質曾何與於悲歡且夫王孫公子抵掌歌嘯朝發五陵暮宿溫園靚粧吳嬌慢舞燕妙將軍勝敵行賞獻廟凱歌屢揚笳鼓迭奏前營旂之大白後蹴鞠之腰褭千石一飲萬金一笑豈不動於所聞忽飄吹之驚竇乃有甯生未遇單練不完翁子行歌樵路晚

寒身辭家而靡適妻去室而不安東眺臨淄西望秦關星月不動迢迢千山獨抱志其何爲乃掩扉而長嘆正則去國伯竒履霜捫花寒而不吐秋風起兮吹霜天茫茫而正色鴈矯矯而高翔痛所天之未遇獨恐死而徬徨又若陳 初絕班姬早衰春苔綠兮生階曙月皎兮窺帷菱鑑無色蘭芳歇菲立長門之殘雪睨建章之高枝撫長夜之如年哀往日之莫追此其人聞之然後增歎填膺發恨銷骨流涕而不自持也是茲殼之在宇宙特羈窮不遇憔悴失意者之所獨悲也彼其鳴噫朝暮者其亦安知之耶是故感不在物而在於心山陽聞笛東市泣琴聞胡笳而折骨掩琵琶而沾襟慨所聽之不同亦何怨於無情吾聞太上立德其次立功其次立言苟有托於悠久又安計於歲年瞻天道之有常孰能係於運遷彼視蔭而嗟衰諒不取於聖賢

於是客主釋然一笑而起庭月既半角聲乃止

扇

劉子坐于山齋于時四月近晦驟暑而雨陰雲伏興風氣襲宇
墻頽壁潰浪浪徹曙下重箔而猶清進袂衣而復御顧視前日
之扇投委四壁黯然無色若敗軍之士卷甲而狼籍也若已放
之女掩袖而不飾也若搖落之木申嚴霜而於邑也於是喟然
而顧客曰是何暄涼之速而踈戚之驟寵賤之殊而妍醜之異
豈非其無自拔之標而軒輊俯仰皆爲夫人之是制此班姬有
感於絕恩而東陽長歌於憔悴也客曰夫理有乘除時有興替
嗟是物之無情果何識於斯世誠於彼以未變直吾心之異視
蓋其爲物也非有他技一主於清不以時改不以人更故其閱
寵辱傲陞黜玩世而不矜也久矣且夫涼風八月庭樹始衰風

慘肅而中人霜淒厲而侵帷鴈橫空而唳怨蛩入戶而吟悲斯
固見踈而遺棄矣而又閉塞成冬天地寥閻林狂號於枯梢野
淒絕於行跡層冰峨而截昉崇雪縞以薦壁累榻複席叢襖疊
密庭熾赭鱗履褥翠鳥擁腋白之萬金宴醪黃之千石燕姬温
座而吹笙趙女暖歌而鼓瑟於斯時也敗鸞塵掩斷篋網積過
目起憎推去如隙而彼亦不自以爲戚及夫蕤賓屆節暄老炎
繼山蒸火雲空走赤熯熾六合之皜皜焦萬狀之靡靡鱗投淵
而煩呀烏栖谷而暍死肅涼臺之弘敞汗流喘以竟趾恨蓬萊
之難躋疑洞庭之猶沸挑笙無功蔗漿失味冰壺不足以溉吻
雪貌不得以近體於斯時也提攜左右斯夕臥起轉輕飈於懷
袖捍百毒於蚊蚋手暫停而若失夢已熟而未委愛逾斂色親
過父子等飲食以尤切齊璧珠以加美而彼亦不自以爲喜此

其為德豈不近於用之則行舍之則藏不見幾微於三仕三已者耶嗟夫此世之人進退睢睢常非時而攻鑽擾秋宇之蠅飛朝乘勢而炙手集權門之輕肥暮失勢而熱中抱戚戚而尤悲曾不悟於時命徒寤歎而神疲故夫天地之間有大寒暑殷才零落於麥墟周士廢居於瓜土利有得喪之異趣功有成敗之殊塗耕有豐險藝有棄取李廣數奇於侯封顏駟不遭於好武邵平晚托於市門翁子早歌於樵路慨大化之不齊難強邀而逆拒雖悠悠之奚心亦戲覩於所處苟吾初之不變固可俟於千古柰何隕獲弗持顛沛失據彼小人兮何足責顧君子之是懼豈惟物之最靈曾無情之為愈言未既長飈振空朗日在樹於是劉子一笑而起曰偉哉客之言也書以為賦

蜂有短序

蜂有君臣之義朝參其一耳若狗忠死節繫名教尤大則不可不之錄也作蜂賦

繫顛穹之陶形兮人與物而同鈞宗一本而有文兮首萬國而為君惟偏全之異稟兮乃人物之繇分超羽屬而獨出兮異哉蜂之如人或以微而不致索或以毒而不敢親孰知肖翹之蜚翼而能有卑尊之大倫若乃春妍景輝玄鳥來歸幽岩縹綉窮林錦蜚於是薨薨窺竅翁翁入洞斜縈姬月大取懸甕將卜食以告遷亦相時而後動是則眉宇之水滸相宅之洛土也至若日吉辰良晴風燠陽其殼也如鉦鼓之合節其陣也如甲兵之成行出則漸密飛則載揚如罌如扇衛小子王是則就印之支庶分藩之令主也而乃金房初建玉宇未成駢肩構度聚首經營卷然似粟是為靈臺千門萬戶環向四開是則經始之勿亟

庶民之子來也周廬既列課法爰作服負香兮成丸翼汲水兮
如杓於是凝芳敵蘭積潤倚酪府庫克溢蠹不知其幾千萬落
專一意以上供亮竭力以誠樂命黑衣之虎賁守重門而司會
惰者必殺不以小大是則交征之庶士底慎之財賦也藹藹華
華一日兩衙歌聲雷震朝罷無譁方其旅進旅退如嚮如對儼
降升而後揖甚趨庭而列拜比常參而宴見無更直與輪代閑
日移陰王乃時巡陟高丘乎下壘卽戢戢而欣欣騁非八駿扈
無三軍何曾蹙額以疾首乃能省方而觀民而或宮車駕暮不
遊不豫群聚于穴誓無背去別瑤林兮玉樹謝金谷兮琪圃無
面目以偷生絕紛華而不顧於是閉口却粒垂頭喪氣納一命
於所天萃百萬而同死蓋商餘孤竹之二子齊橫五百之壯士
也嗚呼辛螫之求周詩是憂有毒維蠱春秋所戒豈知物微性

至五常俱備未容僅比於蝼蟻而不識其事也可以證鬼神而
質天地是故應期而朝信且禮也多思而營巧且智也效死不
二志於義也割脾而施仁之惠也嗟一氣之忠烈亘萬古而不
折事莫小於餓死尤莫大於失節胡委質而爲臣兮顧背主而
改轍彼瀛王事十姓兮可以人而不如物吾託蜂異以勸來世
蓋不特演周公之雅而廣張華之志也

詠歸亭

繫青原之崔嵬維文學之奧區前忠節之馳驟後賢哲之步趨
振文德於昭代深化雨於涵濡紛洋洋而濟濟咸砥礪於廉隅
屹宮牆之數仞接道義之通衢嗟遊息其何所得遺地於榛蕪
宛城南之沂泗用建亭而象諸江山窮於一覽蓋亦庶乎詠歸
於風雩也嗚呼千載而上聖門此樂千載而下我亭此作剖洙

泗之藩籬邇淵源於濂洛雖興廢其何常初無問於今昨蓋將
示天下之廣居振士林之教鐸而豈眺遠之娛觀美之托也哉
且其風和景曛萬物欣覩勃鬱蕭森生機畢露則青春之將暮
也亦有良朋與子偕行單袷初試微涼乍生則我服之既成也
章甫峩峩衣裳楚楚來遊來歌爰笑爰語何帝冠者五六童子
六七其侶也鷺渚泱泱可濯可相溫乎沂水之淨也螺峰蒼蒼
可息可藏鬱乎雩林之盛也予以濯我纓予以陶我性吟風弄
月之襟懷隨柳傍花之意興登斯亭以玄覽尚彷彿於見聖悟
狂點之雍容本胷次之昭莹豈世異而事殊固合轍而同徑彼
醉夢之紛拏何莫踐於斯境於是撫事興懷因名致慨亭夕陽
而愈悲亭山陰而安在連昌之宮檻半欹北苑之沉香速壞華
亭之唳鶴不聞湖亭之蔭魚何怪是皆逞富貴於一時擅風流

蘭亭

有序

於當代縱情肆欲歡雖盛以奚為極侈窮奢志雖得而愈殆曾
不若此亭翼然聖途伊邇建梁棟於仁義立磐石於忠信禮樂
其簷翬詩書其封畛可以樂日用之經常掃人欲於淨盡如天
理之流行等氣象於堯舜倘聖賢之可歸庶努力於日進亂曰
詠歸之樂著於經兮世遠人亡示以亭兮我造斯亭詠而歸兮
晞聖晞賢殆其庶幾兮

越州山陰縣西南二十里為蘭渚越王種蘭處也晉王
右軍謝太傅兄弟數往造焉築亭其上名曰蘭亭永和
九年上巳日右軍與同游者四十一人流觴曲水倡詠
其間不能成詩者十六人時方尚幻以一生死齊彭殤
為高右軍獨有感於脩短之數慨然嘆老之將至豈以

司馬氏之偏安不自奮者政坐淪溺於老莊之無爲乎
觀其與謝安石殷深源書其經綸爲何如哉而蹉跎出
懷袒下茲其所以峻誓松楸也而晉事亦復振矣嗚呼
歷今且千載無能爲興懷者獨知寶其遺帖可慨也作

蘭亭賦

道淞江而東下兮澹沙樹之雲堤莽鑑湖之蕪絕兮訪古縣之
會稽青山四列而眎分兮斷雲曳空而橫犀曲水婉而縈流兮
急鳴湍之清漪湖柳高而翳翳兮群鶯飛而亂啼弔舊遊之榜
舟兮得種蘭之故基睠群賢之伊昔兮偉一代之雄姿當春景
之浸暮兮曖天宇之和熙造斯亭之脩褱兮曰暢叙乎幽情雖
其懷之不齊兮乃俱集而同嬉寄飛觴而傲八極兮託高標於
賦詩或短長之兼就兮或數語而爭奇獨可疑於獻隗之長才

兮何乃竟日而無一辭豈欲托於昏冥兮寧其受於罰卮嗟神
州之陸沉兮莽宮門之銅駝自一馬之旣化兮拳百年之江沱
弔誓江之無人兮落日澹而水揚波洒新亭之囚淚兮邈故陵
之山河誠談玄之誤國兮千載爲之痛歌胡當時之悠悠兮玩
杯酒以自多覽光景之留連兮忽不知其英氣之消磨彼諸賢
之淪溺兮亦孰

惟右軍之懿美兮迥獨立乎江左曾

內史之足淹兮鬱酒酣之磊砢聞廣陵之管角兮擁千騎之駸
駸懷袒下慨非才之不如兮怪大鈞之誰播指堇楸以爲證
兮高出處以在我痛死生之俯仰兮彼豈嘆老而嗟衰誠歎歎
之有寄兮諒同遊之孰知誚東山而爲書兮危深源之北師彼
其區畫之何如兮柰流落而不施嗟千載之不能一慨兮獨以
遺墨而見奇彼敬宗之何人兮顧以金石而况之偉虬髯之英

雄兮睨六合於一笑曾用舍之不論兮付興亡於不弔乃睠悲於末技兮死不忘於茲妙烟玉匣之深藏兮徒以爲昭陵之禍召作茲賦以爲傷兮迺長風而孤嘯

棲深

爲王舉山作地名舉子岡

六合之內八荒之墟匪臯匪涑不旬不廛有岡伏興望之芊綿蓋得名於吾黨而託之手槐黃之一言於是過者喟然而語曰此非姓溪以冉而名谷以隱者之盤旋耶非科目之已遠而寄想像於千年者耶爰有有道築居其巔問其所從來則蓋元祐之初元矣青山繚屋古木橫天籬援翳塗藤茨入椽內環洗墨之池外遶種秫之田竹分徑造之所蔬滿日涉之園春林雨過花澗流泉孤鶯自啼時鳥禱喧清風墜籥永日聞蟬焚香起坐茶味入禪微涼蕭瑟林木自絃臨清賦詩脫葉如船天寒酒熟

梅花入簷峰雪成畫墻暇獻暄閱大化之迭序甘窮居以爲緣族四世而舞狹乃構寬於厥先折干雲以爲棟逝棲烏而爲檣鳴機隱於內雷藏籍蠹於西偏文公題記韻士替篇風月不待獻而彌勝江山不假飾而增妍念百年之種樹終自庇於本根又歌聚之從起待千載之雲聞豈瓢風之畫語異茅雨之夜眠比隱橘而非幻擬種桃而非仙於是先生欣然而笑曰深矣吾之棲也可以驕元亮而傲玉川矣客有難之曰吾聞淺深表裏所分山之深也在谷水之深也爲淵今先生之居介毫末於一馬寄圭粟於大千南匪其中北匪其邊而先生何所指以爲深焉左眺高闈右接廣阡暘車望其林翳飢袂想其吹烟而先生何所恃以爲深焉窮搜邃討談空說玄問字填巷受經款門使昧者欲赴於其燧辨者欲磨於其堅而先生何所匿以爲深焉

先生曰夫泥於迹者常有所窮游於化者或有所全吾聞至人入水不濡入火不熱會光塵於一隙混涇渭於同源故卜於肆者庸知其非隱行於市者安知其非仙嵇康好琴靈運遊山伯倫酒狂張旭草顛豈所托之或淺常不離乎人間顧吾深之安在誠可指於目前彼山林之委塊亦身外之附懸於是客莫能詰走若季咸望其棲而不見渺山水之蒼然

銅雀臺有序

建安十五年曹操作二臺于鄴高入雲漢其一治銅為鳳凰置焉因名銅雀黃初元年操死臺成未十年計其馳騁兵間觀游之日復幾何哉遺令婕妤美人朝脯上脯脯翔望作妓樂世以操留連妾婦分香賣履區畫家事傷於悉乃平生姦偽死見真情為其心之陋也或者

謂不然以為遺令藏其所大欲而徒及家事乃操之微意實為漢賊而身享漢臣之名此固足以窺奸雄之心然愚以為操之不遜顯白于世久矣求九錫備儀扈諷陳郡董昭以勸進特以清議未泯遲之歲月間耳不謂不得逞於隴漢歸未及洛而沒蓋平生心事竟不得遂故流涕不自制而寄愛於幼子少妾焉觀其欲常設妓樂及使人常望西陵不能割生前富貴如此而肯為盛德事乎陸士衡以為長筭屈於短日遠跡頓於促路斯言得之矣使其未死彼固不能忍以待其子也又豈孔北海荀文若之清議所能劫哉作銅雀臺賦

出相州以西鷺兮落落日之榆堤青山如浪而四走兮麥田田而陵陂飛鴻去而杳杳兮寂人家其掩扉荒敗礫之草生兮為

銅雀之故基問興廢而下馬兮故老告予以不知嗟阿瞞之鷹
揚兮偉一代之雄姿以迴天倒日之爲力兮果何強之能支攬
英豪以自翼兮才各適夫所施每磨盾而作檄兮亦橫槊而賦
詩由意氣之溢出兮傲甲兵而笑嘻搜六合之名材兮起銅雀
之崔巍俯雲雨之在下兮招飛仙而過之高鳥度而畏金碧兮
行人睇而愁思啾絲管於天上兮天風散而浮雲悲席不温而
介馬兮曾登覽之幾時衰短日之不待兮徒以施乎總帷執姬
侍以荏苒兮又孰知其雄心之歔歔以愛子而托人兮彼豈願
於崦嵫盛妓樂以媚死魄兮固富貴之未忘豈不知在其子兮
誠一念之未償奄天運之至此兮銷平生於哀腸嗟後來之議
論兮舉不究其所蔽慨睨昇之旋踵兮曾不如猗子之長西陵
瞰乎高原兮莽疑塚之蒼蒼蒼高臺落而爲土兮曲池咽乎蜚蜚

獨遺瓦之在人間兮尚磨澀而不亡論斯人之自樹兮固其功
之孔隆何羣雄之蝟起兮由立已之未公譬吾身之未盜兮又
以摧盜而爲功矧不可以控搏兮未若秉乎厥裏耿予心之躊
躇兮托餘悲於林風

白雉二篇有序

白雉之出必爲太平故見於建武永平與成周之際皆
是時也五運各從所勝周漢皆尚赤爲火德故周興而
白魚薦兆漢啓而白蛇獻符而白雉亦在周漢爲盛白
金也豈非其所制伏者效順即爲瑞與然周漢之瑞木
一而世稱越裳重譯特加顯則君臣具慶使然夫雉文
繡者也變爲純絜非世道休明不及此其在元始亦爲
白水真人發祥耳若出非其時而附會奸臣以取安漢

之號則豈足爲靈物也哉作白雉賦

撫萬物之不齊惟莫變於其天鵠不日浴而常皜烏不日墨而常黔既各安於其素雖純質其猶足妍矧能其天之所不能不待脛而千里以傳蓋有化而役之以爲異彼固莫知其然而然方周鼎之既定萬邦康而屢豐年海豎珉而不濤六氣無盛衰之徧薰六合以一蘇果何質之不遷乃有越裳萬里殊國迢迢三譯獻雉之白林邑扶南暑涉寒蹶玉鞞失輝霜轡失色天空月朗雉揚影滅閭闔曉登兩袂皆雪於是混瑤殿照檀闕過靈臺而烏愧其鷺歷西雖而鷺耻其潔傾凡羽以無羣恨征埃之猶溼夢華虫之前身洗組繡之餘劫念光華之不貸豈詠歌以自賂雖改容而廢常亦反素以爲德委微質於天地爲至治之先哲吾聞五德相勝有順有逆當赤精之麗空宜金質之從革

故周漢之千年效禎祥於一轍惟成周之至盛彌顯白於史策烏流屋而祥立鳳鳴岐而瑞列皆天意之使然擅古今之奇絕倘效顰於美新是媚奸之造物幸聖朝之在上集六合之奇祥矧羽儀之無媿庶及時而翱翔

覽大極之妙化今產靈物之何奇伊續續之仙雉兮孰剪瑤瓊而爲之姿惟南荒之極炎兮薄陰氣而相持疑素摸之融液兮鍾羽毛而不諱故炎以爲絳冠紺趾兮陰以爲霜翎雪衣遡玉京而鑄膚兮素峨峨而琢肌然不能以超寥廓兮託人間以爲依豈無見而偶出兮兆治世之德禧惟成周之聖明兮烝至治於鳧鷖充協氣之薰洽兮合宇宙以爲祺海鯢伏而不波兮風不鳴條而雨時衣裳皇皇而端拱兮萬國朝而賓四夷彼越裳之垠絕兮渺萬里之航梯獻茲禽以爲瑞兮羗能使其天賦之

移恍前夢之竄蠻兮拔文身之陸離洗千仞於南溟兮爲
之羽儀望同羣之采采兮立縞素 繪締 寒而月薄兮發
孤鸞其誰知至漢中而後出兮聊亦與世道而游嬉彼新莽之
執以爲樂兮固將以白頭大夫而待之忽千載之不聞兮寧不
老死於山巔而水湄豈風日之清明兮顧不驚猜於童兒誓重
來之何日兮指西風以爲期幸麟趾之再應兮鳳喙喙而鳴岐
舍茲時而不隨兮復將何爲爲招雉之歌曰結金精兮搆乾坤
應明德兮儀九天慎爾時兮燕雀先

端溪石有序

石者天地陰陽之核也故蘊神毓異無所不有硯之爲
石又其精者以天地之大而產石之爲硯不過數處而
端溪又爲天下第一則山川英淑之氣寒暑禪代之積

千百年間凝而爲茲物亦不甚易矣吾聞端溪取石者
常千百夫挽縷而不能使之出或雷電晦冥失石所在
則知造物非無意於斯石也夫以其生之不易出之不
輕則其出也足以經天地而飾皇猷亦必有相之者矣
不然造物之寶是也將何爲哉作端溪石賦

伊螯極之肇判兮奠地維於四方東蘊和而清在西兮北重勁
而南燥剛曠南荒之呀裂兮胡爲而爲石之鄉蓋以潤而爲骨
兮伏陰氣而補乎陽中藏大古之雨兮雲爲石而山爲蒼鬱古
端之最高兮出衆峰而爲之綱爛柯蠹於穹漢兮扶盧南走而
昂昂歛靈傑以歸物兮賢哲泯而石彰三巖宵而如厦兮北尤
萃乎積氣之截百霆震擊於上兮海飈激射於其傍夜霜寒而
月橫窺兮白日經天而無光厓枝怪草以掩曖兮孤猿嗥而寡

鶴悲翔龍湫陰黑而襲人兮釐千歲而爲璜氣不逞而結茲石
兮故有溫栗而堅強繼羣夫而下鑿兮散鬼火於陰房神蛟奮
其牙兮螭吻孔張豐隆砰怒兮水浪浪羗不知人世之晝夜兮
比其升如昧谷之扶桑割雲紫以淋漓兮北斗隱而布行搃文
武而奪其馬肝兮淒冷血乎老萇抉鵠眼之涓涓兮尚如弔夫
稠父之亡或刻爲大皞之規兮或琢而象夫琥璋或者勢以爲
穹兮或形以爲長散竒用於天下兮舉有礪乎文章錦帆毳
匣之萬里兮進其尤良歷木天之蕩蕩兮置之玉堂清風永日
之娛人兮淨几明窓燎西掖之椽燭兮凝細氈之清香絳人之
玄以爲侶兮發之以將軍五色之芒草黃麻之六經兮施一尺
於八荒陳太平之盛典兮軼墳謨而度黃唐笑十眉之春紅兮
浮遠山其斷腸鄙西陵之故瓦兮出委麥之淒涼龍尾失色而

愈羞兮鳳唳仗而不敢翔構元氣於未有天地兮老空山而待
明昌忽奎運之昭回兮一日出而爲世祥地愛寶而克斬兮鬼
神呵而周防及斯世而不自用兮將何以爲造化之常亂曰五
色補天精竄南兮數千萬年一見於人間兮龍馬奮 河圖還
兮

歌風臺

辭有發於慷慨兮讀之千載而猶壯迹有淪於湮微兮覽之千
載而猶悲况荒烟野草僅足以泯英雄之迹而未足以泯其志
朔風枯木不足以繼激烈之志而猶足以想其竒予嘗遡呂梁
望黃樓艤舟乎泗水之汭弔古乎義帝之域想拔山者爲百夫
之雄而挾義者有蓋世之勳方喟然而未已客有諗予曰徐北
爲留又北爲豐又東北爲沛歌風有臺炎劉之興於是乎在盍

亦少游目乎予乃涉百步之洪赴六合之役至則登臨故墟俯
仰陳迹訪父老而訊之曰茲非會稽還師慷慨傷懷者耶酒酣
擊筑令兒習和者耶茲非游子故鄉魂魄猶思者耶是臺也肇
迹何年壘土誰手豈佐酒故人創之以爲湯沐之榮耶抑後世
喜事者築之以寓懷古之情耶戴白堵立對語率誣登高舒嘯
莽蒼煙蕪嗟夫三代之下得天下以正者孰有若高帝者乎而
今安在哉方其提三尺奮一呼風雲爲之改態虎兕爲之前驅
迨夫歌於斯也功臣顛沛越醢信殖豨方逸而未馘布已破而
猶逋思猛士兮晨星瞻四方兮蒿目人知其情盡乎道舊之歡
而不知其悲過乎失聲之哭雖然桑枯海塵兮其辭猶若新也
山摧石裂兮其志猶可識也啓四百年之緒業兮皆寬仁大度
之基也脫斯民於塗炭兮又豈止榮一鄉誇一時也威加海內
兮安不可以忘危也以四方之爲憂兮又豈兒女之所悲也彼
沐猴之晝綉兮曾何足以與於斯也

聞鶯

惟大初之賦物兮何萬類之殊能草與木之多態兮固塊然而
無情鱗與介之擾擾兮或有情而無聲蛙蚓濁而強聒兮蛭蝮
哽而悲鳴雀喧夫朝日之暎兮猿哀夫晨霜之清夫固有厭而
棄去兮亦有感而難爲聽咸機籟之不能自已兮孰能槩之以
悅心求衆聲之最和兮竊獨喜夫倉庚于時夏日逾求揚陰彌
堤山園賸潤堪熟交齊樂天宇之肇霽襟野雉而羣飛長廊綠
戶踈簾四垂方書倦而進茶乃攄几而拄頤忽有聲之啾啾復
綿綿而若隨感流轉之如園使予衷之倏怡於是思求友於周
雅懷好音於衛詩顧謂童子曰汝豈識之耶其喜而揚者宴賓

之鼓簧也其瀏而清者升仙之吹笙也其紆徐而有餘者魏工之歌纍珠也其足樂夫人之情者韓娥之回曼聲也凡厥有生同役於氣茲豈離於羽族獨其聲之迥異豈中心之有嘉故語言之清粹將前身之麟鳳長無憾於天地幸及時而爲聲資吾儕之詠戲固前脩之可憐終見貸於俎味諒翱翔於山林誠焉識於淪棄作斯文以爲賞庶足表於儔類

芳草

策予馬於曠垠兮澹旭日之暄霽爰浮游以蹇芳兮渺沙樹乎雲之際荒畹憂而眎兮蘭猗猗兮此何地攬長洲之積蔭兮紉峭嶼之崇蕙稅馳軼而悵悵兮芬霏霏兮龍轡誠樂游以忘歸兮耿中情之所寄羌王孫之翠幃兮啾燕趙之絲吹陳金犧與瓊爵兮理清曲於鬢髻傾良辰以行樂兮一日而盡夫百卉

涉朝雲與銀浦兮夕弄暉兮瓊田指幽谷之寶玦兮橫芊綿之青鈿紛擷掇以盈襜兮咸競秀而鬪妍忱蘭芷之不足以爲芳兮獨有取乎康樂之髯蕭燎焚以祀帝兮艾朝進而襟佩莽玉鈎之青合兮承朝露於輦悅蹇連昌之金輔兮 落落而薦黛彼胡脩而自致兮此獨與世而偈背同托根於天地兮終薰猶之何在耿六合之流從兮誠若異夫憎愛胡不變易以取好兮猶自恃而焉待續紛紛以雜蹂兮曠千古而誰采豈無人而不芳兮獨惕惕以自瑞 不昧兮雖排側其孰悔嗟孔聖之援琴兮撫幽幽兮一傷惟屈子之好脩兮襲之以爲佩縗旣聖賢之知心兮又何必求乎舉世之知也雖造化之若無所別兮未必醜好之果可以欺也幸年華之未暮兮尚可克乎佩帟誠人間之不合兮吾將翹乎清都而薦之

瑞蓮

遡青原而西鶯躡北郭之十里橫溪漫漫重阜伏起層軒危榭東縵西峙吾伊出竹行者爲喜問其間之何人知夫子之洵美萬山拄頰堂有流水播播其渠濺濺其沚衆芳統而成宮羣碧葺以爲廡當炎雲之散漫走峻碧之赤熿黃塵漲於門衢玄閣隔以尺咫忽芙蕖之效祥葩一本而並蒂蠹萬花之如雲何此美之獨異於是耆幼羣觀賓游聚詣飛杯賞勝援筆賦瑞記同幹於天泉歌合歡於西內羌藍田之連璧胡驟獲於不藝豈仙人之雙盤猶抗立於千歲秦環不解豐劔同氣高疑聯冠俯若駢袂相向如揖相依如醉顏陽亞影輕雨對淚烟墩增妍露豎助媚乃若暎色在樹清風被蘭娟擢秀以並潔屹競色而兩難泫袖唾以相眩失增成之紈班此其態也而未離乎塵間零露

試玉涼月流九澹同心之莽莽落連佩之珊珊渺所思兮湘水望蒼梧而不還此其意也而未足以窮造化之端嗟夫太和之在古今常易類而難借睨水火之異質企參辰而無涯偶不足以勝竒迨其遇而非儕遡重華之濬美睠庠亭之可懷怨乘舟之秋風歌不容其漢淮丘與軻兮不並周與召兮猶難偕紛是卉之何情忱矯薄而愧垂同光和羲比縶夷齊秀出玄朗芳壓雲機木連理而讓瑞禾同穎而避祺鍾衆美於一榦合二妙而無倪撫六合之曠垠胡君字之若私念禎異之有兆若春蒸而雲滋彼智者之未覲每托物而先知根盤盤以信厚葩采采而書詩倚庭柱而揮塵傲俗子以厥兒持紫蓬萊泛紅昆池梯太華之萬仞送水天之千枝暖此和於天地麥兩秀而九芝然後乘太乙之舟踞千載之龜酌大湖之酒而歌先生之詩亦宇宙

之一奇也

記

吉安興學

今天子在祚務欲以教化作新斯民詔書每下必首及擇守令勉學校甚盛意也廼至正三年秋燕山高侯志自懷慶移守廬陵既下車祇承德命以學校爲先務凡所以育材成化者朝夕究心焉先是廬陵後學多事章句記誦之習或經旨未明躬行未粹者有之公進而誨之曰爲學之道讀書明義理脩身積實踐以爲正人君子之歸若但飾文華徼利達非聖賢意也乃與職訓者講論爲學之次第使八歲入小學十五入大學者皆卓然爲古人之規程繇是士洗濯琢磨始彬彬然知慕三代之風他日又進其老宿而謂之曰朝廷養貧寒老病之士亦謂其有

道有學耳若但以其年無擇於市井執技有過不爲士所齒者豈上意哉繇是士稍稍自引退而老宿無不知廉耻者先是廟學禮儀苟簡典禮者不取於生員別設禮生禮生專引贊進退而不知學生員專講貫習誦而不知禮公曰本末一貫柰何舉體遺用舉用遺體哉革禮生而生員無不閑於禮者先是府史小吏多不務學公進而謂之曰汝曹能知學始可大用今惟事刀筆苟薄利特民之蠹也使之朔望聽講與諸生相問難選其才者以次升縣州府吏繇是六曹兩廡弦誦相聞吏始知進爲士不以吏自限先是廟學錢糧雖多府曹專役任錢糧之科州縣則吏胥移易侵貸上下表裏爲弊歲不給用公革府曹專任者責舊逋嚴新徵而倉廩以實講堂舊扁振文公復取三代立學大義增揭明倫二字其前作宮墻脩杏壇新儀門立課習飲

膳定規着于石使後之典教化者恪有所守繇是四方聞其風
深山窮谷之士多峩纓鼓篋而來若徐滕淮揚江浙廣海暨色
目公卿之子弟爲員積百二十有奇講誦徹旦至正四年應鄉
試者五十有奇學外講切慕道成材而去者不可勝數君子謂
廬陵學者道德明秀之盛自宋慶曆歐陽公作學記以來殆未
始過此若漢唐則必無也夫所謂興學棟宇之高明戶庭之夷
敞其小者也人人以儒自飾以士君子自勉其大者也博聞強
記締章繪句下筆如春濤瑞錦學之末也少者日勉於孝弟禮
節長者日脩乎仁義忠信以進乎脩己治人之方則學之本也
公之興學不徒事其小末而務其大本非知道者未易與言也
漢言文翁興學而漢史所載不過載其文風之盛至於德行則
一語不及如公之知本者難矣公之爲政能使詞訟之繁劇者

簡賦役之偏負者平盜賊之充斥者息逋民四歸桑麻被野極
飢則講常平請賑糴盡其職救火請雨竭已力不憚勞指已俸
不吝費施於民勤矣然皆推日所講者行之則公學校之
政善政之本也傳曰君子學道則愛人非歟公事毋至孝視古
人可不愧居家不祀他神祇惟大書中字懸一室月中氣率家
人子弟拜焉又非公所講於學之本與於是教授李柱與多士
誅書公之美俾誦述其辭焉

螺川重脩馬驛

成周之制凡國埜之道有廬室候館以爲朝聘往來之宿食其
後爲置郵爲亭傳爲驛遞所繇來尚矣至國朝尤以是爲重蓋
使九州四海之廣大窮邊輔邑之遠近文書期會絡繹周流如
人之血脉貫通於一身誠有國者之要務也吉安螺川驛實當

江廣之正途駟騎之要會而館宇歲久摧撓圯漏其黜聖者漫
漶而不鮮其甃甃者沮洳而不治監郡惜都刺嘉議視篆之數
月始命葺而新之內則廳事完美堂房邃嚴櫺牖虛明軒溝靚
瑩使之處者可游可息無周單子客不授館之嘆焉外則廊廡
洞夷重門翬翼庭道隆高馬廐通敞而又前植花竹環以欄楯
使之來者下馬周旋無鄭子產門不容車之誚焉蓋能上體朝
廷優崇使臣之意故非惟俾庭館之高明雖圯填綵繪皆煥然
可觀則夫使者之過此者豈不仰而思之吾之道路之所歷一
寓一息之次無不享有國家之美意亦將圖所以報稱乎詩曰
我馬維駒六轡如濡載馳載驅周爰咨諏此古者使臣之用心
也若夫邦侯之勤於其職則後之來者尚善繼之

廬陵重脩水驛

廬陵在城之驛二馬驛附郡治之近水驛占城南之津監郡惜
都刺嘉議治事之明年仁政宣布民大和悅陽張陰弛百廢畢
興於是二驛先後俱葺而水驛圯傾尤多黯昧益甚乃拓隘以
寬易腐以勁飾舊以新覆瓦之剝者飭之甃甃之陷者隆之圯
鏤繪黝粲然軼於始創彩舟畫舫聯布彌江使客之過者與宦
遊之觀者咸美而嘆焉則監郡之克舉其職善於其政可觀已
是驛在先宋名蒼然亭國朝屢改屢闢而不廢其名者存舊也
今憑欄而觀之大江東下萬山橫陳草樹瑃瓏於洲渚之間風
颿縹渺於煙靄之外蓋昔之揚舫而上下維舟而憇息者多矣
而能如羊叔子不與登峴山者俱湮滅無聞其幾何人哉余聞
古人所過之地必思其地文獻名節之勝遊西河者懷卜子夏
之風望隆中者想諸葛孔明之德則天下之山川皆進德之助

也然則使者之坐是亭而得於眺覽之美其必有所思乎此聖朝之所以望於其臣子者也若特視此爲一飲食一止宿之寓諸君子豈其然乎

二程先生祠堂

聖人開天地不言之秘賢人開聖人未發之蘊是皆神化之所蓄至理之所待天之所以扶持乎三極綱維乎百代也故其人或曠世而一見或接迹而相承或出於一家比境之間或合於殊鄉異域之外非天下人心之所能預擬者也自伏羲得河圖畫八卦曠千有餘年而文王周公闡之自大禹悟洛書發九疇亦曠千有餘年而箕子武王明之自夫子會河圖洛書之妙集六經羣言之成又百有餘年而孟子繼之又曠千有餘年而周子二程子起於一時凡圖書之絕學孔孟之遺言遂大明而無

餘蘊嗚呼是數聖賢之作時之或久或速地之或遠或近皆天地之數與聖賢之心默相扶於冥漠之表天地能啓聖賢之生聖賢能續斯道之命然天地能知數之所以啓聖賢不能知數之所以生是聖賢不能知人豈能預擬哉且文章之與理學本同一源自孟子未有分也漢唐以來文章盛而理學泯至宋初文章復大盛微周程理學亦泯矣謂周程不闕天地之數不可也然二程之學始於周子使二程子師周子由太中公使太中公得以使二子從周子自尉廬陵遷虔攝倅南安始謂天地若無意焉亦不可也於是宋嘉興間廬陵江萬里來守吉遂推明二程從周子由吉先之乃創鷺洲書院祀二程及太中公周子焉後十七年衡陽陳斗南來尉廬陵又推明吉之祠大中二程子是矣未若廬陵尉廳祠之尤爲親切乃復建祠宇尉廳然祠隘

而旋獎皇元後至元丙子縣尉李灝復作祠祠益隘又即毀像寄他祠垢穢滋甚至正元年古魏沈褒來爲尉慨然嘆之遂白監郡愔都刺闢地於尉廳之右構堂三間前環夷庭傍列齋舍高明䟽敞祭有餘地誦有餘屋可謂盛矣按二程子實生黃之黃陂尉廨而黃州不知祀二程太守李說始爲祠紫陽先生以爲黃州諫則黃陂尉廨不祀太中可知聞其所謂思賢堂者皆委廢不治而吾廬陵祠若此豈非官政之善而風俗之美歟沈尉固可書也助其成者蕭文孫憲孫亦可書矣

吉安重修三皇殿

自古有天下者莫不以醫藥濟人爲重然未有使醫廟三皇若儒廟孔子者醫廟皇自國朝始洪惟累聖欲胥納天下於仁壽可見已按史記所言三皇不同而帝王代紀以伏羲神農黃帝

爲三皇歷代從之尚論三聖人功德之大與天地同流其陰陽醫藥開示萬世特一事耳仁者見之謂之仁聖朝仁天下之心重見三聖人仁天下之心於醫藥故亦廟三聖人於醫藥而非以是槩之也就其仁天下者而論使民有壽康而無疵厲有欣愉而無呻吟龐眉皓首不見期功之戚四海九州不逢病弱之人是則三聖人之心也我朝列聖乃與三聖人此心合於萬世之上民之得生於今日何其幸哉吉安曩因廬陵舊治爲廟歲久圯壞日甚監郡愔都刺嘉議始至旣謁廟顧瞻內外喟然嘆曰三聖人之大如此而廟弗稱豈聖朝尊祀之意歟厥明年二月首議脩葺自內殿達外門自左廡達內祀自神之所棲達人之所息柱之撓者易甍之折者完楠櫨瓦甍增密益新墻壁塗砌甃嚴圻潔丹堊素繪整翼煥明而又自三聖人而下四配十

哲像塑顯昂加美舊觀於是人心咸共贊頌蓋聖天子壽民之美意必牧民者有以體而行之今監郡發施善政既已大蘇民瘼又憂民之疾病而崇其醫藥之本其布朝廷之仁至矣詩曰豈弟君子民之父母侯其有焉

悠然堂

詎吉文四十里有墟市且數千竈曰虎溪蕭氏世居焉在宋多貢于鄉升于學決科于庭者至國朝盛大未替前至元丙戌丁亥間余客溪上於是蕭氏諸老曰獻可如山如翰皆在弟子多讀書知名賓客類四方之選其後既別不常往來仍改至元之六年庚辰余既年七十三矣復至溪上客如山孫叔先叔姪者數日則當時諸老與所嘗識皆無在者獨溪山衢巷池園竹樹大約猶可一二記憶從先與余循所居東邊之後圃攀覽花木

從隘達寬有堂翼然中爲奧室像卦爲爐外爲夷亭可坐二十客面有峰曰南山故取陶詩扁之曰悠然蓋江西儒學提舉柳公道傳所書也從先舉酒相屬曰先生其爲我記之余復於君曰極天地間富貴之娛意氣之盛其樂舉不如此心曾無累悠然會意之爲適計淵明賦詩之日向之仕於州縣其齟齬摧折足以拂膺而短氣者何限亦既曠然而釋於心矣凡晉宋間之興廢成敗可以感奮而驚愕者何限亦既怡然而安於天下矣歲時耕稼讀書飲酒自放於得失窮通之外者已久采菊之次悠然見山此其心豈有一毫世累哉吾嘗謂其此雖其族祖之鎮長沙夢天門與其同時雄才壯氣豪傑燕於戲馬之臺者舉不能知之夫天下至清莫如山然心有所累則不能見今君才足酬物故不踰躓子能應門故益優游仕宦進取不足介其念寵

辱貧富不能嬰其懷其悠然獨得者在心而不盡在於山也殆與淵明相望千載有不約而同者矣余聞君將復新是堂雖老矣其或尚能再至而爲君賦焉

虛緣

余友王君有孚種學績文有才氣志行晚未有子或負以後又不自得於心於是曠然推之達取莊子語名虛緣衆聞而疑之曰命於兩間而人者謂其父子兄弟骨肉親故也聖人所盡心焉而虛之可乎余笑曰緣非聖人之所言聖人之所言者非虛若緣者其倏去倏來不可搏控殆虛之尤也且託於天地者孰非緣乎而天地一太虛也日月之往來寒暑之代禪世代之遷革其去者皆不可得而繫也自有生民以來智者之所經理勇者之所馳驅其去者遠矣自其存者爲姓氏族系今之芸芸於

宇宙者寧能知其爲得姓之初者乎且今之所謂虛者豈不以其人族親寡少九十無依七十未娶與自擠於溝壑者其人固不可知矣而親戚之大小孫之盛若彭晡之數百郭子儀之問安頷應李遷哲之披簿閱名鳴鍾列第第宅千里賓客童僕總麻慶弔踈者密遠者合聚會而固結者豈非一時之所謂緣耶而亦不可知矣故緣之在人存者爲實去者爲虛方其存也親者實也而踈者亦實也及其去也則豈惟踈者虛而親者亦虛矣又自其去者言之莫親於吾父吾子而癢痾疾痛喜怒哀樂有不能盡通者莫親於吾身頭有瘍也而呻膚受譖也而惕然而刃吾爪而不知斷吾髮而不動髮與爪未離吾身而疾痛已不及豈非以其處吾身之未有去我之漸乎是去我者虛之始也吾身與天地俱運而附於吾身者不自知其去我也推是而

降爲吾子吾孫其去我者愈遠吾安能知之亦安能保其虛哉
嗟乎人亦孰不欲有父子恩愛之樂而不能有者緣也有之而
不能不虛者化也然則虛則虛矣而彼方以爲實者亦虛也雖
槩謂緣之爲虛可也從是而論古今何往非虛獨天者實耳吾
父子兄弟之天以爲實其離合去來莫之爲而爲者獨柰何哉
於是有孚欣然曰是足以言吾虛書以爲記

吾峰

廬陵城西北可三舍有崇岡墟井所聚高氏世居焉詩書之澤
益以盛大所居前後兩峰對峙尤美者前峰因蒙高氏姓以稱
則高氏之著於茲土者久矣高氏之秀者有隱君子曰方至闢
齋於兩峰之間扁曰峯間旣自爲記復念是峰蒙其姓故又號
吾峯嗟夫天地之山多矣何所獨無居人固有置之以爲已有

移之以爲子孫私者而百年之間陵遷谷變欲問故老以姓氏
隣曲而不可得而是家之姓乃與山相爲無窮隱然欲與傳巖
嚴陵謝墩相並於千載非德足以重之何能至是耶蓋天下之
物有心於有之者未必爲我有無心於有者物常自附君何嘗
有心於是峯哉而是峯自託吾姓以傳則亦莫之爲而爲也佳
時暇日君與兄弟賓友燕坐其中焚香啜茶舉酒相屬煙雲之
縹緲未嘗招而貯也而朝光暮色自獻於窓牖幽花野樹璵璠
秀美本無與於吾事而舒竒生香當几案襲書袂而不可拒風
月之變態鳥獸之好音于喁高潔啁啾上下無不足以供是齋
之娛悅則何必爲吾有而亦孰非吾有也且人之於物雖日與
之周旋者可以爲吾有達官貴人高車千騎早朝晚歸計其家
某丘某水某樹未嘗得一在目若是者又何可強名爲吾有哉

君無心足以有是峰隱處足以樂是峯菴之而曰吾有不得而辭者矣韓退之歌盤谷曰誰爭子所而又欲膏車秣馬從之于盤有羨其樂也余老矣尚能爲君登岩冕覽寥迥以賦乎山中之樂

秋江亭

古文之南百里有市曰白沙大族張氏世居之宋嘉熙四年有舉于鄉者曰舜申樂善好施秘書歐陽先生嘗叙其事以告丞相江文忠公數年來過客稱文先不置則其曾孫也文先嗜學工詩文喜賓客其所居面大江背小溪有山曰鳳凰曰張華聳秀而環映於左右文先臨溪作亭扁曰秋江蓋四時之景無不可樂而獨有取於秋者以其清也涼風初厲草樹蕭瑟天高地迥千里一碧登斯亭也心與之俱曠及夫霜降水落洲渚橫陳

波禽沙鷗孤鳴交飛落葉在於几案寒花被乎蘭楯君領客其間舉觴而相屬援筆同賦其樂非可以俗槩也夫天地清高溫和厚之氣本未易以並得今君處至足之地酬酢無虛日而雅懷逸致常出事物之外推是以往雖游渚而當大變看山而措劇務何以加此豈非不同於人者必有得於天耶蓋歐陽先生之言曰舜申家裕而喜恤鄉人之歉歲以錢三百萬易粟藏之次歲出而取元值一錢不增率以爲常以是鄉人無飢且曰吾澤未能遍克而廣之在我後之人今君旣四世而享有其福豈偶然哉嗟夫一亭之作本非所難而可以見天道觀人事客之至於斯者一舉目而舜申之德在焉文先之所以清者在焉余又聞文先將積義廩勸義學以廣其先志則是亭之觀益遠矣文先名文秋江其所自號

勤成堂

天道之運行久而後成其功地道之資物久而後成其才人生之種德亦必久而後食其報蓋必有不息之功而後有可必之報太史公曰百年之計種之以德豈徒待之而已必有滋培長養之者廬陵王氏居敬以碩學雅德師表一鄉有德於人而不自知其孫成德積學礪行取知公卿曩貴溪縣尹文公取蘇長公銘三槐語名其堂曰勤成今廣東元帥王公爲書其扁成德請記於余余嘉其志而猶慮其勤之久而或疑其成之遲也則爲之言曰天下無不報之善而亦無不積之善蘇公謂魏公之業與槐俱萌意指文正之大顯繇晉公之不枉害無辜故種槐以待其成余謂晉公之顯已在漢周魏公生於未接符氏之日則其先必有種德者矣種槐在晉公之手種德在晉公之前晉

公之不害無辜封之者也非植之者其仁豈特必世乎植之勞封之又勞故成之盛余讀史見元勳偉人富貴奕世未有非其先隱德弗耀者亦秣非世濟其德者若施德於微賤之時肆情於小腆之際事貪酷而不畏乎天狗權勢而惶恤其後豈能大厥成哉蘇公以松栢之貫四時閱千歲爲天之定者人之功也傳曰天之於物栽者培之天地之仁固不能外乎種植而物之在天地間種植之功同而盛衰大小之各異則亦封培之異耳故凡使硤礮而爲沃衍牛羊不能厄斧斤不能夭崇長愛護之功爲多不然雖植何益哉今君之先世旣植之故能詩書不替然而未克大著於世封之者或未繼之也成德其善封之乎人情雖勤而未獲則怠怠則前功俱廢譬之農夫是穰是莠必有豐年成德勉之

麗澤齋

廬陵范君朝宗少居鄉慷慨有大志日與其朋游讀書爲文而又親其勝已者因其所居齋扁曰麗澤蓋深有取於大易朋友講習之道也及壯游京師客授公卿之門所交皆天下士相與講習皆唐虞三代綱常倫義禮樂詩書之大端侍書學士虞公大書麗澤齋名以勗之君博交深資朝切暮磋如是者有年於是仍改至元六年春今天子與二三大臣肇更政化擊逐權奸夜召草詔殿中君倉卒條述皆能黼黻天子所欲言暨詔下自朝廷百司庶辟四海藩輔郡國荒服莫不稽首欣忭歌頌太平贊揚聖天子之英武仁惠而君之學遂攀附以大顯君子謂君疇昔麗澤之所講習者爲不虛矣按兌卦之象兩澤相麗交相潤澤互有滋益故聖人以君子講習言之然所謂麗澤非止

兩人之謂今日友一人焉互資其益明日又友一人焉互資其益推而至於友一鄉友一國友天下而天下之賢皆吾友故士非患無友患取友之不博交不患不博患博交之非賢今天下車書萬里四方之俊彥輻湊於京師任國政則有臯夔稷契者焉論大道則有孟荀楊韓者焉峩冠而趨於廷傾蓋而談於途徃徃皆非瑣才曲士之所及則君之所以能博取乎麗澤之益者幸生天下混一時也使生而不際於盛世遊而不至於通都則居處狹而交友局見聞寡而心胃陋安能一日成天下之經濟哉吾敬君以取友之博而慶君以逢時之治而猶有望乎造道之無窮於是乎言

范君名匯字朝宗順帝至元六年惠伯頌專權自恣謀逐之夜召君草詔事見元史

山月亭

當宋南渡時廬陵宣溪王氏爲詩書大族嘗築第城西南湖橋

之近面未豐門廣衢棟甍比屬巷陌縱橫後則高崖峻絕下瞰
支江市區賈陽延亘周遭百貨交集然後大江橫陳千山對峙
王氏信臣於崖之高作亭扁之曰山月作臺扁之曰雲端名人
勝士日游其上誠齋揚文節公爲之記者是也自國朝前至元
十三年郡既內附此屋遂累易主數十年來予故人袁本厚得
而居之徹舊易新勢加雄壯而所謂山月亭雲端臺者皆重建
於其址制益於舊而扁不改余暇日固嘗登之徘徊四顧渺焉
無極隔江諸山如拜如躍磊磊若赴江而欲渡者想見寒夜月
高萬里一白乾坤之清氣沁入肌骨居是亭者晝遊而夜息何
其樂也本厚屢屬予記予念斯文之在天地間非盡無清淑之
氣然貧賤奔走往往汨沒而失之而富貴之士又沈酣於巖色
勢利不能自拔處華屋奧室重簾累幕之下而悠然遐思山間

壽齡堂

余友王君昇翁爲鄉名儒故其子孫皆明秀敏異有過常人者
其曾孫子齡方在齠齔日親近余講論余見其讀書通析強記
應事開豁有方甚奇之又十數年不見去年冬來訪則年幾二
十歲矣余觀其能比舊有加益奇之今年春以書來告曰不肖
有奉親廬州侯王公鈞溪扁壽齡堂三字寵光之幸托斯文四
世其願賜一言以記其事余交王氏久矣見其子孫壯者曰老
少者曰壯幼敏者曰聰明特達以有爲也可無一言乎吾聞人
生上壽百歲中壽八十下壽六十五福以壽爲第一豈非天之

所與爲甚不輕而人之所羨爲甚難也故壽有得之於天亦有得之於人得之於天非人力所能爲也得之於人人力實有助焉故八十九十自無疾病豐壯康武以至滿百者天也脩善不爲惡孝弟忠厚以得天之祐者人也保養其天不致剝斲其英華和粹耗凋其血氣精神者人也不好勇劫窮其心思竭其智力使優游自毓以全其性者亦人也故人之有壽世多以爲出於天而不知出於天者特少而繫於人者常多記曰古者謂年齡我百爾九十吾與爾三焉世傳周文與齡之說或以爲涉於怪其實能受大人之訓以有益於天年者即與齡也豈必減此益彼以求其天年者謂之與齡乎今子齡富於春秋而王侯乃書壽齡堂以遺之豈非愛之期之者實有樂育之心大人君子之言自有不同於衆人者與自是以後君與大父諸父均有期頤之壽而高堂夫人享有曾頌壽母之福躋其堂者皆求錫難老眉壽無有害之人其慶弘矣豈必真居桃花源飲菊潭水以爲壽哉

玄妙觀經壇買田

自有天即有帝自有人即知敬天而事帝故堯舜禹湯文武周孔之書其警戒惕畏必曰天曰帝蓋臨之在上昭然而日監於出王游衍之間者莫非是也而道家者流則又推言帝之所居玉京金闕峩峩非世可狎而又有羣仙五老驂翼乎鳳蓋鸞車以來人間又言每月二十五日周覽四方八極以察善惡邪正之辨謂之勝遊雖未可究其實然大抵皆言天威不遠顏咫尺所以起人之敬而不敢忽誘人以爲善而不敢怠也嗚呼此與唐虞三代聖人之言何異吾鄉玄妙觀有勝遊誦經壇所以禱

聖壽祈太平也有田若干石道士陳逢吉鉢積所置中爲住持者善鬻道士劉弘大集陳九齡聚資歸之然尚不給會至順辛未郡大疫死亡相屬臨川李君長翁來任郡知事意惻然憫焉與宣慰周公志仁州判蕭某儒學正阮某提點某暨諸府掾費得中統鈔七千緡有奇於玄妙觀建洞淵醮會十一朝請命于上帝以追衆災暨歲事連雨忽霽朝告之初有白鶴四浮空翔舞集殿隅朝罷乃去繇是四城疾驟愈民始知有生醮餘尚存鈔緡六百七十五適周如京宿有出質田十三石七斗爲鈔一千三百七十緡俾經壇返業以爲益知事復偏損已俸續所餘緡返之通前爲田三十九石七斗而勝遊壇浸浸可廣矣嗟夫一醮之成天之顯於民者如此謂其不日遊於人間可乎於是衆皆曰是不可以不記記田之所繇翔增所以示後使知所

守記醮之大感格所以警民使知所畏醮若無與於田田之增自醮始記田而後醮以重壇此記之所以不可已也余惟知事之設醮使民無疵癘買田經壇復使民恒有肅心雖若神道設教而其用心厚矣士君子爲善固不計天之出遊與否而天道福善則不可誣共保是因以永是壇則善之道也

佑聖觀殿宇題名

五雲佑聖觀道士蕭獨清方外之秀傑也以詩聞四方所交多公卿貴人最歲嘗過余曰佑聖之爲觀叔基宋淳祐間爲奉貞堂國朝始得請今額光澤簿劉君尚友嘗記之矣其後里大姓劉毋仇復建正殿而山門廊廡又賴衆力以完獨舊有迎客道院久未復嘗謁臨川吳公爲題辭公曰吾性不喜駢儷吾寧損資爲子倡屋成且爲子記今年二月君再過余介友人張漢英

請曰往吳公賜之倡繇是多樂助而屋以成正殿之後作一區
高出於殿扁曰山水勝處又後爲堂高明與前稱扁曰風月吟
所東西爲客館四扁曰霞棲雲卧深省号安又傍爲庵曰半死
後起元統甲戌秋仲畢是年冬四方於此乎館無不足者顧欲
吳公記之不可得矣敢以爲先生請余惟世間山水比勝槩聞
於天下者率爲神仙所廬又必有巨賢翰墨爲之發揮而後其
地益勝今君之心胃既足與茲山之山水俱勝傑棟高堂曲欄
華檻日增於昔余想君焚香對客燕坐其間大江橫陳萬山羅
立煙濤之浩渺晴雨之變態與夫汀花沙樹風帆水翼參差上
下皆可娛悅或朗吟弄月於冠悠二潭之濱或吹笙騎鶴驂候
羣仙於許卓諸峯之外其勝致固不可悉數然向使吳公遂爲
之記其勝致又豈特如是觀哉顧余陳人猥當斯筆豈獨媿其

山水君復請曰夫使茲山遂爲世間勝處而四方施與之姓名
遂相爲不朽不可以無述先生幸無多讓嗚呼推君之心千載
猶一日也後之居茲山者尚克念之君號獨清先後相其後者
其徒張永年蕭素也

靈巖寺重脩藏殿

踰吉文而南且百里有市曰白沙又踰市不一里有寺曰靈巖
四山迴合巨石壁立相傳寺前舊爲長江一夕龍挾江去以讓
乎寺地勢嶮峭如奮如躍往往與元氣輻輳故神仙宅之多靈
異古跡其寺之稍從而深自宋建隆庚申始其寺之有藏殿自
宋宣和癸卯始藏殿既久且圯有里善士張君見翁倡衆力新
之然所建法輪未盡其制故藏常亦不克運見翁且病呼其子
文行語之曰汝必成吾志文行受命不敢忘至元後庚辰遂捐

已貨徹舊更剝鏤刻之繁既殫精以爲巧綵繪之煥不愛力以爲美蓋踰年而功始畢鄉閭贊嘆四境聚觀所以彰佛道者愈備而見翁之所未克成者成矣夫聖人之教莫大於孝而人子之孝尤重於繼志故論其所施雖浮屠之宮推其用心則聖人之教也古之君子觀人之道不止於一端今文行兄弟所以承先志者於浮屠之宮尚致其力則其於室家堂構之間吾儒之所謂脩齊治平事之所當爲志之所必繼者可知已然是藏之成吾固有以見文行兄弟之善繼而又以見浮屠氏之能自治其事焉蓋非善勸求善營具不及是於是若特若智亦可書也

桂隱文集卷一終

桂隱文集卷二

序

送僉事李彥古赴南臺都事

今天子初改至元之三年江西僉憲雲中李公分司巡訪吉霸南安攬轡未至先聲肅然如范孟博既歷三郡水槩自持如揚伯起民歌頌載道時上猶邑民皆病瘡痍民有夢厲鬼相戒曰李公來吾屬當去矣病遂安未幾被命除江南行御史臺都事君子曰善可爲也李公脩身善其政上下幽明舉知之夫莫難齊者斯人之議今數千里頌美如一公之孚於民者爲何如九重簡注式畀要職雖勸臣之道於上爲得而亦豈非公叡實著聞不可掩乎故曰善可爲也則又曰臺比憲所蒞彌廣臺都事比監察所職彌衆公前監察西臺莫重矣而未總乎一臺之機

務也。食憲江西又重矣，而不得悉問乎江南之民瘼也。然而上下幽明已如此，今蒞彌廣，職彌衆，則其取應又當何如？韓退之贈李君房別曰：失之此足愛，惜得之彼爲歡。忻今公之擢其庇覆吾民，益大誰獨無歡忻乎？詵灌園郭門南北之士大夫有意於我者，皆不敢妄有所譽，獨於公不能忘乎。頌於是乎書。

送蕭克有偕曾從吾赴瑞州永平簿

蕭君克有以世家魁傑之姿，往官渠陽。曾君從吾以士林環秀之彥，實偕其行。其志好之同，議論之合，真所謂魚川沫而鳥雲飛也。古之君子，其處也必觀其所與居，其出也必觀其所與遊。不可附而附焉，可以知其客不可致而致焉，可以知其主。故學不失其所以講政，不失其所以謀趨，不失其所以歸反。是而曰志好同，議論合，吾不知其可矣。若二君之相視，莫逆其君子之

所望。歟！太史公經行天下，遂有史記。今航洞庭，撫赤壁，登黃鶴都邑，室屋足以壯其氣，魚龍濤浪足以激其懷。風帆煙樹足以駭其觀，亦竒絕矣。然豪商巨賈歲歲之過，覽不一能一言者，蓋鮮若二君之登高能賦，其山川之所待與。子夏曰：學而優則仕，仕而優則學。今仕者固優於學矣，學而未仕者，蓋所以優於仕矣。渠陽地僻而事簡，魏了翁之所以益樹千載也。簿君政事之暇，相從覽領，弭節乎羣芳六藝之林，振策乎道德仁義之苑，其亦足樂乎。余老矣，間嘗讀書，二君之警發是賴，故尤惜其別而甚。願其別之有成於其行，起而祝曰：使簿君之政軼其父兄流高譽於朝，遂入爲名公卿君之光也。使君亦蓄其所學，克其華而大其實，遂建侯萬里外，簿君之志也。語松茂而栢悅，雖子之衰懶倦遊者，亦將與有願幸焉。遂書以爲贈。

送賀元忠赴越州廟山巡檢

禾川賀君元忠爲曲阜學正既滿選曹以新例授浙東餘姚縣廟山巡檢當戍艤舟郡蒼然亭下士友咸追餞或曰賀君前後二除亦異矣曲阜之墟河山蒼莽市邑蕭條麥短禾秀黃埃千里雖強壯不能爲情及入禮廟則聖賢衣冠肅穆如生鼓鍾鏗錫珮履雍容諸生興伏百拜何其文也會稽之陰溪明山碧舟航如畫士女填會晝夜歌舞雖正士不能不移而又長戟勁弩傍趨前擁短衣上馬鳴柝而巡亭檄何其武也二除可謂異矣賀君其變於異乎余曰不然朝廷之用人不一其職而一其才君子之仕不一其地而一其德選曹以是處賀君誠知人矣吾嘗聞古之有爲者處寂淡而不以爲憂居紛華而不以爲悅安禮律而不以爲嚴勤師教而不以爲勞賀君性美而才達氣純

而質堅吾知其視會稽如曲阜視巡檢而不異於庠序矣又克而上之其地益殊其職益不同賀君其有異乎若情與境遷器與事局豈大丈夫之有爲者哉於是衆皆悅俱起而頌曰浙東西禮義之邦大丈夫士之仕宦與潛處者皆宗程朱而慕歐曾賀君其不以居於武而踈於見矣錢塘大省所駐憲若帥星羅而碁布其位皆處周呂而出方召賀君其不以習於文而怠於事矣他日有升大府者必賀君也則書以爲贈行序

送揚生廷章往旌德

士之不相知者或同室而異趣及其相慕尚則雖越千里而不以爲遠是心豈可強哉同郡劉君粹裏以雄文高科爲旌德縣尹廷章將往從之告別於余曰願請所以教嗟乎生亦好學也已生之家君固宿於學四方之來從者戶外屨滿吾聞生匠氏

之圃者不求規於他地生造父之家者不學御於他人生胡旌德之之也故曰生亦好學也已非旌德之賢不能來生之學非生之好學不能慕旌德之賢雖然生之出必念夫吾辭親而來也歸必有以慰其心旌德之見生必念其離親戚涉江濤而來也其必發樞啓鑰無所吝於生矣余與旌德友也久知之也深其可慕效者豈獨文章哉生必勉之

送蕭煥有入京

廬陵蕭君煥有積學有才氣語當時政事如良醫病証具有方治評古今人物如老吏讞牘一不可逃情弱冠遊京師以救荒三策知名教挑源克振其職爲照磨臨江興國皆理寃澤物戢暴媿貪郡人爲碑頌其政以是稱爲良材爲偉器豈過論哉然十餘年展轉求品官以限年勞未獲升用君又恬於進取日從

賓遊賦詩論文以爲樂乃今始問道京師謁改選舟過臨江郡士友咸遮餞或謂予曰子之爲文辭於蕭所不媿嗚呼余言非教何所無媿也

送艾用濟歸河南就鄉試

艾實元暉河南士之秀者也去年來從黃君希仲于廬陵郡學學媿媿日有所進六月望告別於其師友與常所往來者將歸河南就其鄉試余告之曰昔歐陽子廬陵人也學於河南以成大儒進而軼於孟荀揚韓之列廬陵山川之氣有以毓之歟河南士君子之行有以勗之歟今生生於河南學於廬陵河南在中州其山川之氣固不劣於廬陵矣廬陵士君子之學問又豈劣於河南哉生所毓所勗之地不劣於歐陽子則其學當優於歐陽子矣語曰顏何人也希之則是然今余謂生之必可希乎

歐陽子人或謂余之易於言也余且謂生之不可希乎歐陽子
是余之厚誣生也生勉之哉若乃今之科第則學不幾于歐陽
子之彷彿者或庶幾矣不必爲生勉

送達子通

士大夫居官有善政能愛民輕富貴重名節審去就不爲苟合
天下之奇士也蒙古達理雅飭字子通曾祖官中書丞燕南廉
使子通以其祖世賞監濠州鍾離縣暨監同城縣暨監南康縣
願丁母憂不赴復監鹽城縣至正三年遷監集慶路江寧縣至
官理寬平訟奸吏望風歛避府檄浚陰山河道計用工二十八
萬六百子通建言開河道本以爲民事或不時反爲民害歲蝗
旱民飢且死而脩河何爲急疑其事不行上官怒子通復力請
罷上官益怒子通曰吾可不爲官不可徇上以厲民即日托以

遷莖拂袖去嗟夫士不能以名節自高變化其初復阿上而苟
合文過而求容皆不能舍富貴耳若漢汲黯蕭望之東漢黨錮
諸賢與宋之不肯奉青苗法者皆可謂特立不羣之士矣蓋古
今所鮮見也且子通例不必丁憂而願丁憂其重天理輕人爵
能爲人所不能爲已見於此及受檄浚河縱屬民非已罪然必
不可寧棄官去是愛民重於愛身愛忠直重於愛爵位他日立
大庭任大事豈肯徇時以謀身哉吾故曰天下之奇士也子通
所至方且爲詩歌暢懷賦景飲酒談笑曾無芥蒂於心者其度
量氣節可觀矣吾黨既爲詩以美之而余爲叙云

送歐陽可玉

自宋科廢而遊士多自延祐科復而遊士少數年科暫廢而遊
士復起矣蓋士負其才氣必欲見用於世不用於科則欲用於

遊此人情之所同廬陵歐陽德器可玉鄉俊士也告余將遠遊
余問其所志則獨不然其言曰士之脩於身者爲道德見於外
者爲文學斯四者固皆可以自求而亦當有取於人古之君子
非不可閉門息交以成其善而或從師取友於天下良有以也
今之王公大人居則高堂重階狴犴守閤出則崇牙大纛武夫
千羣介馬填擁數十里吾固未易見也而以道德文章重海內
者其人差易見也往年嘗拜虞公於家溫乎其相接藹乎其相
親然自虞公外未多識也今余復欲涉洪都道武昌踏金陵撫
閩洛以造京師庶幾所欲見者咸得見焉其足有以翼余之進
而策予之不逮也余聞而異之蓋士志於用世者類苟取富貴
而已其志於道德文學者何人哉以道德文學求天下其人有
不進子而見者乎吾將見子盡識天下道德文學之人而二者

亦將在子矣行矣無倦

送延平楊上人歸閩求師

自師道不見於聖賢之教而相師莫盛於老佛而尤莫甚於佛
氏其徒至歷辛苦甘寂寞絕生人天常之樂受垢衣餘食之汗
洒掃薪水之是給馳叱棒箠之不辭近者率十數年久者或度
一世噫其事師亦嚴矣而究其所得或謂聞一語而悟因一事
而解卒墮於鴻濛混濛非世所共知然自古迄今求是教者未
有已也若聖賢之所以教則即乎人倫日用飲食之常道其事
不必如其賤其日不必如其久而所得者其綱常爲君臣
父子其治化爲禮樂文章其道爲三皇帝王之公其書爲九經
史傳之實本倫而未舉體立而用行與天地同其大與日月同
其明與山川嶽瀆同其流峙皦然皆世之所共喻然而去古既

遠士之知師道者何鮮哉故唐韓柳氏皆著書極言士之耻於相師以爲斯道之大病而卒莫能正也延平楊上人自少走天下遍求其所謂師至豫章禮善言佛者絕學留八年而後渡淮漢遊南京入西川上蛾眉拜古所謂普賢希其徒若干年航洞庭住君山參善言佛者空菴僧歷南嶽七十二峰下湘潭謁善言佛者無方僧各有年數今將自廬陵復蹈東吳歸閩益求其可師者師焉噫其求師之勤不少於昔人矣上人生龜山之鄉爲龜山之裔聰明而多藝苟以是心而慕其祖濬乎程氏之流泊乎孔氏之渚不難也而溺乎彼不能反乎此既可悼其途之失矣而吾黨士與遊者皆爲詩歌以贈之而無一人感上人之勤以自媿其求道之不敏者可見儒者之自棄而不能有所勉激也故因上人謁余言而爲是說庶幾或者有感焉

送張子靜遊武昌

張子靜舊從中齋鄧先生之季子元宏遊元宏處鄉校以雋聞名也一日來告曰跼躄丘里間久矣誓將自西山而武昌以勗吾學焉余謂之曰古之遊者志學問而進取之兼得後之遊者志進取而學問之不知今子過洞庭覩其浩洋之勢浮東南而浸日月風濤之洶壯魚龍之出沒則足以充其氣撫赤壁之斷岸黃鶴之崔嵬思曹劉孫氏之百戰則足以考其得失而慕其人物之英傑尋寒溪之梅問窪尊之故迹則敬其剛介之如存酌芳洲之草指鸚鵡之峩峩則傷其辭華之美而不自愛凡山川都邑之得於目何往而非學若過之而不知日夕與俱而不能賦則與舟師估客何異雖遊何取子之遊以學言可尚矣爲我訪顏氏之巷而觀於孔山峨高冠鬚髮如雪者子拜而師之則學

廣矣且告之曰使公留廬陵吾不及此公得無鄉國之情乎

贈張漢鼎赴嶺南

當趙宋南渡時北方士大夫皆隨駕以渡散處州郡若常德太守亳州張允蹈之居廬陵其一也子孫繼世盛大今又二百數十年吾所與遊者希武希武子漢英尤秀敏多文漢鼎頡頏競爽疏通能達於事十年前嘗以儒試吏于嶺南適廣寇蜂起漢鼎奮謀猷飛書檄供億軍需揣摩事會動中機宜驅馳戎馬間親俘馘劇寇七人然不自伐帥府嘉其才錄其年勞保申爲府奏差以省親留家久之至正五年冬十月遂辭親出門余贈以言曰子之祖以高科與學仕宋爲大官今子復以才能發身帥府雖未足以盡子之蘊而得其途矣余聞元戎悅禮樂敦詩書好賢下士子執鞭從之猶挾美玉而遊於卞和之門也傳曰公

侯之子孫必復其始子益勉之余雖老尚拭目焉

贈委行所遊五羊

士之遊於四方所樂者在得其所從苟得其從雖道里之遠舟車之勞有所不計何則樂乎此忘乎彼也故古人有千里而命駕比屋而相違誠以其樂與否耳吉文之英稱於州里有婁氏兄弟曰存所行所強學績文既不遠數千里從別駕僕公于金陵行所才學駁駁欲軼其兄州里之聘以淑其子弟者踵至然志所不樂不顧也往年遊淮南從平章敬公威卿走杭浙從憲使鄧公善之道同志合如埴唱如箎和今又偕其兄從憲僉僕公於五羊非歸其勢也誠有樂乎其人也婁氏兄弟之於僕公也其偶然乎哉非僕公之德不足以致二婁之來非二婁之才不足以爲僕公之客孟子曰孟獻子有友五人無獻子之家者

也五人者亦有獻子之家則獻子不與之友矣夫獻子之欲友此五人者友其道也五人者若之何而不以道自重哉憲僉僕公學博而才宏氣剛而德清其所刺舉雖公卿無所避婁君之所以友之者宜何如亦曰道而已語曰太山不讓土壤故能成其大憲僉公今日以道治數十州他日以道輔天下吾知不忽乎婁公之所友者矣

贈邵以和

邵君明卿以清異俊拔之資歷府掾有年三子皆穎出如其父其仲子以和肄業于學校游余門密知其敏於學而考古之力勤也諧於俗而應世之道善也古人取人貴有體有用講之禮樂而不能通試之灑掃應對而不能習體何有哉問之錢穀而不能知資之甲兵而不能帥用何有哉若以和庶幾兼之矣狄山素爲儒武帝問其能守一郡曰不能問其能乘一障強對曰能而卒以取窮爲儒至於如此固矣倪寬混混羣吏中不見異於人及上有所問他吏不能對寬獨能對稱上意爲吏獨不當如是乎以和爲儒久以府掾試吏於文江體用兼優其在今日矣故於其行稱是說以贈焉

贈林可翁談地理

舊見蔡書凡前代富貴家所葬輒圖以示人曰是出某相某卿觀者歆動去年洪林可翁從空山上人來吾州親指某地當富貴某地宜貧賤尤奇爲人葬甚多其效皆欲刻期驗余因念地理術亦奇矣廝養童僕擇葬偶得所即溫飽可致馴至居高門出累騎者有之儉克尚霸屈意奉葬師設機筭謀佳穴甚者發他人塚出累世枯骨而藏其親然莫不取富貴顯融子孫昌奕

第巷白屋之士，俯馘談詩書，動輒蹈規矩，恒世世苦飢之弱，不自振。夫福善禍淫，仁者必有後天之道也。然天理常不驗而地理常顯，然者是地理可信而天理不可恃也。嗚呼！自地理之說勝而天理隱，抑天理不可恃而人始求之地理，耶！自聖賢言之天理，必可恃，然苟非信道篤而輕外物，誰能舍地而俟天哉？雖然，使求之地而不棄乎天，豈不猶愈乎吾懼夫世之求乎地而棄乎天也。故因可翁求贈言而發，是慨焉亦庶幾為莖書者之初意云爾。嗚呼！觀吾言者，亦可悵然而一嘆矣。

贈醫士王宇春

人之疾無大小，皆足以害身。醫之道無內外，皆足以活人。然惟妙於藝者能之，同郡王宇春精通諸科，文雅識道理，敏於見而不自銜，勤於人而無幾求。余嘗見其所療，多奇驗，比又身嘗試

奇不肯苟簡，一語飄乎如輕雪之度風也，冷乎如寒泉之落澗也。澹乎如古壘洗之不可雜衆器也，非有得於古歟。夏君方將膏車從其兄仲善于會稽，仲善才又高，觴詠磨礪之餘，必有如靈運、惠連之天契神悟者，自是當益工歸當以語我。

劉梅南詩

梅南名志行

劉君志行詩五言絕句古律如衣冠士，使人起敬。雖復笑諧不廢其雅，七言律其靚麗者如野橋夜月學案，霓裳聞者莫不辨其蕭散者如空山絕壩，時見幽花行者回首長短古句如春風吹潮激灑晴空，莫窺其所挾此豈獨天機學問所到亦用工然耳。至其間獨悲孤笑危睇遐思，則可見其奮於志長吟思慕高歌憂患，則可見其厚於倫。橫槊賦詩短衣射虎，則可見其通於才。君宰有民社而羸馬敝裘若一寒士焉，世之能識君心者亦

豈多哉

九日登鹿角山詩

余舊家吉水南嶺有山崢嶸如鹿兩角俗呼爲鹿角當在宋時山下有喬木數千章連抱參空陰雲蔽虧鷲鶴號集宛然深山太古意也國朝始通是鄉爲官達割馬驛所謂喬木斬伐迨盡莽爲曠土近年來或繚以長垣限以棘溝而所謂曠土又將爲果園蔬圃矣嗟夫是鄉特寬閑寂寞之濱而爲谷爲陵者如是不一則通都大邑之改化又何恠也余每歸故鄉至輒喜留滯不能去昔人所謂樂其所自生非歟至正癸未遂因度九節于此于時天氣連陰初可衣單袷八日意行飲揚君文川別墅又飲其兄吾可桂花樹下羅君宗伯宗仲邀過其家劇飲痛醉至暮乃歸衣冠駢集居人屬目余因朗誦曰九節追歡亦偶然羣

之益驗然皆非急於效以愚人蓋其言曰治病必求其源用藥必鋤其根不求其源雖治莫知其向不鋤其根雖愈必致於復且病之方至也如洪水之驟合其勢不可以遽退疏導濬滌自底于平躁者逼其勢以壅遏則勢反愈甚而功必無成蓋天下無不可治之病亦無皆速愈之病謂病爲不可治醫之過也謂病爲皆可速愈責醫之過也古之爲政者必期月三年而後功效始見若朝更化而晝視成暮立法而且求治議論之士紛紜於朝著督迫之吏旁午於郡縣安有美治哉余聞而嘆曰善哉其言治水合於禹之道其言治人合於周公孔子之用心豈徒醫云乎哉書以警夫世

郭劉二君邂逅詩

士君子遊宦萬里外忽遇故人知己握手豈不足壯志氣壯顏

色燕山劉元卿爲廬陵郡貳幕抵官之初適客省副使郭公持使節弭番於此一見盡歡如子美之遇孟雲卿應物臥之逢揚閣府傾倒談笑舉杯相屬極世間聲色勢利有不足喻其快於是秋旱方初適得甘雨天若助其喜者殆亦一時意氣之所爲也郭公賦詩一篇屬和者盈卷蓋人相遇他鄉固可喜而又爲故知尤深可喜也郭公中朝近臣劉君明時才士他日頡頏雲霄未可量此其風雲際會之一占云

夏道存詩

詩之爲體三百篇之後自李陵蘇武送別河梁至無名氏十九首曹魏六朝唐韋柳爲一家稱爲古體自漢栢梁秋風辭馴至唐李杜爲一家稱爲歌行古體非筆力遒勁高峭不能歌行非才情浩蕩雄傑不能今觀夏君道存所爲詩琢清貯澹凝幽拔

賢携酒路聯蹠茅簷老嫗扶孫語重見衣冠八十年文川和唱云有約登臨興浩然風吹襟袂舉蹠蹠先生領袖衣冠盛更醉黃花四十年遂約一日登鹿角峰至期余乃攝衣徑造其頂同遊者二十六人列首相向坐如環絲竹稍間因用東坡大華峰頭作重九天風吹艷黃花酒浩歌馳下腰帶鞢醉舞崩崖一揮手分韻余得作字約明日詩集獨缺鞞崩二字亦以避所難所諱也明日詩集同遊徵余序遂書

文江西渡楚寥廓有山削成蒼鹿角驛亭古道數百家人煙四起象虛郭我亦鹿角山中人久客歸來似遼鶴革行已稀少壯多白頭愈覺卿土樂秋天九日雲漠漠振袂凌危散腰脚大江東來忽空濶青山環走擁簾幕豁然百里指顧中南眺層城北僊閣白觴激灑照醪酒碧盤崔嵬出巖騰羌笛高

吹破落日村鼓狂鳴動虛壑谷精遁走山鬼奔樂極但愁風
雨作風雨作可止之請君勿輕動浩歌且更酌向來夢維今
安在馬臺龍山俱寂寞不如藍田把萸流芳終以文字托
鹿角山山頭石路何硤確應知後人慕羊公佳時踏破青芒
屨

龍溪曾氏族譜

族不可以無譜族有譜然後不以踈爲戚戚爲踈不以尊爲卑
卑爲尊戚踈尊卑秩然不可紊而後孝弟之心生焉若戚也而
爲踈踈也而爲戚尊也而爲卑卑也而爲尊尊卑踈戚其序已
紊孝弟之心何由而生然卑尊踈戚之序素紊者始於義不親
情不密義親情密無是病矣故明吾譜者所以使吾義親情密
也今夫父子兄弟之間寧有不義親情密也哉自再世而降至

三世四世五世而後浸有不知彼爲吾兄爲吾叔父爲吾伯父
者矣又自是而愈遠而後鬻吾之族於他人市他人之族以爲
己族者矣嗟夫使吾族譜明又安得有是病哉明吾族譜者使
吾之子孫不以吾譜鬻於他人而不市他人族以爲吾族也蘇
明允有言觀吾譜者孝弟之心亦可油然而生矣今觀龍溪曾
氏族譜慨然上有感於唐風杖杜之詩下有感於蘇氏族譜之
引於是注其族自一世再世以至於十四世十五世其派分源
別其徙其復其蕃其絕罔不存且明者其意殆欲至於百世而
未已則其勢安有戚踈尊卑之遽紊而不知有吾兄吾叔父吾
伯父者哉是故族固貴於盛譜尤貴於明族盛者有天道焉譜
明則人事之盡而已曾氏之族其可敬哉

塵外流芳集

塵外流芳集者友人蕭字有遊永菴所爲詩而羣賢和之者也
今六年矣孤峰上人編爲集而以是名之屬子序嗟夫人生無
事登高訪遠尋幽覓勝或放懷於水竹之間憇跡於禪寂之外
一生復能幾遊遊而不能賦賦而不能傳者又何限古人於
此事最是留情而一觴一詠能使人稱頌爲佳話者甚不多見
上人能集是以傳其冒中亦不凡矣倘刻之壁使後之來者摩
拂而讀之或爲一悵然也

李伯玉太素脉

歎人張子充言太素脉始於黃帝岐伯伊尹扁鵲黃石公華佗
孫思邈皆秘不傳惟陳希夷以授王朴而此術遂布於天下然
余少時見攻此者甚罕故友湜溪郭公晉能傳通之亦默不言
近年通者頗多友人李伯玉得其法於鄱陽邵明素其傳正故

其術驗古今觀人之法多矣惟近諸身爲尤切春秋公卿大夫
察人禍福於動作威儀之際一舉足一發聲一形於言無不識
其終身者至秦漢間始有論若唐舉許負亦能察人終身於一
見蓋雖不及春秋公卿大夫之神而非后世之所及惟脉則古
人僅以察病未始有以言貴賤者豈亦所謂秘而不傳者耶君
能益精之何患不知人哉雖然吾亦有自觀之道書曰作善降
之百祥作不善降之百殃夫人苟善矣雖欲辭福不可也苟不
善矣雖欲辭禍不可也使爲不善而欲求福於脉難矣噫世之
人誠能皆以是自觀則有不待君之觀也歟

蔬筍詩集

僧翠微詩不多見然每不苟作往余初觀其藁喜其彷彿帝王
蹊徑嘗進以一語今見其嗜慕益堅譬之飲食猩唇豹胎與芻

秦之悅口者皆却而不御所御者乃庾卽之淪非周顛之晚菘
文與可之燒筍蘇長公之蔓菁雖富兒之綺羅羶章者所不取
而風致乃未易及惟知味者知之翠微詩可謂得僧家之本也
然使百尺竿頭更進一步豈不愈可敬哉

彭翔雲詩

亡友彭君翔雲詩鍛鍊精確而不廢真意如幽林曉花真寂不
賞如寒機夜織神專而心苦如深山道老語言近質終有德人
深致如山醪溪菽或使富兒哂蹙而知味者獨有所領蓋蘇老
云後數十年天下無復有此文也已然詩之爲言品律固不盡
同要其同歸於佳卽葩浮而不宿於理富健而不求於味又安
得如君詩之真實可愛哉憶吾與君相從廬陵印山間君年四
十有二三余甫弱冠君第琦初則長余二歲笑談觴詠繼以講

切或臨于水或休于樹或倚戶而立或促席而論率且至夜漸
中乃散未幾君死又數年余與琦初皆纏人事而各散處既而
復隣居于城雖時相合然求如與翔雲共處時優游永日不復
得矣君死旣三十一年余與琦初皆蒼顏皓首當時親知零謝
欲盡其所與游居之地池湮臺廢莽爲畊疇鬱爲高樹白楊連
塚望之如宰如臯下馬而酒麥飯者皆非向之所執盛衰離合
之迹如此可爲重慨而琦初猶能寶藏君詩手抄示余評又可
喜也嗚呼今誰知翔雲者知者獨琦初與余耳余旣畧爲評泊
而復疏其遊從之槩至其懿行高節不爲宰物所知憐則琦初
述之已備世言詩能窮人觀於翔雲尤信

遊興善寺詩

遡塗治而南百里有源曰吉陽山水環合土壤肥沃源有寺曰

興善清泉繇後徇寺門而出琅玕亂石間如琴磬然寺僧作亭跨其上脩逕蜿蜒竹樹蒙密頗有幽意相傳南唐後主同母弟李長者著華嚴合論其中論成騎虎上升遺像固在寺之勝以此夫自拔於富貴之中而遐舉於塵垢之外固亦奇矣然亦安知非見其兄沉酣聲色國境日蹙既不欲爲微子抱祭器而去又不欲效智果易姓以爲民望故自托方外有避禍之實無去亂之名且其所爲上升安知非見其國旣歸宋懷不自安而竄匿其迹假是以神其說耶自古孤忠志士高者托神仙下者托傭保徃徃然也距寺三十里又有陳橋廟橋教後主不降城且陷死之嗚呼長者之去可謂見幾而作橋之死可謂見危授命其事乃皆在是鄉空山斷隴之間好遊者不可不知考也泰定丁卯余客塗南溪景翁張氏九月晦日訪寺作三詩景翁弟自

翁亦有詩而老友魯先生諸君子皆賜和僧宗應作卷請書以重山門因叙以唱和之意而牽聯并述長者出處云

百詠梅詩

天地間奇花異卉無足當百詠者獨梅可以當百詠不厭愈詠而愈不窮雪後園林水邊籬落踈影橫斜暗香浮動工矣而竹外一枝又工近世劉後村侍郎積百篇又工余族五山宮講積百篇又工須溪劉先生短調亦至百篇又工今見王君朝卿以二韻疊和爲百詩則又愈難愈工梅之精神標格何其能受人之賦詠不窮如是也朝卿曰子獨不見誠齋翁稱陳洮湖愛梅造次必於梅顛沛必於梅賡賦不千篇不止將不工耶余駭而起曰若是天地之生詩人無窮則賦梅者愈無窮後五百年余當騎白鶴夜踏羅浮山雪中與君更共賦之

張子靜詩詞

張子靜樂府柔情嫵態芳趣婉詞行徐而為妍淒婉而餘怨如
聽昭君上馬琵琶蔡琰塞外十八拍不自知其能使人斷腸也
五言古體貯幽寄澹而不失散朗崇朴反古而自是敷腴如入
宗廟而撫壘洗七言長篇浩蕩不羈悲壯自悼如公孫大娘之
舞劍器也雖時有未適中亦可謂有奇氣他日學益克神益完
宜有大過人者子靜少負才志嘗航胥濤棹洞庭窺廬山衡嶽
以自激發然迄今未有遇其尚俛首場屋亦以經術干時用哉

誌銘

建昌經歷彭進士琦

初宋瑞臣彭齊後

余友彭君琦初以至順二年九月二十一日歿于五羊官舍其
子鏞後二日亦死訃聞闔門二百指哭振閭巷郡中士友咸失

色相弔其季子鏞跣走迎喪踰年十一月庚午奉柩葬于廬陵
化仁鄉印山新塘之原請銘余惟知琦初久莫如余不得辭也
初至元丁亥余客印山琦初在焉於是時科廢十年印山知名
之士尚不少日夜相與談說詩書諧笑飲酒而琦初與余尤欲
自勵制行為文務欲絕出世俗而追古人磨礪相高出處不能
相舍當時不知其樂其後皆遷城雖巷陌相望然各纏家患世
故沉浮困耗而少年英銳之氣俱少衰矣延祐初元仁宗皇帝
詔天下以科舉取士士氣復振咸奮淬以明經為先而琦初以
四年魁鄉貢至治癸亥又貢遂擢第授南昌縣丞秩滿調建昌
路經歷未兩月有訴吏役不均者仇家共構陷坐解職叅政耿
公嘆曰玉石俱焚若此何以勸善會廣選行薦為廣東鹽官居
官數月以疾終享年六十有六琦初少有通才直氣外率內敏

遇事見獨奇姻族之貧者扶樹使自給受侮者擇其患失教者
勗以學事之病于民力不能扶則爲書以言于上又言文丞相
當祠陳古今大義激切不諱故未仕而人信其能有爲居南昌
摧折橫吏民多復業天曆初急造兵器飛符夜下連郡騷動琦
初請貸官帑徐規以償事辨而民不知平反盜獄增復學廩率
爲省憲賞識僦居一室圖史蕭然獨四方求文者滿座讀書夜
分無毫末官宦意故已仕而人信其能有守平生教人傾竭不
各校文江廣見出卷有可取者必爲抄錄曰吾恨不能盡収又
建言欲於貢額外取士故事不必盡達而人信其用心之廣其
於學破牘萬卷詩文隨意引筆不爲棘艱余嘗評其文如春江
晴瀾滔滔順流若可藝玩疾風過之奔怒千尺或者徒見其敏
實未覩其變也遺藁可數十卷有理學意錄有聞見錄杜注叅

同初名庭琦字士奇自號冲所旣以士奇入仕改字琦初世居
廬陵白珽自宋大博齊後分徙化仁鄉福塘曾祖文益祖子深
學者稱坦軒先生父季慶宋兩與鄉貢國朝贈吉水州判官曾
祖妣胡氏祖妣郭氏妣劉氏贈宜人娶羅氏贈宜人三子長鏞
次鉉先卒次鎡孫漢沂洪余與琦初少壯俱艱苦無成琦初晚
令若可少慰然一第官衆人可致在琦初無足論者當今天
子聖明海內清晏宜得奇才與學以論禮樂而軼三代若琦初
雖獲登用又如是而止且死南州非命也耶而余白首相失追
思少年相期尤有可感者安得不反復舊事言之琦初常喜以
詩文余評曰惟子知吾文未病前數日猶寄示巨軼且曰吾將
歸老與子論文如曩時蓋書至之日死矣嗚呼悲哉銘曰
積之深施之淺匪施之淺維用之晚奮於鄉死於遠胡死於遠

維忌之輓尾完兮壁毀群驅兮驥蹇嗟哉志士百世一恨

之公婦

張處士性善

至正二年秋余友曾泰復以書爲其甥張治請曰治先君子以去年辛巳十一月十四日棄諸孤將以今年某月某日葬于某地之原敢以吾友顏成子之狀請銘於先生先生幸賜之銘死且不朽余時留豫章不及見書則又致再四請乃發狀而嘆曰治余所知治之父性善尤余所知不可不銘張氏自五代時繇貝徙言竟居吉水文昌鄉西園世以儒顯曾祖崧尤博學有名聲旣不用於時則放浪山水間方笠騎犢飲酒賦詩以終祖同老登宋淳祐甲戌第歷贛寶慶信州三府推官棄官養親時相交薦徵大常博士國子監丞不就父希文克世其學性善生至元十八年辛巳幼穎敏侍信州公側名士滿座咸驚異其蚤慧

就學克勤夜燈徹旦毋鞠氏念其苦常勉其少休君勤益甚弱冠以八韻賦鳴往往凌厲先輩試補校官就中選復薄而不出及仁宗皇帝肇復科舉君慨然曰此吾時也累試不合有司然磨礪相善兄道益貢講畫速化友顏成子貢淑訓克肖子再龍次榜則君文非不可貢可第也於是知有命矣君素孝於親篤於倫誼從兄喪父弗克舉不計貧能恤兄子長失教不憚勞能訓君子謂此或常人可勉至於生死在前而不懼禍福切已而不變則非常人所能君嘗過友人值其大疫死病肩踵屬親戚散莫顧君嘆曰見病走非義也痛有神必不加禍有義留旬日瘞死治病滿獲安又嘗任里役有劇賊匿其里官責捕急吏教嫁禍鄉富人可脫已禍君曰吾寧自禍義不禍人破產購獲賊儒者類闢妖怪及見一鬼遂自驚動輒噤不敢向口常說仁義

見一事適已自便或重禍人置淵壑且相笑語自以爲智其視君所爲何如也君通究經史子集山經地志天文地理爲文操筆立書教其子皆有文嗚呼世豈能皆累世仕宦即累世詩書相追襲賢於驟貴而落遠矣吾誌君墓以死生禍福不動爲難歷述祖考子孫箕裘不替爲可貴必有知道者知吾言之有可感也娶曾氏賢而宜家先二年卒于三曰治曰再龍曰源女二長適曾某幼適羅某孫四宗檜宗集宗杞繩武有遺文朱門問辨紀事珠玉射策提要若干卷禹貢沿革圖指南象岡集五卷卒錄十卷今兩集三卷程文藁四卷君舊寓永豐明德鄉死於寓嗚呼君美文行而不見於時可銘已銘曰
文不騫達之畸行不馳交之滴義也而痛走仁也而已夷吁不見古之遺

高處士師周

嗚呼余銘高君師周之墓其合離盛衰死生可感甚矣高氏自吉州吉水歸仙遷雅莊爲世科望族至君和兄弟益昌國朝至元混一以來君和累任徵巡隱然有偏裨方略保障州邑游摧劇寇四境依以爲安衣冠名勝日集其門第君器鄉貢舊人君寶當時文士故言文武兼備稱焉又數十年君以幼齡嗜學日有聞君又師事艾文學幼玉磨琢詞賦學校試率在魁列俊聲一日動鄉郡方冊姓名遂流布江廣湖浙之間方是時君在家庭爲佳少在朋友爲英游賦詩飲酒往往自放間嘗來城郭與余遇輒縱意論文於詞賦友三山林允元潼川唐化龍江東熊瑞每平視無語雖合處恒不久而君知以氣爲文如鷹隼之方得曠漢而騫長風也又數十年仁宗皇帝以明經脩行取天下

士君忻然曰庶幾可以展吾志矣然竟不合於有司又困於門
後不復屑屑以科舉爲事由是避囂居城所居適與余爲隣携
其子植過余日循廢堞荒塚往還共談其於經史諸子百氏之
書跋涉根柢能使余敬蓋與君會合之密未有如此時者知君
之文浸宿於道雍容持重如老將之行師制敵雖有成敗利鈍
而其鋒終不可挫也又數年君復歸鄉近故家餘十里而止雖
山林深密而賓客時至吾聞其與客共坐常至竟日几席或經
數日不徹無取去者可謂僻矣然儉人機巧里役桎羈禍患巧
中猶不能免薄俗日滋惡肆善消理每如此天曆己巳聞君撫
事感物慨然有不獲于懷用陶淵明天運苟如此語爲詩見詒
往往皆感嘆自傷余復之曰天運苟如此相期在聖賢蓋期君
以古人之事而不芥蒂於世俗也蓋君與余踈濶未有甚於此

時者而知君之文與氣俱孳歛久矣如瞿塘三峽之水霜降波
平不見洶湧奔放之勢而人愈莫測其津源也嗚呼始終三十
年之間而君之可喜可感具是矣吾嘗謂君英傑剛銳之氣自
少至壯厄於科舉之未復自壯而老困於禍患之相仍君不以
自惜而君子之論則爲人可惜之然於家無孝友之闕於人無
伎求之過矩矱雅道涵茹斯文鄉稱善人斯亦可已君生宋咸
淳甲戌死元統三年乙亥正月曾祖汝齊祖鴻飛父禮翁娶李
氏子男三崧崧植孫二同孫還珠有詩若干卷藏于家以其年
某月某日塋于某山之原崧泣請銘余於君相知深宜銘銘曰
玉也不必其瑤珩璜也不必其采楨用而不施不若行成不知
其人視吾銘

凡子古臣

始余哭兄長翁兄子古臣年十五六哀若不可生尤奮欲揚其親今三十有七年余與古臣俱剝落無成而獨以後死又哭古臣其忍銘之哉古臣髫鬣爲余兄後軒軒有大志不肯爲庸瑣刻意就學授簡輒成誦爲律賦有俊聲旣而學益昌恨不見科舉及科復已踰壯一見所頒取士文體曰可無學而能然連試俱黜蓋其文浩博高古而有司樂平易也旣復自嘆曰士生天地間當俯仰無愧外物不足深計築宅一區繚以松竹梨棗之屬村徑深窈野興蕭然書倦則灌畦倚樹與隣叟往還阡陌間或循誠齋楊公故廬廢圃微吟久坐徘徊而歸人亦莫有知其心者余嘗觀其平居議論與其治家規劃使用世必甚有可觀然竟不試以死可慨也古臣於事親從兄取友皆盡道見事有不平者必抗公論見困苦者銳欲濟忘其貧鄉曲子弟不率教

者必迪其歸讀書善研究有詩文凡十卷至順二年五月一日以氣疾終得年五十有三古臣字希古初與余同居吉水南嶺余後徙郡城古臣遷南溪不時相見見則必夜話連旦余晚歲多憂患古臣獨尚義欲取以自任嗟乎孰使古臣死無以慰余之老衰乎娶廬陵彭氏子介女勝娘將以至順三十年壬申十一月乙酉塋于所居之近中鵠鄉尚坑原余哀其有才行而不得祿又不得年故爲之銘銘曰
學而不仕也如璞不玉美而不章也如蘭隱護才也爲讎志也非福嗚呼古臣猶在吾目

仲子尚文

延祐七年正月二十二日余仲子尚文以疾死四月二十九日其妻王氏暴疾死六月二日其子開孫昉逾暮繼死短生不嗣

哀莫置力其年十二月二十七日辛酉合葬其夫婦於吉水州同水鄉南嶺之西隱原歸故鄉從先塋也余傷其不淑買石以誌之劉氏自南唐保大間繇臨江徙吉水南嶺科貢相望尚文生而穎拔八歲閱族譜知敬敬為宗系又聞曾大父大父皆以文學知名當世即刻志家學經史暢析詩章清麗天出間近韓柳年十三四為律賦輒先庠序科復益研究羣書獵富探玄夜誦畫績文蔚以達不肯俗常有四書疑纂若干卷諸史纂若干卷雜纂若干卷丁巳試貢闈不刊作勵志賦其言以勵志為先刊達為末明年八月柳生于左腹既潰而元氣已劣百體俱病羣謁醫不治危坐一室意良苦然見父母憂勤輒茹楚不呻矯為怡愉家人或用巫史曰有命毋惑常執卷不置約之止曰兒無以忘疾豈以為學耶歿之前一日觀唐史至魏徵獻陵之對

曰大宗聰明可誠感何至為戰國機術哉病中為古律詩數十篇用意彌高遠切在諸子弟中蒼然有孳肅之色事二親甚謹疾革營市甘旨節序悲喜若以不得久娛奉為痛憂家念親之有遠慮而不屬其私聞親黨休戚病若為進減身之不恤而愛氣類如此居常尚氣誼可知故未嘗有德於人徒以才志早歿宗族兄弟親戚朋友踵門痛哭悼弔彌數月猶依依焉尚文字文仲生丁酉十月王氏生丙申八月世居吉水東門夫死哭之過哀曾大父銓學者稱麓隱先生大父仁榮宋咸淳進士茶陵簿改從政即平陽縣尉學者稱習靜先生嗟乎人孰不病而病不可名人孰不死而死獨可傷妻子相從地下父母白首祖送天乎忍哉使其壽宜與吾門吾不德至此柰何邢敦夫王逢原顯族多貴交故大而名聞天下尚文地寒譽不出鄉亦其人不

願人知雖嘗往來者或不能深悉也嗚呼古今之可悲如此容
有之矣而吾獨以尚文之可悲又曠古之所無也死而有知其
亦能悲此銘也夫銘曰
孰爲而賦也孰爲而附也孰爲而裂之遽也爲懿爲醜其安據
也爲石爲玉美不固耶爲鶚爲鶯祥而寓耶歸來故鄉高峩峩
者墓耶

蕭生以吾

皇慶二年癸丑某月某日蕭以吾死年三十五余哭之哀明年
改元延祐之五月其父熙績以書來徵銘余受而哀之如初嗚
呼如以吾之不克其壽果可哀矣以吾少明敏事父母必達於
順處家庭未嘗疾言遽色與之接而挹其和者或克然也始余
客蕭氏見其遇事謹用心厚意其必有爲於世讀書爲文講析

理道論世代升降得失常夜分相對僮僕倦強意彌厲尤嗜詩
自選以下諸大家皆手寫聯篇帙寤寐體製間以所未見者試
評焉輒曰似某某無不然被服澹薄如寒素其風致篤厚有可
媿流俗者初熙績連孕子不育故以吾特鍾愛以吾生時家固
未羸又多病熙績夫婦劬瘁良至晚賴其力以佚而以吾死矣
其於人世父子之情爲何如也以吾病且死無他言獨教其弟
以娛親應門泣然曰吾不得以事吾親矣及死諸父昆弟親友
鄉黨皆悼傷不能去於心古今以德人君子爲難如以吾者世
孰知之哉以吾諱貴孫曾祖某祖某文行爲世師表宋末以詩
經魁天下授衡州推官學者稱草廬先生父諱某熙績其字也
宋鄉貢進士母郭氏先十六年卒繼文氏宣慰同知公長女配
袁氏子男三人某某某女一人許適袁氏以十一月某日葬某

鄉之原以吾初有志功名恨不在科舉時死數月而科舉興窮
達雖有命亦可哀已銘曰
其履之醇醇其意之恂恂而不壽於其身嗚呼奈何乎白髮之
親

墓表

蕭德翁

君諱望字德翁姓蕭氏曾祖諱尚老祖諱棟父諱煥宋蕪縣主
簿宋亡以國難死時君始八歲避難應變卓如成人公私應酬
搶攘會三兄俱逝與弟貴翁表裏樹立公上之供給不能使之
困鄉里之機弁不能使之傷繇是勅點者避其鋒高捷者避其
善於是官暴吏姦政如虎蛇東家西里南隣北屋鮮不披靡莫
支獨君兄弟所為多出人意表老成者相遜曰是二子斐然剝

出如秋風雋鶻所向無前未可量也久之齒益繁居益隘遂益
克拓其堂構池園寢為鄉里甲頌溪劉先生以其能以德興其
門書德齋二字以為之表其子永復求余為德齋記君名日聞
于四方好施尚義脩橋梁治道路捐醫藥給衾棺殺穀值嫁孤
女奉賓客如是者類數十年不倦過者咸稱曰是足以名德齋
矣然君未嘗以為德為之益勤吾嘗觀於世未少有德於人輒
自贊不已公之不自贊非矯以為之者豈非其慈厚本於性其
謙讓得於天有不自知其然而然者歟君長身豐頤聲如洪鐘
直而有容質而不誇尚大體而不拘小節敦實理而不尚虛文
然君尤以孝弟稱母夫人年八十有奇公養志無違率其子弟
各為新第鑿池以魚闢園以花映帶左右戲彩爭迎輶輿環侍
親扶持其間真若潘安仁故事其能使鄉里朋友稱譽者不徒

以其事親之力有餘而尤以其意之有餘不徒以其身之能孝而尤以其子孫之能孝也孟子以為世稱曾元之不如曾參徒以其意之不能克廣耳若君之事親再世而有餘意有餘孝豈不甚難得哉君又友其弟第死而哀不止豈不甚難得哉君生淳祐己巳享年七十有八子五人求憲某某女三人孫男五人孫女八人曾孫男二人曾孫女二人君歿以丙戌十二月二日後十日奉柩葬其居之近易家山附先君主簿李夫人之兆左既葬其子憲等既求其姻友奉議大夫劉參狀其行又踵門而請余曰先人幸蚤辱相知且辱為記其齋宇今先君不幸棄其諸孤先生尚賜一言以重其阡以為千載不朽余既念與君交久又賢其有令子故為表其墓嗚呼數十百年之後丘落谷湮有登高而望臨穴而嘆曰此宋仁宗瑞臣之子孫尚其封樹

之哉

故宋張伯儀

於乎伯儀死且九十年矣而耆老談其風鄉人誦其德子孫務詩禮闔門數百人指曰可以盛大則君之所以樹善垂後者豈偶然哉君先世自具州徙吉水曾祖文德祖紱皆隱德弗耀父謨不仕然以行取高賢公卿間平糶四十年秘書歐陽守道常貽書江丞相萬里亟揚其善君名淑少自克立外重內敏謝俗嗜學受業大理寺丞曾公錫弱冠凌厲庠序有聲名試貢闈屢捷乙榜事父母以孝聞從兄弟以友著居鄉里以善稱好善責已酬物諧俗視其父無不及闢園鑿池增置齋館圖史環貯花竹秀野日與賓客往還賦詠其間於世利蓋薄如也生宋慶元壬戌七月十七日卒咸淳庚戌三月五日娶胡氏繼吳氏蕭氏

子擇字天陞樞字天極天陞以芳年登漕貢孫文孫定孫喜孫明孫俱天陞子也克大其家曾孫觀老吉惠德行文辭並駕古人建義學立奉先祠蔚然日進於禮樂玄孫維申南復皆慕學尤奇既以卒之明年辛亥十月壬申窆于龍潭吳家記之原至是文之姻友曰蕭某佳士也致文之意以其曾祖宋進士南城縣丞蕭靜軒狀來請表其墓且言鄉老之思君未置嗚呼當君卒時海內名筆相望不以此時謁誌以發潛德顧待今而以屬余非文之克彰其先歟余觀世之大姓一再傳之後替滅者何限甚至丘隴湮沒草生狐嗥不知其何人其或子孫榮華而飽食煖衣又不知彰其先美今君之墓百年異代而子孫方欲表以垂不朽其家之盛而後之益賢可知矣乃表於其墓曰古稱爲善必有後天下惟孝友惟有德於人者天必祐之鄉

君子必喜稱之以流於無窮大史公曰余登箕山其上蓋有許由塚云謂其風流不泯也於戲後又千載有過是者必式曰是宋善人張君伯儀之墓

胡禮

自黔婁以貧死幾二千年廬陵胡禮繼之貧可知矣禮之賢亦可知矣禮生名家上距忠簡公七世曾祖某祖某父某禮字尊生早以穎悟受知鄉先生博士劉公會孟禮部鄧公中文既踰弱冠從余學以律賦論率魁鄉校皇慶元年科復禮自期其戰藝當首捷而累不利詩詞天出而詞尤工清切窈眇近世殆鮮儷性嗜酒稽古所得止以資醉憤世嫉邪不可柰何則托之酒與詞暢懷忘情少年貌固娟秀繼而貧病每見輒稜稜兀坐稠衆中然文益腴嗚呼天之生才艱矣若禮之成者又艱而竟以

貧死命也夫禮死以至順二年某月某日得年若干初娶臨江
教授劉豈蟠女再娶郭氏子某今撫鞠於周漢臣未死時為書
與宣慰周公志仁及漢臣與常所親厚者以塋復為書乞銘於
余細字如平生余讀之墮淚復之曰吾忍生銘吾友乎子疾固
未死死而不銘吾乃負子既死踰一年余為銘友人蕭升周賀
買石刻焉相率酌其墓而表其上曰骯髒而窮者命耶疾弱而
短者天耶白壁泥塗俯仰一嗟嗚呼奈何

桂隱文集卷二終

桂隱文集目錄

卷三

祭文 附哀辭

祭王梅邊

祭夏深道

祭蕭從吾

哀戴用齋

書 附小東

與揭曼碩

荅揭曼碩

與虞邵菴 缺

與楊竹礪

國家圖書館 NATIONAL CENTRAL LIBRARY, TAIWAN, R.O.C.

祭彭冲所

祭楊西有

祭仲子尚文

哀楊秋山

與歐陽圭齋

與鄭鵬南

為仲子聘王氏

代王通趙氏



桂隱文集目錄

與平坡

荅周如綱

與李方心

與羅養正

荅王宜父

與羅志行

荅鄧以道

荅王志文

與解辰叟

與王聲吾

與歐陽石泉

復荅秋江

荅郭方春

與彭居所

與滕玉霄

代與鄧善之

為長男荅蕭敷先

與揚西有

復荅鄧以道

與彭宗富

與王頽庭

與袁嬰堂

荅秋江

慰李履善

慰揚天鵬

慰蕭國陽

慰艾公善

慰毛天秀

慰李存吾

慰羅師尹

慰王庭望

慰李方心令郎

慰蕭遠心

慰羅元夫

卷四

雜著

劉紹平蹄平崕說

見翁真容贊

題危大樸與鄧子明書後

題蕭煥有為政碑後

跋四君圖後

劉賓遠字漢隱說

三節六桂堂頌

題浦陽鄭氏義門家範後

題林常春家藏紹興閑書後

書曾成玉遮見哈喇圖詩後

國家圖書館, NATIONAL CENTRAL LIBRARY, TAIWAN, R.O.C.

跋文山和東坡赤壁詞後
書揭先生所書卞宇文後

題李氏所藏先世交游翰墨
書虞邵菴送體仁叙後

賀聖誕表

謁吳太守啓

保王梅邊狀

贈聶推官梁文

揚忠襄廟題疏

脩延福路題疏

鷺洲石橋題疏

府城西津浮橋題疏

高坑竹園石橋題疏

刊忠孝史題疏

玄妙觀法堂題疏

附錄

先生行狀

墓碑銘

謚文敏咨

謚文敏勅難古字

史傳

歐陽文公荅書

揭文安公荅書缺

柳侍制書缺

虞文靖公荅書

虞文靖公別詩

虞文靖公次韻

夏提學讀手卷詩

胡方伯求文集書

朱太守祭文

柯知州祭文

子尚乞脩墳呈稿

盛布政批詞

桂隱劉先生傳

國家圖書館, NATIONAL CENTRAL LIBRARY, TAIWAN, R.O.C.

桂隱文集目錄終

桂隱文集卷三

祭文

祭王梅邊

嗚呼孰不事親而公能甘旨盡歡如曾子閔子之以孝傳孰不
 居喪而公能苦塊飭粥如王裒徐積之廬所其篤兄弟也如連
 璧竒木千載而不可分其從氣類也如長風健翮得意而縱高
 騫其用武則力足以任乎鄉里之保障藝足以守乎原野之橐
 鞬其為文則精者出寶劍於千鍊沛者縱春濤於百川賴以排

元 謚文敏 桂隱劉 說 著

元 賜進士門人 羅 如 篋 顏成子 編刊

明 曾孫 三德 用 敦 灼 重編

族孫 方興 天健 志孔 較刊



難者以之爲柱於中流待以舉火者以之爲毅於凶年聞其辯者疑其爲戰國之處士見其粹者疑其爲山澤之癯仙人方縱侈公胡爲澹服而蔬食人皆行樂公胡爲晝忘食而夜忘眠蓋其可知者已見於斯世之公論而不可知者雖吾亦不能以盡言嗚呼公年不躋於上壽而凶傲或至於耆耄公名僅發於六館而貪狡常一日而貂蟬生材傑而不見用於天下吾不知彼蒼曷爲其然詵少而聞名晚始相識雖十五年之未多貴情好於一日每暫離而即書常久會而恐失談何微而不窮辯何異而不一非悠悠之論交觀勢利以踈密公昔初病吾往候公公喜我至剪燭夜中後聞向安每報每喜於公何益心則如此三月欲盡報公在門雨車淋漓握手忘言蓋入城未就乎賢子之養而先急乎朋友之共論慨此意之迂闊豈流俗之所能既相

從於累日復別公而有行公云此行定隔千古孰知斯言之讖曾不旬浹而公貌不可再覩矣公有令子雖死不忘獨風流之求絕增鄉國之盡傷公魂何之公柩返鄉倘斯文之足慰尚彷彿於一觴

祭彭冲所即琦初也

嗚呼冲所四十五年之交遊今遽已矣世間有不可失之友今遂死矣憶歲丁亥吾來邱山吾始二十君過其二以意氣而定交甚金蘭之相契風窓雪棧雨笠晴巒何遊不同何理不議春園新花秋墅高桂我棋而喧君筆而醉大篇短章竒文奧義或一辯而千言或一筆而萬字君如大海奔放不收我以溪澗亦逐其流君如騏驥蹴踏九霄我以馭駘並馳其輻或同異而角立卒至善之是求取言笑之莫逆終磨琢而若仇咸默契於古

人遂顛倒於俗儔乃若世故鞿轡遊氣酢酢常利鈍之共濟每
亨困之相謀所與談者至親有所不知所與俱者同氣有所不
侔君晚決科遂滿夙心簪花曲江聯騎上林貳邑佐藩四馳厥
聲我方淮園抱甕郭門君有書來心必相論雖蜚伏之各異而
情好之彌敦昨歲二月君赴番禺艤舟蒼亭旗旆舒舒建帆把
酒叙別斯須謂重會之非久乃望瘁於馳驅挾冢子以俱遊懽
雙駕於靈車初得報而猶疑今撫柩而長吁何彼蒼之異好叩
大鈞而無途朔風吹波春雪裂膚峩峩石灘儵儵穹魚君歸良
苦魂魄何如我多患難失君愈孤君亦知否當歆歆歎魂今來
歸為飲此壺

祭夏深道

即婿夏
親之父

嗚呼深齋於是往矣環百里之風流於是喪矣三十年之情義

不復曩矣尚憶相從君我方壯顏如烟玉談經春浪氣傾公卿
車轍填巷交遊南北文帙盈囊錦輿扶親頓足高唱吳魚入饌
燕酪流觴兄弟竹屋聯吟共賞傲東月之晴軒宴荷亭之夜帳
凌絕岫以吹笛泳大江而縱舫解紛排難振弱拔枉一時氣槩
見稱僮固流俗之僻易亦氣類之所仰二何豎之無情乘六
氣之乖爽堅車中之高卧閱寒暑之消長坐不離於重氈行不
舍於壽杖似鑿齒之半人老一窓之天壤嗚呼馳騁之姿局以
拘攣談笑之懷襟以痛愴雖神情之未減亦姻友之共悵何鳳
凰之在藪而鷓鴣之凌空天驥之跛足而豺豕之走壙也嗟維
久要申以婚黨既欣同而戚合愧情密而迹曠每懷問安以慰
暮向每懷劇語以見叙暢曾中心之未酌忽長逝而缺望思周
旋之平生增悽悼之萬狀偶膝瘍之為梗覺拜跪之猶強遺惠

兒以往奠寄老淚之橫放

祭揚西有

嗚呼世未嘗無公孫僑管夷吾之材常患位不顯於時世未嘗無王彥方陳大丘之行常患名不登於史嗟維西軒振拔自己遂繼喬木爵爲杞梓鄉有靈雨君爲之懷鄉有螭虎君制其鋒君所排難如翳而風君所煦撫如飢而充其遇事如大阿龍泉之淬秋水其急義如高鴻俊鶻之奮長空其氣愈謙而王公貴人忘其勢之峻其語若訥而遊士俠客喪其辨之雄崇門盤迴大第高蠹冠佩從容詩禮磨最兄弟急難如手足肅我階庭睦我姻族歲時拜起家法桐木伏臘詠觴清風杜曲弱冠羣英氣撼場屋追故家之遺意愧四境之流俗忱倡勇之在君紛襲芳而繼躅而况名駒長鳴薊門青雲縱鞞魯後周前或華髮之

懷綬或青年而乘軒謂從此而奮舉遡螭坳而凌木天何夫道之無憑乃賀廬而吊庭易袍笏以古塊變綵衣於素纓昔之笑談今爲煢煢哀此痛之良酷諒行道之撫膺嗟君材之槃槃竟大噐之未施譬騏驥之伏櫪縱駑駘而爭馳幸繼志之有人終興門於他特顧惟君我相望英槩曾托姻之幾何遂求別於千載懷綢繆而不語持盃酒以遠酌春雲彌空春雨連晦思君平生一慟如對

祭蕭從吾

嗚呼吾哭蕭氏素心翁父子二人矣今最少如從吾亦復哭焉其哀爲何如也君少穎悟卓有立志謂當乘青雲而縱八極何所不至柰大化之生材常進退之倒置卷經綸之一堂傲多變於睥睨園林清宴花竹春意蓋察善脉者先療疾病於未然善

標舟者不以波濤之可畏而識者以一家一鄉而推之固知其
可用世也方將建大廈以成肯堂之志遺一經以爲燕翼之計
胡中道之相違溘朝露之忽逝崇霜疊雪憂集禍萃山空今木
落鳳亡兮鳳謎遂使慈闈哀哀白髮悲淚猶子熒熒子立麻總
襁褓呱呱朝暮誰視而阿大中郎爲之寡惟而鮮棕端居而求
歆雖然事有不必憂理有不必揆覆乃培之基禍乃福之隧試
遐觀於古今可含笑於下地追惟平生所契者義晚失良朋相
望誰慰薄奠一觴有隕其淚嗚呼哀哉尚饗

祭仲子尚文

嗚呼尚文汝何辜于天而至此極耶憶汝之幼素多病苦吾客
於外憐汝者毋暨年七八從吾四方志氣嶷嶷書聲琅琅援筆
而寫輒已成章吾常期汝可與吾門但疑尖疾或不可以長久

也已而年學俱長粗有俊譽磨勵簡編適際科舉推汝之心蓋
自以功名之不足取也戊午三月汝感腰疾五月稍安汝自治
藥吾猶不甚以爲意其年八月吾歸南山汝亦繼來路逢疾風
至則感冒吾與汝連床共語汝云右腹之扁若有瘡塊隱顯可
疑吾令歸城速治吾亦旋歸則汝瘡浸長遍謁諸醫或云宜消
或云宜潰歷試諸醫而瘡勢驟進矣汝書抵吾齋云比連服內
消凡不見內消但覺外長此十月間也遂用外科貼至十一月
初三日瘡潰出濃數升汝口呼痛汝手治濕吾不忍見聞次日
精神如常人朋友皆賀吾復得壯子雖吾亦自謂是當愈矣夫
何証狀變爲弱虛連用剛劑幸而復振其年歲晚次年新春又
謂當愈矣汝於此時有感必詠聞唱即和其心忻忻恨不一日
從朋儕以快紆鬱也吾三月十一日遷居城西汝以是月末病

復進自是元氣益羸東支西敗朝劇暮差遷延以至秋冬如春
空之既霽而旋雨餘燈之欲滅而復明也汝痛而呻吾與汝母
汝兄必在汝傍母以爲心汝痛暫息意暢而怡吾與汝母汝兄
必在汝傍共爲之喜雖心知其不起而猶冀其萬一苟延也今
年正旦汝猶強稱觴觀賀客題名至元夕意愈不樂然危坐相
對何所不言經史環枕隨意輒讀孰知其僅越五日而旋死耶
嗚呼吾祖父之德非宜夭其後者而至此何耶汝之顏貌與汝
所爲非宜短折者而竟至此何耶疾病人所不免而汝病獨異
於人醫藥以濟夭死而醫藥至汝而無益人死則有妻子可以
嗣守而汝之妻子相繼而俱盡父母兄弟非不用情骨肉親友
非不效力智窮神弊無所歸咎不知造物者意竟何爲也天地
有窮汝父母之恨無窮也汝父益老汝母多病一餉之適意思

汝輒痛不知汝九原之下意又何也今將葬汝夫婦於故鄉南
嶺西隱原山之右汝曾祖麓隱先生之墓也山之左汝祖縣尉
習靜先生之墓也汝生不逮事死而相從其可樂或尚能如人
世間否也吾爲汝墓銘銘汝良痛汝其知也耶吾讀韓魏公姪
墓銘悲其早年羸疾以天一妻一子一女相繼以逝汝之可痛
大畧類此韓氏非不德也汝之聞此其尚可少慰也明日庚申
先以汝柩入壙後日辛酉汝妻喪繼至而後入壙汝母汝兄當
臨穴永訣汝父以今夕先奠一觴汝其知之尚饗

戴用齋哀辭

皇慶二年癸丑十月二十有二日用齋戴先生死以十二月五
日葬友人劉某悲其有文章而窮以死也作哀辭嗟斯人之生
兮患不爲賢胡絢美之如君兮祇以爲窮之愆學如武庫之森

備兮文浩浩乎如山川謀可以彌世故之輻輳兮辨可以拆堅
白同異之玄然而蔽風雨僅有環堵之室畜妻子則竟無一項
之田仕不投於儒選之調羹不及於下壽之年病霖雨而無裹
飯兮黔婁之衾蕭然瓦燈寒而無輝兮孤兒咽而不眠總麻不
足於數人兮孰負土而廬阡誠以才而至此兮願以斯文而回
彼之天嗚呼萬古一理兮徒有泪之潺湲

揚秋山哀辭

往予幼時聞公名籍其意其遡風雲取卿相直不一日豈復可
進而友哉特改公爲民吾鄉予始以諸生見公稍察其純折輩
行與交特相好於是予之悉公者深矣公少尉廬陵入郡憲幙
以斯文自任不喜作聰明常爲道人服行田里間察陰事祐弱
擊強諤諤以臺諫用郡邑至出嶺歸隱而盡洗前念浮沉俗間

若無所能人先士大夫死義固多而廢處者往往或以才不諧
世老不堪用才與年如公而確然不動心者殆鮮閑居無營故
人故吏鷹揚滿眼列鍾鼎蕩閭巷慢慢若不聞覩性喜客傾倒
談笑無復底蘊故知細論坐久隙語或嗒然長吁則世亦莫能
測也與人交謹往復謾行市井間若不玩然心所不合或竟
坐不按一語近年以來諸公貴利自薄以文高相譽不吝至褻
以周召不爲意公獨不肯泛應應亦不一字過情故紛紛者若
不相樂而心實嚴忌之郡俗習爲小有挾即侈然躡處躡躡前
輩漫不省獨敬公挽與並公於年長一日者必遜下或因以少
化廣坐崇勢談笑方張公問以舌戟健者輒愧屈此其平生聰
明無所爲用而入於議論間猶如善庖之芒乃老吏之案牘妙
中肯綮而隱隱不得遜伏耳憤世嫉邪自託晦嘿古冠敝衣動

必矩法施於事爲乃不爲脩飾古所謂通介者其在斯人與予嘗評公平生發姦摘伏如趙廣漢劉穆之活死命不自伐如錢若水杜門教授如管幼安詩酒遊世如陶靖節老爲諸候客如杜子美守窮不妄干人如陳無已此皆其迹也若其自得雖予亦不能知也嗚呼余初識公時猶妙風致蕭蕭如仙人愈會愈老自號蜀鰭數年埃黑生面然猶意其未死而竟以死亦可哀也人生讀書抱才入官用世曾不少究而窮處以死天命竟何如也予少不可於時從公周旋迂闊今已白髮過半矣前不能爲公用世之經濟後不能爲公立身之名譽徒混混爲衆人以老而公所爲取者竟何如哉感公生死視他人衰特甚叙壙誌之所不及作哀詞曰士有出而爲干莫兮俄折而頑仕不數年兮四十之閑結爲瑞芝長虹兮何復見乎人間哀

哉乎秋山

書小東附

與揭曼碩學士

詵昨歲聞遷直集賢遂以斯道日侍嚴近天下幸甚閣下宜得此久矣而天下之所望於閣下者則不止此也位日高道日尊天下之文體日益取正於閣下天下幸甚古今文章甚不一矣後之作者期於古而不期於襲期於善而不期於同期於理之達神之超變化起伏之妙而不盡期於爲收斂平緩之勢一二十年來天下之詩於律多法杜工部早朝大明宮夔府秋興之作於長篇又多法李翰林長短句李杜非不佳矣學者固當以是爲正途然學而至於襲襲而至於舉世若同一聲豈不反似可厭哉其於文則欲氣平辭緩以比韓歐不知韓歐有長江大

河之壯而觀者特見其安流有高山喬嶽之重而觀者不覺其聳拔何嘗以委怯為和平迂撓為春容束縮無生意短澁無議論為收斂哉故學西施者僅得其臚學孫叔敖者僅得其衣冠談笑非善學者也故李杜王常並世競美各有途轍孟荀氏韓柳氏歐蘇氏千載相師卒各立於門戶曾出於歐門而不用歐蘇氏雖父子亦各務於己出蓋士非學古則不能以超於今而今亦何必不如古使吾自能為古則吾又後日之古也若同然而學為一體不能變化以自為古恐學古而不離於今也蓋嘗讀閣下之書上不遜於古下不溺於今詩古矣而不可以指曰自某氏文古矣而不可以指曰自某氏此善學者也學古而能使人不知其學古則吾自為古矣無他學古而能為古人之實不徒為古人之文此所以能使人不知其學古也此所以能自

為古也僕少頗踈劣其於斯文非有意於述作故亦多散逸然間常取存者讀之似亦有視古人無甚媿者夫知音之難故有曠千載而獨得僕也幸得與閣下並世而立亦嘗辱一言之知耻而不以質正於左右則後而失其時矣謹畧錄所為文若干篇及朋友所梓詩一集獻於下風得辱深評而極論之甚幸古之投所業於公卿者皆以干進也如僕豈有是心哉倘有以為之不朽則曠六合千載而不可數者豈不在是乎干冒崇嚴無任兢悚

與歐陽圭齋學士

說惟道之在天下不必盡在縉紳之士亦不必盡在山林之人而縉紳之士處於尊顯故其道易孚山林之人伏於窮僻故其道難達然古之人固有名滿天下文布遐裔而出言而人莫同

其樂會意而人莫知其微徒同聲附和以名相求獨山林之人
乃有遙悟於千里之外而不能以相語者又有吟蟻閭閻讀書
著文自得千載顧視流輩無足爲語而知崇高富貴之中有道
所在而勢分之隔不得以相從者斯二者不得值於天地之間
久矣然縉紳之士不得山林之人以知其心之微若少缺於其
樂而不害其道之傳山林之人不得縉紳之士以知其道以發
其心之所樂則有槁朽於木石而已故自古士之立於班行之
上苟有以自見無不著稱於時而其負斯道者遂爲四海之河
華一代之師表而山林之人則曠世不聞有以斯文斯道自樹
於千載若漢之楊氏唐之韓柳氏宋之歐陽氏者豈斯道偏在
縉紳而不在于山林歟吾固疑其有甚不可傳也是故山林之
人倘知道之在己亦必趨乎縉紳之有道者質焉至有自號於

縉紳曰吾之爲文之深愈於天下之人而縉紳之有道者亦必
進之若知己必使有聞於天下後世是豈徒以爲聲名哉徒推
有餘以賑不足哉亦必其意之有樂乎此也嗚呼非真有道者
不能也閣下鍾山川之間氣當科舉之興運大庭偉對天下稱
誦不二十年遂躋卿輔雄文與學凌厲當時天下之人固以閣
下爲天下之歐陽子也而閣下乃自謂爲廬陵人廬陵亦何幸
復有一天下歐陽子哉詵廬陵人也自少頗知爲文而知道不
在己故亦不甚經意而於閣下之文雖不多見而若有以知其
心喜道之在縉紳者復出廬陵而衰老不能走京師以蘄一言
之相契謹以其所爲詩及錄其所爲文若干篇以獻古之投文
者或蘄於用世若詵之衰老皆非有他獨庶幾一言之相契爾
伏惟憫山林之老朽有以慰發其心黼黻篇端使鄉人子弟藉

以畢梓以見信於來世諒亦閣下之所樂爲也干冒崇嚴無任
悚慄不備

答揭曼碩學士

去秋吾吉夏仲炳歸得二月所惠書甚慰執事身居崇要有論
思撰述之責而能念及山林遐遠時賜音問非觀勢之時所爲
也所論天下德行文學之士蓋自有其人若僕何得與於其間
或者謂江西爲可薄則實不然姑以宋三百年而論二程起河
洛橫渠起閩中濂溪晦翁南軒起東南皆爲道學宗三蘇出蜀
歐陽出廬陵王介甫出臨川曾子固出盱江皆以文學名天下
後世益扶輿清淑之氣周流於天地間互爲豐嗇厚薄安知後
有作者不生於曠古無聞之地乎且人之習於聲何常之有豈
可以一時一人遂有輕重高下於其所生之地哉執事以爲何

如執事之文皆於日光玉潔之中而有河傾海倒之勢其鳴於
千載必矣又何必其不江西也茲因鄉人某往京師謹此問起
居末由會晤萬萬厚自珍愛不備

與鄭鵬南憲使

某伏處山林聞明公名滿海內久矣暨其來南則又聞其敷汙
警愾夙夜勤政好貪褻魄煌煌如風霆之日呼震於其上而不
敢以寧竊以爲此古賢士大夫也安得一拜下風以觀其聲光
誠不自意大旆之回少留廬陵辱過敝廬遂得承顏接詞者累
日又不鄙薄賜教以詩以明公之文學議論高出當代而下聽
於愚盲而後知大人君子之用心與流俗異也明公朝廷之所
倚注班行之所推重入爲臯夔出爲方召觀風察俗則爲張范
承流宣化則爲龔黃此人心之公言非獨某之私贊也如聞臺

省交除但不知果就何取相去差遠馳慕奈何某自別明公之後益就汨沒然閉門讀書確守矩矱不敢有一毫意外之希慕朝廷搜求遺逸過蒙明公推援而心耻以聞達求於人諒當終老於書冊間耳曩者一子頗肆力於學既踰弱冠病及兩年以死心甚憐之自爲之銘不自揆度欲干明公大名爲之篆額所以償其短世慰其土中之幽思伏惟仁人惻隱之心特賜允請則某與逝者俱感明公之盛德無窮也干冒崇嚴不寒而慄

爲仲子尚文聘王氏

惟季秋爲四時之清氣九日爲千載之佳節於此而奉啓偉人則竿牘陳言祇以爲瀆而况婚姻至情禮不在文請得以畧誅它日行東山涉字水撫其競秀合流之勢起伏萬貌坐念自有宇宙以來其人品磊落英豪固不可盡數而百年之間飛霞頡

頡峩并相高亦復何限然聲光起伏往往不可以玩其喬木舊家蒼然歲寒傲霜雪而不變閱桑海而大耐者其有幾何有如名門忠厚以爲本禮樂以爲文盛時掉鞅宦途角雄塲屋聿爲戴景執事昆仲才可以干莫噐可以瑚璉識時應世聯芳競爽闔門十指歲時衣冠雍容可畫鄉里指之爲大丘之問公藝之族橘中之棋非深扇外之塵不至豈非山川之氣所特鍾者歟其甲烏衣踵三槐爲世道柱石且有日而婚嫁板附豈冰氏子所敢企其下風哉次兒尚文年可十五嘗鼎斯文或賞其可然澹泊相遭當求其稱而塞脩惠言乃欲舉令學靜學之次玉女爲之配循避歎然質之秋山先生而以爲信因念諸父因依固嘗有一日之雅而又從宗兄以識靜學冲襟遠識當時竊有願交之意而今乃得爲肺腑之戚誠所甚幸用是不揆其情而廟

焉穆卜以不腆書幣請焉百世子孫之好將在此而宗祊實嘉
賴之臨筆不勝忻悚俟命之至

與揚竹礪

曩以哭子之感重累書奠雖嘗奉尺書為謝終以未得造門為
歎相望二百里祇重瞻邇耳邇者來城始聞令弟明齋遽爾捐
館使人驚怛不自已明齋以名家識時之才當昭代右文之日
外歷藩宣內任清要朋友之間方望其大用以究設施庶幾世
道與有蒙賴迺今中路折軸四方盡傷兄弟之情如手如足當
何以為心耶抑古今痛事如此不少以數觀變以理塞悲為國
家自重乃親友之至願也未能躬唁伏楮拳切

代王通趙氏

遡銀潢於異代文綵猶新懷珠樹之舊家聲華已冷幸里閭獲
托於平生宜婚姻遠啓乎兩姓韻閨房既能綉於平原而兒稚
豈並佳於逸少福徵百世事定一言有女不以與凡借重直同
於九鼎之子歸宜其室相成倘副於三槐

與平坡

詵作踈兩年殊切馳邇乃忽聞尊公奄逝使人驚悼不已坐念
前朝宿儒零謝殆盡使後生小子猶及聞正始議論之髣髴正
賴後凋一二公行為鄉閭之典刑文為學者之領袖暮歲巋然
砥柱薄俗使同里各得其分如得質於大丘使過門各得所願
如得見於司馬詩書科目之效正在目前而不克少踐階庭之
膏達此吾黨所同慨也時暑方熾尚惟饘粥加勉不勝至願

答郭方春

說不相見久矣中間賜訪又以留外不得會晤獨特從今凡往

還知動履安務則雖不見猶見也適中忽披手書讀之忻懽垂示高文皆有至味大抵脫去流俗務就真實古之作者正如是耳苟未能忘情於銜鬻則以寡理爲雄壯浮靡爲博瞻但可欺誑聾愚耳石洞詩猶有常王風致恨今世識真者少若此空山絕澗之意誰與領哉見教人有傳說若不滿於科舉者此告者之過科舉取士尚矣漢唐以來名賢多出此途此明時之所以網羅天下之英俊者也而誰敢小之其間賢愚不齊從古以然譬之六化生鳳凰麒麟之瑞豫章楛杙之材與檇檠根莠葉苑蕭艾鴟鷂也均雜然而並與天亦安能規規然而擇之又安能使瑞與材皆無覆或生成之偏哉蘇明允李方叔之流皆未嘗得志於科舉窮退之曾子固皆累十數試而僅一得說雖無以亦預知命之不可言也或者之論哉所刊程文非性

未嘗開口論其是非亦志氣衰惰世念日薄乃未嘗一過目也足下所論四書之弊甚善然不敢附和者恐不知者指爲忿耳足下相愛又謂之不待科舉而重此不敢當但科舉外物非人所能爲若立身行己差少過失則俯仰之間自有真樂然未易能也足下停蓄其學不肯羣試於有司作文制行皆在科舉外此尤可敬幸未得相從以消鄙吝也詵一向留家頗有應俗之作未能寫寄仲敬遠遊似未爲得何不姑處館娛親力學俟命然男子生而志四方安知不遂以此遇也兒輩今歲亦留家附道多謝何時到城當得面究不宣

答周如綱

別後獨坐一室深思共語忽已在百里外殊用悵然兩日抵家朋友還往度日夜歸得書發緘讀之推與過情而待所尊敬歎

然不敢當人生無如朋友之樂然英妙可與晤語者甚難足下學勤而才富爲文皆足以警發衰朽譬之寶劍雖未出匣自有斬犀兕破蛟鱗之氣僕方以得講切爲幸而足下乃禮恭逾甚可見懷寶而不自矜也周伯仁之牛心炙蘇長公之密雲龍皆當時大賢故舉動言笑輒足以傾一時而名千載若僕之好德樂善則有之而身處窮約其言語何足以加毫末輕重於朋友哉至論僕之爲文若過高深而不利於場屋者僕正恨不能高深果高深雖不利於場屋不恨也况爵祿外物自有定命卑淺者且可得高深者獨不可得哉見喻欲示以高文尤所願見會面當在旦夕得劇論也敬堂留瀘東未歸談間亟稱才美志行恐高尚非澹泊儒家所能淹未知其能小用心於訓迪否足下度其可甚幸

與彭居所

說於名門相好之義不待申之以婚姻而後篤密也而况托姻方隆哉君處山林我依城郭相望要不甚遠佳時暇日既不能幅巾杖屨扶携阡陌以共一笑之樂而書問之往來詩簡之唱和亦且濶焉如許則徒恃此心之同耳執事有過人之俊而自處於謙約有經世之蘊而自托於晦歲青峰流水花檻藥欄超然隱君子之趣若非世俗之所能溷者而階庭子弟方且振翱仕途揚鑣道閭過長沙而思賈誼之達政窺五溪而想伏波之立功蓋常挹其議論熟其詩文江岷源委蓋有自来則吾之於君雖未見猶見也說疇昔多幸辱君賜之主維以令弟某之長媛許適小兒某甚盛心也結言以來亦三四年惟恐其箕裘之不能襲詩禮之不能勗以爲君辱而孰敢有意於早成婚哉

年及志學亦差若可進萬山諸賢過而撫之曰足以賦桃夭矣
敢用曆吉以是月丁卯奉書納幣于廡下所謂不以微薄廢者
惟道義歲寒將恃此爲萬世子孫之福

與李方心

某欲拜書久矣而輒墮因循中承尊字此時欲寫數篇鄙作求
教冗故未及即答旣而擬十月間必一到印山因得求見則面
語爲詳而筆墨可廢也乃多雨久稽故鄉竟不果往雖情如此
而欲不自媿罪不可也即辰霜氣益嚴想尊候佳適不知日食
米可幾何去年聞喜食麵亦果否每觀牋翰辭氣蒼然只似公
健時未嘗不以喜以敬科舉興公固尊宿不復屑而某輩亦老
項不作數矣幼聞旗鈴晚復見之可慨也今之時文往往夫人
自以爲能鑄驚驥一驅無復知媿然世間伯樂實不常有則文

體固未可以復古也春間有袁氏者欲作賞試適與申齋皆不
暇命題多非本意今見謂有二三卷然全未考青原賦亦未
見好者或得佳作當錄呈也六月來又與申齋冲所約爲課試
意以激勵兒輩初行此規作者頗多今則有題而無卷矣至如
學校季試所謂彌望皆黃茅白蒿誠不曉其何故明經古以爲
難今雖但記見成註脚亦未見其人某少不力學今聰明荒耗
其遺忘不待數華以後况欲求斯言於科舉之外耶先生學有
淵源平昔所得還可疏示一二否某近留南嶺有數篇應酬文
字謾錄求教以塞嚴命適求斯文亦復可嘆眼中巨擘非不滂
葩駿動一時意向病在誇多求捷不知古人務必傳者亦爾否
也如某輩但能識其如此耳先生以爲何如

與滕玉霄

自明公之歸洪也不及一書奉問起居自以爲心之所嚮千里如對固不計乎書問之疏數也頗聞辭榮授老以詩書賓客自娛四方所共高而朝廷之倚注方切安車召還盛之白玉行且見之僕窮經山中日向皓首去秋亦嘗來洪非爲科舉亦欲因以見明公乃聞有臨川之行科舉懸於一夫之去取所不足惜所惜者到洪而不一見明公耳明公名滿天下齒牙餘論所到諒不靳也親友李兄迪吉肯堂殿講之諸孫談命竒中自號心天欲掛一簾於浦雲山雨間非借明公大手以表章之不可故介僕納拜於庭下倘辱回盼則其長價豈特右軍八角扇哉干冒崇嚴臨楮愧悚尚期厚加珍愛以膺顯擢不具

與羅養正

自君入南不敢奉書以候起居以君方驅馳於國事則山林放逸之民固無事乎書也如聞驛傳上下亦蒙寄聲深見不忘獨媿僕失於瞻伺不及走見耳一命之士苟存心於愛物於人必有所濟矧執事以英傑之才明敏之見參贊憲幙事無不統一道之民蒙惠必多此流聲之所以遠布也臺省需賢責實縱觀在此行矣某今歲仍城居亦時到鄉數與明宗羣從令似中舍相會皆安樂無他因城西吳某以臺檄補憲掾謹勒此以寄鄉慕某爲方崖御史之懿戚俊爽有文學草廬吳公曼碩揭公皆所矜異以鄉人之情振德而輔翼之幸甚相望甚邇未由參晤惟冀保練以亨奮自愛不宣

與鄧善之代蕭煥有

往留京師辱不以其年少學劣進而教之周旋累年所以敬言其不及而勗其成者良至求知已於天下舍公其誰賦歸以來從

游殆絕豈無他人以爲獲交於明公則所謂於山見終南於水見黃河誠不敢以泛然他挹也明公以昭代之才久處嚴近議論高朝庭聲名滿天下班行之間殆鮮其比中間假節南來首以文行重儒風復以憲綱範俗弊其所素蓄當益以展布竊以士君子之仕也所以行道而道之所寓也惟文章足以飾皇猷惟政事足以振世運方今之官爵雖皆可行志而惟館閣可以不負其文章惟風憲可以必達其政事明公之文章則居館閣政事則位風憲矣他有美官復何足道外此則尚未爲宰相耳蘇明允有言天子之宰相可以生人可以殺人而求一言之幾於道則不可得明公先有其不可得者宰相直外物非明公之所難也其曩爲桃源州教不數月以歸杜門讀書又二三年始受臨江照磨簿書勸勸苦無自得之趣然心之不可必不肯苟

隨雖時有平反而獲罪於上下至矣以是復奉身而退其於仕進豈不甚可嘆哉然皆不足爲明公道獨惟明公天下所同慕願一見而不獲而某幸有疇昔之好乃不能走千里以盡所欲言以此抱媿殊耿耿也偶聞有便人書此薄寄拳切錢塘素所欲往明公在焉會在旦夕惟厚加保練以國家斯文自愛不備

答王宜父

歲昨別後每懷先公從游之好內傷於心自謂文字之寄痛涕泗之示感不足言也因念友道之薄於今爲甚大家貴人則必於勢利之足以軒輊者傾倒焉鄙夫游士則必於勢利之足以相振者奔走焉否則未有不難合而易踈者也先公之於僕僕之於先公皆在二者之外是以愈久而彌敦既沒而不朽而豈流俗所能知哉頗聞執事居憂讀禮動法古人四境流譽於

是足以爲梅翁之子矣於是僕之見執事將如見梅翁矣然不敢以書相勞苦者懼徒溷孝思也新年相望益重馳慕晨興得書慰感兼集非獨不忘其契闊而且有以寵光其荒寂誼當引却而不敢受恐或者以爲不情耳於昭盛心藏之無斁宅兆之卜固不可輕然陰陽使人多畏當擇見之高者謀之遺藁已錄出甚善其間編摩校治昔者尊公用力勤矣亦不可不過目而後入梓至於述行昆仲亦當先自編類雖其大節昭著在人而必有隱德非外人所盡知者推先公之心雖十易藁不爲厭也

荅蕭敷先

代長男立敬

惟婚姻辭無不腆而浮恭長語則不敢瀆且先施實命之矣故亦直叙梗槩以復于左右每念異時名門諸老寤寐詩書虛右以迎四方之賓游設醴以肅當代之耆碩而老人大父定交尚

矣並鞅文場聯鑣京國意氣之盛豈特足以爲一時之士契將百世子孫綢繆因依之好未必不基於此矣親家執事禮樂聞家珪璋雅士少而嗜禮處純綺而能有其風壯者有猷閎輪雲而能教其變以順親成身爲先務以教子明經爲彞程方今黃卷夜燈弦誦比屋文昌之光屬天漢擢魁蘭宮上軼乎壬戌之芳躅固可俟也門寒宗敝理之乘除消息且不敢有頡頏相先之想而况婚姻禮云乎哉乃昨歲有談令季子明秀可妻者欲以長弱息某室焉某聞而疑之蓋不敢以偶於大者今昔所同而功遠乃道執事之心所厚者斯文所薄者世俗所急者道義所棄者資裝是以有取不然豈其食魚而無魴鯉哉書幣有嚴辭曰納絲敢不下拜歲寒初心惠徼無疆之福復自此始

與羅志行

惟兩漢專門之學迨唐猶盛至先宋行其義爲文於是辭華尚而經術踈矣國朝崇雅黜浮以實取士而後士以通經學古爲高然講理而不壞於聖賢爲文而不失於規矩者蓋亦良少學宗大雅四方所推尊公旣以英聲茂實振鐸而漲其流執事又以青年美才橫經而繼其響光前聞而掇世科茲亦何難小孫年浸以長求師而學正喫緊用工時也歲月荏苒再教者有竭盡不倦之工學者無憤發自拔之意篋裘之繼甚爲凜然敬以書請于左右倘不鄙夷肯爲惠來則煇葵讀書相與切磋究之豈惟二三子之幸亦僕衰老之願也

與楊西有

惟異時舊家相望喬木連雲弦誦之韻頑衣冠之還往何其盛也時運乘除而疇昔會合之樂殆不可數各城以來時拜忠衰

於鄉校以爲斯人耿光至今照耀乎宇宙而其子孫近在丘里乃不得時時相與劇談而縱論可媿也有如親家執事識時之偉見用世之長材持論公平而名德足以重鄉里高義倘儻而蒙華足以交公卿一門子弟凌厲斯文皆有傲倪斯文之想昌運所會蒲輪之召老杏園之燕少行並見之某少不適俗惟有慕乎前修之所爲以爲吾家公是靜春之道德文章可勉而至時志蹉跎家聲益冷但浩然天地間差少媿耳兒女婚姻之責曾未能畢而吾兒之子琳復以締婚媾蓋宗黨過爲悠揚執事不以其清約而許以令玉女室焉某聞而喜曰是鄉里舊衣冠之裔也會聚往還將不復盛於今日乎則敢廟焉而書請于左右微福結言其自高曾而下實寵嘉之

荅鄧以道

惟師之重古人所先春秋戰國聖賢之教未遠在所不論下至西漢皆專門受業弟子以千數至唐河汾之後其道稍泯故韓退之抗顏爲師說而柳子厚荅韋中立言尤斷斷焉若宋初泰山徂徠湖學之盛則又古道之復起也退之又言愛其子擇師而教之則徃教之習久矣士至於徃教豈古道哉雖然以其猶知所尊慕則不可不傳也曩自科舉之廢世相率爲詩章雜學固無事於道科舉既復弦誦相聞而其事以記誦爲長有司之決得失者又多踈劣於是文章不必有法學者不必有師未論求學雖徃教者特爲章字句讀之不知者設耳恭惟執事以世家喬木之胄聞先儒宿學之傳明經垂後樹義恤孤家庭之間不論弱冠而不廢乎學又不遠百里之外下采愚陋而使兄子師友焉此其追古道遠俗流甚矣固不肖之所願聞也書幣之勤敢不下拜雖然愚請有以進於是師資之有功在於學者之自慕子弟之率教在於父兄之所行匠氏之成鑪妙奪乎造化之速宋人之刻楮乃徒爲歲月之淹執事以爲何如冬氣益寒伏惟厚加保練不宣

復荅鄧以道

聞執事之名久矣蓋其見聞議論有故家之遺風而練達之材可以備明時之實用恨不及一識不謂今者過聽辱賜書進之以爲塾客此如柳子厚所謂起病賴之駒覽足之浮圖所以承乏心切自慶疇昔向慕之好遂得爲知己也奉以周旋其敢自後又念君子之交貴于始進之不苟僕平生於朋友苟受其托必盡其責故成材卒業者亦不少至如窮年堅坐則以家累哉未能頗聞執事處齋者必以月計雖有明效大驗不足以易歲

月之積龍溪初書及希見教皆謂不復事此及見其再書與執事之副墨則又不然此所以遲疑而不敢奉命也與其少曠於他時而取謹不若自揣於今日而先審於進退乃所以荅執事下采之盛心也執事以專坐爲益而僕以開發爲長未信而言君子所誠敢奉聘幣以返左右伏惟亮之幸甚人生會合之期誠有不偶後此相逢尚希面謝不宣

荅王志文

歲裏辱書深佩不忘新年相望無從嗣音想履候安摠得帖尤慰見喻叙述先公行實此揚親之大節誥辱知最厚誼不敢辭然恐筆墨枯朽不足以發潛光耳至於銘文今世常欲得顯宦爲之而不顧其文之足以傳否志文卓識固當有以異於流俗也未會切冀珍重不宣

與彭宗富

尚憶東湖談咲之樂且兩年矣自後雖常邂逅而聚散匆匆祇重思慕歲事肇新緬想綵服高堂稱觴介壽福與春新伯仲以明朗俊傑之才加磨礪講切之功如出匣之劍所向無前而且淬之越砥益銳其鋒其遡霄漢而取青紫也必矣獨恨踈濶不得時扣新意以發憤人迺者辱訪又以留山中遂失迎候甚爲悵然醢壺分餉非篤吾味之同不及此君非掠美我獲飲醇爲惠侈矣懷佩何如何特重有入府之便傾竭欲言臨墨幸切

與鮮辰叟

說於君有平生之好而會晤差池動二歲然心所嚮往往不以是隔也橫經鄰郡教思益布脩塗雋武日引而升於是不負所學矣友人曾君存我舊與同客方崖許繼又與名父子後先客

古步文字蔚爲時秀鄉校小試往往多前列今年館授教兩之下自賀知音有人然吾不獨爲存我賀君以斯文師倡一邑使和應者得存我非特足以見吾鄉之多才而古今雅調發於衆樂之中亦文字之至樂也因其行輒寄此調問起居未會切冀厚加保毓不宣

與王顏庭

比承賜訪示以高文實有古意浮梁二篇發越盡而不爲羨美梅邊情詞慷慨記顏樂能尋顏子樂處記停雲能言陶公所未言甚善甚善自世尚恠詭而指大雅爲腐自俗眩葩藻而斥理致爲常求其意足以宿道文足以宣心者駸不多見老蘇常讀鳧繹集謂今世無復能爲此文者矣僕於君亦云知多有佳作恨未全見天氣尚熱想燕處清適便中勤此奉起居

與正聲吾

洗去冬於大旆之出偵伺不謹不及走送自後聞自抗浙而京師山川都邑之勝麗古今世代之興廢領覽殆盡人生茲遊固已竒絕而又取麾持節易若拾芥伏想錦歸之初賓游鄉黨排前稱慶草木亦與有矜色相如之擊矢前驅買臣之車馬填道不是過也且聞階庭蘭玉皆將頡頏青雲一門袍笏昌蓮亭嘉誠口多難羨正欲進賀拘掇未能輒奉尺書以道萬一今似扶闈之行已當趨裝又有周旋之便不敢拜字別附致拳切

與袁巽堂

伏自去春得奉色笑雖共踈闊而動履之吉無不備悉比審司征滿扶解篆還鄉而令子路教復領新除一堂之間袍笏相映可以見山窓先生之澤可以見巽堂體用之材可以見喬木故

家之地山川氣運之回復既盛於昔必當復驗于今也說爲門
墻老賓客助喜特甚適留山中兩日方抵城又未能造見姑先
奉尺書雖無能贊一辭亦可觀其心耳尚存惓惓倚俟而慶

與歐陽石泉

說比者再領尊字備悉亦已別具報矣審知留洪有暇娛親甚
樂而令子有索女之喜長幼共康一堂四世此真福也人生仕
宦步字百里上有遐齡之母下有慰情之孫誠可多羨獨惜阻
脩不得與慶爲歎微禮遠奉聊寄情耳丈人以何日戒行天氣
浸熱若得五月到任所爲佳蓋一則此時道塗或者尚未隆暑
且旣擇榮上之日到彼稍早凡事當從容也

答秋江

說聞君家忠厚之稱久矣百年之計種之以德夫自高祖以至
今日豈百年哉名父令子所以培植者有光無替作亭覽勝飲
酒賦詩亭中之長者優游几杖將與園綺而齊壽壯者磨礪翰
墨將與晁董而俱升豈非世德之驗乎辱命之記媿筆力衰朽
無以發揮耳令親就道來訪袖出手書尤見崇篤斯文之意至
於餉之以禮本不敢受恐來不知者之疑也頓首祇拜何媿如
之

又答秋江

說於翰墨間相知極久未得一會晤爲歎孟秋知將入府繼聞
興盡深爲悵然君家積累世衣冠之盛而名父令子又炳炳愈
常足以振後而光前乃復思所以發先曾大父之潛德而以表
墓之筆見屬深懼衰朽不能稱塞雅懷過塵謝言寵以佳貺其
何媿如之傳曰先祖有美而弗知不智也知而弗以傳不仁也

足下之爲人孫可謂仁智者倘入石有拓本望示及幸甚

慰李履善

訖昨聞君之有父喪也以客外不獲走唁夙擬開歲一致此慟及抵仙境辱令兄賜訪之後旋感風失聲繼復馳歸竟以書行愧當何如常憶往年陪冲所一登君子之堂三父皆精神未艾羣從兄弟玉立環侍剪燭夜分留連劇論使客忘去何其藹如也曾未幾何方心先生乘雲而仙本從相繼酷沒嘉植欲盡鄉國盡傷令尊公復奄棄色養當時鄉曲往還之樂逝者丘山如之何不涕泗交頤也執事居喪讀禮憂痛柰何訖旣不能面唁相望黯然兼事當在何時尚或可與執紼之後以追其愧耳雪伯霜仲棘冠纒纒敢并致下意

慰楊天鵬

聞君之有母夫人之喪又矣而一書亦墮因循何其可媿也然純孝之痛久而彌新則寬譬亦不可以緩廢惟古人事親樂莫樂於家方隆而無虞年方盛而及祿執事高堂華庭輿豐饌以優游暇適之日盡婉愉娛養之歡顧四境所同羨而又芝之揜除且下花誥之渥非遙少須數年疊觀盛事豈非人間母子之至願何居作物爲此缺然姻友爲之惋傷矧身處其痛將何以爲心然倚伏之不齊在天揚立之可必在我執事之所自樹旣足以重慰斯母少抑憂毀以副爰慕者之所期幸甚茲乘便翔輒往辦香少寄拳切臨墨黯然

慰羅師尹

訖於先公之喪聞訃旣後而奉慰尤遲故援筆而先媿也惟先公以忠厚爲一門之福以老成爲一鄉之望高堂四時彩服後

先桑麻話卯酒之春燈火課韓檠之夜人間至樂何以踰此尚
憶去秋道便奉謁瞻其衣冠之高古議論之英發謂當期願未
艾而俯仰之間遽隔今古雖在先公爲無憾而人子至情百年
猶以爲短荼毒疼割固當何如孰正欲躬造總締竟不能遂輒
往辦香聊寓一哀相望惟重黯然

慰蕭國陽

疇昔曠野相遇悲不能言然不敢即宮而吊坐念人生禍福禮
所不免而二母之喪萃於一日則仁人孝子之心誠無以堪處
也僕周旋名門日久切知孝養純篤歲時綵侍東西相映人間
母子之樂奚以過此叢哀疊疊驟焉繼之何作物者能厚其平
而不能少貸於今遂爲是過酷也茹毒嚼苦當尤不可以常情
論相望百里亦何以爲先生解哉歲新即欲致辦香而因循不
飭惧其彌久輒以書先旦夕過門專圖面唁以旣

慰王庭望

奉書之初乃以唁語臨筆黯然而日者高堂禍變屬留滯于外歸
而聞訃悼怛不能自已靖惟人生事親苟不獲遂具慶之願則
尤以偏侍爲重古人冰魚冬笋必極人子之所難良以此也且
聞執事出盡應門之勞入盡養志之道家事纖悉一不以累其
心蓋亦自有足以爲娛樂者何若惡劇不待百年孝純天賦荼
毒奈何孰之次兒得倩門墻升堂稱壽以效半子之情方且有
俟而今遽已矣何天道之好乖而人事之不可知如此也初欲
令其躬致一哀適體中小疾不果行一書寫情既墮臯緩亦不
復以寬譬語進尚惟節抑以膺倚禍之福相望無任拳拳

慰艾公善

誥於先公道心先生有斯文眷屬之誼昨歲之初聞變也悲悼
盈襟然而既不能躬唁復不能致尺書正坐時故纏綿之累而
亦孰知其心哉念惟先公雄文雅製鏗鏘一時譬如膾炙無不
同嗜至於粹字冲襟其襲於人也又如和風之被物名酒之入
肌無賢不肖皆爲酣暢此其去柳下惠黃叔度固當不遠使羽
儀當時薰其德而化者宜何如而少不能使第一之償老不能
爲命之待此其理之不可曉者一也七十之身九十之母省檄
再三旨甘四集母子相娛之日不爲不長矣然天能使是母之
有名子以揚其親有上壽以享其養而不能使先公之終養其
母此其理之不可曉者二也雖然合門數百指詩禮桑麻昌熾
如春而諸孫又以儒選方相繼而別起造物之所以厚先公者
未爲不至矣送終盡禮素車縻至追念平生負媿千萬輒爲哀
詩三章以馮風致之萬一庶幾有知尚爲一慨然也

慰李方心

誥與尊翁別久矣九月辱書徵近作此時意欲一到印山專從
公傾倒既又不能兒輩復遞至手書則十一月初也月望間繕
寫鄙文數篇及書一通因未暇寄乃一日偶過方崖家有曾兄
從吾談尊翁仙去初不謂然或曰此懿戚也宜信已而傳者浸
多於是與素相厚者出涕相吊幾先來復得訃音且知屬纊之
際棺槨衣衾之無憾蓋哀心至此已十日而猶如初聞也誥於
尊翁本有先後進之分斯文相收乃忘輩行其間誼氣之相投
出處之相與議論之脗合有不可以數者獨恨相知百里外不
得朝夕親炙耳計公之拳拳於余余之拳拳於公皆他人所不
論也死生契闊遂至於此可哀也已蓋取手書觀之乃未病前

數日所作孰以爲此死者哉執事驟罹此痛荼毒奈何然一家之責方在一身朋友於是重有所望則僻踊哭泣特孝之一固當有所節也詵有懷耿耿當寫爲哀辭以發春首詣靈几以致掬淚茲先以書歲寒且甚相望黯然

慰毛大秀

邇者先大夫之喪與吾黨歎惋相吊欲奉唁而未能手書遠馳墓銘盈帖讀之不自知其潛然也先大夫以明經之學負善賦之聲咳唾隨風皆成珠玉故拾其餘昇者猶得以追安期子喬而爲之伍時不我與高遯山林弦歌足以寓其樂泉石足以佚其老一堂四世綵服後先蓋人間詩書之福未有過此者去而上仙政復何憾而異代豐芑之思歲寒碩果之感爵而不能什于懷况孝子慈孫痛當何如遠日有期痛當載道所以襄奉所以顯揚往往皆是屬羈於俗不得效執紼之敬在來觀之列謹再尺書復爲輓詩三章籍此少見葑菲於存歿翔風行雲矯首黯然

慰蕭遠心

某於名門內變宜朝聞而夕吊也乃懷此心至今始能托之尺書羞媿過於悲矣今姪興吾州判家學有素盛年高科謂當騁騏驎於長途奮鵬鷲於青霄造物擬之以應世道之復銅章縱車魯未小試而遽折其軸友朋之間尤有咨惋而掩泣况在父兄何以爲情然而富貴死生皆莫之爲而爲者向之賀門旣非偶然今之吊閭要亦當以前定視之也先生學宿於理諒於悲悼之中必有權度薄奠持前聊致意耳歲晏寒驕伏惟以吾道自愛臨墨無任奉切

慰李存吾

今年多得會晤然被匆匆每見每不盡意自八月來稍踈闊而君亦從是居憂矣相望悲痛有不待憑棺握手而後為傷且吊也先大夫平生以一經自樹立其於斯文研微析妙可謂致力深而用心苦矣閱世悠悠一笑良難脫抱省檄使由是而畧展所學曾何足以慰其萬一而造物之靳於我輩者若此世間少年臯比說法何必有學學與命殆真冰炭之不可兼乎昌黎有云賢者傳一命則隨以死而東坡於董傳允所深慨古今一理甚未可曉也孝純天賦荼毒當何以堪然昔之能揚立而慰其親於土中者皆以患難而得寬譬常語不足為左右道也詵未能躬唁姑托之書而黯寒之懷非面莫究

慰羅元夫

始聞君有母之喪驚怛之餘即欲走吊竟墮因循愧當何如人生二親皆莫報之恩而母道尤可痛故筍盤之饌柳輿之奉常極意而有所不足然而伯仲之競爽其所樹立皆足以慰親之心歲時奉觴各致甘旨則亦可以一咲而永日矧其間驅馳仕路分祿助珍壽窮而養給則固無甚憾乎人間也人子至情百年猶以為短至足猶以為憾伯仲之荼毒痛苦固非吾言之所可解也隆暑彌熾伏惟孝履支持強自寬抑

桂隱文集卷三終



國家圖書館, NATIONAL CENTRAL LIBRARY, TAIWAN, R.O.C.

卷一
三

桂隱文集卷四

雜著

說

劉紹平號平悟

扁鵲得長素君要劑故能洞見人腠理腸胃孫思邈得龍翁三十方故能名千載療百世蓋醫之神者其初必有鬼物為之授受要非臆度意揣所能到也安成良醫劉此山其先嘗遇異人俾以丹繼俾以善訣由是醫益神此山身長魁梧端視徐行治病尤奇驗人家爭迎至恐後而此山怡然未嘗有矜色汲汲求貧者病活之此山字紹平自號平悟夫天下之窮林喬木多矣下至一州一邑必有名區勝境可為美稱者故孫復號稱大山石守道號稱徂徠真希元自號西山揚伯子自號東山近世前

輩亦有號南山號崑崙者大抵非張大之過則期望之高今紹平乃取平崕以自號按山有崕崕者山之隱而不耀者也夫其隱而不耀者則何如其平也夫抱已顯之技而托之於甚隱挾可高之名而處之以甚平紹平之用心可見矣今夫山在天地間隆隆奔赴斗起千丈出雲霞而隔天日者非不高矣然數節之後其勢壹落無復能環之如兒孫者維之勢之平者則常綿綿延延亘千里而不止紹平之用心其將使百世爲此乎歟吾聞古之仙人無不妙於方藥然往往皆隱君子爲之今是家父子神於技隱於德吾疑其入之所以授其先者不獨方藥也劉氏之福其未艾乎

劉漢隱字

廬陵劉賓遠字漢隱有才學連年館城中還往吾門以漢隱之

義謂余言余謂三代以前如耕莘築岩釣渭之夫皆深隱而不出及其一旦而出則使世道爲堯舜不可尚矣下至虞仲夷逸朱張少連之徒荷簣耦耕之士皆經聖人評論不可復有褒貶今君之於隱但以漢言然西漢隱士無傳商山四皓其傑然者歟東漢逸民傳者十八其立身尚志亦皆有可觀然能使東漢二百年高人義士清風峻節耿耿相望則皆嚴子陵有以倡之其末也又有躬耕南陽抱膝長嘯雖在十八傳之外然方之伊傳尚父固無媿也然則西漢之隱固有媿於東漢多矣今君於兩漢之隱宜何從乎蓋高之爲孔子陵次之爲四皓至若樊英輩之純盜虛聲者固無足取也君尚勉之

贊

見翁真容

其幼而無怙也委孤楫於波濤之流其長而自立也屹傑棟於風雨之秋其應世以才如綸巾羽扇之公瑾其處鄉以善如欸段下澤之少游聲吐洪鐘儀象山立笑諧足以霑四坐之磊砢忠厚足以化平昔之怨尤能容物似千頃之波不做物似百尺之接蓋其不可及者積學之子孫如謝氏之江左而種德之家世如富公之青州也

頌

三節六桂堂

北庭僕氏世出高昌皇元龍興以義來內附至莊簡益顯莊簡子都運早備宿衛克有勲勞遷為廣東鹽運使子正議大夫吉安監郡始留豫章居焉於所居建三節六桂堂而家愈大初都運在廣東朝廷方征南交護督漕餉會海盜大集轉鬪失利以

罵賊死事聞上嘉其節謚忠愍贈守忠全節功臣時夫人方盛年確守貞節母子相依倚為生正議甫數歲母嘗病劇割股和藥露禱獲安天下謂之三節正議五子世玉世學世德世南世則其猶子世文宿嗜學如饑渴科舉興遂連登上第布列中外天下謂之六桂議者又曰非三節不足以兆六桂非六桂不足以顯三節合為一堂實宜古之君子為善而得報於天者有矣然徃徃多曰種德于公欲高大其門自謂活人實氏五桂並芳世謂其好施王氏種三槐以待三公亦恃其保符彥卿夫活人與好施皆為善然安知不出於有意以揣摩之心而要于天天雖不爽其福而君子猶薄之若僕氏之獲福則純乎天理而已蓋不肯辱其君不忍忘其夫其心豈有望報於天者其割股救母此心但以答母為福豈計及其子孫哉故天理與種德異天

理發於公而無所窺擬種德雖發於公而種之必望其報以是
觀之僕氏之福德過人遠矣詵惟古之有盛德必有頌魯僖公
脩泮水人猶頌之况僕氏之盛德舍頌不足以爲美乃作頌曰
猗歟僕氏著迹于唐武功文德有烈其光卻連桓桓佐我烈祖
殺身成仁遂一海宇曰維忠愍大猷蠻徒橫船芥鉞日靖海潮
嗟彼狂狷將蹈愈噬邂逅投命垂耀百世帝若曰嘻維汝盡忠
錫汝美謚以崇厥功鐵駢金戈助擊羣醜邦人異之朝祀以久
高堂渥丹自誓栢舟所見者義貞烈誰倚正議在髣髴著厥孝
刲股療母至性誰教三節之大萃于一堂上契天道下正人綱
春官取士六擢其桂青雲聯鑣銀漢並袂懿哉正議監郡廬陵
耆稚載道言觀其旗黃堂深廣庭有嘉木公坐于堂白日肅肅
民曰我公郡之黃龔士曰匪伊爲時獲龍朝有良臣家有才子

名在天下功在國史

跋

題危大樸與鄧子明書後

右宣文閣經筵檢討危素大樸所與鄧晉子明二書子明宋禮
部郎官兼學士院權直申齋鄧先生孫也禮部登景定壬戌第
與大樸曾祖炎震子仁同年宋且亡禮部墮駕入海親見崖山
戰敗陸秀夫抱幼君沉海遂亦蹈海者再爲北軍所鉤致不死
知當時興亡事極詳後文丞相囚金陵禮部實與俱日夜相與
唱和詩歌以娛悲紆痛張弘範元帥以客禮謁請爲其子師及
歸廬陵以所聞見集錄爲野史若干卷歲不示人今七十餘年
遇聖朝脩遼金宋三史詔求天下故史遺文大樸實嚙朝命來
江西至廬陵求禮部所爲書子明雖誼不敢秘值有祖母之喪

不即送上大樸先後有此二書嗚呼自古亡國多矣未有百戰
海島擊舟自沉其間忠臣義士貞夫節婦死者何限天下不能
盡知禮部此書誠不可少壬戌科取士六百三十五人多名士
廬陵則禮部與涇溪劉先生在焉禮部與子仁雖同榜未知其
相厚與否今子孫異代數十年之後交游方深大樸揚聲中朝
為時名雋子明不墜世學抱其先祖所著上進史館以成前代
之書世遠家存人亡言在皆非偶然有可感者有可敬者余以
耄老伏處山林尚及見之且先叔祖鎔子叔父士器與危鄧二
氏皆有壬戌年家之好因書以識感慨云

題浦陽鄭氏義門家範後

余少時觀司馬公家範顏氏家訓朱子家禮及夫桐木之韓花
樹之常所著家法知中州前輩軌範未嘗不同但世道趨於下

此意遂希闊鮮有聞有識者每為之一慨今觀浦城鄭氏家規
則知舊人典刑尚未泯也然合族而居原於家之有法家法之
正原於詩書之漸磨見聞之講貫以詩書為家宜其齊且穆也
鄭氏九世一堂同食此固難矣世豈有家法如此之正而町畦
異爨者哉唐張公藝雖曰九世同居及高宗問其何以能若是
則大書忍字百餘以對嗚呼忍而後能如此亦出於勉強矣其
視鄭氏豈不有所愧哉

書蕭煥有臨江為政碑後

余舊閱古人平反輒為反獲數過喜快若親見又恨今世無復
見此人及其見斥鬼神破妖異則又疑史氏或採摭之過今觀
蕭君煥有臨江所為政則知古今人真無不相及而史皆信史
也夫知屈抑而不敢言見像偶而輒下拜皆怵於禍福也天下

惟不怵於禍福者可以行其志天下惟學而有守者不怵於禍
福蕭君之政通幽明而無間其要不越於學耳今方閉門益究
經史則其政未可量也仕而優則學學而優則仕蕭君有焉

跋林常春家藏紹興蘭書

古今世祿之家子孫踈傲不知厥先創業之難狀其原緒者多
矣春秋傳稱王叔不能舉其要是也高門大第崇臺列榭一再
傳而為墟亦多矣漢史稱此屋閭人如傳舍是也是故庾信羅
含之故宅屢易異姓溫公康節之契約流落他人良可嘍也友
人林君常春示余其家所藏紹興蘭書更歷離亂今二百數十
年而屋與契俱存不其難哉天之將昌林氏觀此可知矣

書曾成玉所贄前御史哈喇召觀圖及所贄詩後

今燕訪監司哈喇公稟天地剛正之氣負霜雪凜冽之操其立
中朝祗排推貴多矣近歲為御史又以直言劾奏大臣坐是遠
貶南荒所過道路無敢親比之者獨廬陵曾成玉作詩遞見追
送不憚遠可謂有義氣矣因念漢黨錮之禍唐揚臨賀宋胡新
州諸賢之貶平生親友弃去如穢乃獨有一二耿介不顧死生
而慕義因以得名曾成玉豈其人哉今又為詩百詠以見公志
跡其前所為必非以此為取憐求媚者故贄以壯其行云

跋四君圖後

古今士大夫人品之高下原於心術之正邪心術之正邪又係
於師友淵源之所自戰國之士所師者轉丸祛篋為口吻之驗
全身之區其見鄙妾婦固宜若戴宗彭宣輩師安昌侯張禹此
豈復磊磊落落之名節也哉子夏之學為田子方再傳為莊周
君子謂其激於拘繫之過荀卿之學為李斯又得於其師見趨

議論之偏嗟夫學術所關大矣甚可畏也宋承五季極弊之後而士大夫嘉言善行比隆三代其故何哉以其師道之正非前代比耳若胡學閔洛紫陽之徒黨扶樹教化其功何可勝述比季世秘監歐陽公與齊先生以雄文遠學為世師表一時名士多出其門而信國文公於先生為嫡孫行大傳劉公禮部鄧公則高第也信國既以名節高百代而大傳禮部亦卒為宋全人以文章重天下宋雖亡國而景光無窮先生力也先生當賈呂勢焰薰灼力陳其姦萬死不顧使遇事變豈肯全軀保妻子要之其教學者皆本仁義忠孝故其効如此嗚呼其可仰也夫

跋文信公和東坡赤壁詞後

坡公此詞妙絕百代然恨鮮得其所自書者信國文公所和雄詞直氣不相上下而真蹟流落如新尤可謂二美具矣昔朱文公少時嘗學曹表劉共父學鹿脯帖文公以其字畫古誦之共父謂子所學者唐之忠臣公所學者篆賦何論古今文公終身以為媿嗚呼此書距今纔四十年其可敬慕何必在千載之上哉

附文信公和詞

乾坤許大算蛟龍元不是池中物風雨牢愁無著處那更寒蛩四壁橫梨賦詩登樓作賦萬事空中雪江流如此方來還有雄傑堪嘆一葉飄零重來淮水涼風初發鏡裏未顏都變盡只有丹心難滅去去龍沙向江南回首青山如髮故人應念杜鵑枝上殘月

題李氏所藏先世交游翰墨

內姪李同立仁藏其先祖傳園翁祖深齋主簿父伯英學子正三

世所交名公翰墨寶之如珙璧自傳園至今且五十年中更離
亂人事升沉伯英立仁皆早孤而能寶此難矣傳園翁博學多
文及交東山楊公大小山二蕭公東南名士多相與今獨存約
山朱公一帖深齋穎悟絕人未弱冠文章川湧山拔凌厲一時
約山諸公皆期以國器交將必天下士文山須溪心遠尤篤密
往還書問最多嘗與文山心遠共作論如聯句各手書于篇寶
祐丙辰與凡肯堂及文山同赴省中途屢聯句爲賦論旣而肯
堂省魁文山殿魁皆歎歷顯要先生獨至咸淳甲戌方第旣沒
族姪鶴田狀其行須溪爲銘誌哀特甚今獨文山三書心遠一
書鶴田行狀藁存而諸公往還書翰聯句賦論須溪手書墓銘
皆不見伯英少游燕邵菴松雪善之伯長諸鉅公特相厚翰墨
尤多今鄧公詩亦不復見以是知三世所交游翰墨存者特十
百之一二豈不愈可寶哉余於傳園公爲外孫幼嘗往還外氏
凡前所稱翰墨多親見之今觀此卷固傷其不免於流落而尤
以其能寶爲喜淵明凱風寒泉之思羊曇西州丘山之痛睠然
于懷故書此不敢簡畧云

書揭先生所書千字文

余與蕭氏交舊矣元統甲戌乙亥間於字有家見今翰林學士
揭公手書千字文正直端楷如刀畫玉心甚重之時坐有善書者
張漢英尤手書之不置後三年字有酷歿其所藏書畫不得復
見漢英一日於他人家偶見此卷曰噫此故人字有所藏也問
其所從來則字有之豎童盜而鬻之也乃歸其值丐而藏諸家
又四年漢英出示此卷求嘗與字有往來者叙其故余念朋友
死生離合物之變遷流落皆有可感者此卷藏於漢英猶幸爲

不失所也

書虞邵菴送體仁叙後

邵菴虞先生少有仙才靈氣侍袞龍香案之側數十年天下之異人方士皆得博察而徧識其於道所得超矣晚歲山中所養愈熟至正三年臘未盡三日偶過廬陵弭節玄妙觀朝天閣常喜夜與道士剪燭談道明年正月三日甲子子時曙欲動先生未睡也獨與道士曾體仁相携遠虛廊遂坐雲堂上論脩真養虛之法存神守丹之妙語頗密明日遂書其事以遺體仁或疑先生所書者實不書所云也予不及質之邵菴問體仁笑而不言噫邵菴所謂他年相見於閭風玄圃者其亦使子騎麟翳鳳而騷其間歟

表

賀聖誕代吉安路總管

伏以龍飛當御開壽域於九州虎拜稱觴衍皇圖於萬歲乾坤共慶人物咸春欽惟功冠百王道先大極乃聖乃神乃文武運帝德為四海之君曰壽曰福曰康寧錫天下以九疇之福景運及光華之日月春風被錦繡之山河適當五百歲篤生之祥咸致千萬年無疆之祝臣等忝叨守土遠效鳴鳶普天之下率土之濱皆共樂漢主牧民之治如川之至如山之壽誰獨無華封祝聖之心

啓

謁吳太守

伏以虎符分治聲名傳二千石之良鷲渚回春氣象增千萬家之盛江山若為之改觀民吏相望而革心春藹閭閻歡騰鼓角

竊惟後世之大守何異古者之諸侯為國股肱厥有屏翰藩宣
之責作民父母使無嘆息愁恨之聲是以昔朝每重茲選苟克
當予重寄必歷典于名藩故郭細侯自雍郡漁陽而後牧于并
州而黃次翁由維揚潁川而入尹於京兆非惟使惠澤可遍于
鄉國亦欲使別歷以熟其才能大哉治天下之用心蓋亦非衆
人之所能識其惟府尹中州間氣當代偉人牧民有漢河南之
良規河南謂吳公其治郡國常稱為異等律身有晉廣州之家法廣
謂吳公雖酌貪泉而不易其心昔再牧閩溪島洽兩岐之化雨繼
遷守浙湖山歌五袴之春風撓之弗濁澄之弗清服胥吏而超
同列剛亦不吐柔亦不茹抑憂右而惠小民以五事為侯伯之
師以四書為政治之本平反報母此謂高皆美絲衣趨庭之可
娛撫字勞心謂陽城豈以畫戟森兵衛而為樂幸甚青原之千里

聿來皂盖于九天使遐陬遠方始知有大守之重俾深山長谷
爭願識使君之賢有國家當用真儒此其效矣自州郡入為丞
相行且見之某歷落無成侵尋已老書林聘朝藝苑翔夕謾如
韓愈之自勤弟子攀桂先生卧雲母為方平而取笑然思吾仁
吾義之何歎將求老圃老農而為師豈意下車偶蒙問姓居是
邦事大夫之賢者可不盡恭禮于廬按處士之尤焉則非敢望
狀

保王梅邊

伏以徵求遺逸幸逢千載之明時薦舉賢良少見一鄉之公論
庶從學校轉達省堂切見前大學生王其身備美才世推名士
其事親也有溫席扇枕之風其廬墓也有寢苫枕塊之實文詞
高古足領袖於儒生武事優通屢削平於寇難論治體則不媿

於賈誼懷義氣則素慕於仲連雖丘園高蹈之多年而名譽自聞於四境不以應詔是為蔽賢為此保結請申上司以備擢用化為相應

梁文

贈武昌推官聶以道

乘相如駟馬已增鄉里之寵光大于公門閭又啓子孫之昌運
巖名在黃鶴泰山之外氣象重仁山字水之間恭惟某四海清
標百年間氣其英發人皆以為賈誼終軍其廉潔世或比之范
滂揚震其操可以壓湖雲湘雨之勝其風可以掃蠻烟瘴海之
昏天子聞其名謂當在朝廷羽儀之選宰相老其器姑試之州
郡繁劇之間居然以白簡肅萬里之海隅幸甚以花誥慶雙親
於地下天曆中中書奏江華尹聶以道為武昌推官上警曰此

可

題疏

揚忠襄公廟

伏以忠臣義士化為長弘之血而不歸孝子慈孫可使皐陶之
祀而弗求蓋先忠襄死宋難幾三百載而名節在人心有千萬
年霜雪丘墟淒其金陵成敗之一慨春秋俎豆誰非桐鄉愛慕
之不忘而况後人可無祠屋今欲一族共假魯許之田庶幾吾
鄉自有巡遠之廟非真望其福我壽我亦何可不尸之祝之老
柏闕宮嗟歸來兮趙氏之鬼北風西日會有感於荆公之詩

城西延福路脩甃

伏以七里郭三里城共嗟西路之差求九達達一達道安得后
土之常乾柰何泥滑滑而雨蕭蕭况且路漫漫而禽傑傑甃以

硯石宜矣庶幾車徒便之使前覬余今覬金多助出衆力即朝
運甓暮運甓坦途在人心白馬鐵驪汨沒同無復絳老在途之
辱青鞋布襪從此始便歌周道如砥之詩程起脩程福同延福

城東鷺洲石橋

伏以地闊天開以大江而壯上郡北來南去常一葦而駕鷺濤
使待渡者如蟻立於沙汀病涉者希鶴填於河漢今欲成長橋
於鞭石若將以平路而視川水分白鷺山落青天地勢旣自初
而有待海跨金鯢波開玉螻路人可徹夜而行歌非惟王政之
扛梁所當爲亦且城闔之襟袍有其蔽倘用工百萬餘夫能若
鴈蕩即醴水四十七道不遜泉州明日過之鄉里拜何公之馬
其福遠矣子孫乘相如之車

府城西津浮橋

伏以臨流不渡共觀拍岸之驚濤造舟爲橋便擬成梁於平陸
蓋空闊之極不可徒扛而涉十一月往還者衆何用野航之受
兩三人欲追前代之遺規大作東薪之浮舫使履之者無鷓橋
之填漢使望之者如寬道之行空當路必有超鄭卿濟乘之功
諸賢必有效坡山指帶之助人人利涉步步安行父老來看定
記巨鰲群鯨之舊子孫共過誰非高車駟馬之人

高坑竹園石橋

伏以幽谷空山地似睢園之有竹斷橋流水人嗟鄭國之無梁
何可使盈盈一帶之間若真有洋洋千里之隔今欲效海仙之
鞭石便可如靈鵲之填河是在羣賢共成美事臥波龍見不待
插羽翮而過之題柱馬歸將必有子孫之興者

刊忠孝史

伏以事君莫大於忠龍逢比干以義開三代奉親莫先於孝大舜曾子以行師百年故自亘古以來惟此二者爲首今有老於文學之令尹乃欲集其事類於當時已蒙徵入於經筵宜即用工於繡梓諸君能損已費一日共觀人文甚盛甚休可傳可遠聖朝用乎是道所以教四海九州舉世家有其書何啻于千秋萬歲

玄妙觀法堂

伏以玄爲衆妙門瓊館琳宮之幾百載法本真常道羽衣黃冠之千萬年以晨鐘暮鼓來講於是堂可上雨傍風不蔽於其坐必使盤盤焉可以隱相儒迎仙客必使朗朗者可以調素琴閱金經是故撤而新之殿有起而相者杏木梁桂樹棟坐看天近之樓題柳邊院花裏朝共聽書歸之珂佩人間五福聖壽萬年



附錄

桂隱先生行狀

翰林

國史院編脩官

夏以忠撰

先生諱詵字桂翁號桂隱姓劉氏系出長沙定王子孫散居江西臨江之翟斜宋集賢學士敞公是中書舍人敞公非兄弟姪以文學號江右三劉為先生之派族先生先世有諱滔字禹績官大理評事由翟斜徙吉水之南嶺傳六世至彥升彥明昆弟彥升字鵬舉五子競爽第四子儻字端臣生子少齊字思賢以書經領宋紹興癸酉鄉薦是為先生之高祖少齊子黻字德卿宋大學生與陳東上書留李綱被斥歸從誠齋楊文節公游子銓為國學內舍以文學氣節受知文山丞相號麓隱子仁榮字雲祥號習靜與弟化龍及長子元同領宋景定甲子鄉薦世

稱三劉復興明年兄弟俱及進士第雲祥擢授從政郎平陽縣尉先生平陽第四子也母李氏有淑德懿行先生始生平陽公夢晉左丞郝廣基桂林一枝之語故名二歲失王父母五歲能識奇字授以古人詩文輒成誦與羣兒戲設俎豆揖讓進退有不式者即去之七歲而孤九歲而宋亡崎岨兵革中太夫人授以經史寢食不廢先生以穎悟之資奮志不凡尊師取友刻意問學自能樹立於羈旅不墜先業又斥大之年十二能賦論十五爲童子師有持異書詰所難知者先生得書一夕盡其義明日以語或人愧謝去舅氏鶴田肯堂深齋皆名進士咸器重之先輩趙文彭元昊晏宗錫榮節艾幼玉皆知名士優游鄉校雅相敬畏雖科舉已廢猶以其文教學者先生學益力名益起劉氏自翟斜而下益有光焉太學博士劉公辰翁見先生詩文極

稱之禮部郎中鄧公光薦奇其詩賦爲之序引尋命其子受學復列薦名士五人於提舉方崖蕭公泰登先生辭不試後提舉蕭公禹道聘處鄉校始居郡城弟子彌衆曾制幹先之楊縣尉如圭皆忘年交後方崖蕭公爲御史薦以校官鄭公鵬南爲尚書薦以遺逸學山文公爲集賢薦以館職狀上于朝皆不報延祐甲寅科舉制行先生年幾五十有司舉孝弟明經大守強勸之駕先生曰科舉之學吾非不能但學以講道豈以是爲富貴之筌蹄耶辭不就乃隱耶門訓學者以師道自立士子千里裹糧而至一時名家巨室欲其子弟規進取者咸師事之若進士顏成子羅見大如麓輩皆門弟子也先生於其質之不逮者必誘掖其進其俊秀者必力許與故多所成名廬陵胡程弱冠受學先生憐其貧而篤教之及歿先生復哀之而表其墓同門蕭

亦周賀爲刻石焉先生理家豐不踰矩儉必中禮耳目之好一不經心不爲世俗好尚之所淪染母賢子孝聞于遠邇至於冠婚喪祭於禮不違事諸父謹嚴與諸昆季盡恭敬友愛之道先世恒產悉推讓之子姪及門遇以禮而教誨之必以忠信節儉爲本伯氏蚤世其子古臣方幼撫育訓導使有成立古臣死又撫其子如古臣夏氏女死子女俱用羈皆教育而婚嫁之脫卽南嶺祖祠率子姪歲時祭祀正昭穆之序貧族不自給及婚塋不備者皆賑貸之而不責其償焉居常峩冠博帶行規步矩自古君子風從容廬里數十年凡夫稚子皆知起敬公卿大夫士聞其高風莫不聳動而願見之先生未嘗出其所長以自鬻與人交接一主於敬久而不衰心怡氣和不妄語笑苟義有不

可卽毅色正言人莫敢犯嘗言於官府復司戶廳詩人堂于鄉校曰此唐參軍祠可泯沒于僧寺乎吾非以爲名也歸婦氏墳廬奪于豪卒者曰彼弱不自立吾非以爲利也釋誣指逋負后妃王卽錢者數十曰長此安窮無厭將及我非以爲德也晚年進學益勵于初四方求文強屬于門先生手答如流若不用意而理致森嚴莫不歎服有詩文若干卷板行于世曰桂隱集翰林承旨歐陽公玄未識先生而書問頻致稱先生道德之重藻鑒之明其爲文根柢六經屬贅子史躡躑百家淳澆演迤資深取宏榘矧格匠達于宗工不鉢劇心目不稍擢胃腎液古融今自執其鞴靡慮不獲靡施不宜雖未嘗露其雋際廉悍踔勵風發之狀韞玉在擗氣如白虹不可掩抑及叙先生文集有曰余讀先生之文溫柔敦厚歐也明辨雄雋蘇也至論其妙抑豈相師也哉有不可傳以言者矣翰林待制柳公貫稱先生德業之

盛於古人不多讓蓋先覺之士也奎章侍書學士虞公翰林侍
講學士揭公尤相知重至郡從論文累日不忍去既別往復有
書虞公稱先生以英偉之器不肯小出以徇世好卓然如靈光
之在魯風雲變遷三光不爲之蔽虧漢汙載道大陸不爲之昏
墊霜降水涸而松柏後凋沙磧汰除而黃金獨耀區區早持不
足之資以應世退而亦已衰老求如公以伏生之年教授齊魯
不輟何可望其萬一所賜之書驟而讀之如雷雨旣盈千源並
合大江安流不見涯涘萬斛之舟寶藏充溢旌旄導前笳鼓擁
後賓客並列雅歌投壺浪波魚龍獻態呈狀形勝古迹過目如
電快哉快哉又曰先生之文無奇崛艱險之僻固波瀾之浩蕩
無頽靡膚淺之陋固山嶽之雄峙愚嘗以爲生一鄉而不溺於
一鄉之薰習生一時而不合乎一時之流俗豈非所謂偉然間

氣而何待於人哉及觀先生詩文而序之曰集嘗承乏禁林竊
意高蹈遠隱之士必有過夫人者而不之見也歸僑江上乃得
劉桂隱先生之文於其門人學者而讀之則誠昔日之所願見
而不可得者也惜乎江湖之遠而不能有所薦於上焉又以先
生之文爲能繼夫歐陽永叔曾子固而稱之曰山林之日長得
以極其力之所至學問之志專有以達其知之所及知其背於
塗轍之正即有所不爲知其可以傳諸方來則言之而無疑論
古今成敗而無所蹈襲出人意表觀乎瀧江之麓青原之波不
亦善於達本而溯源者乎揭公乃曰大江之西德足以潤身文
足以垂後有子孫之賢無飢寒之迫如先生者真天下之至樂
至榮者也又曰方今天下德行文學之士日寥寥矣若江西惟
先生耳又曰先生德行日尊文章日富豈僕媿媿者比耶又曰

論古今文章辭甚高義甚富病甚切而憂甚深古人所以爲古
人今人所以爲今人往者不可追來者殊可歎如先生者幾何
人哉近數見製作令人不能釋手益增向仰之懷取踈於大人
君子日夜思念果何益耶及爲先生詩文之序則曰先生非君
子之行不行非聖人之學不學其卷之也深其積之也隆其地
不離於閭井其名不登於廟廊其發之也沛然浩然而常有餘
故其詩沉著幽遠得天地之性情其文平實敷暢會古今之法
度因其所感而爲之律乘其所託而爲之義或常或變而不可
窮惜老而不見用於朝廷也先生以宋咸淳戊辰八月二十六
日生卒於至正十年九月十三日享年八十有三葬以是年十
二月二十五日墓在州之仁壽鄉東槎灘之原娶印岡羅氏有
婦德能致內助前先生二十年卒子男三人長立敬前先生五

年卒仲尚文克世文學先生鍾愛之蚤世季應麟業進士女四
適同郡李以孫夏昶彭鉉蕭泰端皆宦族昶以下三婿今皆有
官孫男七觀先大次程瑜諒理讓珣理今爲龍溪書院山長瑜
新城教諭嗟乎劉氏世澤之盛代不乏賢自平陽聯科而後陵
谷變遷不獲寃用於季代然先生克紹先業迪光前人斯亦難
矣今之士大夫稱先生德行道藝如出一喙尚論其人孰有賢
於柳侍制歐陽承旨虞揭二學士者哉四君子德業聞望已極
一時之盛不輕與可而能極其稱許敬慕則先生之實學從可
知矣先生卒門人進士顏成子已狀其行山長病其未詳以語
以忠以忠自髮始燥歛衽盛名世父果原先生於先生之居壤
地相接爲輩行交誼彌篤而以忠又與山長友善故於先生之
潛德懿行尤所悉焉敢撫其梗槩以干名世之士銘其藏而表

章之使先覺之士死而不忘非斯文之幸歟
至正二十四年春正月甲戌狀

挂隱先生墓碑銘并序

翰林學士承旨光祿大夫知制誥兼修國史歐陽玄撰
廬陵劉挂隱先生卒葬之三年子應麟遣孫瑄來京師請其墓
銘於玄值世多故未暇請也又三年遵東海以歸乃致前請謹
撫其行狀叙而銘之先生諱詵字挂翁號挂隱其先清江之翟
斜族也翟斜之族自宋公是非弟兄叔姪以文學聞天下號
江右三劉先生之先世有諱滔字禹績者由翟斜徙吉水之南
嶺傳六世至彥升彥明兩弟昆升字鵬舉五子競爽第四子曰
個字端臣生子名少齊字思賢是為先生之高祖考少齊生子
敬字德卿宋大學內舍從誠齋楊文節公游子銓字衡父受知

文丞相號麓隱子仁榮字雲祥號習靜與弟化龍長子元方同
領景定甲子鄉薦明年俱及進士第受平陽縣尉先生平陽弟
四子也生二歲失王父母七歲失父九歲宋亡奮以穎悟之資
自樹羈孤之中能不墜先業又斥大之今之大夫士論先生德
行道藝必推本其先人於是平陽之縣科雖不獲究用於季代
因先生克紹咸稱其有子而劉氏自翟斜而下益有光焉先生
之為德不為世俗之所搖效不為風聲氣習之所淪染卓然以
重厚醇雅與鄒魯士埒而無怍容事諸父及諸昆弟盡恭敬友
愛之道先世恒產悉推讓之子姪及門必厚遇以禮伯氏蚤世
其子古臣方幼撫育教誨使有成立古臣卒又撫其子如古臣
夏氏女沒所生角羈未亂教育而婚嫁之如禮晚即南嶺初始
祖祠率族人歲時祭祀以正昭穆之叙居家處鄉有古君子風

訓學者能以師道自立至其爲文根抵六經屬鑿子史闢蹊百家淳澆演迤資深取弘架瘦括匠達于宗工夜古融今自執其鞵靡慮不獲靡施弗宜雖未嘗露其僑傑廉悍踔厲風發之狀韞玉在櫝氣如白虹不可掩抑四方求文襍屬于門有古文若干卷諸體詩若干卷駢儂書劄若干卷總題曰桂隱集蜀郡虞先生豫章揭先生及玄皆嘗叙之各以所見極其形容詠歎之盛然以先生之文微吾三人言有不行世者予先生歿吉之弟子頽成子狀其行稱先生年十二三時長於宋季程文若律賦論策臨文沛然蔚有老氣宋之遺老鉅公若李氏鶴田肯堂深齋三公於先生爲母黨尊行一見即以斯文之任屬之中齋鄧公須溪劉公於先生爲鄉先正見其文尤加器異鄧公嘗延之家使範其子若彭異吾晏山心於先生爲畏友往往推服延祐

初科舉復興先生年纔四十餘州里有司舉孝弟明經太守強勸之駕先生好古與主司瑟竽理之必然不足深論先生退自塲屋一時名家欲其子弟規進取者必厚幣求師事之古有善射者射牛鏃掠牛腹舍麤詣精以不中爲勝賢父兄願欲得其不中之竒他日與拘拘然求中者角我欲中斯中耳方崖蕭公爲御史以教官薦學山文公爲集賢以館職薦尚書鵬南鄭公過廬陵見之歸朝以遺逸薦公卿推轂當時賢士推轂者可得美譽賢士何與焉先生生宋咸淳戊辰八月二十六日卒以大元至正十年九月十三日年八十又三葬以是年十二月二十五日墓在吉州之仁壽鄉東槎灘娶印岡羅氏有婦德能致內助先二十年卒子男三長立敬先五年卒仲尚文克世文學先生鍾愛之惜蚤世季應麟業進士女四人適同題李以孫夏昶

彭懿蕭泰端皆宦族祖以下三婿皆有官孫男七觀先夫次瑄
瑜諒璉讓珣程今除龍溪書院山長瑜新城教諭孫女八曾孫
男二未名玄於先生未獲一識而書問不絕相知為深虞公晚
歸田過從甚樂每有相見遲暮之歎虞揭二公皆先卒玄以垂
耄之齒獨得銘公銘曰

宇宙氣化消長有時斯文盛衰不係乎茲富貴倘來非悠久
功名時至亦易就維茲二事衆可勗天畀斯文曰子獨近代
四家廬陵眉山臨川南豐頡頏其間展也挂隱實宗歐陽豐
曾約蘇謹嚴歸王天勳其束不斬所重我其承之責若光寵
在衆不隨予獨不訾不馳厥齋俾昌於詒

皇帝聖旨中書省樞密院呈奉省判翰林國史院呈准學士

王榮祿咨嘗謂

聖治右文丕著易名之典儒宗尚德庸申請謚之規爰率舊章
以旌善類竊見先儒劉執吉安路吉水州人氏道明德立心
廣氣和得周孔之微言守程朱之正學躬行實踐而善名早
著立言垂訓而懿範孔彰生無鍾鼎之心沒有章逢之慕有
功名教作則後人當時交游如本

朝名儒翰林承旨歐陽文公玄奎章閣侍書學士虞文靖公集
翰林侍講學士揭文安公後斯翰林待制柳貫等或稱之曰
道德之重藻鑒之明非君子之行不行非聖人之學不學而
或稱之曰德足以潤身文足以垂後根柢六經屬譽子史皆
極相推慕不可殫述宜加褒錫之恩以顯幽潛之德如蒙准
言聞達

朝廷將本儒比依至正六年贈先儒金履祥文安先生許瀛文懿先生等例謚以徽名如上旌異不惟有耀於儒宗亦且克

彰於

聖治爲此今將本院編修官夏以忠所述本儒行狀抄連在前具呈照詳得此批奉

都堂鈞旨送禮部照擬呈省奉此移准大常禮儀院閔送據博士廳呈議得江西儒師桂隱先生劉詵以簪纓華胄詩禮名家懷道秉德博聞苦學不以貧窶動其心不以功名移其志其道德之光漸於鄉里也遠仁義之教被於後人也深故身歿而人思之益切歲久而其名益彰當時名儒如歐陽文公玄虞文靖公集揭文安公侯斯待制柳貫等稱其德曰道德之重藻鑒之明稱其文曰根柢六經屬廢子史或曰先生之

文能繼夫歐陽永叔曾子固又曰德足以潤身文足以垂後又曰先生德業之盛於古人不多讓蓋先覺之士也今觀諸名公稱先生之德行道藝如出一口則先生之行實可見矣易名定謚允愜士論謹按謚法博聞多見曰文好古不怠曰敏請謚曰文敏連呈照詳得此閔請照驗准此本部議得省判翰林國史院學士王榮祿舉江西儒師劉詵道明德立心廣氣和得周孔之微言守程朱之正學如蒙准言將本儒比依金履祥文安先生許瀛文懿先生謚以徽名如上旌異不惟有耀於儒宗亦且克彰於

聖治以此叅詳儒師劉詵既大常禮儀院定謚曰文敏合准所擬如蒙准呈宜從

都省移咨江西行省劄付本部依上施行具呈照詳得此

都省准擬除外合行移咨請照驗依上施行須至咨者
右咨江西等處行中書省

至正二十六年 月 日

省掾張思齊 跪

元賜謚文敏勅諭

字係蒙古難譯不敢書梓

御

至正二十六年二月初四日

璽

桂隱先生傳

元史一百九十卷 傳卷七十七

翰林學士亞中大夫知制誥兼脩

國史臣宋濂

翰林待制承直郎同知制誥兼

國史院編脩官臣 王禕等奉

勅脩

儒學二

劉詵字桂翁吉安之廬陵人性穎悟幼失父知自樹立年十二
作為科場律賦論策之文蔚然有老成氣象宋之遺老鉅公一
見即以斯文之任期之既冠重厚醇雅素以師道自居教學者
有法聲譽日隆江南行御史臺屢以教官館職遺逸薦皆不報
詵為文根柢六經躡躒諸子百家融液今古而不露其蹕厲風
發之狀四方求文者日至于門其所為詩文曰桂隱集桂隱詵
所號也同郡龍仁夫字觀復劉岳申字高仲其文學皆與詵齊
名至正十年詵卒年八十三後

朝廷賜謚文敏

歐陽文公答桂隱先生書

玄視廬陵江鄉乃未獲一寓桑梓之敬諸鄉先生亦未嘗一望
僕約虛名誤人僕僕南北抱茲二欠負負奚文先生道德之重
藻鑒之明令先之以書且有文集叙之喻僕何足以叙高文之
後此亦虛名誤聽聞耳踵襲訛謬如是不已豈不甚可畏哉僕
自去春痺疾盛作一歲之中謁告十九今者又有哭子之戚俟
張南歸予環之使要諸潞上夏初誤恩落侍講升學士俯儀循
牆迨今未敢拜命心常怔忡舊學廢忘仲賓還姑爾塞責津楫
高明知罪知愧盛暑力疾治答不敵先施切希照察

虞文靖公荅桂隱先生書

伏承遠賜手書陳古今文學之原委十百年如指諸掌此足以

見閣下不以鄉里古今而為界限博觀乎天地宇宙間知其有
不可泯者可謂知言者之為言也然引喻過當非集所敢當惟
有惶恐閣下以英偉之氣不肯小出以徇世好卓然如靈光之
在魯風雲變遷而三光不為蔽虧潢汙載道而大陸不為昏墊
霜降水涸而松栢後凋沙磧汰除而黃金獨耀區區早持不足
之資以應世退而益以衰老求如公以伏生之年教授齊魯不
輟何可望其萬一也所賜之書驟而讀之如雷雨既盈千源並
合大江安流不見涯涘千斛之舟寶藏充溢旌旄在前蕭鼓在
後賓客在列雅歌投壺浪波魚龍百態異狀形勝古迹過目如
電快哉快哉是故佔俾之小子迷瞽之有司固無足以知之蓋
不足怪也高文大冊俾序其說不亦難乎姑述謏聞以達于大
方家之側多見其不知量矣知之罪之一惟所命令嗣純厚不

隨流俗恬然以隱居奉親為樂蓋今世之所難得者集目疾之外尚無他故或得一執手於清江之上豈不幸甚當暑治苔不能詳好伏惟鑒念不宣

虞文靖公別桂隱先生詩

扁舟已作渡江雲回首高年憶兩君兩君謂桂隱與申齋坐客頗知常刺史詩人猶拜杜參軍總看玉樹當春晝共對青藜過夜分他日聚星如可畫殷勤垂白更論文

又次韻荅桂隱先生留行詩

懷哉歲暮扣重關置我高堂俎豆間遠道無窮忘已老凡情不盡若為閑徐行歷歷皆平地滿目青青是好山只為丘園待春兩扁舟先愧逐雲還

江西提學副使夏公黼讀桂隱先生手卷絕句

前輩風流耳熟聞典刑今日誦遺文南榮白晝花生眼一片青天度卿雲

江西布政使胡公辯求桂隱先生文集書

恭聞

桂隱先生江右人品元時名儒理學遠宗於周程文章繼美於韓歐名載元史籍藏

國朝某生不逢時恨親炙之無由叨守大藩望江山以馳思謹訪賢者之後裔願假遺跡而一覽愚蒙稍迪欣躍何似

吉安太府朱公諱仲祭桂隱先生文

惟公鍾山川之秀氣為一代之名儒何行非程何言非朱何文章何議論非後學晚進之明師某末學晚生無由執贄茲叨守夫名邦獲拜公於賢祠既考公於郡誌復詳公於元史然後知

虞歐范揭之美譽與夫文敏之美謚信乎為天下後世之公言
而非出於一時一人之阿私獨惜公美玉在斯豈積藏之遺逸
之薦館職之除曾不聞用夏可以變夷也胡為乎肥遯而不肯
小就於一試雖然孟子有言士惟尚志以公之清風高節豈惟
足以垂範乎一世而不足以激頑起懦於後世耶尚饗

吉水知州柯公躡祭桂隱先生文

先生之文日光玉潔先生之行清風高節先生之交虞陽范揭
先生之徒誠服心悅郡邑之祀國史之載先生可為不朽矣嗚
呼其孰可以付先生之衣鉢尚饗

玄孫舉人子尚呈乞脩墳稿

永樂十九年某月某日江西吉安府吉水縣舉人劉子尚呈乞
脩理先賢墳塋事尚先祖劉詵謚文敏宋代宦裔元朝名儒操

履端方器識弘大負毋逃難山巖中孝不讓乎躍鯉生宋悔迹
胡元朝節可愧乎捫虱文變士習之陋遠邁韓歐學探古訓之
微近比程朱顧遺世已日久晚丘壠幾乎湮沒且傳家無厚產
欲封樹難以措置草生狐噪令行人為我心惻雨濡霜降俾後
嗣戴罪人間達逢 堂下隆重儒道追崇賢哲南州高士旣蒙
垂仁脩墓元朝隱君竊敢比例推思倘蒙准呈幽明感德

左布政盛公願批詞

文敏先生心懷宋室跡遯元季山林舊隱廊廟遺材行素重於
鄉評學兼精於文章據伊孫呈中所述即本職史館所見墳塚
不治固子孫難以為情賢哲罔崇抑官司不能無咎為此仰該
縣即將本職所問解戶錢柱等贖徒銀內支八兩脩理墳塚以
崇前哲於旣往以勸人心於將來銀給付子尚後該縣仍行申

報本司以憑查刷毋遺

桂隱劉先生傳

嗚呼先生實行未易以知也蚤歲遇國朝科舉制廢猶以故宋律賦雄多士延祐科興又嘗隨衆往還場屋者數次至形之詩文亦間嘗有急急功名意及後州里有司舉孝弟明經太守吳公強勸之駕先生則又曰科舉之學吾非不能但學以講道豈以是爲富貴筌蹄甚至集賢學士文公陞尚書鄭公鵬南御史蕭公泰登皆力薦之而苦苦不就即後觀前先生若判然兩截人矣噫孟子云君子之所爲衆人固不識也素餐者奉命求藏書及江西廬陵得與先生劇論者十有餘日始有以窺先生心事焉先生世家吉水南嶺曾祖散字德卿爲宋大學生與陳東上書留李綱祖銓字衡父爲國學內舍以氣節受知文

丞相將顯擢大用中道而歿父仁榮字雲祥與弟化龍同登進士第忿世欲有爲沮於權奸賈似道先生生七歲而孤九歲而革命知先世皆剛毅卓卓非庸庸鄙劣者流即克竟自樹志向不凡則欲高首陽之節者其素志也至爲科場律賦往還場屋者值朝議方索南土不屈之士故爲是以委曲遂志而已不然先生之學淑訓弟子如劉性顏成子羅如麓羅見大等皆得以及高第而先生屢赴場屋獨得不第哉即如先生真欲第也孝弟明經之舉太守勸駕矣厥後文學士鄭尚書蕭御史又推轂矣先生胡爲平竟拒之哉素固有以窺先生之心委曲遂志而已先生歿十有六載素始遇令孫山長伯瑄于龍溪書院出示先生行狀墓銘謚議等篇素大惜諸君知先生之未深也故敢以鄙見表而出之先生諱詵字桂翁號桂隱謚文敏與同郡遂

陽提舉劉岳申文聲相頡頏與進士彭士琦為親友而幼長相切磋自中朝貴人大官及四方游宦者至吉必以得三人之文為幸先生尤善於古賦綽有鮑謝風致文集若干卷諸體詩若干卷門人羅如篋等為之梓行而虞陽揭柳四公暨鄧禮部皆嘗為之序引極形容其盛年八十三卒

至正二十六年丙午春仲月前右宜文閣經筵檢討危素大撰頓首謹書

桂隱存稿附錄終

公行作流落先正言文詳矣而其與當時諸名公交游翰墨遺失更多如柳侍制書類進士狀鄧禮部序引揭文安公書與序之類今皆亡矣茲因吾子孫罪也幸猶有存者謹錄附後

曾孫用竅頓首識

恭題重梓桂隱公存稿後

吾祖桂隱先生存稿凡若干卷當先生存時門人羅如麓已為梓行如麓之言曰先生平生詩文流落過半則其稿之失存者必多故總題曰存稿者此也

國初購求遺書梓本遂送公府今家所藏者止舊梓詩餘文僅存抄本成化間方伯胡公督學夏公相繼訪求俱抄錄以應先大夫知錢塘時亟欲梓行懼存本失次托鄉先生東川羅公校正適

內召命下後遂巡郎署間弗果既而出守高州海上多警不暇及退休逾年先大夫奄棄諸孤因循未遂

每為遺恨近諸

當道索稿力不能備書因與族姪節推方興謀以梓傳而永新族子志孔以會譜來遂捐貲以梓嗟夫先天夫欲梓而未果予小子欲梓而未能誠可媿也已然使吾祖存稿之必傳固不必其梓之出於已也乃與節推輩相率求叙於

天史念菴羅公令弟用敦男炆彙編繕寫屬之族孫天健校讐以授志孔敬題此以識歲月云

明嘉靖癸亥春三月

曾孫三德頓首謹題

跋

余少入祖祠知先生從祀七世祖之後及長為邑諸生又知先生列罷邑鄉賢首祀然所以得祀者固未之知其後得謚議墓銘及所存遺文讀之始知余劉氏之族至今猶幸以不墜者非先生而誰賴耶先生生九歲而宋亡固宋人也及元混一大統力辭徵聘不就考諸通志俱以不仕元大節歸之獨當時若歐陽文公玄虞文靖公集揭文安公孫斯交薦于朝止稱其文章根柢六經道德為儒林宗師未有及其出處之微意者豈諸君子皆有元名臣固難與其節耶夫古今為文者多矣惟根柢于道者可傳而不朽先生大節雖隱而未彰其為文獨傳而未泯非夫涵濡

於聖學精微之蘊維濂洛關閩而後者我是編也門人進士羅如虎之所輯錄藁存於太守南園公欲梓之而不果今仲子三德季子用敦思其散漫益不可考出遺藁於余校正而彙次之帙成相與請於太史念菴羅先生叙諸首永新族子大學生志孔鉅之梓以傳為嗚呼今之世族名家類以先世科名赫奕為美談然尚論其出處之正與道德文章可傳於世者寔難其人若先生誠有功於名教不獨曰劉氏之所賴以不墜而已凡為吾族後者可不思所感發興起以不辱先德徒以其文為哉

嘉靖癸亥春谿園派二十世孫廣西平樂府推官方興題

余齒年竊觀翰林解公手筆家譜序有彌桂隱先生者心已識之弱冠見

念菴羅大史師兩序吾劉新譜復亟稱不置愈切嚮慕於是從南嶺族之長老讀其詩文存稿始知先生道德文章出處皆大有關於世教匪徒一族光顯已也遂手錄以歸玩閱數載懼其散逸令男弁托梓以永其傳俾後有作者得因文以求夫先生之所至可也月日為嘉靖四十二年癸亥中秋族孫永新志孔拜手謹識于白雲洞



國家圖書館, NATIONAL CENTRAL LIBRARY, TAIWAN, R.O.C.

國家圖書館

桂隱詩集目錄

卷一

古體 五言

感興五首

謝吳寧極和閑居韻五首

飲酒有何好

天道勿徒恃

客去不可挽

山中雜賦六首

贈張漢臣遊金陵三首

陌上桑

江上晚興

春寒閑居五首

古意三首

作詩能窮人

夢事安足憑

金盞還復來

山中五詠

石洞雜賦五首

山家

征夫嘆

國家圖書館, NATIONAL CENTRAL LIBRARY, TAIWAN, R.O.C.

雪後遊遠山園

遊觀善兄弟雙清園

春懷

夜坐二首

送劉教授入京

閑坐望城隅李花

庭芷

庭竹

桂山堂獨坐

對酒

錦雞行和王生

初秋感興

和高方大初度泛舟鷺渚

和楊伯允

送范主一憲郎

中秋懷學翁兄

十六夜雨邀諸姪飲

寄鄭洪守四首

印山道中喜晴

送蕭從周赴廣東帥閩照磨

中秋故鄰楊氏招飲

盧堯道中

澗月堂二首

悼往

酬邵有初

晚春和蕭孚有二首

芍藥

曉行

暮憇南溪橋

苦旱

八月四夜聞微雨

夜聞桂香

題靜山堂

曉立

和蕭孚有見壽三首

和張漢英見壽

王笥山建三清殿二首

留新塗憶亡孫鳳二首

和涂率修中秋二首

送王僉憲

和張自翁答婁廣文

再用前韻簡諸和者

送嚴教授二首

和張慶遠遊青原

和登洞巖三首

和羅昌逢千葉桃

送李學錄考滿歸廬山

和高師周

國家圖書館, NATIONAL CENTRAL LIBRARY, TAIWAN, R.O.C.

和鄧牧謙社日郊行
雨坐

遊延興寺二首

和羅元翁三首

午飲

送艾幼玉赴南安儒教

交恭堂

戲贈祈雨者

贈劉斗祥祈雨

和周山長遊覺報寺

和白樂天三月三十日作

贈蕭以能義惠

題勤有堂

白木槿

五日和邵有初

荷花莊獨步二首

村墅曉起

田家詠二首

八月十四夜聽雨

元日賦紅梅

癸酉元日

贈興國歐陽明翁

石菖蒲二首

賦梅窓

八月十日飲熊氏園

諸賢皆和遂再用韻

旦坐對客

曉行

和饒自然夜坐

贊饒自然山水圖用前韻

再用前韻簡蕭孚有見顧二首霰雪和彭經歷二首

和邵有初同飲熊氏小園

贈青田道人

和張尚德憲郎

和張學錄三首

再和三首

謝傳用賓詩及端石

山礬

瑞香

雨晴門外獨立

暮坐

秋夜

客懷

開歲三日池上小立

新晴偶步

山家阻雨得晴出郊

初見白髮

早行值雨

園亭夜飲

午坐

呈劉須溪二首

曉起

暮雨

偶題

偶行

和蕭天叙山行

別劉少府

影調義

文江晚步

感興二首

雨後

青青橋邊柳

山墅初冬二首

夏初城西樓讌集

左耳陶瓶

題芳洲

九日偶賦三首

印岡道中

八月十四夜陰

送吳提舉歸九江

五言絕

寄鍾祥叔

池亭即景

援筆

小松村

遊崇福寺

和蕭安國浴罷見寄

七夕二首

把鏡

暮齋

先母諱日二首寄學翁兄

義荅影

有行

對月

搖搖田中草

新晴

送于學錄分題賦尊經閣

初夏書懷

賦清露軒二首

燕同知請雨四首

贈丹士

送鞏如安迎母閨中

和友人端居遣懷

哭素從義

國家圖書館, NATIONAL CENTRAL LIBRARY, TAIWAN, R.O.C.

正心齋

自家意

十竹

假寐

日夕

山居即事四首

夜雨獨坐

元日

耳鳴三日不止

暮晴

卷二

古體七言

題曾瑞卿神龍圖

和芍藥歌

東園花

地隆隆

東華山天一道院歌

夜宿山家二首

兒時喜見雪

明妃曲二首

後采薇歌

望城岡

後醉歌

冷熱吟

承志齋

南江之南

白木槿二首

有候

題枯林畫蘭及蒲萄四首

春陰二首

山行

除日

新春二首

春雨曉坐

題羅稚川山水圖

贈趙中山

天高高

和邵有初見壽

題盤谷圖

送王學政滿代

和東坡四時詞

前采薇歌

釋枯林鐵如意歌

前醉歌

貴賤吟

飲南山故居

飲谷平李氏

中秋阻雨山中陳氏邀飲

陳推官母受封恭人

遊中華山

贈劉士貴入京

和楊用宏

丁都護

木牛歌

題南園

題錢舜舉巖壑圖

送邵有初之揚州

草蟲

巖雨行

野人家

贈劉尊德善琴工畫

題羅稚川煙村圖

青原春嶂

螺峰殘雪

石磬飛瀑

古城秋釀

平園衰柳

元夕諸子孫小飲

賦秋晚紅梅

玉壺歌

飲印山田舍

題劉平妻殺虎圖

天馬歌贈陳所安

題文山衡陽躍馬圖

和盱僧金山見龍韻

公無渡河

秧馬歌

贈廬陵孫縣丞

送張君玉謁天師

送劉玉成之杭

謝王宜遠餉黃雀

題羅稚川小景

再用前韻答彭清源

殘僧寺

放鮎魚歌

山月亭讌飲

神岡晚橋

鷺渚斷煙

西峰卧松

小洲暮漁

鳳墅斜陽

社日偶成

碧壺歌

增長沙王自得

賦歐園海棠

憶昔行

羅定翁家書雷致雨

感舊行

題雲巖齋

桂隱詩集目錄終

桂隱詩集卷一

元 謚文敏桂隱劉

詵

著

元 賜進士門人羅

如麓

顏成子編刊

明 曾孫 三德

用敦

灼 重編

族孫 方興

天健

志孔 較刊

古體 五言

感興五首

其一

昔在唐虞時萬象昭白日聖人垂龍衣巖殿吹鳳律朱草聯階
生景星當戶出群賢布天下野穀盡嘉實嗟哉戰國交九寓淪
斧鑕糟糠委仁義軒蓋寵權術孟軻起驅馳白髮颯垂軼空餘
七篇書千載資歎息

其二

姬室逸其御天下皆兵交楚武首僭王名器從此消仲父佐伯業仗義何嘒嘒正辭削其僭王綱可復昭奈何舍其近遠問南舟膠堂堂匡周師其得僅一茅所以魯仲尼加之器小嘲良會不再得誰能遏秦嶠

其三

秦人燔詩書聖道散若煙宮殿干斗極東遊問神仙漢祖祠孔子遂為百代先大哉禮樂意所見何卓然因勢導其趨勇赴如決川但恨群臣間餘習猶察鞅良平維善慮不在三代前安得豁達資一見賈少年

其四

金張貴朝廷衛霍列茅社奴隸凌虹霓親戚折五伯鬪雞馳郭杜射席宿滄灞意氣驕盛時咳唾有光價相如滌器夫萬里乘駟馬買臣最微賤懷綬出即舍賢愚何必齊時至俱氣化豈無單練士叩角五陵夜太史重成名寂寞千秋下

其五

峨峨蓬萊山白玉為洞房仙人雲霧衣侍女冰雪粧丹霞縹緲中往來皆鳳凰借問群仙人何者為秦皇群仙顧我咲振袂凌風翔我有金鼎丹鍊之踰千霜相期息瑤樹歲晚何渺茫吾聞仙人家美酒如瓊漿長生所願求得醉亦可償

春寒閑居五首

其一

貧居托幽巷久雨客來絕春寒霰時集淅瀝在高葉鳥鳴日已晏寂寂茶鼎歇慙無晁氏智懶事主父謁閉門自讀書庶以勵

高節

其二

瀟瀟山城雨，撼撼書館風。嗻嗻鄰屋雞，迢迢遠坊鍾。遐思在古人，展轉魂夢通。抱拙俗所棄，歲晚將誰同。賦成不輕賣，金盡當忍窮。

其三

久寒卉木寂，初旭陰翳謝。春淺有令姿，澹澹在平楚。山明孤煙發，天迥一鳥下。積憂鮮曠懷，怡詠聊比暇。賦詩勿鏤刻，養生師叔夜。

其四

昔時如花人，今見兀若株。華滋散安在，嗜好豈不殊。河水不灌翳，春風不歸枯。聞道須少日，立功無暮途。

其五

西里夜園燭，東鄰朝玩山。相視無羨心，豐約自不閑。芳草滿幽庭，日晏人未還。夕陰忽微暄，孤禽語花間。

吳寧極惠和閒居五詩，復用韻為謝。

其一

嗜澹鶩墳素，端居世機絕。微風被崇梢，撩亂書幾葉。山家晨煙薄，日晏遠春歇。庭寒拊餘蕙，剝啄謝過謁。幽懷忽浩然，高詠脫音節。

其二

衰髮如素雪，一往隨飄風。悵然平生懷，危坐聞遠鍾。守身易成隘，應俗或謂通。不惜舉世稀，所慕知者同。彷徨豈有求，寂默非傷窮。

其三

文章在天地萬古相遞謝風霆春行天鵬隼秋縱楚所得雖良
殊白役總無暇飛霜厲薄寒木葉日以下咫尺不共論孤燈結
遙夜

其四

以我砒礞器報君珊瑚株至寶非可酬但表心不殊石賤貴能
固寶潤知難枯人生在有合醜好豈一途

其五

玉屋起代北荆江出岷山苞流各自立皆與元氣闕此理誰復
知神禹去不還不知諒何傷相望天地間

古意三首

其一

古風日以喪交道遂以圯昔時素心人忽若匪知己朝直蓬萊
宮暮宿光祿邸聯騎多季劇填門集金史疑嗔著天下名德為
垢糝古言西施貴衆色失桃李不見秦張儀卷舌讓蘇子

其二

南方有佳人天質辭紅粧素手映輕雪明璫照羅裳二月千花
開笑語春風香盈盈水晶簾丹霄貫疏房自倚絕世姿鬢髮不
能霜秋葉鳴西樓城烏啼夜涼高節良自固諒不悲年芳

其三

昨日苦大燠酬以今日寒天道極必反人事盛必剋剛柔有迭
施消長乘兩端彼美者誰子一生困辛酸日晏食未炊冬月衣
不完著書垂白髮門草煠漫漫天道何由詰俯仰良自歎
飲酒有何好

飲酒有何好但取愁可消古人不造酒天地皆是愁劉阮醉一石我飲三葉蕉當其忘世累畧與劉阮伴人生量淺深隨分無過求天地倘無愁無酒亦可休

作詩能窮人

作詩能窮人誰能忍不作但見平生愁霏霏筆端落朝騎孤鳳凰暮駕兩黃鶴手攜王子晉吹笙上寥廓人言忌太高下筆寧淺弱窮通信有命詩道未可薄

天道勿徒恃

種稻南山邊雨足多稻穗一朝疾風來腐折不可刈東家不知畊雨粟夜滿地問渠安得之飽食了無愧我欲廢鋤耰雨粟非可覲人事且自盡天道勿徒恃

夢事安足憑

昔夢驟重車躡霞凌青冥麟鳳羅百供從御皆瓊英既覺知虛無豈足詳追評封國忽銷印繪功反屠烹戒食或已忘遺金或悔輕人事尚無據夢事安足憑

客去不可挽

水逝猶可回客去不可挽不惜佳客去但恨聞道遠明珠買娉婷歌舞供笑莞車馬填門來千金具朝飯子孫日以驕六籍不掛眼所憂非無客客多良足歎

金盡還復來

人生百年間金盡還復來惟有少日顏一去不復回不惜少日去但思志氣顏古人當少日樹立何崔嵬歌聲出金石可老不可摧所憂非金盡金多安何哉

山中雜賦六首 士申

其一

昔出憂雨來今行恐無雨倘蘇八月早寧受一日苦
蕭蕭涼浥稻稍稍潤入土生物吸流滋如飢得膏乳
田家隔短牆頗亦聞咲語幸收饘粥資筋力庶可補

其二

歲旱千里同萬物多槁枯東鄉早被澤生意回未
疏西鄉遂愆期滌滌氣未蘇皇天豈有私欣悴自爾
殊所以李將軍再拜劉家奴

其三

秋氣日潛變單絺生薄涼疎雨鳴淅瀝微燈翳空
房少日已嗟老衰年彌獨傷繁憂寸緒起坐空彷徨
便有蘇君金何由返流光

其四

道逢誰家墳嵯峨起十尺八柱聳赤銅四階壓文
石幽墻發黛光碧瓦戢鴛翼生時諒何為功言豈嘗
立一朝棄人世永與所歡隔光輝在空山於事竟何
益醜好死未忘可為愚者惜

其五

空山有一婦二十失所天貞心比堅石血淚迸湧泉
寒燈役機杼拾穗裙不完婚男與嫁女辛苦雪滿顛
自謂分當爾節義何足言城中豎孀姬潛好留少年
門前立旌木世人何由傳

其六

我飲本不多興至不可無但恨無美酒旋買山中壺
山中近扑味山外多澆渝飲灰令人病飲敗令人愚
寄言好飲人慎無以名沽

山中五詠 丙子

其一

蓐食希早出出城日已辰况憫肩輿勞時亦步嶙峋嶙峋苦難
步投宿荒村民啓扉熾燈火延客意頗真苦辭村無酒無以澆
埃塵歲歉有稗粟尚可分炊晨高門多吠犬倉卒難投身勿投
高門宿勿厭村家貧

其二

季秋乃多雨浙瀝終夜鳴槁枯既已過不足蘇疲昨庶以沾園
蔬聊堪作冬羹井冗泉稍出始免汨泥泓王賦雖尚寬京官督
私征府邑奔奉命斯民敢違程冬羹未可期何以為吾生

其三

溪橋落白水野路覆紅葉山邊四五家日暮烟火白歸牛認深
巷行客指新月村田早傷餘老稚筋力竭方今冬序初饘粥倘
未缺雪霜且已來卒歲諒何策

其四

矍矍山中日茲晨已堪愛暄暄下墻陰稍稍曝軒外幸此賓會
少展體聊炙背締衣未浣汚綿褐催補碎人事苦難給寒暑傷
易代漸為啓期老頗慕靖節醉荒村惟孤松寂寞得相對

其五

僕隸日晏出空庭長寂然鳥雀噪未析牛羊散平阡人家隔林
塢崇崇上孤烟樵薪頗下嶺荷鍤亦在田諒應愜冬暖慙若忘
荒年鄰翁慰我獨沽酒酌我前飢儉慙此意勉強盡瓦船陶然
共酣暢亦各適其天

古詩三首贈張漢臣遊金陵 能詩琴

其一

古詩出情性聲在閭巷間採之被絃歌聽者醇風還大音既寡
濶群喙何間閔燕昏混良璞楚篆藏崇簡妙理忽有合正在不
可刪秋高星河空天風吹珮環

其二

古桐蘊至理出陽或施陰和為祥鳳鳴悲作離鵠吟高寄周孔
思清寫夷齊心子期不可鑄空有千黃金天高九州曠百世無
知音夢騎白麒麟振衣蓬萊岑

其三

金陵南之鎮興廢滿目中青山澹無言萬里江流東高樓朱雀
橋野笛交秋風子行覽其餘彈琴送飛鴻栢臺雲霄間貂豸峨
群公為言經濟理所貴賢俊崇

石洞雜賦

廬陵羅士奇都事彝母新塗百洞山水甚佳丙子冬其
姪履貞邀同遊穿幽覓勝相與徘徊者連日擇其景之
尤佳者賦詩五首

石洞

蜿蜒辭夷臯迢迢陟穹巘綿綿千萬峯蒼秀入遙見既疲猶穿
雲小息仍下阪崎嶇到祠庵高檜掛日晚人家統稻田窅然復
平遠園廬接烟火籬落散雞犬雖知非仙源諒亦樂農畎卜居
茲未能撫景徒繾綣

石人

石門何年啓疑與開闢俱上有遺世人形軀畧模糊山空明月
寒來往誰與徒吾聞晉榆石能言禎妖樞又聞穀城公頗窺陰
符書叩之了不應無乃嗔我愚

石橋

石橋跨碕礧藤花被兩涯筍輿此小憇攸然會心期崇梯級三百未陟神先疲野人薦美蔬稍足滋渴願嵯峩岡頭阡封固百世基純孝所形著觸目皆參奇嗟哉世間人紛紛愧繫裡

石溪

是日與郭德方坐溪石論文把酒忘歸

冬旱水愈涸微流行石間烟如玉璫窓屈曲相交閔冷然落幽罅隱約聞佩環擇石踞其高兀兀相對閑日晏遂相酌持觴看青山踈雨作還止徘徊澹忘還

石泉

重巖括元氣雲竇出涌泉迸流絡廣石百尺高簾懸微風度午日燁燁生虹烟始知窮幽討奇觀滿垓埏我友趨奔鹿蹇裳陟其巔蹇步獨鈴屨矯想為欣然飄汲試茶鼎庶足凌飛仙

陌上桑

燕雀不隨鳳鹿鹿不附麟豈不出儔類各有平生親妾家東城陌柔桑統畦春春風時物變無衣念良人高臺王侯家鐘鼓鳴層雲回頭偶一眴通意何殷勤朝為採桑婦暮作深宮嬪富貴非不佳誓不易賤貧比桑可變海不變賤妾心

山家

山中烟明明山下泉曲曲書聲出疎林楓葉半茅屋簷教曝綿泉園曠縱雞畜寄言避世人如此亦可足

江上晚興

南堤直而崇西岸窪以折中流千片帆水日相映白翩翩孤鷺逝迢迢高樹沒緬思汨汨人今古幾英傑晚泊得鮮魚舉盃望新月

征夫歎

六月征廣徃塗埃千丈高渡水波沸骨登山汗流刀射虎攢疲
馬棘荆破長寨賊來多如雲石洞穿千整鐵甲日曬火大旗烟
漲濤惡溪塞斷骨亂礫紛流膏前年過流沙苦寒脫鬢毛風裂
壯士胷雪積將軍旄人生莫作軍寒暑相戰塵人生莫作軍性
命如蓬蒿君王方神武狐鼠何足憐但願四郊靜微驅敢辭勞
雪後遊安成王氏端遠山園

幽園閉殘雪微紅上危枝豈不先群芳天運如相持積寒意澹
澹初旭光離離春風來方多小忍須其時

遊王氏觀善兄弟雙清園

入門得幽池一逕窅以邃蕭蕭水竹間寂寂林壑意晴寒樹影
靜春薄柳枝細海棠如處子體弱意先麗日蒸丹砂丸露點守

宮臂少年嗜看花常恐春未至只今勝情減得景聊一憇作詩
記良遊重來非所計

春懷

連陰如病醒耿耿乍離索鍾疎山館靜花落春衣薄清心近懶
率壯事成寂寞卧看古木枝幽鳥午頻啄

夜坐二首

日入暑未解夜久涼始歸山月升漸高照見幽人衣幽人行未
已月亦轉墻西
雲行樹陰薄風過樹陰歛雲風弄清夜政尔無人知惟聞墻根
水冷冷下幽池

送劉一清教授入京

三月江水綠君行適京畿辭親古所重而使親顏怡江北多楊

花江南鶯亂飛去去事經濟歸來樹旌麾

閑居燕坐望城隅李花

春晴滿天地我獨了一室得欣或暫時積念動彌日
暹花洗宿潤妹靜耿獨立日光照素服玉氣起數尺
紛紛看花人車馬共朝夕幽意當誰言微風斷城笛

庭芷

庭芷不受俗清意耿涼袂微瀾映幽雲踈雨洗道氣日長飽食
罷坦腹花間睡閑居誰與娛賴此聊自慰

庭竹

庭竹如高人踈處更堂堂當其得勝趣豈必客主忘月明瀉垂
露危坐肺已涼閉門良亦勞有酒乃未妨

桂山堂獨坐

笙竽鬧春晴此處乃幽閒啾啾惟鳥鳴寂々鮮人跡青天樹光
動白日瓦氣濕陰陰庭下影滿地不可執蛛絲網虛簷懸葉如
墮翼緬懷昨日心孰擬坐茲室抱迂世同薄得景意自適窮通
信所遭逍遙聊永日

對酒

落落復落落所為竟無成童非如昨日念之為心驚城東臉如
丹秋風化高塋况持鬢間絲豈與流光爭古人稱飲酒意欲償
平生平生豈足償但可傷其情

錦雞行和王生

驥足為性禍翠羽供世儲大化役群動顛倒無根株茲禽亦負
美自謂物不如若若漢官綬纒々楚豪珠低頭若自惜疾舞還
復徐孰知羽毛累遂失山澤舒古人誇衣繡永笑籍與朱乃知

世同戒最患心自娛君子道若鳳千仞不可拘長鳴朝陽間不
學鳧鴈腴

初秋感興

秋風殊未來林葉獨先見譬如老將至顏貌已潛變娟娟庭中
月落梁上燕有酒誰與同微涼髮如練

和高方大初度日泛舟鷺渚

君詩瓠子河剽怒奔驚湍又如明月珠夜室生芒寒坐傾內法
醞不數涼州酸手援綠綺琴付之中郎彈薰風四五月鷺傳滿
城觀天開白鷺嶼蒼翠十頃實書堂昔所建崔嵬集儒冠當時
擇俊髦十艾得一蘭恭惟先正翁士林青琅玕筆花發天潤濟
流愧中乾君詩復留壁千載當共看人勝地逾重句好天為歡
偉哉故家步真足追却鄆

和楊伯允

舊交存無誰故里歸似客楊君如霜木月旦所推擇齊詩師轅
公魯禮重王式天命有窮通道味無損益幽居邃門巷花竹繚
外飾朝窓研經理暮館講今昔欣欣學子懷生意競春碧相過
愧獨老白髮兀前席徘徊山澗勝俯仰釣遊迹無事頻往還勿
使長相憶

送范主一憲郎

庸夫老丘里志士輕山川古來環轍人往往皆才賢范君繡衣
家白壁生藍田清遊半朔南征衫積澗煙崇臺交辟剡思親理
歸船吳州肯暫駐風檣傾四筵揮毫走秋蛟吐句紆春連清霜
淨江波水花寒更妍棹謳催客發風正帆始懸翩鳳凰翎終
當儀九天

八月十五夜懷學翁兄 癸酉

有酒不共飲君為松下人始悔生存時不獲日相親君兒遠不歸君詩久恐湮萬世理如此停杯問蒼旻

十六夜雨邀諸姪小飲

世事不可期今宵竟踈雨豈無樽中酒終復減歡趣子姪既滿前稍上相笑語共言見面稀無月亦良聚燭花剪欲盡絡繹語庭樹雲開月已高還照人歸去

寄洪守鄭鵬南四首

其一

英英瑞世氣今在斗牛間定知古龍劍千載乃一還兩風既順時五穀如丘山民物不疵癘朱草生堅頑願從蘇雲卿種菜湖

水灣

其二

明公國之彥海內今誰儔使節遍南服晚乃守雄州霜露回為春意和氣仍秋月寒西山嶠雨斷章江洲疲甿既蘇息佳趣倘可酬

其三

梅子非仙才高見在物先區上僅一慰去就乃偉然江山澹無語事往隨孤煙巨省立萬馬白日大燾懸古人不可見表章賴公賢

其四

高士去千載危亭被崇苔湖水澹秋色野鳧時下來春風百鳥鳴楊花滿樓臺行行事遊冶安知欽高才知公重風化枉轍能徘徊

曉發印山道中喜晴

翳_上煙散陂沉沉雨承雷桑暗麥芒齊山園雉晨雒老翁驅犢
行丁壯各鋤耨我亦駐筍輿一訪農圃要答言春事深耕時
及候豐凶雖天教用力非可後感彼務本言愧余尚奔走

送蕭從周赴廣東帥閫照磨

崇_上五羊城雄藩鎮南服海風吹貔貅嶺月懸大燾君居清油
幕美器瑩如玉榕葉秋雲深笏子夏雨熟寄言慎寒暑從此奮
遐躅

中秋故鄉南鄰楊氏招飲

老來歸故里百事非故情惟有山間月猶作兒時明是時秋且
半夕氣忽已清南鄰招客飲步聽危澗聲月色酒中亂樹影盤
中橫鄉曲佳節意風露白髮莖我懷豈在酒酒觴且徐傾

盧堯道中

客枕睡方適雞鳴戒行路月落斜雲間餘光在高樹遠材四五
家朝煙澹江浦依稀橋邊人髻髻山下塢乘車與負戴擾_上各
馳騫百代無窮期妍媸迭新故感此行躊躇鴈聲忽橫度

寄題胡氏澗月堂

泠泠山中澗皎皎天上月以月照澗泉舉世無此潔月以表我
心澗以明我德秋風吹八極路石濯華髮短歌吸寒光羽衣弄
飛雪夢騎白鳳凰直上碧瑤闕安知世間人咻咻方病熱

又

世人不識泉等之黃泥湍世人不識月視若白瓦盤斷篙三板
船沮如鯀鱓蟠擊筵喧里耳曉_上聲不完嗟此泉與月信當何
人看我嘗溯其源顛白通廣寒懿彼隱君子相從此盤桓

悼往用友人韻

百世來未已千載去不回毀器無完梓焚玉成惡灰嗟哉已逝人忽忽誰所催琴懸久不撫闔閉終無排沉憂鮮一適永別非暫乖崇卜園中花烟若白雪裁有酒今不共慨然心為摧

酬邵有初

邵子國之器胸有石渠閣翩如孤鳳凰萬里不可縛文采臨風高肯顧臯鷲惡胡為守一窠寂寞猶似昨讀書諒有會娛親亦至樂上林多高株庶用得所托

晚春和蕭孚有二首

朝陽發微燠夕雲生層陰東池荇芽短稍覺新水深攀翻步春風孤唳聞遙禽適此得倦坐欣然誰會心俯見水邊影閑披竹間襟邂逅有佳致欲賞難復尋鄰酒夜來熟邀客歸共斟客去

因獨醉卜醒還自吟

又

幽抱鮮歡情況比春多陰圖史揜一室蕭然門巷深煮茗晝已晏時下花間禽還往既寡儔欣戚當殊心微風動書几樹影忽在襟幸為時所棄至理得探尋東階有美井溉飪可灌斟食飽良自愧臥聽山葉吟

芍藥

夏早衆綠翳階藹始獨開窈窕專后德深房出徘徊翠蕤擁帝輦手擎紫霞杯夜永宮月酣餘香散蓬萊

曉行

畏熱中夜發出門人已多紛紜各有役如水爭趨河始知昨宵夢此時方無何悠悠百年問夢逸瞬息過大星如玉斗照我雙

鬢儲東日如車輪三輟未上坡

暮憇南溪橋

黑雲高崇上落日在雲後狀如張玄袍黃金綠其首疾風吹黍
差微陷成杵白萬里青天遙數鳧下荒畝

苦旱 壬申

七月暑逾熾夜涼如高秋陰陽既罕構時雨知難求良苗委白
莽遂茲空田疇疾風起地埃枯藁鳴蕭颼饑粥當不具官賦何
以酬卒歲無卉服誰能完續裘悵然悲疲吐吾亦憂吾憂

八月四夜聞微雨

夢覺有奇事淅瀝高瓦鳴焦枯豈云潤且欣聞雨聲秋稻既無
及蔬麥猶可畊側耳恐復止願望深中情向來春夏交流潦高
入城秋旱理宜有天道良難平大鈞轉萬物旋斡勢孔輕仙瓢

貯海水安得盡注傾

夜聞桂香

雲月遮晦明微涼入幽寢推窓寂無人老桂香可飲百年無適
意短髮謾垂領悠悠市道交舉俗無管卽

寄題高氏靜山堂

太初割元氣散在八極中一靜閱今古默與天運通草木奮霄
漢神變生霆風本性固如此孰能窺其功

曉立

清晨有良悟偶此得少立雨餘溪聲近霧重林氣濕宿禽去初
盡畊者稍已出此心諒無同汨沒聊日日

初度日和蕭孚有見壽三首 前二詩詠其弟蘭雪

其一

崇上畹中秀歲晚有佳色霜霰淒以來凌厲氣不折美人昔滋
種所貴非凡物采采懷袖間三歲香不歇尼父為援琴一彈重
魯國湘臣繼為佩食芳可絕粒豈無他華英高世在貞德安得
因長風貢之白瑤闕

其二

天上多奇花大者可如手歲寒發奇色皎潔照宇宙美人玉為
冠侍女練為袖簪之乘風遊姝嫿掩群醜贈我雙白璧千金不
輕買我欲酌斗酒還為美人壽風標忌天潔顏色忌天秀何由
返天宮藏之以為久

其三

天女五色機織自開闢日至今弄寒梭軋上猶未息筋力弊千
秋鬢髮變遙夕織成鸞鳳縑世俗猶厭質藏之不復道投杼事
安歇所貴識者知尚使光價溢歲晏風雪驕萬里寒鑱骨誰能
製為裘一展復三極

和張漢英見壽

我昔三千秋曾寒蓬萊芳右擘方平麟左持王母觴夜立通明
殿帝旁司綠章三生習未盡謫墮翰墨場飢寒如酒顏齟齬困
魯臧賴有二三子相從如鴈行又持青琅玕壽我升我堂我老
學蝟蟄者子爭鵬翔愧我非韓才期子樊與張豈有龍泉鋒不
能藏尚方

玉笥山何提點建三清殿二首

竒峰雲岫峨白玉作樓觀飛乘墮人間彷彿天上半只今三千
秋妙斲始一換丹霞貫觚稜白日隱其閑吹笙集群帝一笑視
汗漫倘逢梅子真小立共談漢

又

始青何魏々妙道不可說出虛還入無豈必待宮闕去地千丈
高竇棟忽以傑下視九州九決莽如碎雪騎麟睨北斗夜冷遺
玉玦會借回仙叢共臥山中月

庚午冬留塗州憶亡孫鳳

古道昔同往天寒今獨行汝死不自悲我老難為情死者若不
悲死當勝於生霜重草盡委山空泉自鳴我髮既盡自我懷何
由平

又

快意每不至傷心來自多十年五痛哭安得髮不皤之子入夢
想長眉雙頰醜氣既何之耳側猶絃歌月上高林楓月落幽
社蘿怪魑攫人命陰壑森蛟鼉吾聞聖明時沴不干太和重華

不可慙千古當奈何

和涂率脩中秋二首

來日不可麾去日不可招老衰既易至千載知非遙明明中天
月照此佳節宵歡薄憐趣減酒漓知俗澆緬懷區中交我我多
蟬貂豈無知心人未若涂與蕭持觴不能飲矯首窺崇霄安得
挿長翮與之鳴清朝

又

佳節去如客茲晨已難招又如波中舟汎汎看漸遙適此有名
酒足以慰良宵早々苙欲悴自汲頰灌洗月明簪其英婀娜如
垂貂極知非節物頗勝服菜蕭鄙性偏嗜愛扶植愧高霄夜深
風露多生意觀明朝

送王伯振憲僉

健翮隘六合逸足輕長途抱才既不群常調安得拘王公天下
士風節今所無脫身常布中振袂升天衢遂通金閨籍早贊臯
稷謨朝駕刷玄圃暮車息清都高馳飛霞佩縱挹寒露壺手持
使星節冰霜歷番禹經綸要大用令德天所扶青原昔仕邦重
遊真壯圖父老傾酒觴臨分何踟躕祝公秉鈞軸四海躋唐虞

和張自翁答婁廣文雪蓬足疾

支離妙無用鼓筴食人十王駘中分魯形廢道始入木壽不願
材齒堅以居濕倚伏本何常失馬福所集奈何煎喜憂自滴槁
竹汁至人蘊天和客沴當自戢驕陽脫冰飲至陰謝裘襲心同
造物游身豈二豎繫株拘海自運捷者瞠不及示病學維摩要
以鈍為急我生困世途裹足掃梯級自安却鄆步不效文公習
君詩劇鶻羽絕藝忘決拾又如控龍駒迎候不獲揖一讀顏為

開浩歎神物蟄再吟手不放珍過侯壁執坐憐食藿澹共齧魚
鳳泣請君勅仙神呵護九轉粒散為六合春禎咎變嘔吸世無
疵癘人偃者皆起立

再用前韻簡諸和者

青天行萬古度三百六十東西蟻疾遲南北極出入木金互健
順水火迭燥濕萬物生其間一氣隨散集洛花炊瓊肌山菜冷
醃汁雲高鵬路多蒿短鷄翼戩夏璜委塗泥燕石或什襲涎駒
駕金根天驥困隸繫嗟哉造化理顛倒過不及少憂貧賤拘老
怨歲月急舉觴共問天升覽瀕幾級我文如貧女寒燭癡組習
百年供蓼苦萬事如瀟拾今年金川東避遞車笠揖每見意氣
生浩然春啓蟄明時用多士陋者猶戟執誰非彈冠喜何用向
隅泣君才豈山棲未可言絕粒屬君皋夔任貸我喬松吸我和

君當歌天風白雲立

送嚴仁安教授二首

蕭蕭羊裘子百世餘清風聞孫頗相似志節甘固窮三年青原
教介直誰與同春遊望肥馬秋夢思鳴蛩貌作衛樂癯詩比鮑
謝工離別古所難風帆去如鴻

又

良醫有相道天下無沉痾况以醫教人濟世當益多中仁外自
見根盛宜繁柯萬物通一體流暢春風和清時念民瘼岐扁聯
禁坡勗哉勵羽翼雲漢終凌摩

和張慶遠遊青原

平生高恒心今日行茲原東風豈不好褰衣步青天境空忽欲
動意却仍貪前白日照八極千崖偃如眠芙蓉遠脩供鈴鐸晝
不喧佛祖了何語香爐自主煙群經過名教乃以文字傳題詩
雜好醜訥者存歲年不知自有以登覽誰最先春橋喚飲酒一
醉日可千陰七風在麓炯七天映泉同未不同趣隔花亦垂鞭
和諸友登洞巖用工部龍門寺韻三首

其一

御城隱東峰芙蓉亘西境昔聞閻太守於此謝幻影仙茅一丈
高飛瀑六月冷悠悠遼東鶴千載一歸省

其二

平生慕茲巖未踏巖中境及茲共賦詩自笑如捕影蓋臣鄉邑
廢遊客姓名冷古人悲湛輦臨風還自省

其三

志士懷四方孤生念遐境如何幽絕地不著冷蟬影買船江口

風展簾巖下冷茲遊諒非遙勝趣當暫省

和羅昌逢千葉桃

閨嬴首增春朔霽久連望梅殘不留玉枕盛忽成障異姿奪衆
妍殊萼同一狀重緋雜楊裝疊綵迷下上淚明露借光影墮日
分漾紛披競年華剪刻費天匠先生被花惱書罷時亦訪亭空
畫無人山鳥立幽折橫波繞碧帶老樹入古像同遊無前度得
句有孤倡仙源誰與期微風起衣浪

送李學錄考滿歸廬山

吾聞山房書富蓄冠天下其孫善讀之聲譽播時價偉哉墨泉
君千夫白玉瀉序庠得君重冠佩領儒雅學端衆所敬交重事
難舍木脫鷺嶼秋帆歸建江夜他日忽相思風高鴈橫野

和高師周有短序

師周吉文俊士也著名久矣於今為老成連舉於有司
不得志丙寅十月用天運苟如此作起語為古句十五
韻見寄余感其少年翰墨相與晚節坎壈相望嘗欲和
之次年正月始能援筆而以陶語置末聯云

相牛學甯子殖貨師計然君平隱賣卜步隲甘灌園古人苟齟
齟亦在數者間郭門秋風高老屋脩竹邊席珍門無聘懷賢意
自憐擷菊飲寒澗鼓琴忘歲年故人萬山中燈火窮青編草玄
髮如雪投筆相顧歎世好皆楚腰僮被不見妍梧珉薦清廟滿
腹空琅玕學畊恨已晚萬事甘自捐吾聞九成樂顛倒隨陳完
至音一以散誰復窺其根卓哉吾心理本具混闢前天運苟如
此相期在聖賢

和鄧牧謙社日郊行

春風輞川花社日浣溪酒百年少曠懷四海幾佳友馬蹄破莎
泥輿影掠桑畝交深主忘賓句逸心應手流水清繞廬好山秀
當牖幽尋既有會劇語不知久撫卷如同遊不待接踵肘妙乳
蓬萊音三歎得希有

遊延興寺

宋季寺基沒入鷺洲書院至是始復

穀芽吐堪束麥穗老未收犢迹橫滿道潢汗斷叢溝古苔草木
長遺址如圓丘時清幸耕種桑柘交平時人家脩竹間藤花俯
溪流蟠石之所碍鏘然鳴玉球愧我雖能詩所居無此幽曠然
生世心易足始易求過橋不能去小立聊悠悠

又

叢林翳行徑葉氣襲客襟稍深得空曠窅然銷塵心禪房白日
靜蔬花繞黃金鳥鳴寂無人庭枝弄微陰高僧為焚香相對兀
若瘖殿宇未完舊鼓鐘初成音孔釋本何意廢興乃相尋信知
衆生累等以一念深出門得好風行雲散遙岑

雨坐

近夏天氣濕飛雨無時來迴風卷高葉半林白光開空齋玩造
化聊與相徘徊吟詩卒未就晴暉在庭槐

午飲

我飲不必多醉與千石同兀然睡欲醒肌膚生纈紅從來天地
間一足無儉豐未知盡此生當復可幾中

和羅元翁三首

其一

白日懸高空夜乃息之海伏陰况薄蝕見者為永慨孰知造化
理持此並覆載如何崑山炎不肯少相待

其二

青天非不高不出環之中羸縮本無迹千載乃可同變容與夫
笑未有隱所從履霜早辨冰見月先知風如何世間意往往終
難窮

其三

清風如高人爽致可以師浮游天地間匪亟亦匪運齊統之所
招似者或致之豈伊至妙意而或入控持如何執執人可執不
可思

友恭堂

為南安人作

天初賦生民落七八極中倫屬本一體初亦不擇從風花偶相
聚並美固罕逢方其竭所感自謂金石通孰知若行路笑啣猜
矛鋒獨持惘七心四顧真若窮流言病不友謨蓋恨不恭聖賢

所不齊而或一日同旭光拜稽肅堂序如春融競難過元季角
勝嗤謨嵩聽雨同夜燭持盃坐晨鐘談經未朋徒環侍森兒童
世俗吝徐行此意何從容梅花三百里流水浮煙虹作詩寄吾
敬三歎慚高風

送艾幼玉赴南安儒教

儒官如蔗杪妄意近佳境亦知嗜習累誰俗示雋永堂七道心
翁學者倚袖領摛詞屈鄒枚講道來華而盛世擅場屋金石出
欵聲東家升仙子往七盡餘鼎空山三十年華髮忽垂頂春風
八極意獨立脩竹影一官豈足償跋涉屨崇嶺五陵多少年冰
雪照清炯揚花鳥語亂走馬出三省古來天地間此事從耿耿
南中少人事山水清可泳歲晚不負君梅雪三百傾

贈劉斗祥祈雨

古人敬天威吁咎待其定後來方伎多乃更以人勝炎風一月
早閉戶窘如病江流斷橫練擗甕竭朝暝稻畦絕鳴蛙里閭可
無命劉生起驅龍造化若可令孰能使一日春意滿丘甸勿云
事邂逅期尅乃足敬群仙居蓬萊佩玉事清靜流霞護丹宮狂
吠不聞磬嗟生獨區區豈有尺寸柄三歎慙此心作詩以為贈

戲贈祈雨者

淵龍困彌乖甕蜴閉欲僵高人輕千金不買一餉涼墨池片鴉
濕夜靈懸曙光江河如春流昔者何所藏

追和白樂天三月三十日作

人生天地間行樂苦未畢陪歡與強笑有似名無實新年如乍
來四序忽復一池痕亂微雨簷翼語殘日青山澹無在風花雜
徐疾笑持鬢間絲為問此何物

和周伯恭山長遊覺報寺

黃埃漲門衢白日照郭郭長年厭煩囂鬱若未翔廓平生嗜靜
心轉覺味不薄流光易清晏壯事落盤礴始信山壑姿終當巖
石著人情擇便適世好更羨惡逸居非不高智者笑纏縛富貴
諒所欣又若垢未濯故應任所運何者可先度向來諸名山固
有一宿覺當其失俗緣自謂如勿藥却憐心未了欲往輪四角
此如霜餘水以乃自安壑使其涉有意固已為造作乃知豪傑
士多悟匪多學恭惟平園翁至理集渾璞創寺偶一時豈以此
為托百年賢愚盡奎畫落樓閣悠上東門瓜窠上華表鶴風流
在斯人淪浹心所著夕陽草樹空客子散腰脚羊杜遺峴山松
紹謾河朔人生幾泡夢奚用苦酬酢虛名等賣瓜賣者不自嚼
東流澹連雲青山去如幕登高亦能賦有酒胡不樂放懷天地

間與彼俱調謔清風從何來我憤岸未落詩成豈不佳衆樂雜
賈鐸孔佛將無同獨愧此言約

寄題吉水程州判勤有堂

讀書如農功播耨無休時春雨因鋤鑄薰風走臺緇秋熟償所
願黍稷高京坻東家不昏勞飲酒隨市兒室空立四壁衆飽已
獨飢始知貧富權非盡天所為筋骸我所有墮廢誠非宜六經
具理道諸史垂興衰修身與治國途軌坦且夷講切得其要高
可聖賢追功名特餘事記問非所師但使本根茂華實當滿枝
退之以利誘不免後世玳英七程別駕龔卓讓設施作堂扁勤
有燈火喧吾伊頗聞郎君佳過眼無前疑胸蟠五千卷下筆蛟
龍馳勗哉樹斯文千載以為期

贈以能義惠

義財古所難史傳希以濶其間垂一二千載事若揭蕭君詩禮
家貲蓄本涼劣獨懷濟世心汲汲甚飢渴江橋橫長虹輿步無
病涉有粟濟歲飢有薪救冬雪親與仁民隆殺各有節東家
田連阡鐘鼓鳴繡闥春遊飾燕駮夜宴圍趙瑟族姻半顛連肝
膽迥楚越况能念閭里濡响誓俱活嗟我蕭君賢財出鷺股割
絕甘不待多為惠貴當厄丈夫志及民常欲俟顯達歲月忽蹉
跎白雪颯秋髮誰能持此詩誦與腰金客

五日和邵有初

節謝客稍稀書永意彌獨滿花間雨林光弄遙綠緬懷獨醒
人一往不可復素心諒難得且酌樽中醪

白木槿

種臺每開
十日

數卷出籬援耿耿照夜闌月寒客獨起恍若山雪殘天風冷然

來坐久身欲翰夢酌瓊宮漿薦以雕玉盤群妃霓裳冷天嬌環
青鸞世言朝暮落耐此十日看始知潔白姿頗勝施朱丹太鈞
縱萬物爾本羞蕙蘭同類偶自別亦復得賞歎勗哉勵貞節相
期在歲寒

村墅曉起

秋晨雨初歇草木涼蕭蕭墻桂吐微香架荆揚其條物意正自
適而我亦逍遙物不怨閑棄我豈傷寂寥物我樂天運可長亦
可消

荷花莊獨步 庚午

少年所寓留今視為故里鄰翁不知老笑我老如此徘徊阡畝
間感會獨在已雨足秋禾肥平偃如席几雞豚散原隴菰芋繞
池水飢饉稍已忘及此樂生理日暮樵未歸炊煙數家起

又 舊與彭士奇羅君遜皆寓此

昔與二三友周回此田疇中歲風雨散茲遊誰與待望山漸適
意得樹亦少休峰回西風長吹我駝毛裘登高遂遐矚一粟托
九州去住定有契欣戚焉足番戲攀西祠花下濯北澗流

八月十四夜聽雨

佳節隔一日連陰雨凝秋不知及明夕當可見月不陰陽迭相
乘萬古理可求明月豈我違美酒宜預謀 不音否

田家詠

田家務生理機車夜紛然少多有程度夜久始安眠雞鳴復競
起照室松明懸日日不遑息不飽粥與饘自言多假貸火宅百
慮煎大家急索逋往往乘豐年豐年固可喜可喜亦可憐

又

日出山東明荷鋤事耕作日入山西昏持斧斲松柞但取朝夕
給不恨筋力弱秋綿吐圃巷南市酒可博相攜各有徒澆倦亦
暫樂豈必無機心嗜慾良亦薄

癸酉元日

元日解纜續氣候何過暄墻東有繁梅清曉蜂喧聒高齋門晝
闌靜坐觀遙天瓶英炯如玉相對俱無言

元日賦紅梅

紅梅本遲暮冬暖遂爭先亂粧額黃澹細鶴丹砂圓維加點染
土風致終自然懷哉生意具欲折還復憐物理且如此吾生寧
怨天

石菖蒲

盆池有靈苗石罅忘偏互微根亂繁絲疎葉散纖碧苔莓封巉
岩沙水明的皜所貴含貞姿終然傲蒼色道人勤養護黃悴輒
剪剔常與貝葉書珍愛同凡格豫樟蟠青冥風雨作霹靂小大
固爾殊賦分焉得易相期喬松交歲晚堅九節

又

始從山中來遂置窓几間稍依勺水潤猶托怪石頑竅沙涵淺
白均苔上微斑貞靜固可愛長茂良已艱幸與好修者同此一
室開月寒垂珠露玄津自根還燈火親已晚庶用凝頽顏

贈興國石印歐陽明翁

淳樸既已散大年良亦稀惟聞南陽山食菊多耄耆又聞商顏
老頽頽霜鬚眉時與蓬萊仙騎鹿扶桑池元氣有鍾會昔聞今
見之崇崇鬱孤間文石如印奇君家擅其秀兄弟皆期頤曾玄
羅高堂綵服光陸離南燈北窗月千丈喧吾伊聖朝重耆德坊

表生光輝我欲往相從共食瓊田芝笑間廣成子重逢復何期

賦興國王氏 梅窓

天地有清氣散作梅窓風梅窓有奇致妙在窓月中金莖澹午夜清霜飛天空道人起危坐八面虛玲瓏橫斜落瘦影妙筆由天工玩之了無言意與太極同我聞三槐家種之在瑤宮千載有佳句何異孤山翁

八月十日蕭孚有邀同蕭州判安國諸賢集德元寺鳳山

繼飲熊氏園

應俗妨良遊茲行偶能遂初逢梵寺靜繼得儒宮邃晚芳被深徑寂歷含野意游鱗動微瀾幽鳥下荒砌怡然抱蕭爽適以念興廢後遊誰與期得酒且復醉

諸賢皆和遂再用韻

夏華既云謝秋實良已遂幽行歷故墟一逕入深邃感舊多嬰懷得勝亦會意微風來高林小坐列苔砌攀覽景彌佳衰倦興先廢路逢隴上人正復可同醉

旦坐對客

夜久聽寒雨坐來星滿天重霧被原野漫々白於氈五更雨復集急灑驚客眠豈意今日霽旭暎如黃綿相對庭樹下滿傾藥玉船萬事且勿慮蒼天工轉旋

曉行

星明天宇迥山驛鼓初發行人稍已動露氣漫墊白方塘漫道隅荒々似寒月日出炊煙橫雞聲隔林樾

和臨江饒自然夜坐

庭樹秋月高危葉先欲墮孤蛩感涼氣唧々稍近坐鄰家弄機

杼微燈出窓破寢齋生新苔禪裯揜閑臥

再用前韻贊饒所作山水圖

高人發秘思妙景自天墮蕭々山水間草樹環四坐雲歸野色
靜泉落巖光破平生慕清遊展轉面壁臥

蕭孚有諸君見過貽詩復用饒韻二首

閉門無來人秋晚柿葉墮時從林下行還向草間坐車馬忽枉
顧蕭々踏苔破客去明月上山禽喧夕臥

又

子雲事規矩歲晚高閣墮何如馬長卿都騎傾四坐吾生兩相
忘寂寞茆屋破陶然盃酒間竹床飽秋臥

霰雪和彭經歷琦初庚午

歲飢爪地荒老病卧玄晏閉門三日雪飛霰相雜亂飄空乍鳴

屋穿隙已在案載途積愈高集水凝不泮山寒消久暄土潤蘇
亢旱頗疑湘鮫泣珠璣夜紛散又如洛倉破白粲接原岸柔條
壓既低高木擎欲斷體圓工斲弄地遠迷界限我生事嘲吟寒
餓不可道坐憫民瘼深誰與覓醫緩救荒既不預應卒自無筭
古稱兆豐年至此可三歎

時歲將除再用韻和之

別歲夜臥遲怯冷朝起晏黃雲低不動白霰下愈亂鳴簷鏘若
珮積地厚成案遇堅勢屢躍得暖温先泮嚴沍阻春生蕭條助
人早紛如撞斗破疾若搏沙散朽株發英華深谷變陵岸先生
懶斫路門外人跡斷作詩無雕鏤白戰安可限空山斲黃精微
此命難道少年喜快書老大悔儒緩豪門方飲羔觴急不可筭
安知負薪者道旁拊膺歎

和邵有初同飲熊氏小園

客佳不必多地近得頻往極知後老時聊復縱心賞樹深路欲
盡林缺天忽敞坐久飛雨來黑雲湧奇嶂清風雜笑語共作金
石響尚疑有餘韻隱隱在蓬萊豆觴稍狼藉賓主各酣暢安知
墻外人謂墻外千載落埃埃生時諒自謀局促戒游蕩百營有
醜妍一盡無老壯何為苦不飲勞身入羈鞅

贈青田道人

軒上青田鶴萬里在羽翰曾從蘇下去復此來人寰相望三千
年曼然鳴空山蓬萊雲峨峨夜永風月寒天街方九軌要爾駿
笙鸞胡為鶯與駕飽食青琅玕嗟爾有仙才欲往諒不難

和張尚德憲郎

君詩如長江浩浩積瀦匯縱之瀉千里所過不可界又如百貨
集光彩照圓圖銛鉉于莫鋒溫潤瑤璃佩變化發令姿富博駭

群睽鬱孤留十日山水各獻態振衣千仞顛營款谷秋籟涉溪
螺斗驚窺谷祀根吠群峰如故人拄杖靜相對畫追坡仙遊踏
破山浪翠吟工歷木容氣正失垣魅知君青雲士勝迹猶所愛
經濟滿胸中領覽暫方外不同牛山登流涕感謝代五羊屹霜
臺椽檄促今迨懸知衆器陳政復待敷鷲古來成功人所貴志
慷慨文奎動遐極爽氣破炎霽九月霜露嚴整駕傲高邁便同
南溟鵬俯謝蜩鸚類

和張子明學錄三首

其一

比竹無至情焦桐無餘滋和音發清潤婉妾令人思奇薦傾衆
目矯然出藩籬物理終有合恨無音與姿

其二

白雲豈不潔或謂無其芳斗柄豈不高或謂難挹漿高潔自皦
皦俯視驚堂上倚杖久無言飛雲度橫塘

其三

張君北方學易道究微淨長才譬騏驥跼蹐果下徑作亭依魯
城傲悅有餘興芳草皆會心飛雲亦成詠

再和三首

其一

滔上九江流南紀胥潤滋禹功之所浚萬世可以思觀其赴海
心誰能與藩籬志士諒不殊卓哉經濟姿

其二

微露澹秋色佳植崇時芳采之遺所思寄情如饋漿美人冰雪
姿當置白玉堂清風忽徐來文漪遍方塘

其三

文江抱東山秋水綠逾淨崇上聖人宮飛橋被衢徑多士欣所
慕遊覽足高興悠上在泮飲炯炯浴沂詠

臨江傳用賓以詩見贄并貽端石用韻為謝

幽幽端溪石來自佳人持相待三千年所得非所期春風琢粹
質秋泉湧寒滋文增李杜壯書助鍾王宜聞昔初取時千夫下
巖陸堅錐啓石礦利刀斬荆藜鐫鏤后土閱百醜得一奇點若
魯鷗美伏如虞雞鷗宜登白玉堂黃麻照春姿發揮四海治潤
洽萬姓私謨希禹皋懿誥逸周召規胡為到窮谷一落不可追
飢吟臘雪凍病哦春日遲蹇上涓滴潤不能霑硯溜生從嘉興
學江漢驅文辭鉅冊博群理三讀為歎咨研磨不自寶乃以贈
所知愧我無所用藏之如鎮圭

山礬

叢_匕亂玉糝_蘿_匕含金綉山明風日醉香入行人肌塌然薪樸
間時至有此奇我欲畧下體持種蓬萊池美人天上來萬一充
調飢

瑞香

蘄_匕丁香角滂_匕水沉味月映赤瑛色日照紫煙氣神農不知
名但道天下瑞夜寒擷其英綴作飛霞佩願登君子身華滋長
不悴

雨晴門外獨立

東風瞰我幃啼鳥發我興出門更無人惟有青山靜瑀_匕石水
鳴忽洗人世聽它日豈不來邂逅乃復勝

暮坐

悄悄若有懷悠悠竟無適春深墻英落失我庭下石颯然一雨
止坐見萬瓦濕風急寺鐘盡惆悵成暝色

秋夜

閱書意適倦仰見檐月明孤燈秋夜客獨聽藥鼎聲廢吟聊養
病處寂更生情還看手中扇持此感平生

客懷

去住兩無定幽獨誰為開秋齋朝雨濕飢禽獨下來繁柯委悴
葉廢書振新埃懷安誠可適終當何所裁

開歲三日池上小立

今日天氣暖已似三月春經冬雨雪少風起輒生塵道人幽行
倦樹下一正巾流水見兩鬢一笑歎我身日光墮木影滿沼黃
金鱗白雲行其間游儵動齋淪偶然景與遇亦足適吾真人生

會心處何必窮其濱
芸黃埃中勿語行道人

新晴偶步

宿雨衆卉濕簇
新黃稠蜂聲
蒼氣暖鳥語
林光幽戲拈碧桃
片試放清池
溝翻亂眼急
既礙還復流
雖云玩光景
聊復寬
鬱憂不知玄
都子會意
有此不
不音否

山家阻雨得晴出郊

山家半月番坐待
雨聲住東風入我簷
領客村南去晴光著天
壤生意欲飛舞
野禽拂清漣
雜花滿幽樹
回首西岡麥十里
綠如雨新年今日佳
復足濟勝具兒時所
繼過髣髴猶可觀
穿深過亂峰意與仙境
遇白雲行洞口枯木
記歸路安知山間人
不訝余何故

初見白髮

本無大憂患何謂蚤見及
人言汝多知我亦怪弱質
崑而日夜運春雨浸雲
澤本不與相期安能限
其色門前晞朝陽遠映
江柳黑數根偶如此何
用更拔摘待渠三千丈
更好照庭雪

早行值雨

瀕江夜不寐舟客聲可怪
颼上篁竹動沙水輒澎湃
晨征路決漉春泥踏行
蟹江空霧連山隔手已
為海古木夾道邊宿雨
驚我蓋我行亦何為益
信勞大塊平生青藜杖
至此如足賴天地稍嚮
明雲來復如黛平田萬
白珠欲攫不可待竒變
固可觀跋涉良足慨作
詩寄吾友要使心目會
何時終南山臥聽響窓
外

寄鍾祥叔

三歲祗等閑一日正難度
向來會心處邂逅誰得
語山深百鳥鳴想見吟
益苦君才極落上槃會
過齊楚寒機變鬢髮擔
不輕

一顧坐令車馬熱短褐尊霧組丈夫志經綸寄食等傭雇紛紛
適獻笑得失豈相補春雨漲空江暮雲帶平莽悵然良晤期且
寄餘春賦

園亭夜飲

酒酣愛花香三嗅滄欲既春風心骨軟狂過發永歎却念坐間
人誰共此時意

池亭即景

小亭掃芳晝幽鳥語初暖坐歌階草柔行避徑條短水光與花
影歷々明不亂疾風忽翻林落紅半池滿

午坐

今日頻送客兀坐心未定午倦睡適來鳥語偏滿聽昏々半人
世隔屋喧笑競惱我彼不期閱動政在靜清風白晝永庭影亂
復正悠々無與言起步林東逕

援筆

落日池上飲荷花醉於人清風吹人衣玉笙徹秋旻酒酣起絕
叫遊子不念貧平生阮嗣宗定勝石季倫

呈涇溪劉先生二首

仙人三山來袖有五尺琴綠尾龍門植朱絲軒轅音攜之魯謁
舜三奏鳳舞庭風高天路斷歸見崑崙青起視八極間琅々成
孤鳴綠海凝不動白日回夜明時遠地亦失猶使天下頊但恨
無子期彼直樂其名

又

六合白日盡閉門讀仙書骨凡俗亦重三歎空若無朝芝與暮
石憂樂病益癯坐聞安期生散藥行八區飛霞貫紫帳天風吹

流蘇青童笑九丹庭下白玉壺念以千載事咫尺雲中居奈何
歲月忽欲徃終慙愚

賦小松樹

何時始移根今日已映坐沐露欲五寸出草先幾箇林深帶宿
潤滑滑垂白唾欣然千丈意鬱勃不可挫我無定居地此計恐
成蹉他年欲待陰日月當已過桑麻要生養文字迫寒餓柳傳
未可學記書真足課如何抱空踈矧復習癡情嗜飲以山水五
歲飽高臥君看重來時風雨夜相和

曉起

曉街千動發秋房獨酣寢紅日照松端鳥雀鳴相應世味澹不
生道心方暫領擾々塵埃間老我不自省

遊崇福寺

我齋不盈丈面壁兀若頑出門天地濶曠如脫牢閤青童迎相
揖笑報山僧還婆娑三四客竟日長松間中心定何如氣象無
此閑誰當千載後如我坐茲山

暮雨

層宇晴氣濁霽然生浮雲夕風入客體暄寒倏以分坐愛墻西
木微雨偏可聞松苗潤當時藥草秀已耘還因春務迫愧我道
未勤

和蕭安國浴罷見寄

烈日曬書牖微風懷舞雩溯溪得盤渦日覺泉竇枯馳暉貫水
石交曲如金鋪從容雖竟日忽々若有驅始知羈旅中一快終
非娛此山豈有契久住真慵愚年々見華黍頗熟田間夫人生
亦底用丈室飯一盂崔嵬七尺影壯矣將奚圖東行有問我多

病同相如

偶題

客懷無可著，日上來看花。夫不自食同里為天涯，風微天無雲日落，人歸家聊題今日心，寄爾東門鴉。

七夕二首

斜月隱雲裏，明河橫樓東。鱗鱗萬瓦靜，天高樹無風。衆星炯不動，靈鵲從何通。遙知積氣上六合，方無窮。十年欲學道，憂樂填我胸。胡為彼玉人，世念亦未空。牽牛紫鴛衣，織女白玉容。一水清可涉，非時寧敢從。窮年弄機杼，縫成合歡宮。綵掛牛之角，樞倚虛之東。停車俯八極，白草連秋風。勿嗔會合少，天地以相終。

偶行

東阡出南陌，天氣近佳節。日晚春衣翻，崇阿微風發。飄然起長懷，矯首萬象列。大江日夜流，天際生新月。

把鏡

今年復明年，天地終如此。山中有畸人，頗怨歲月逝。梅花盛已落，桃李欲相媚。愁來把鏡看，白髮蚤三四。

和蕭天叙山行

臨水偶成趣，朋來如相期。人家山礪隈，往覓漿水遲。清樾抱石橋，行旅坐支頤。交交雙鳴禽，見客已驚移。

暮齋

客去簷雀噪，高齋久清立。踈雨無行人，煙崦夕炊濕。前園薜蘿衰，東鄰日夜織。同門信不至，鴻鴈滿江澤。

別劉文甫少府

崑崙八極間白日去未已堂上梅溪翁眾器古壘洗向來幸不見既見會乃幾平生慕前修婆飭不自起始愧古人學不憚走千里歲暮高館寒殘雪尚可履公歸我亦去後會未得擬請參在家禪願吸西江水

先母諱日痛不可言二詩寄家兄學翁

今朝亦何朝驚骨淚如霰嗟哉十五年每歲少親奠墻墳長春莽當日本草定生存未能養臨歿不及見如何一杯土展轉日如電乾坤有盡期此事不可念前年理舊衣猶是雪寒線生子亦何為循髮青欲變寫哀寄吾兄行雲滿郊甸

歛形亦為孝擇燥何必福因循若有待萬死罪莫贖春來凜可痛逸籟過新竹况堪分百念來忽去亦儻吾兒寄他巢未能念姓族君兒慧而病近復聞廢讀林煙午未起多雨潦入屋回首

同氣親參差多可哭幸今得天地此事決秋菊

彭琦初作影調義因復戲作

出門違所親百里變山水東西與南北舉頭惟見爾七何無一事相逐若相喜爾從扶桑來又欲催我起長途見爾落映我走如鬼嗟哉爾不死我苦未可已曩者郭門人怨爾不少止奈爾頗癡頑萬古終如此

義谷影

我生天地間與爾皆有役我不與爾謀爾豈願我息終風十日霾知爾怨已極孟冬夜差永寒燭慘相索爾如生華屋玉面不我識爾如息樂丘與爾永相隔奈何爾不願爾願或不得是機偶相遭萬古亦戲劇

文江同諸公晚步

意登何須高一覽萬象足大江繞孤縣草木入滙復東山走虬
龍出沒獻所伏晚晴天氣正新月映江淥徘徊數過舟上下有
遲速是時清霜初木落杭稻熟平田見溝塍荒埜縱牛牧天時
既已豐世運或可復陋邦亦何為巨鎮今所獨遙聞郅都鷹郡
邑所側目西鄉瞰官途亦或理迺屋焉安倘可期未敢責深欲

有行

昔我行高原黍稷青茫々及茲涉秋雨晚稻亦已黃東峰出晴
日西嶺陰不常草木凝正色英華欲歸藏倦言一歲間奔走何
所將驚風盛弓繳鴻鵠高其翔志士念四海時危懷故鄉蓬蒿
萬偏側乾坤迴其綱

感興二首

窓空見高樹新葉一寸碧春色已如此十日曾不去年出山

遲臨水見秧刺昨因農圃言偶念丘壠迹豈無躬耕資懶性乃
弗力便當歸去來家人為炊秣

測測衣尚薄高齋近寒食微雨濕飛覺行雲弄晚色墻英困未
舒庭綠日無迹芳年逝相逢胡乃長為客人人生天倫樂富貴不
與易念歸乃不歸此興為誰役

對月

月明方馬秣夜永接樂悲葉光如垂露宿鳥屢翻枝柴門步復
立萬恨集此時飢驅明當別木末踈星稜

雨後

微鐘生暝色遠舍春正急空檐暮雨歇偶然有餘滴危坐久無
言童子了不識

搖搖田中草

搖搖田中草靡靡何足矜歲久蕩春暉丁男未歸耕旭日野鷺
來飛舞相踐凌鷺飽去不念草性隨自榮

青青橋邊柳

青青橋邊柳移植東家門但得歲歲好那能懷本根遊子年貌
往踟躕武昌春所思在舊物微木非足存

新晴

春晴吾故人兩月一見之先生坐不出猶如雨中癡案銅浸素
蔦幽貞澹相持倘得造化心春色政在茲

山墅初冬二首

甲戌

鄰春五更動機杼響俱發薄霜厲曾宇天西輟孤月驛馬嘶不
已壁蛩鳴乍歇故人期不來山莊多落葉
少日鮮歡趣老境多孤踪山墅寒掩閤蒼苔生庭中濟世久已

晚著書懶無工惟應學王生作文稱酒功

送于伯尚學錄滿歸分題賦尊經閣

堂堂廬陵學傑閣凌青冥縹帙充屋棟祥光夜馳霆子史豈不
多所尊在聖經聖人制作意百世昭日星易以開造化詩以勗
觀興禮以垂世範書以底民寧春秋謹筆削亂賊思斧刑子弟
事其長臣庶尊朝廷仁義飽穀粟綱常明渭涇天地列河岱日
月行海濱大哉斯閣間萬理為一庭巍我在人目嚴敬生中局
于君三年錄口吟披不停譬如飲醇酒心醉未肯醒薰風吹歸
棹明日指劔亭自此講天祿更照青藜青

夏初城西樓讌集

輕陰翳萬屋夕陽在遙山空濛亂紫翠變化頃刻間憑虛一以
眈衆景何斑斑薨棟散高下岡峦如斷環孤檣出宵暖飛鳥時

去還客佳飲逾多感以長會艱賤言名利徒誰能同以閑勢集
易傲俗有求多俛顏悅已嫉來式違時傷廢班百年一丘墟勞
生共塵寰願與王子喬騎鳳相追攀

初夏書懷

永日賓轍稀危坐頗自佳幽禽下書几晚花獨當堦簡策散不
理焚香破孤懷猶嫌市聲聞移牀息南齋

蕭子有以左耳陶瓶對客煎茶名快媿婦坐間為賦十六

韻

南中土埴堅妙器出陶火控搏雅以靜整削平不頗渾淪象爪
團短小類摘顆粵柳實盡剝蜀芋膚未剝啄如柄揭西耳若柳
生左油滋飾外鍛灰盆墮下裹高齋奉煎烹湯勢疾軒簸狹東
蟹眼高薄逼車轂播俄頃潤渴喉巧婦愧其惰乃知轉旋工政
要傾酌安主翁嗜吟詩佳客時滿座呼童汲清深淪雪澆磊砢
急需既能應閑棄無不可東家重函鼎菌蠢腹徒果美人預為
齏常恐遲及禍何如且小用慎勿誚么麼

賦袁州鍾清卿清露軒二首

善琴

虞舜既已遠仲尼去不還寥寥古桐音流落歸空山之子子期
後千載手可攀華軒湛清夜露光在林間一彈月當戶鷺鶴蹄
清寒再彈風度水魚龍奮神奸起讎仙掌濕振衣上天閔人間
正酣睡從古聽者難

零陵有奇器升降閑世道聖人方在治激灑照青昊飛仙千仞
端探飲養其實夜寒抱瑤琴騎鳳弄華顛獨立天地間萬古以
不老

題劉氏芳洲

朝種百畹蘭暮種千樹芷芊綿十里間環之以流水春風弄柔
漿秋露濕芒履雲來值捲簾月上見隱几馨香久已忘采佩聊
自喜世人服猶艾污穢寧在已悠々千載心相望惟屈子

燕二山同知請雨中華隨應四首

峨峨廬山雲骨琢天上雪試之虞舜朝霄漢慶五色文江六月
旱千里受其德千里未足多有天下澤
堂上中華峰秀出雲霄外松花長道氣燈葉幻天界崔嵬三仙
人厭世不肯浼一笑從公遊為公作豐歲
刑鵝竟何為擊錫乃類戲古人決一獄自可回天意賢哉別駕
公展治劇勞瘁此雨當歸誰作亭公自記
豆肥悴為萁稻秀焦欲槁溝車鳴鳴々田笠曬杲杲郡公吁請
雨一雨萬物好邦民歌公賜此賜等大造

九日偶賦三首

古人愛時序行樂苦未滿心期諒多廢人世良非短富貴首不
回貧賤笑亦罕九日固自佳淒涼滯孤館
我性不藏事急吐如建瓴世人務寬厚叩意如堅城豈不共談
笑何以同其情秋風一盃酒千載無淵明
人生所涉閱散漫如天風去之即陳迹好惡俱已空誰能為在
交歲晚心亦同道傍得遺金一揖顏色充

贈丹士

大哉方寸春可以毓天地偶其一念私手足且痿痺故當先自
治無復秦越異達心世良醫未達不肯置如泉方出竇必遂到
海勢神丸構元氣鼎火力千歲謾々市井中光塵入游戲豈非
壺中公遣出世間世嗟哉閭閻子寒熱劇攻殪壯兒呻柳肘老

病喘秋肺從君訪十丹萬一施七劑

印岡道中

小溪隱曲折青山走崔嵬向來富貴人埋沒俱煙埃壞屋數十家高墻半莓苔少年所經覽白首心愈哀土人既消歇郡人爭主裁勢力有小大彼此迭往來博哉宇宙間千古同一咍

送鞏如安迎母閨中

疾風厲八極之子行奉親昔別兒未言兒今華髮新天寒渭波白雨旭秦樹春路蒼照車幃桑雉飛雉晨促歌鼓趙瑟醜酒烹猩唇盡招平生友往候湖之津

八月十四夜陰

階蘭葉猶吐庭桂芳乍歇夜涼集佳話幸有二三客杯盤雜草草聊以先令節矯首浮雲間遮隱霧微白不惜今宵陰共看明

夜月

和友人端居遣懷

嗜書固成癡愛馬亦成癖塞垣馳風朝山牖映雪夕黃埃髀盡消細字髮變碧功名諒何補歲月良不適始知苦心人不特貧賤迫

送吳提舉歸九江

承平成同文北學及楚甸多聞宿至理羸質出高辯百年兵革餘此士可幾見翩七不我留梅雨颯歸扇山城青嶂高風帆疾鶻箭寄語匡廬峯未老須一面

哭袁從義

別君未兩月傳訃始疑妄童來得直報失歎淚自放歸城弔君兒內恻刮肝臟君廬乃未定欲哭無所訪念昔客君家我弱君

始壯山窗古衣冠談論瀉春漲三峯競竒秀清絕行鴈蕩座客
多英豪車笠填里巷廐馬騰驕嘶樓姬咽清唱鼓鐘喧朝脯昌
運積饋釀夜詩涸鴈硯朝酒發鶯益君尤嗜迂濶又手折詞匠
扣扉報警聯急吐如技癢約試古洪州五月舟已榜蹉跎我興
盡君志乃獨亢霜臺肅縉紳閣閣排祭報落筆風霆生四座色
驚悵文書上省曹吏黠歲月曠復以茂異聞州里許其當才高
命苦竒遠近身已喪知君豈有待獨可念趣尚前年從謹兄千
里殞茅瘴賁志不得年追憶有餘愴君今復繼亡如山刻危嶂
死生固有數豎經乃相望福善理則那造物疑可誦知心幾何
人而况日泉壤君兒既奠居麻雪始垂帳屬我病山曠乏劣積
衰狀東芻付兒輩含悽黯東向青春如昨日白髮餘輩行悠悠
酒壚荒寂鄰笛亮秋高風動木夜永月窺幌三歎平生視淒

其隔風浪

五言絕

正心齋

以下五詠為戴正傳作

人心應萬事最戒與俱往所以古聖賢但教約其放

承志齋

古人請所與於事本為細苟能充此心何往非順志
自家意

萬物有生意欣欣同化鈞始知人心仁元與天地春

南江之南

將父水之南故家在其北依依南北情一水安可隔

十竹

高人貴不群種竹只種十我思伯夷風不妨更孤立

白木槿二首

潔比何郎白淨如寶兒
慙秋風竹籬迳日暮道人庵
童童綠萼靚炯炯瑤英削
天寒門半掩賦命無乃薄

假寐

梅援幽鳥鳴山客睡初起
空齋晝無人寒日在書几

有候

山鳥聲百變之子殊未回
不如墻西日澗灩向人來

日夕

日夕同騁望行雲遍天涯
歸來獨坐久踈雨響南齋

題清溪僧所藏枯林四畫

蘭二首

纈蒼得雨茁劍葉當風披
道人采葯去誰與同幽期

昔從楚臯見今掛梵王家
諒應面壁禪無復生心花

蒲萄二首

秋藤逸危架勢重疑欲委
高齋明月上顆顆如懸水
枯葉展大蝶低枝屈長虬
露寒壓成酒無夢到涼州

山居即事四首

井口橘依塹井頭桃覆屋
山家秋日晏閉門數修竹
村墅薄生理門靜如招提
柿葉大如扇滿地無人題
竹架已藏扇陶甌時煮茶
踈十日雨開盡黃葵花
靜意便野性新涼足高寢
山屋夜雨來歌枕談歲稔

春陰二絕

桃李生寒色連陰未著鶯
殷勤夜來雨供我聽溪聲
短上麥苗遠冷上溝水清
北山晴雨裏一樹李蒼明

夜雨獨坐

容膝九年壁陪人三斗埃小牕微冷夜掩卷雨頻來

山行

墻角袂生波山風吹而醜桃卷紅欲活愛殺可如何

元日

庭燭懸春粟瓶梅有鵬花兒童能拜跪還認客為家

除日

盤蒿番雪味槽酒入春姿斜日梅梢意年年只獨知

耳鳴三日不止

本非作勞者無奈聒吾神節奏真天樂何從舉似人

新春二首

舊雨來人斷新年遠夢多朝朝庭下樹看爾欲婆娑

淑氣已著物晴雲時弄陰隴梅坡麥外別自有傷心

暮晴

忽見今宵月那無久客晴樹鐘遲欲盡村火遠猶明

春雨曉坐

衆木蔽春塘花落如墮鳥山庄苔滿階久雨來人少



國家圖書館, NATIONAL CENTRAL LIBRARY, TAIWAN, R.O.C.

國家圖書館
民國

挂隱詩集卷二

古體七言

題曹裕之所藏曾瑞卿神龍臥沙圖

老龍胸有天下雨養道潛身臥洲渚脊鱗十丈黃金橫鬚沙萬
斛玄珠舉意酣太古陰風寒氣接洞庭秋浪怒黑如海宮仙人
燭滅撤華宴水晶蝦鬚之簾橫墮雲階寒不捲明如虬髯帝子
戰勝朝馳歸朝暎下照曳地鏢甲三百片山隄石流赤熒萬里
焚帝下墨勅搜抉江海爾不聞吾聞葛陂之竹投水奔雷澤之
梭夜逐風雨騰上天彼非龍身托形似一日乘化竊氣高飛騫
嗟爾胡為失其所胸有霖雨禁不吐坐令時人寸墨寫爾歸囊
楮大呼老龍笈天公前驅飛廉後竄雷一為人間作年豐

題彭宜遠所藏羅稚川山水樓閣圖

平沙蒼蒼鳥未歸，煙村四合高復低。漁翁兩上青蓑衣，賣魚直上長楊堤。千峰萬峰何崔嵬，朽枝瞰水忽倒垂。倦驢向橋欲渡，疑後有羸僕，勢若追却疑詩人。獨尋詩舍，鞍先濟何所之？飛樓縹緲山之西，中有美人長鬚眉。凭闌相對知為誰，豈非海上喬與期？宮中琪樹秋離離，彷彿疑有香風吹。吾聞蓬萊有此地，流水落花隔人世。便當贖買青芒鞋，小向是間住千歲。少音

芍藥歌和羅起初

我昔騎鶴遊揚州，笑玩奇花大如斗。高樓聳出霞錦窠，西施夜醉吳宮酒。高樓西苑皆言花也珊瑚萬片割曉酥，十日名香猶在手。仙家女隊千紅粧，碧油簾幙圍四廊。風暄日醉春似夢，中嫁與姚家黃小園。今日忽再見，瘦減不如當日面。夜深明月照闌干，弱影伶俜似飛燕。名花流落亦可憐，志士忼慨悲流年。欲呼四相

不可共獨醉，鶯黃壓春甕。

贈趙中山

中山本舊公子於道有得蚤遊京師為諸名公所敬

先生昔佩青珊瑚，錦袍白馬玉雪膚。夜遊鈞天聽廣樂，帝翁分食瓊宮酥。天風千丈吹綠髮，紫鴛七十黃流蘇。手斟北斗酌玉女，麻姑曉報滄溟枯。東方烏啼白日薄，姓名盡變騎鯨魚。葦池內養九芝露，金房獨照千年珠。肩摩淨名孔雀扇，足躡子晉芙蓉車。吹笙看月薊門市，從者皆服貂襜褕。群真虛左願聞道，親寫文字為其徒。少年經世二十策，海水洗盡無畱餘。始知古來忠孝士，變幻不與常人俱。君不見韓亡流落子，房子千秋萬歲傳。編書

東園花

東園花西園柳，東園昨夜春風來。西園臘雪仍折朽，東西維相

鄰一妍願一醜東園卽君十六餘千金恣買新豐酒吳姬嬌唱
燕娥舞團作花毬大如斗西園月高寒蕭蕭枯枝過時不作條
志士叩角夜寂寥卧聞卽君吹玉簫吹玉簫獵騎曉出咸陽橋
相遇不揖色尚驕可憐貢公罷梁棟彈冠但望王卽用可憐馬
生晚益窮日夜更望蘇卽官祿重豈知人生各自好誰肯輕裘
相與共西園柳東園花莫浪喜莫自嗟君不見道傍草二月三
月蒸紅霞

天高高

天高高去地幾萬里中隔以魍魎大風之狂豪六月七月旱魃
恣虐饗赤日如火銷民膏黍稻干井為黃蒿池魚涸死江沸熬
我苦熱毒無處逃前年飢死如牛毛空江窮山鬼晝號嗟哉此
事可復遭仰天三歎天高高

地隆隆

地隆隆下有海水包絡千萬重中有升天降雨之臥龍不能呼
吸此水為年豐山篁枯立山樹紅嬰婦曉汲千里中鉏耰無用
掛壁東石光落杖騰長虹郡官擊鼓鞭靈露官街十丈塵漲空
嗟哉地道成天功俯地頓足地隆隆

和邵有初見壽

姜牙膏漿天氣肅子幼種豆年不熟秋風拄杖雪滿頭自分桑
麻安杜曲東家公子蓬萊仙錦袍騎鳳高聯翩談鋒大阿不可
挫筆力三峽來無遺我如疴瘵行躑躅君步飛凌嵩華巔銅駝
陌上一携手酌我瑤池王母酒相期更待三千年還以蟠桃為
君壽

東華山天一道院歌

太極未判陰陽濛玄津蒸氣相流通劃然天高與地下但見積
水渺漭行其中我窮其源良為宮天地不死此其宗神人得之
奮以雄超遙長鈇馳大空九州八極命在躬霓旌絳節紛來從
福地蕭爽弭橫風東華之東天高峰上與元氣為冲融流光揚
采奔靈露道人羽衣雙青腫壽宮玄殿相魏重千石之窟萬石
鐘朝撞暮擊無秋夕聖人在上年穀豐道人吹笙騎鶴追喬松

題盤谷圖

廬陵即幕賓盤所李君字長翁家藏盤
谷圖非必盤谷也志隱耳為賦長句

千崖蒼_上倒石懸老檜下瞰空濶森白根上有縈絡斜下之瀑
泉下有縹緲半出之窗軒忽然漁舟散浦淑疑是秦人桃花之
仙源叢林盡處長堤統柳外沙邊行客少汀烟漠_上不成兩汀
樹疎_上似飛鳥依稀水檻知誰家疑是唐人洗藥之温口問君

此地何處尋可買不惜捐千金君言此亦盤谷境我已先從畫
中隱嗟君才氣何堂堂胸藏霖雨未八荒平明走馬入黃閣日
晏文書紛鴈行我我奎章九天上白日旌旗下仙仗秋風挿翻
高韻頑雖有此境何繇往丈夫英氣多難攀九環寶帶懷青山
朝川墅龍門灘會買青鞋待君還

夜宿山家二首

蒼山四合如鍍色滿地藤蒼白如雪夾澗居人十數家緯車共
響深更月艾烟驅蚊窗壁低棘根通犬門徑窄破衣袒跣無作
嫌安識人間絺與葛

山中舊遊猶可記竹裡青帘招我醉我傷身世感慨多野老一
盃惟徑睡夜深涼月照髮影數寸星_上不成髻東方欲赤烏亂
啼還駕筍輿謝幽致

送王士弘學政滿代

君如代北秋天之豪鷹疾颺呼霜整翮拔地而憑陵下擊乎墻
垠萬里之絕埜上摩乎崑崙千仞不可到之穹青君如洞庭龍
驤之長舟椎牛擊鼓掛帆直指東海而遨遊雪波如山鯨吞鼉
噴霆雨急舟人飲酒笑傲百怪如安流炎埃積鞫未高舉歲旱
水落晉洲渚坐令衆禽野兔得自樂短棹高歌疾飛舞丈夫借
逕學校間窮年講道凋朱顏詩章直欲凌鮑謝文筆正要窺楊
班只今官滿謁青選走馬一日看盡燕然山燕然山盧溝月行
人青絲映華髮人生有命無窮達君不見南陽文學黑頭磊落
雲臺功閔西教授三鱣講堂兆三公

兒時喜見雪

兒時喜見雪癡待天雲黃晝觀捲箔恨暝色夜聞攬裘思曙光

佳人踏靴映玉屬獵士鞚馬驟白凰千金高樓換美酒樓外三
尺酒百觴寶香綉帳春色暖俯視萬里成大荒便從淮城取元
濟直至延海歸蘇郎迺來悔狂年已過閉門讀書學堅臥蒲團
竹几聽蕭瑟畏寒自補油窗破欲論往事誰復知但見羣兒似
昔時

和東坡四時詞

燕子輕寒生院落佳人自捲猩紅幕縷頭風細墮楊花簾下日
長添繡萼纈紋酒暈透瓊肌雙陸初贏笑問誰閑縮同心當戶
立不知花影滿春衣

幕波微皺回廊永酒闌手枕珊瑚冷槐影橫階午簟涼榴花滿
地風簾靜梅酸未試意先顰倦拂琵琶撥未勻紈扇半閑冰盃
凍翠禽兩兩下窺人

瓶浸雙頭蓮，顆綠盡闌開。却青奴竹微涼，半下水晶簾。坐看踈
螢度，高屋夜靜，樓風時動，局隔牆一葉落，虛庭血色。駕羅裁未
就，月明處，起砧聲。

燭暗睡輕，聞畫角，玉盆脂水紅冰薄。深戶無風，綉幄垂小瓶一
片梅花落。轆轤隔屋轉，伊鴉雲母香，猊暈宿霞。報道卷簾寒霧
重，午粧纔試翠鈿花。

明妃曲

漢宮美人人不識，初出宮門天下惜。漢宮歌舞人不傳，琵琶馬
上行人憐。君王含情重悽惻，只在殿前番不得。人生豈是無知
音，知音已晚徒傷心。天寒衰草沙似雪，舉頭惟見漢宮月。十年
漢使去無蹤，夢中長在明光宮。國家和親四海樂，不怨君王悲
命薄。君不見秋風茂陵英雄才，萬里江都嫁昆莫。

漢宮佳麗三千人，妾身萬里當和親。當時未必恃顏色，政坐命
薄無黃金。黃河朝度冰蕭瑟，邊馬群嘶笳鼓咽。路逢漢使不道
愁，復恐君王尚淒絕。妾身夕死何足憐，獨以君命難為捐。單于
調絃親起舞，却獨上馬看青天。年年作書寄征鴈，腸斷鴈飛難
到。漢君恩許贖，比賤姬不效少卿招不歸。

前采薇歌

庚午大飢，民多采薇而食，因借伯夷采薇餓死意作采
薇歌。蓋薇亦薇屬，而差大山間人食之，謂之迷薇。見朱
氏詩。

我不是西山民，采薇不粟哀。亾敷又不是周成，卒采薇禦邊踏
霏雪。年荒良田三尺塵，甌懸冷兒踈。嗔長鏡短錐，采薇去東
家。西家相為群，霜嚴磴滑山路峭。月落巖啼，山鬼嘯。曉翻石罅
得叢根，共恨土枯根亦瘦。寸根入手如寸金，春烹作餅碎勞薪。

鹽空歎盡味慘惡空憶飯甑曾炊銀人言食薇無穀氣五日十日終亦斃今宵妻孥輶充腹誰料後來死何地我死願隨行雨仙徧傾天瓢作豐年薇根滿山人不食天下米斗皆三錢

後采薇歌

春采薇嬰兒奉賣與豪門破肥鮮年々得米不費錢冬采薇潛虬根白石犖确斲難俯身榛莽如獸蹲山寒雪高衣裂破塹藤束縛筠籃荷瘦妻羸子暮候門地確夜舂松節火沸漿浮々翻小杓濕霧騰々升上銚熬烹成餌甘比飴一飽聊償終日餓冬采薇猶可為春采薇今年根盡春苗稀豪門有米無可賣隴麥短々難樓飢采薇采薇我聞夷齊嘗食之餓死首陽天下悲嗚呼天高蕩々萬物微我死安得蒼天如

釋枯林鐵如意歌

君不是金谷園中石季偷明珠買妾長安春錦絲圍障輕一世珊瑚高株碎如塵又不是黃鶴樓邊王處仲萬騎上流縱馳鞚狂醜千石發浩歌唾壺敲碎天為動君是天台丞相之嫡孫胸中八九吞崑崙少年寶玦落荆棘再拜禪林依世尊手持鐵如意笑傲典午二豪之富貴良工精髮生碧花古制蟬螭隱元氣木盃不用輕大江蛟鯨辟易馮夷僵薊門駿馬疾秋鶻飛箭穿髀心如忘談經說史似支遁四座公卿遜高論古來豪傑多竄托槁面布衫塵土混畫蘭千紙生秋風賦詩萬卷老愈工承平智策無所用落魄行遍江湖中嗟哉爾之如意兮不願為大梁遊俠之袖椎寧落為許行耕野之鋤犁寶光發匣間里怪珍重深藏莫輕費君不見干將莫邪困豐城化為兩龍飛去延平津利器不試空有神

枯林天台葉西澗丞相之後有才氣能詩以畫蘭名世
頗勇俠或不舟渡水蓋隱於浮屠者嘗遊京師走馬海
子上中飛矢流血滿靴不顧
始歐公所稱秋演之侍欵

庚午歲七月自城中歸吉文故鄉南嶺谷平廬陵印山凡故
舊多招飲者飲後輒援筆賦詩五七言律外得歌行九篇聊
書以遣懷云爾

望城岡 揚誠齋入城必從螺岡排徊望城岡
上故有醉殺螺岡門外私酒之句

楊侯醉飲私酒門今日秋風捲行迹不知更後數十載何人知
我曾登陟憶昔老人攜我行紅顏照路雙鬢青蹉跎忽亦如此
老還望曾城坐衰草衰草秋蕭蕭官亭路遙遙後有芙蓉亘古
之岩堯前渡三江閱人之石橋百代百代高鳥飄一村一村自
漁樵

前醉歌

天青青造就萬古事不平月皓皓照盡世間人醜好人言天月
俱無心平頗醜好皆由人我言人生無智力明月青天愁所集
簞瓢貧士年少死相君蒸乳老無齒販屠市兒萬戶侯著經儒
生白滿頭李君晚役將軍府文昌碑起韓碑仆啓期九十無一
兒遷柩多孫披籍知雄狐妓園釵列屋朝雉悲歌夕牧犢楚和
抱璞哭山中燕人寶石緹十重百年老樹同一榦半作犧樽半
溝斷古來恨事何其多青天明月奈爾何我有一斗酒澆君肝
肺之嵯峨青天明月奈爾何

後醉歌

天如輪我行與之周八垠月如璧我坐對之居一室買酒酌月
月滿卮買酒澆天天飲之長風吹天碧萬里纖雲飛盡月如水
黃金滿塢董將軍長安夜炬高焚雲胡椒八百元相國翠珥寶

釵落荆棘征南竒，熱泣杜郵屬鏤憤。入洪濤，秋禹山血濺麒麟。
閣機雲，夢遶華亭鶴。破心詞，臣溺蒲衣。何如讀書閉山扉，斷頭
博士窘乘障。何如得句支藜杖。山中老人無撓權，青天明月俱
欣然。愁亦無可耐，有酒只勸月。與天青，天明月俱欣然。

貴賤吟

庚午大飢天下死者相
望秋大熟穀反大賤

春大飢，斗粟不易。娉婷姬秋大熟，三錢直買一斗粟。人間貴賤
反掌異，賤未可輕貴。難恃君不見，土龍百拜還為塵。病駒秣豆
乘錦裯，人間貴賤元無真。

冷熱吟

庚午六月雨寒連
旬閏七月如初冬

六月雨重裘不離身，七月寒北風吹倒人人言。三伏當大熱，天
公變化誰料得。君不見陰泉升釜蒸成雲，獸爐五更燼如冰。人
間冷熱君勿驚。

飲南山故居

旂竿東峙彭家寨，五代時彭玘鹿角南繞劉家村彭家旗槩落
曾立寨於此草莽敗劉家衣冠。遺子孫百年風，玉又一變叢林化壑池。成塹
山亭楊柳驛馬坊，官道豫樟北商店。詰人令族困屠沽，曠夫互
即高門閭。故家兄弟日益少，惟有老夫長眉鬚。少狂幾何忽衰
懶，歡樂無多飽憂患。天寒木落砧乍急，日暮門空客初散。餘年
定有幾，還鄉倚杖秋風看飛鴈。

飲谷平李氏

粟黃黍短沙連浦，白髮涉江尋故路。伍家渡頭篁荻秋，柳侯廟
前煙火暮。昔時冠蓋風雨凋，舅家喬木涼蕭。微吟西州淚，自
墮欲訪黃壚誰可招。杜墟左轉增閭室，兩街坐賈如郭邑。殺牛
壓醪百貨交，道逢少年不相揖。尚餘八十病姻兄，羅羞饌客空

壘夜深山月窺前庭童稚熟睡二老醒談舊未了荒雞鳴

飲印山田舍

即處下

少年曾客金竹峰江歲移住城之中城中金竹幾未往麤得白
髮成衰翁居人興亡秋葉換巧黠四方拙間開天公顛倒作奇
觀舉世區區事業義我友秀川羅文學以通第白頭胸著天祿
閣我友龍湖李隱君註謂勝方之二公秋風落筆吹行雲干將
白虹發原草蚩尤夜墮玄武老談王著經卿與軻感時屈宋能
高歌古今坎壈稱數子數子之外應更多山中秋高月如斗醉
呼老農同舉酒同舉酒滿瓦船便令餘生酒百年飲酒之日萬
五千

中秋阻雨留山中陳氏莊邀飲

去年中秋客洪州桂花莊頭山寺幽少年齷齪事記問有酒有

月無倡酬我獨不眠多徃恨坐數古人俱不見徐生亭柳禿如
帚孫氏江流淨橫練長河北斗壓高城角聲吹斷湖鴈鳴此時
少年亦酣睡滿城無人看月明今年中秋住山塢山未早寒作
風雨烹羊醜酒亦可樂但惜無月無佳句憶昔去非當雨夜恨
乏知微上天柱便今天柱可一遊老翁畏寒何可留

題劉平妻殺虎圖

君不見杞梁妻夫死但能哀聲悲又不見泰山婦虎食其夫哭
當路人生伉儷重百年閨房無力救所天空餘肝腸裂寸寸高
徹遙漢卑重泉何如濱州劉平妻獨勇殺虎奪夫皮其踵大兒
三歲能取刀小兒坐席癡不恐沙空月落山谷深妾命何輕夫
命重當時視虎如兔狐眼中無虎惟有夫一朝義聲震百郡裴
旻李廣皆庸奴古來君臣亦如此患難政要忠良扶何為當熊

待馮媛何為狄來使鶴戟射猿老將世豈多搏斃車右今不見
秋風展圖毛髮起始信人間有倫紀嗚呼河東女兒抉眼去其
夫若見此圖當頽泚

陳推官伯玉母鍾氏八十一歲受封恭人

相君饒花饌萬羊不如卮酒娛高堂黃金三組車載道不如榮
親受封誥陳公美政多平反有母八泰乘錦軒公餘談政母色
解春風滿頰晨加餐天門曉瞰光萬丈 聖人錫類恩波蕩鳳
花鴛紙動高屋鶴髮翟褱照華障官僚車馬填巷衢耆老進壽
爭攜壺庭中轟 椎大鼓諸公能歌公自舞共言遐筭古所稀
共歎激勸逢清時致君澤民要兩盡此母福澤無窮期班衣兒
啼作歡喜借問何如老萊子奉親從此位近臣借問何如萬石
君

天馬歌贈炎陵陳所安

所安名泰甲寅以天馬賦領薦下第頗不遇故以此嘆之

房精夜墮滎波中驂騶奮出如飛龍昂頭星宮逐枉矢振鬣雲
闕追天風漢家將軍三十六分道出塞爭奇功當時一躍萬馬
盡蹴踏少海霓旌紅韓哀謝輿伯樂去蹶塊誤落奚官庸十年
阜捩食不飽雖有駿步難爭雄春隨錦韉北陵北秋臥衰草東
阡東時從駕駘飲沙澗未免泥滓沾風驟夜寒首藉山谷迥長
嘶落月天地空時平文軌明蕩 萬里窮荒無虎悵交河不用
踏層冰裹足山城學馴象吾聞天子之廐十二閑驥駉並收無
棄放金根雲罕出都門喚取雍容肅仙仗

遊中華山和胡履平

我遊神山如登仙少壯欲往今暮年放身徑上最高頂下視八
極何茫然松風怒起作奔浪樹蟬絕叫疑哀猿平田分列萬仞

下一點彷彿城中煙雷藏洞穴早行兩燈隱草石宵懸天三仙
從來志當代辛苦學仙亦千載惟應濟世念未空古殿高居儼
金彩白雲不掃花滿地玄鶴歸來月生海世人慕仙未忘累春
謁秋遊貌先改西風鐵笛三千秋何處摩挲更相待

題文山衡陽躍馬圖和涇溪韻

將軍紫綬馳燕然丞相白髮初山前重瞳悲歌泣虞美伏波眼
穿鳶墮水英雄相望千萬年西風荒草迷五原延秋王孫折金
鞭女墻明月銅駝門衡山春濃風日好紫韁電轉人未老豈知
蹶塊追海橫海天如雪狂瀾倒主樓十二春衣妍流雲却月爭
取憐落花金谷獨一死蒼旻不語丹心傳劉家的盧空識意金
粟龍媒俱久逝少年相對那得知掩圖醉倚南風睡

贈劉士貴入京能詩琴

君不見南風五絃發天上壽域化城春蕩七又不見鎬京雅南
開太平宮中笙簧歌鹿鳴慶雲重見二千載虞周和音落昭代
明堂旭日照宸袍石渠仙仗雉扇高文王宣父迭奏相和應后
夔師曠環珮相周遭沉香晝宴呼李白禮樂昭回發顏色大明
早朝列臣甫元氣礪硠天地裂君今讀書老空山清才雅調誰
與班舉頭但覺州里隘振衣欲往參其間往者蔡家綠綺桐板
自煨燼傳商宮往者汲縣白華詩一旦高列秘館中丈夫遇合
亦如此請君一跨扶搖風

和盱僧白牛師金山見龍名如瑩

白牛牧所不嫌遠世界大千隨處見前身是龍工畫龍親向雲
濤翫奇變槎牙滿腹生甲髯濡墨未掃神先遍華堂薄射黃金
鱗高幃淋漓水晶殿長身真許仙叟騎怒甲已從神禹見旁觀

辟易不敢嬰硯有風雲筆生電江南嚴冬喧雷車驚電滿城飛
石轉頗疑天官下取圖未識人間餘幾片嗚呼僧繇去世誰敢
許相望高風千萬古

和楊用宏誠齋族子

南溪古木臨官衢公墩我屋連烟蕪百年冠蓋散如雨黃金夜
飛子孫去春風剪燭城西窓得君如壁不可雙我才老愧八义
手君貌初酣千日酒東家當壚猩血衣輕寒水郭楊花飛相逢
且飲君莫違

公無渡河

公渡河驚風無舟水揚波公欲渡兮將奈何公提壺黃流萬里
人為魚一壺不濟將焉如彭咸申屠死不朽殘生取名亦何有
南山射鹿春草肥隴西刈稻為美酒公無渡兮為公壽公欲渡
兮可奈何河流不及此恨多

丁都護

丁都護即騎白馬今何處丁都護即骨今歸還是否妾心痛似
杞梁妻夢殺夫讐夢無路采石江雲陽渡斜陽江上山無數後
人不識都護誰時唱此歌渡江去

秧馬歌和蕭養吾

天門龍駒來貳師朝燕暮越千里姿折旋蟻封乃不可彼固信
美非吾宜江南二月秧事急水田千畝肩鴈隨壁間木馬忽湔
沸歛若起廢逢明時背輕腹滑騎不蹶昂首尻高過犁方畦
曲畝翠分路意會規矩無差池平生芻豆了不願獨以筋力充
人飢驪黃不形牝牡混跼齧俱泯兒童嬉東家少年輕稼穡千
金市駿窮所之看花九州誇疾走世路險遠難為期不如田家

水土熟與汝老大長相知借汝襤褸覆塵坐錦韉青絡非汝思

木牛歌和蕭養吾

吾聞景升養牛千斤肥椎之不了士卒飢王生號牛八百里徒
瑩蹄角將何為此猶虛名乏實用負任毫末了不支何如武侯
象其似獨化枯槁為神奇平生憂人不自食餉運常飽千里師
剗心俯首竭筋骨氣象深穩人誰疑中多抱負外運鈍論功猶
勝狂犢馳雖無奮勞効耕種尚以微力裨興衰自期中道可不
廢雖有捷徑寧能趨惜哉清渭不可渡不得束載四海隨我嘗
讀書論成敗魏不足控為吳持江陵蹶羽旆歸劔郿南衰髮秋
風知前謀既輕後過重天意蹉跌長如茲浩歌木牛感豪傑空
有遺恨供人詩

送廬陵丞孫美任歸寓常州

廬陵丞公北文獻鳴琴坐堂如子賤家慶相傳節孝門政聲早
入循良傳剽繁政似矢發弦破奸不異冰消曉山林百里臥犬
驚桑柘四郊歸社燕西偏獨僻吏塵空往々蒼苔生匣硯八表
清風竹滿庭三年春雨花成縣路人聞名爭識面馬上踈髯青
未變只今考滿書最功遮道人情如乍見春留嘉樹高憇車秋
入歸帆輕似鴈丈夫功名困下邑風鵬未試同榆鷄北門門邊
揚柳店迎新送故車蹄遍南來北去共官途誰識胸中五色線
燕臺黃金百尺高見說諸公文論薦江南山水雖可娛未許種
茶老陽羨

題劉子明南園

丹陽何人多竹石客來詠歌人不識平泉百年遊者閑一笑臨
風嗤有力世間萬物如天花寓目猶須藏以室城西老人好事

者園亭自為諸賢立酒觴春浦集少長詩帳秋風成甲乙美花
鱗、照錦段新水消、明練匹山虛月落琴調動竹深畫靜書
聲出諸郎秀穎壓餘子君本種名今得實江南夏雨成豐年溪
流映日清且玄便擬出城尋勝境為君援筆賦千篇

送張君玉謁天師

張君家住青原峰呵役鬼物驅靈靈噓氣闔闢天門風飛符招
雨走怪虹又呼大化歸筆鋒黑水揮斥皆成龍蜿蜒歲蟄尺壁
中霹靂夜怒三湘東晨興啓筭濕霧濛濛潛與西里為年豐天宗
仙人朝帝宮赤驕紫旆青瑤空玉女執樂千芙蓉祥飈颯珮鳴
牙衝君騎此龍為後從百拜香案箋民衷使世無虎豹魑魅與
射工五風十雨聖賢懿哲常相逢仙人危坐拱手不言功

題白府判仲謙所藏錢舜舉巖壑圖

我如謝公好名山開卷著我千巖萬壑間亂煙遙峯出縹緲怪
石翠樹相回環忽然山破飛瀑落皎如仙人玉帶垂雲端喧
欲撼溪谷動使我毛髮森清寒不知其間有何徑但見荷擔兩
兩相追攀浮屠崔嵬蒼壁頂佛屋隱映長松闕下通窈窕知何
處想見小溪穿石去沙邊汲叟犬相隨橋上行人驢半度林空
路斷孤舟橫或坐舟尾或疾撐左巖右灘地苦狹長篙落石如
有聲我疑桃源從此逝恍若風景非人世欲呼錢郎問其途錢
郎已去誰能呼

送劉玉成之杭

錢塘之景天下無我昔未遊知畫圖吳山闌檻神仙壺沙河燈
火錦綉衢四城翠翹上靈隱萬象畫舫遊西湖孤峯梅花白雪
廬大堤楊柳黃金株百年風物未盡改遊子那得聞其初錢王

厭稜墮秋蕪趙家宮殿佛鼓喧朝暈西風吹潮落越嶠夜角呼
月沈姑蘇劉郎妙趣世希有五色燦爛披珊瑚請君一往覽古
昔醉以千斛之酒驚黃酥寫以文考賦魯城之筆千萬字吹以
東坡弔孟德之簫聲嗚嗚歸來錦囊壓蹇驢與君共簸明月珠

送邵有初之揚州

君不見凌風臺下梅如雪何郎踏遍官樓月淮王宅邊芍藥開
杜郎騎鳳雲間來名區政要才士賦登高擲筆千霆怒風流調
笑落人間坐使江山重千古我有邵子工詩歌三生夢見杜與
何瓊花夜醉后土觀錦帆曉弔揚家河男兒辭親事遠役勳業
飛騰須壯日秋風何處却相思二十四橋吹玉笛

謝王宜遠餉黃雀

野田秋陰稻穗垂山禽來啄日以肥斑_上背點楚鳩色煌_上腹

借倉廩衣稍飢作陣帶雨下既飽聯翅穿雲飛土人攜網巧規
伺或布一網無脫遺高明購買貴初出但取悅口寧論貲饌美
鮮淨凝琥珀入酒漱豔明琉璃詩人尤喜體質滑錫以美蒲柔
絲披嗟哉群百姓命易一旦鼎鑊魚貫隨物惟有美足取害復
以貪得忘罟維頭顱萬里奉包篚幸免遠貢遭明時吾徒縱食
誠有愧捫腹何以酬相知

草蟲

晴風麗日天地熙昆蟲草木同生機野花煌煌綴組繡山葉剪
剪明琉璃黃蜂天牛各有役白蝶彩蝶相隨飛野蚕卧枝玉一
芴新蛭脫蛻冠雙綫角蝸吐腥螳臂怒蜻蜓翼剪吳綃素蛛絲
散網專攫餐縛蠅似縛白門布盡工胸有太極心秋毫點染追
天真胡爲所畫僅九物終以殺機疑非仁嗚呼安得人心皆祥

麟阜蝨草蝨蕩蕩共造周原春

題羅稚川小景

遠洲連岡近洲平高樹稀葉低樹青長溪浸日流無聲中有數
葉漁舟橫誰家飛軒接水亭沙邊客至扶杖迎江村頗類浣花
里人品兼似陶淵明

巖雨行

為安成汶原王氏
丙子禱雨仙岩作

江南六月旱彌盛黍稷冥冥猶如病良田迸火大龜裂野埃馳
空群馬並汶山居士哀民窮擊鼓楓林事祈禁樹日荒荒旗屨
錫山風蕭蕭角相應阿香夜半起鞭龍奪雨空中爭負勝黃流
奔猛棄滯滲派乳沉酣浸丘甸槁苗髮委活欲回秀穎雲抽洗
初淨鄉人飲酒交推功瞳老無飢群播詠巖中至人何年來大
旱實司雷雨柄年深情與居民孚災患扶持通喘譽吾聞太平

五日十日一風雨山川不敢私跡令嗚呼玉京九閔蕩々不可
名且願群仙活民命

彭清源用前韻相屬奉和為謝

君詩氣壓三軍盛大將貔貅如去病平沙萬里穹廬高駿騎疾
驅誰敢並我詩悴若荒隴苗雨斷泉枯望祈榮又如涼蛩抱衰
草淒咽秋風夜相應白頭不遇俱可憐土偶挑人定誰勝君不
見杜少陵流落漢西耕稻向天寒短褐無春姿大雪漫山沒鏡
柄君不見陶淵明晚托遠公蓮社淨孤松傲倚難覓醉五柳荒
涼空入詠古來文士多苦窮虛名不值一欵馨江南微雨澹火
雲少昊行秋初布令相逢且勿論新詩不如斗酒歌呼樂天命

野人家

野人家瓦少茅半遮墻外橫青山墻頭出葵花遠屋桐樹繞屋

麻地碓春粟如黃芽小如高髻髮爬簷平生有額不點鴉月色
夜夜照紡車木棉紡盡白雪紗為言主家頗豪奢繡羅作裙歌
嬌娃州符昨夜急如火馬蹄踏月趨官衙

殘僧寺

殘僧寺白髮僧幾個野潦浸殿隅青苔生佛座山門窺月竟夜
開畫壁吹風連歲破粥香久廢擊木魚飯少惟應燒土銚經箱
蝶泊藤花垂石塔烏啼松子墮為言空門亦里役鄰寺終年擾
官課寺中零落幸無田若使有田亦奇禍

贈劉尊德善琴工畫

劉郎善琴如雍門萬感畢赴指下絃和如威鳳鳴若木閭闔蕩
蕩開晴天怨如玄猿嘯遙夜酸風孤馬行窮邊劉郎善畫如鄭
虔落筆飛雨大化懸豪鷹秋翻代北月飢鴈暮下江南煙悲崖

哀聲遠蕭瑟斷蘆短荻寒竿綿洞庭廣楚神忽動秋風六合心
高騫九成韶鈞亭舜日萬騎羽獵思秦川惜哉流落世未識酒
酣自賞詩千篇嗚呼明時才藝衮衮班集賢安得有力貢之至
尊前

放鮎魚歌戲和劉文遠

莊生觀魚起萬累雲海扶搖持共戲任公釣魚雖似癡淝河蒼
梧飽膏臙人間此物亦何為腹滿腥涎肉連尾貸生不可成風
雷烹食未足恣刀几跗蛸小器如覆蟻不識江湖甘一滴古來
魴鱖出入難獨恃形微不滅跡黃埃八月埋輪端南村北村嗟
雨乳放渠清冷免螻蟻慎勿再近珊瑚竿

題鐵仲堅宣差所藏羅稚川煙村圖

荒村漠漠煙連山誰家野店兩樹間青帘稍出樹梢外秋風敗

葉寒班班路通白石流水亂長橋縹緲依山澗漁姑得酒歸意
速携稚渡橋如落鴈寒藤老木又一川魯船方饌魯斜懸有魚
有酒復有客風致何必能詩篇亂鴉幾點天疑暮欲泊未泊環
高樹小舟七八散前灘或倚長蒿收釣具君不見鷓夷一舸遊
五湖子陵羊裘釣桐廬安知若人非其徒

山月亭讌飲和梁景行諸公

廬陵城西有宣溪王氏山月亭雲端臺楊誠齋嘗為作
記命屬袁本厚加改飾予亦嘗記之丙子八月招飲亭
上梁景行蕭安國劉
高仲諧公賦詩故和

城中樓臺如海市城外江山總清意蹉跎千載不見稱主人每
與名流避雲端山月高一時風流正在誠翁記千峰相讓如主
賓萬景競招如我爾令威秋風呼城閣海塵夜揚迷忽區衣冠
淪失爽鳩氏蒼老不記開元事烏衣燕去無客來金谷花飛似

春霖世間萬事難可虞回首歲月如隙駒故人有子氣食虎文
彩蚤勝徐卿雛臺邊草樹回秋枯臺下庭院開畫圖香夷斲與
文杏並紫鴛飛與翔螭俱君不見楊家移石羨溪隅風致更勝
劉家無又不見天津故宅安家即邵翁小車時翱翔君今臺亭
得勝地偉事欲與二氏方尊前傑士爭頡頏諸老鬚髮照日光
是時斜日照作詩要維南溪楊文章共垂百世長

青原春嶂

以下係廬陵十景同蕭克有享有諸公作

渡江十里山水清千峰萬峰爭娉婷野花織成石家幃嘉葉合
作王母屏釣臺有泉出山背忽作玉帶相紆縈東風遊人不知
趣日日車馬來傾城

神岡晚橋

西江秋波燕尾岐千嶂春木鳳翅齊道人結船布江面行者如
燕東復西 頭煙起樵子急林杪磬發山僧歸庵中老仙危坐
穩付與萬古看斜暉

螺峯殘雪

城東青山女兒眉天寒變作滄浪鬚晴風忽放寸碧出亂白猶
在蒼松枝暎光薄射分衆色斷纈碎錦春離 道人看山路泥
去日暮拾得金螺歸

鷺渚斷煙

金牛寺前江水黃大洲橫陳江中央人家夕炊起篁竹一段兩
段青迷菴去帆點 上春雨暗孤鳥漠 上秋空長高樓書罷遙指
顧彷彿官賦來連橋

石磬飛瀑

年年麥岡野花紅家家謁廟江水東危峯巨石壁元氣老樹白
澗浮晴虹玉龍飛下數十尺髣髴疑是香爐峯窮源一笑俯八
極萬壑千嶂號松風

西峰臥松

定光道場鳳豎東古樹蟠地疑髯龍參天元與風雨會老大偃
蹇山之中千年琥珀結精氣半夜笙鶴朝仙宮大平明堂方論
建扶豎大用須良工

古城秋釀

大江蓼花紅滿堤堤上人家多竹籬雨厨笋炊白雪甌霜甕滿
瀉黃酥危城中少年好游冶渡江買醉携蛾眉江東估客貪祭
賽第一先酌蕭郎祠

城有蕭
衍祠

小洲暮漁

螺湖石屋江水平大船小船滿東津
嘗出魚輒數十落日光射金鱗
鱗楓橋煙起新酒熟共穿小魚
歛西隣大魚雖肥且勿食明朝
賈與城中人

平園哀柳周益公

城中書樓天下奇碧玉流水長虹堤
堤邊柔條一千尺鷺黃巢
巢春風垂居民異代起華屋此物
已槁不忍移豈無他樹好顏色
不忌丞相手種時

鳳墅斜陽曾通判

城西仙園不可當花闌柳榭春風香
酒樓鬢鬢竹西市娼女結東杭州
梳百年風流去如雨一笛落日寒
荒荒乘除自當返大朴君看燈火
明書堂

元夕諸子孫小飲

梅外初升寶月圓柴門春入菜絲盤
鼓鐘不斷山城濶燈火無多野郭
寒童子折花偏愛節老人持酒強
爲歡牙旗鐵馬群英事謗賦新詩
寄客看

社日偶成

西郭先生嗜酒盃散裘潦倒積緇埃
踈踈社雨梨苓老漠漠春陰燕子
來灌圃天隨餘把菊閉門仲蔚長
蒿萊衰年頗覺頭風進烏帽何因
倩客裁

賦杜氏秋晚紅梅用友人韻

君不見綠珠吹笛意態閑畫樓百尺
垂闌干紅粧十年不復識今日忽
見春風村又不見景陽麗華唱璧
月醜腮半露鈿花繁酒酣妙舞未
肯散一笑婉婉宮井寒餘妍尚可
眩一世綠空化盡難爲完坐令前
身白玉質施朱作豔嬌能言頗疑
守宮點臂

痕不滅又疑如意傷頰血未乾淒風淡月疎竹外幽香著客能
返魂同根霜雪魁百卉未有早秀爭秋蘭煌煌庭院生曉色一
樹變作扶桑暎我欲呼坡仙叩門共醉詩清溫我欲喚東野長
安一日走馬看向來酒禁今已釋莫遣頃刻無壘樽

碧壺歌贈陳生可珍善畫

碧壺之山何處是直隔瀛海三萬里之驚淙琪花瑤草春掩曖
雲階月地秋玲瓏九節之蒲可作杖千歲之鹿時相逢但見安
期子晉吹笙來往驂蒼龍亦有子房跨鶴從赤松碧壺子君是
仙家第幾宗戲翻墨汁寫山水一點半點飄落成魚蟲請君試
作碧壺之高峰使我指點崑崙方丈東盡以世間萬事一問壺
中公

玉壺歌又贈陳生可玉亦善畫

君不是費長房跳入壺中窺三光手攬八極一粟藏日食天帝
玉女之玄漿又不是竇侍御袖貯清冰三百柱掛之萬仞迎風
之寒露秋風吹上蓬萊顛地下空驚洒瓊雨玲瓏瓏琢自大
古前混混浩浩隨天圓中有素液之萬斛元氣之千年化為天
酒浩蕩直與黃河懸左醉處妃右倅佺戲作山林萬化奔羽毛
花萼雪落紛清妍玉壺子壺中相去碧壺幾萬里可憐君家好
兄弟妙筆俱奪天機秘安得盡我壺之中日夕吹簫飲酒追逐
兩壺公

贈長沙王自得用之

君不是杜少陵亂離西遊復北征又不是孟東野長安走遍者
花馬一簷兩橋稱詩人綿裘三斗長塗塵胸藏琮璧世不識筆
挾風雨天爲嘖高門我我千石簾熊白饌花饌人乳繡衣滿座

扶風豪金釵列屋邯鄲舞酒闌車馬散燭椽君來朗誦詩千篇
崎窮不滿薄俗笑意氣自與常人分古來英傑每如此事成十
載稱其賢君不見太平真觀二十策當時同是新豐酒家客

賦歐園海棠和羅起初

蜀州海棠錦成畦昌州海棠芳氣菲名花自古恨不見東風吹
在西家西美人厭酒紅珠落半笑新晴半含萼玉膚柔薄絳袖
寒粧淚輕盈脂臉忤大真嬌睡金屋春綠珠夜燕宮蠟薪一時
群花盡妾媵娉娉媵真仙人雨餘繁枝深綠淨好及佳時入
觴詠花容相對易新故人事無情有衰盛我昔曾同花下歡寶
釵挿映鴉髮盤只今便能日日爲花醉欲挽朱顏應已難

感舊行

余生九歲爲至元十三年丙子避兵山觀李氏又三十
一年丙午尖內兄其淵又三十一年爲後至元二年丙

子諸親相邀後番數日因思
三至歲皆逢丙若有數然者

憶昔丙子宋祚變天兵南來混九縣舉家避兵竄山巖道逢哨
騎落鶻箭倉皇奔匿道苟家弓架攘攘短牆見當時脫命五步
間店叟焚香身手顛行投李家日已晡張燈招魂具饌餽老人
攢眉論興廢我時雖幼知艱虞又聞土兵在嶺外肝腦滿地紅
模糊偷生度日四五載短衫窄袖忘詩書聖朝右文庠序起始
復勉學思爲儒兩家婚姻益稠密冠蓋城闔相絡繹君家氣運
如新春我家貧賤如前日却從丙午哭盤淵六月赤熯行青天
歲當飢饉路蕭瑟殍橫野無炊煙陂灘悍激落清浪草樹蒙
翳號悲蟬天道一周如電掃偶向山中事幽討兵飢定息太平
久少壯丘墳童稚老溪流改徙棟宇多短植恭天脩木槁後生
秀者來如雲欲陳往事誰可論烹羔擊鮮醉賓客東家西家邀

欵門所嗟淫雨連十日不得登覽徒清樽天番老眼倘不死重
來山水與子笑傲觀乾坤

憶昔行送李省掾友仁從李龍川平章定寇

憶昔歸退之運籌辨幕擒吳兒蔡城夾道拜丞相歸來却作平
淮碑憶昔于公異梨頭露布從東渭文章功業相久長一語精
神照天地克奸小大雖不同賓主千載同高風舳艫白鉞航玉
虹勁氣欲刻千崆峒丘夷穴路九兕斃溪湮齏倒群蛟窮莠稂
穉盡嘉穀在鋤惡樹善心元工城門夜開燈火開童哇婦織村
無哨四郊桑麻與天平絃誦家家施禮教懸知耆老歌盛德鏗
斧春風餘幼少章江水滿牙旗舞勺陳橫空搥大鼓殺牛擊鮮
勞歸族千斛鶩黃浮甕醕相君黃扉君紫府先生作詩如古甫

題傅雲巖齋

商家良弼去千載天下常患無甘霖不知有雲捲海水至今藏
在巖之陰金支翠旗貫曙旭鐵騎蒼虎蒸遙岑晴天白日作五
色中有仙子鳴瑤琴鳳凰翼旌鶴參駕欲出未出真無心聖時
飛龍澤九牧五風十雨年穀熟安得閑雲老巖谷

羅定翁家書雷致雨

炎風蕭々吹赤日道路行埃積三尺沙泉起焰江容轉秀稻連
雲今稿立西家藏蟄々謬死東池蹙龍々不出天高萬里如堅
珉狂犴信信誰動色先生世家神仙府豐隆吾兄阿香母謫居
下界百習空猶閱顛崖墮辛苦尺書夜半報家庭載雨滔々赴
南畝長皋回青短隴秀如以黃馘飽膏乳誰言至人無私念唯
諾終應勝踟愬八荒六合等赤子隔轍町畦果奚故嗚呼人間
一室分恩仇天公如以人何尤

桂隱詩集卷二終



桂隱詩集目錄

卷三

古體七言

上隴行

南樓乘月

天上謠

題韓幹三馬圖

題胡忠簡家九歌圖

和牡丹借山谷韻

萬戶酒歌

和蕭公立聽雨

和張觀光見貽

遊沙山和蕭安國

淮南芍藥

和劉元翁

古桂

題揚補之梅

城中鼓

羨曠明伯義渡

和友人

題丘介叔石山



織錦歌

寄劉濟用萬戶

冰港叉魚

竹外梅梢

侯邸春盤

雪鼎烹茶

城角春聲

贈劉橘隱善棊

吾廬亭海棠和羅昌逢

醉歌行

蠓梅和羅昌逢

和羅昌逢叙別

題陳所翁子龍巖畫龍

和楊教授喜雨

雲林獵虎

水邊柳影

山村臘酒

地爐撥芋

江帆雪影

寒食行

題廬陵孫縣丞家慶圖

和友人

再和

再和

和羅昌逢

送楊拱吾應昌府判

壽蕭孚有

贈東湖劉山長之京師

律詩五言

送文學赴召入京二首

故里夜坐

省西隱原二首

山墅中秋懷諸子姪二首

和蕭孚有二首

贊余學正祈雨

用前韻答梁景行

送歐陽雲瑞赴上元縣尹

題劉良用詩塚

湖山歌送武寬則再入京

送忻都總管第五子歸揚州

歸鄉即事

促織和工部韻

八月十三夜聽雨

山莊阻雪

和張漢英五日自壽二首

正旦雪凍拈筆

用前韻答彭琦初

和邵有初遣懷四首

送鍾子隆歸省親

八月七日莞草曉行

故里

重到鵬鵠避兵之所

上元

城外晚眺

和袁鑒翁

寄古渡諸公

學翁兄過宿寓所

舟中

十六夜懷諸兄

和邵有初郊行

送林醫官歸故鄉

山觀道中

正月二日

九日呈艾幼玉諸公

春仲簡郭蕭二公二首

和周叔恭

謝彭道存

八月朔暮日食

家兄去後對雨作

八月十五夜

九日郊行

對客暮坐

客途

寄友

除夕

與江東郭提舉

久雨害稼

瘞天

元夕

九日憶蕭孚有

會詩人堂和山谷韻

輓文文溪宣慰

輓鄧中齋二首

輓李鳳林二首

輓文母歐陽夫人二首

哭王鼎翁三首

歸鄉

春雪

隱居和范國用

和吳翁兄二首

和許中立二首

自和

酬劉以芳見貽二首

遣仲子歸鄉後雨坐

輓劉湏溪二首

又代輓二首

輓蕭方崖二首

又代輓二首

輓胡節推二首

輓潮州李教授二首

輓劉肖翁二首

輓高季遠

酬岩上人

謝素從義招賞牡丹

和張提舉題安福書閣

府公請雨

送文州判赴寧州二首

和友人

留印岡山中

八月十四夜小飲二首

輓王隱士

輓楊同知二首

輓蕭吉翁

酬曾允升

和彭自遠

和張提舉登吳文閣二首

和劉實翁後中秋

送劉尚友赴汀州教二首

春日江上

和鞏志道憲郎二首

故里

代輓文母歐陽夫人

輓陳隱士

輓聶學政

輓高教授

輓羅見大二首

輓文學士二首

輓劉子昭二首

哭蕭州判二首

中秋和甥孫李時敏

又和遊龍寂寺二首

元日和尚文韻

贈劉生季恭

八月十四夜與姪厚對月

十六夜飲姪孫道立小齋

輓劉貢士

輓子章二首

輓毛齊芳二首

輓解內舍二首

輓曾學士二首

十五夜無月三首

和羅士奇遊洞岩二首

元日示兒孫

送曾學萬入京

故里曉坐用長兒立敬韻

中秋分韻得年字

歸城道中

六言

清明和歐陽山立二首

春日偶賦二首

鼇溪山行和彭琦初二首

和題黃鶴樓圖

卷四

律詩七言

和彭贊府陪拜黃堂二首

和友人牡丹

壽仲兄誠翁

和彭贊府見壽

即琦初

和曹正中見壽

和張漢英見壽

旦日試筆二首

春日酬友人

和劉道淵

和彭庭發

酬周景叔

和遊劉氏園有感

和宴王氏新居

謁誠齋祠墓

和閑居即事

楊居士邀飲二首

送劉巨川赴海豐巡檢

和蕭孚有霰雪

上元雨陪學翁兄飲

用前韻答琦初

節後再和

閑居即事

新年和蕭孚有二首

謝琦初惠紙衾二首

和琦初盱江見壽二首

答琦初追和上元韻

中秋和蕭孚有二首

中秋和學翁兄

南山故居偶成

贈陳達夫遊廣西

中秋月暗和蕭孚有二首

春遊和徐錄判

和午節舟中

登滕王閣

古洪舟中

登金竹峯

飲崔仁卿宅

送葉教授歸金華

和李知事卷雪亭

蕭母稱壽宴客和蕭芳洲二首

曉起用麟孫韻

中秋無月和國通姪

和蕭孚有見壽二首

和涂率修見壽

和胡履平見壽

和楊貫道見壽

和張伯溫見壽二首

和蕭公著見壽

和王元帥過快閣韻

送公著隨父入京

送歐陽公源之京師

故鄉夜坐有感二首

中秋陰雨

寄壽永平蕭主簿

和遊永古堂二首

和海棠

和閑居即事

和觀剪柳

遊新塗塔寺

荷花在少留

和友人病起自壽二首

壽友人母

和學翁兄上元雨

和丁教授陪拜黃堂

用虞學士韻送楊居所省中襄公墓

寄劉旌德

簡晏提舉

清明同諸友登螺山瑞華二首

再用韻酬諸同遊

又酬同遊韻

送郭可玉肇慶教授

送袁稅使赴萍鄉

和蕭可則

送蘇學正

送彭學錄赴潭州

上元飲蕭氏盤中和友人

飲罷偶賦

枕上再賦

元日和尚文

送黃新之教古端

題秀野亭

遊興善寺三首

和張自翁贊遊興善韻二首

再和曾學士

和曾學士見貽二首

和婁行所雪二首

上元次學翁兄

贈蕭稅務赴興國

贈胡履平借克有之興國

遊洞巖用須溪韻

再和友人遊洞巖韻

和奔元凱

和賦一覽樓

宿魏君壇下

網村道中

發洪州

九日和鞠景中二首

清都臺和坡韻

上元留宜春一木庵

遊青原

和劉實翁

寒食和友人

江上清明和友人

喜李伯英至自燕

偶成

暇日至吾廬亭

渡江

和小飲鷺洲

和遊青原

送文尚志赴寧州判

燕

和題南齋

九日同諸友遊登和煥有二首

和涂率脩

和賦吉塘橋

和登神岡山

和率脩黃泥上塚

贈何善積

題竹友堂

十四夜月

十五夜月暈

故居感興

故鄉自壽

送曾伯璋歸重侍下

送劉高仲考試武昌

足成夢句

春日和楊伯允二首

和高方大初度登中華二首

送龔學正赴南康

和許山立見壽

和彭叔和見壽

再和二首

九日諸賢登高二首

又和同遊二首

次彭叔和和九日韻

羅履貞同遊石洞

人日郊行

題翠屏晚對齋

十四夜對月

送趙稅使赴道州

送宋趙儀赴貴德知州

和學翁兄

和劉咸吉

題蕭將軍廟

中秋故居對月分韻

新元

雨中出郭訪友

和清明

次日再用前韻

送曾韞輝任檀州學正

十五夜再和二首

憶鳳二首

次蕭上舍賦杭州韻

和蕭孚有

新年簡彭琦初

次花朝韻

歲除夜坐過半

春雪

次龍文璟送蕭公著省親韻

送周儀道往池州

雨中牡丹

壽蕭熙績

壽素恭甫

和劉路教上巳晴

輓周總管

輓洪菊潭

輓饒玉甫

賞梅

七言絕

題京兆圖後二首

題張敞畫眉

宿荷花莊

次韻宜遠樓共飲

壽蕭熙明

大霰戲作

寄友

輓趙學聖

輓劉子清

輓伍總管二首

謝龍文璟和韻

題明皇並簫

和遊興善寺三首

上元日晚入城

題蘭竹圖二首

題李鶴田大事記後

題十八學士錫燕圖

惜春

贈李福元賣書作墨二首

題濃淡竹

元日

過瀘江

新塗道中二首

謁蕭定基墓

歲晏連雪二首

題僧枯林蘭

題錢舜舉畫馬二首

橫石渡候舟有感

再和

倚樓

春晴二首

郊行二首

秋日江村圖

水墨古樹圖四首

題宮中所掃除棄餘

遊能仁寺

贈曾維新工篆章

淵明臨流圖

題畫江濤

羅漢栢二首

新年十首

江行春望

題松石圖

廢屋金沙二首

五日

城歸途中

閑居即事五首

贈吳存道鍊丹

題牧童騎牛圖

春江煙雨圖

寒汀小雪二首

初秋次友人二首

午慵

客夜秋風

城歸途中

晴嬉

贈墨客三首

對花偶成

李陵宴蘇武圖二首

重涉瀘江二首

羅稚川小景

蘇武持節圖

題枯林蘭

和趙子昂寄馮海粟

白鶴花二首

牡丹二首

和竹枝歌七首

雲錦亭四首

墨梅二首

寒食

上巳獨坐三首

秧老歌五首

哭蕭孚有七首

詩餘

滿庭芳

西江月

憶秦娥

謁金門

青玉案

臨江仙

桂隱詩集目錄終

桂隱詩集卷二

元 謚文敏桂隱劉 誥

著

元 賜進士門人羅 如篋

顏成子

編刊

明

曾孫

三德

用敦

灼

重編

族孫

方興

天健

志孔

較刊

古體 七言

上隴行

以下十二首皆至元丙戌至壬辰作

江南雨晴千里春桃李漫漫催殺人山人出門看落日一年一年髮如漆髮如漆兮奈此何會看曉鏡清霜多街頭古路雪坡陀千人萬人朝暮過燕姬細馬笑且歌真顏勒石高嵯峩翁仲寂寞空山阿誰能酌酒相摩挲

遊沙山和蕭安國

書窗半月雲冥冥今朝有客天亦晴七年懷山始一住宿雲捲
盡群峯明峯回水橋帶行路數尺便覺分俗情穹崖白石飢
路髮髻樵笠玄蟻行軒車既令路人駭杖履亦有青山迎倦攀
尚覺人語遠小憇先得亭陰清仙樓下俯心忽動天風吹衣疑
化城芙蓉崔嵬去未已青原拔怒來如爭偉哉造物裂元氣削
此蒼壁懸亭亭臨風措碑誦未了虛谷洶湧波濤生江山千年
如一日是間風雨平復驚借爲今人頭髮照溪水昔人壁間遺
姓名豈無樽壘可一笑獨懷南澗悲山陰同來豪士亦不少狂
絕如白歌如青風流益自愧寒鄙謔調未覺須娉婷闔閭巷
暮眠鹿滕王脩竹春聞鶯丈夫登臨要勝迹向來意氣終何益
槎牙江頭樹千尺記我斜陽下危石欲題妙語還自惜恐有仙
人怪今日

南樓乘月

人間塵埃能幾何夜夜明月九州白獨提愁髮御秋風漢江漆
之不成黑江流迎我來滔滔古今銷盡黃龍高樓頭攜酒邀天
飲我與殷庾爲三豪吳姬膚肉映肪雪笑倩坐客穿舞袍胡牀
吹玉龍朱闌懸豪曹已傾四海添我酒更推三山鱸其鰲符堅
石勒豎子耳尺組縻之如猿獠昔人功名何足論惟有風流千
載存當時結束不成興誰愛明月來端門我起舞君莫回姮娥
隨人不可推君捉我影入我手酌君玻璃三萬盃

淮南芍藥

西施三十埋五湖寬飄南國香骨枯隋皇群姬一朝死迷樓妖
氣夜如水江南草木千載歸廣陵芍藥天下奇晴風羅漢春色
午輕塵微雨姑蘇池東家綉鞦西紅絲黃冠女兒學塗脂屏風

夜色丹砂泣王孫偷醉青蕤濕豹胎猩唇宴王母滿城馨
大鼓油車翠幌推不行竹西將軍舞虢虎萬花夜逐錦雲空四
相化作神仙去風流老守今種瓜灌畦馬廐春日斜城中
泥滿路喚賣遺花人不顧

天上謠戲效李長吉

瑤京夜宴弁紛星洞庭神樂八荒聲
幼龍未起月忽墮捫空路
迷失仙纓轉杭東海蓬萊曉遙看太白當天小海塵相隔青
茫玉玦海邊委秋草鴈啼霜濕衆娥裙綠毛斷耗三千春
桑枝千層拂人馬春寒夢繞高丘下

和劉元翁

廬山江水之西流今年涉我舟復舟平生歲月向此盡
百里何必非并幽伏波少游兩不可玄髮如客誰能留
南飛鳧鷖吐鴻鴈我亦天地無幾求空山歲晏催客別
與子擊筑歌四愁陌頭雞鳴曙光發池上古水寒蕭颯
人生百年各有願養牛種橘亦得齊封侯

題蕭天叙韓幹三馬圖

高堂崔嵬立三馬蕭侯得之韓幹寫犀包曉解塵漠
霍如飛龍落庭下開元有道朝華戎土蕃羅拜驪山宮
蕃兒拳髯帶沙礫朔風卷羶鵲落空玉堂閭闔開崑崙
權奇磊砢萬里同當時沙苑七十萬申寧岐薛連枋
棧五陵翠華長掩霑太平受貢祗貽患蜀道青驪後
騎踈金粟草木西風初豈知此事千古無天寒日薄
人看圖

古桂

庭前古桂何時發數日空階積黃雪
雨餘天上藥珠明風起人

間金翡翠相看竟日不得去况乃清霄对明月天公生物隨人
娛華寂後來同一色漢宮仙人理秋髮舐稜千尺畫闌列夜深
仙掌露華凝萬斛清風繞陵闕長生未保富貴虛風流更落柴
門客人生願欲復何盡有酒無辭酌佳節

題胡忠簡家所藏九歌圖

崑崙之水西極來南合萬水澹徘徊山哀浦愁雷雨垂精氣冲
漠陰風頽里音巷樂氣所使陰陽轆轤何靡也故臣哀怨歌不
足誰掃生綃更愁悴平生擔欲窮山水風塵跼蹐不出里飄然
蕭也毛髮起濯足瀟湘洞庭尾皇車駘駕飄上下雲中渺漭光
相射北渚風起吹參差蓀橈挂棹波濤亞九阰雲旗扶桑輶鱗
屋擊鼓山鬼愁吳戈提首靈宛轉荒庭白日寒蕭颼春秋祭祀
豈有極歌舞情竭君來食楚王寬厚國無禁民俗富樂流為惑

曲終翻見熊繹綏我欲添畫湘纍泣君不見淒涼三戶魂未歸
眼斷秦關路蕭瑟

題楊補之梅

補之之梅不易作况乃藏自澹翁閣澹翁千載忠補之一世雄
元氣擘裂乾坤冬開卷灑然見二公孤山之月羅浮風澹雲萬
古吹不融黑埃黯慘翠羽失小牕滉漭重湖東塵心蕭也淡若
水臥看青天露如洗

和友人牡丹借用山谷韻

幽園草青人不行三月晴嫩蜂無声國香銷歇餘態橫風醺玉
環酒初透雨困飛燕體逾瘦可憐流落不登豆洛陽百年生遊
驄馬塍年少今成翁相逢何事依舊紅

城中鼓

城中鼓日日送人城外土雕鞍綉組走滿街雪旒練幘後無數
路人環看爭歎嗟歎渠富貴如朝花明朝路人還復繼桐棺敗
布孤妻鬢嘉禾門頭春樹綠東市高歌西市哭人生得空自
多貴貧同盡當如何

萬戶酒歌

秦定乙丑真定吳侯來守廬陵議行萬戶酒申請重定郡民預喜賦詩相賀

城中禁釀五十年目斷炊秣江東煙官封始運索落甕官隸方
載稽山船務中稅增沽愈貴舉蓋可盡官緡干先生嗜飲終無
錢指點青旗但流涎今年忽縱萬戶釀處爭說邦侯賢富家
逶部買秫田小家盆盎爭濯泉開城曉避麴車道築室夜甃糟
丘磚便將相如舊渴吻一吸擬盡長鯨川老翁童稚喜欲顛秋
醉月下春花前豐年五穀賤如土市上遊人歌復舞歌復舞邦

侯堂有八奏毋共飲蟠桃幾千度春風吹醉九九州公但飲醇
丞相府

羨曠明伯義渡因用友人韻

江南野水村復村行人不渡愁黃昏西舟齊駕江濤喧捷如天
馬來天門秋沙殘陽春細雨南涉北來誰肯駐嗟爾悠悠渡水
人少待同儕莫先去

和蕭公立聽雨

浣花風高雨如電杜子廬破無處著飛葦滿空懸不落孤吟但
願寒士樂彭城二蘇秋雨中對床舊約隨飄風今年江沙踏晨
履明年禁鑰聞春鑪貧傷志大功業小貴恨離多歡聚少古人
今人共聽雨送盡千年昏與曉癡兒酣睡簷聲春惟有詩翁愁
獨新惜花惜柳復惜稼憂家憂國還憂身我今多感肺腑裂剪

相門詩集卷三
燭西牕頭似雪夢雲咲電閣多幻蘇旱作霖真謬說驚雷夜半
翻春湖巖撼空山七欲無明朝八極生霽色絕喜流潤連瓜區
書生習氣元相似政坐談堅并辨異從今連床夜雨但美睡不
用書囊萬卷誇強記

和友人

君才太白高世雄長劍出匣凌崆峒騎鸞鞭鳳不可窮吹笙醉
擘馳之峰我才老澀峽裏皓白髮千丈侯難封塞簾無復東塗
紅坐看青蛾充瑤宮雕蟲作賦如屠龍世意澹泊師曼容道旁
相逢仲與翁何異遺爪泥雪鴻文章淵源端有從百仙効役無
敢慵寸筵何由撞巨鐘弱羽未可隨衝風十千美酒詩腸空酒
酣坐見花濛濛龍頭石鼎爐火中夜聯佳句彌明同睡覺不見
惟奴童

和張觀光見貽

群公冠蓋趨承明至治四海鸞鳳鳴天開閭闔雲五色日照明
堂韶九成張君才華振夕秀縱軀自可馳勲名豫章隱林困萬
石當春不及茗之營吾聞黃河之水崑崙來奔流萬里喧霆聲
從君直上觀其瀾秋風吹我冠上之瓊英

題丘介叔石山

驪峯北擁天祿閣莓苔千仞如橫槩汴水春來艮嶽山東風萬
里飛網帆人間貴賤如反掌千古行人一惆悵不如平泉醉踞
蒼虬龍花間細雨馱裙紅不如大湖閑嬉品甲乙賓客淋漓供
妙筆富貴集竒生禍媒文章不泯爲物災勢消有力即挾去名
在好事猶頻來不如山中老詩翁疊高壘怪千萬峯不貪國爵
學頑鈍不受客拜忘清雄獨特堅白傲一世本不慕名那有勢

今人後人誰可虞此石終古留茲墟臬亭風日醉如酒坐看巉
巖搔白首子孫補天從有才勿袖此石歸蓬萊

織錦歌

南州織錦天下奇家家女兒上錦机蓬萊額黃染萬斛渭川苗
紅種千畦鳳刀冷淬并江水龍梭細琢炎洲犀春波雨深淨如
練按紅濯黛隨時變高鬟半髮玉腕明心逐輪絲千萬轉晴漪
翠浪舞白鯨細柳高花穿紫燕青樓臨道起鞦韆蝴蝶鴛鴦逐
少年月中三郎坐聽曲海上漢武來求仙窮年玩歲容髮改研
精極巧造化憐陌頭楊花春鳥語東家西家教歌舞燕姬金捍
擁四絃百萬纏頭棄如土人生得意各有命豈無紅顏甘自苦
君不見部門十里桑柘村蠶婦朝朝踏風雨

陳所翁子龍巖畫龍

所翁畫龍妙天下墨水千江醉傾瀉天地變色草木寒霆電交
作畫為夜陰風蕭蕭出空庭天落黃金壁間掛前身是龍身不
知龍來與語相嬉嬉歲飢乖龍不肯起畫龍夜出行雨歸不知
雨到幾千里但見綃素濡淋漓所翁丹成駕龍去雷巖傳家自
奇趣蜿蜒半幅浩欲動鱗鬣槎牙攫雲霧軒窗怒濤聲洶歎匡
笥夜光亞春吐嗟哉雷巖今亦仙此龍神妙不再覩誰能久藏
繫金棍雷公繞柱窺囊褚只今春風急雨日夜多便恐一日飛
去驟天河

寄劉濟用萬戶

君如襄陽杜征南輕裘緩帶我兩膝峴花江笛邊吏閑風流千
載成美談又如荊州庾征西上流重鎮孤罷旌旗不動萬馬
嘶秋風颯紙自題世家桓桓產燕朔山川英氣橫詩槩啖牛

醞酒赤羽旗讀書揮塵青油幕去年擁麾戍潮陽貔六月飛
風霜溪潭鱷去洗瘴雨滄溟颺息凝清光暮春歸帆拂鷺嶼滿
城酒香咽簫鼓客來痛飲百尺樓上青山浩無數槐陰盡戟
列枝滿榴花猩裙小姬舞丈夫窮達固有命才氣騰驤天所賦
嗚呼向來書生百年文字間一日乘障如狄山

和楊教授喜雨

南風吹野山荒_七低田初涸高田傷挈榘抱甕忽四起翁稚婦
女爭穰_七龍車連夜駕海水穩載天上千困糧散為人間六月
雨洗濯萬物無瘡瘡稻梁分畦翠亂湧桑柘連隴青遠揚頗聞
一穗踰百實野老傳翫驚何祥部門輕風萬里道已覺飽飯無
飢腸宮中化瑟調玉燭史官上賀書非常 聖人奎章講經理
百辟冠珮鳴水蒼山中之人歌擊壤不恨白髮如馮唐

冰港叉魚

丙辰歲晏無營友人有賦
十題者援筆戲效其賦

玄冬水落江埧陳晨霜凍石花嶙峋耐寒漁師妙獨刃斲玉下
取潛淵鱗大鱗掉尾血貫眼小者驚躍棄不緝絕憐貪利輕性
命千載無復奉親人

雪林獵虎

朔風曉寒天地白將軍打圍千騎列南山老獸工避人穿崖蔽
木蹤不滅地窮怒躍戟亂衝十丈瑤峯盡成血却懸駝背歸入
城不見爛編見白額

竹外梅梢

誰家修篁千萬竿短牆流水朱闌干孤芳託根得春早一枝斜
出行路看暹凝青林炯初霽一點兩點雪未殘小牕月落霜用

動誰與伴此空山寒

水邊柳影

江南殘臘水雪消人家垂楊如灞橋窺春嬌眼寒未動彷彿已
學東風腰東家女兒重歲月心逐時物先妖嬈此時欲竒未可
折直待二月黃金條

侯邸春盤

侯堂進儺簫鼓喧家上頌花過殘年玉盆青絲縷楊柳隴西菘
蕈江南解繁絃脆管促拍手纖指高髻傳四筵少年風物日日
好莫回耆老談開元

山村臘酒

青峰抱田溪逸門茅屋數十連炊煙水春香秫籩白玉槽壓新
釀鳴紅泉黃雞肥坳更評餞歲但取醉飽不作筵城中爭學北

官飯官釀苦薄空費錢

雪鼎烹茶

六花漫空羔兒傳夜酣掬簷茗可煎人誇江南谷簾水我酌天
上白玉泉石鐺龍頭三足穩松風蕭颯起濤煙人生口腹亦隨
分陶党風味無媿妍

地爐撥芋

道人山房棕爲簾鑿土燎火防冬叢紅蒸楮拙森怪獸灰中蹲
鷓香可拈黑膚點淡露玉質溫潤可以當却炎人間宰相君莫
問趺坐且薦春醪甜

城角春聲

江城窮年柳芽黃家上辛盤闌稱觴城樓夜吹梅巷引起視天
宇皆飛霜牛衣有人久待旦冷銼三尺冰花長勿云暖律苦未

轉中有萬斛東風香

江帆雪影

朔風數空夜飛霰
綴積百萬玉龍交
曉戰茫天地如大荒
只有行波蒲一片
推蓬四望眼光眩
倒浸玉扉水中見
却疑馮夷宴未終
舞女猶持白鸞扇

贈劉橘隱善棋

九州群仙一黍珠
二老一橘當有餘
况今劉生止一身
橘多人少皆空虛
千年白日碁幾局
瀛洲玉塵今幾斛
智瓊額黃藏机多
其間之樂當如何
秋風吹雪種人首
安能橘中共君友
須君騎龍追老仙
借我此橘釀春酒

寒食行

去年寒食城東橋
郭田野蒼春搖
城家中家出上塚
久晴爭試紈與綃
松邊細馬擁綉鞦
柳下輕車窺翠翹
竹籃買花分載酒
七酣遮路行吹簫
高岡纍纍臨廣道
敗輦短籬編棘棗
北人火癸哭望雲
土人高墳歲剪草
老翁愴咽心未平
童稚嬉遊那有情
懸知十日辦一出
焄蒿不及行
春心男兒百年驚
婚宦慵癡未必輸
精悍黃金堆堂紅
頰笑闔棺未了如
雲散夏畦埋骨繞
里閭海上田橫無
麥飯江山滿眼樵
牧歌萬古行人一
長歎我時醉臥山下
家興闌行吟西日
斜郭門排前競先
入却獨倚樹觀歸
鴉今年孤村又寒
食閑咲清遊無一
日人生時序良可
驚踈雨閉門落花
積

和羅昌逢吾廬亭海棠

閉門春色深
許日暖紫綿生
霧雨主人慣
看不常來過
客暫遊那忍去
短梢未許隔
墻知落片暗
隨流水度古
砌侵泥新蚓

行修竹滿林幽鳥語紅顏流落未須嗟妙語發揮吾亦主

題廬陵縣丞孫美家慶圖

藿羹負米待四方綉輿迎歸兩鬢霜女嬃嫵媛怨湘水長陵握手驚淚滂人生骨肉恨離別旦暮目前愁困阨天倫一笑豈有禁造物相違每難得丞公有母八十餘朱憤扶養頰明珠青袍黃_七洞庭橘畫船白_七江東魚堆床笏綬_七子嬉戀膝觸悅髮姊隨舞觴花間高燭曙踏踴柳下輕幘飛平反入報慈色動名勝款門珍饌供孝慈節義各自植一家昌運如春種大初賦命散萬殊醜好悠_七亦異趨風花九州本不擇而乃衆美同一區只今見姊如見母便擬彤書增節婦人間富貴未足多三歎高風千萬古

醉歌行和答友人

七十古稀今已半東風把盞虬髯亂新詩稍與歲月多狂態潛隨顏貌換洛陽十五載_七行佳人擲果攔街看寶釵醉折償千金馬上吹笙春酒暖妍媸萬古命不同憂樂千端天不筭雪消水長江魚來鄰兒縈揖桃花岸出門閑倚東風歌六龍弭節羲蘇緩

和友人

大江日夜東流下長憶當年來往社千金鬻賦過班揚斗酒吟詩凌鮑謝祇今嵇紹自不孤如以雙璧眼中無阿兄詞源倒溟渤季也學力包具區天風綺語忽照我排真堂_七結句安乃知大雅尚可作豈直黃初當突過古來得名何必然一語邂逅或可傳西鳥相酬鳴不已爲君一笑三千年

和羅昌逢蠟梅

傲寒獨擇風霜時避潔不作冰雪姿世人
不識名以蠲試用人力當愧之空山耿
澹正色熟視雖媚不可嬉雪跡點映忽異
態日黃滉瀆疑空枝北風緝裘卷半褐玉
膚微露紅非脂先生世味等嚼蠲獨愛香
氣清詩脾銅瓶燭下爲細酌喚花喚燭了
不知長安少年慕遊冶千金買鞭映空垂
東家鳳珠騎竹馬西家額黃學宮眉何如
此花有真意近道不愧禪林梔

再和

梅兄不見今幾時黃塵盡浣冰玉姿却疑
來從金仙國已覺顏貌俱近之水邊林下
恍如昨都非都似驚相嬉額黃萬斛塗未
了頰怒半落宮簷枝縹裾下壓紺裙褐細
袖醉枕紅膚脂天寒鷺兒凍凝酒日明蜂
戶光分脾暗香着人欲襲骨妙意未必和
靖知小窗靜畫膽瓶古長廊微雪朱簾垂
一枝几案誰所置便覺春意生睫眉勿嫌
吟詩苦不似酒觴更倒黃金梔

和羅昌逢叙別

南山十里橫江濤截流峙以巨石豪昌逢所居地名豪石風流文獻蔚相
望一笑不待鴻濛遭春遊朝縹閣風馬海釣夜飽任公鰲堂七
九州白日麗八翼不墜誰非陶天荒路斷鳳凰去歲七節屋秋
風高我如具蠶出已晚意欲作蠶何堪縲君才過人氣愈粹內
法九醞中山醪長篇一瀉縱河辯妙意不語如禪迹坐令陽阿
與下里嘔啞非雜雲中璈丈夫有願各坎壈牽灘百丈誰能篙
老謀壯事了不念客中飽食聊遊遨豈無躬畊舊泉石歲久繞
宅生蓬蒿冥鴻學飛志四海決起已倦鳴求曹長錢短衣會不
遠卜鄰共種秦人桃

再和

人生斷梗隨春濤，世事九馬分秋豪。驅馳未必天與力，豐悴政信吾所遭。東家公子出富貴，嚴城夜市看燈鰲。春濃玉鞭墮漢裏，天寒翠袖圍秦陶。車懸湛盧結死客，一笑吐斗黃金高。田翁負郭繞耕種，冬稻春雪春絲綠。溪鮒登腹玉色菜，園蔬薦美鶩黃醪。詩書不識肝肺朴，處世忘世天刑逃。先生窮年弄筆墨，飢吟欲學仙家瓊。按竒獵險不肯縱，九折下轍瞿塘篙。荆州登樓薛彈鋏，但以歲月供遊遨。主人惜別君可飲，搏雲豈必賢翔蒿。不見種瓜東陵邵，不見抱犂豐中曹。短歌未了起相語，我爲土偶君爲桃。

和羅昌逢

字江五月輕帆漲，南風飄飄捲衣浪。故人百里肯重尋，相逢喜見平生心。窮通慣見貌難老，談笑生風人愈好。新詩猶欲俎豆予，倦遊久已如相如。夢中占夢竟何據，鄉人說鄉念歸去。春花繞屋菘韭長，有酒不願求西涼。

送歐陽雲瑞赴上元縣尹

秋風吹帆秋日白，傾城車馬送行客。送君宰邑古金陵，墨綬緋袍鬢猶黑。金陵壯觀天下佳，青山銀濤遶人家。城墻夜轉晉時月，市門曉戴吳宮花。樓臺萬戶散晴雨，鄉井昇平盡歌舞。南商北賈朱雀橋，童兒呶啞五方語。崇臺百尺飛清霜，人物高誇網與滂。鶚鷂搏空肅南紀，鷺鷥鳴晝伏安敢。翔君由省郎，再製錦文采。從容多善政，路人爭看六一孫。臺府達官俱起敬，古來縣宰名誰番。前有子賤後大丘，請君整駕追前猷。

送楊拱吾應昌府判

昔年金宋通盟處，今日春風花滿路。輕裘走馬江南人，高髻彈

絃河北女水肥魚美如截肪爭歷蒲萄留客住風流通守誠齋
孫政事文章俱有譜盛年得此未爲遠回首都門猶尺五茫茫
煙草低牛羊中有李陵降淚土請君飽食應昌酥有酒不須酌
今古

題劉良用詩塚

劉君埋詩黃土深曠視六合無知音冬雪峩峩塚千尺秋風萬
壑同哀吟子期邈在九霄上陽冰一去終無人君不見道山藏
書高於屋萬古何人辨珉玉

壽蕭字有贈以香譜琴律老須文清溪竹

我昔曾交蓬萊之群仙天香飄飄襲夢沁骨清無煙仙人譜之
示我以秘玄又聞五絃浪石室如秋泉祥鸞征鶴雖夜度
乎遙天以律寫之人間傳何人高冠吹藜乘雲我古文一史盤

礴手持生綃修竹微雪寒娟雲階月地疑是長生之圃不老
之垣邇來三萬八千年當時四物還依然卷贈吹笙騎鳳之雲
聞祝渠住世如南山之竹高且堅坐評文章飛霞千仞追躡往
駕而孤騫後猗永日傲兀乎玉堂之細旃致君重華薰風復來
解恨乎八埏

湖山歌送攸州武寬則再入京

寬則自號湖山能詩琴客
京又諸名公多贈以言

洞庭瀟灑萬水會衡山突兀千仞外青天偃蹇浸其尾白日跳
丸出其背地維窪圻波濤高元氣淋漓雷雨霽其間人物多豪
英山爲襟裳湖作佩武君講書河西府魏貅動容熊虎拜玉京
群仙迎笑談夢斷依稀廣寒界始知十二宮中玉季奔馬周富
貴不係常將軍武君長才有如此秋風彈琴望天閣琅玕五色

騎青鸞鳴呼衡山之高何不授在居庸脊洞庭之大安得上接
黑水渾坐令武君官爵高大難比論

贈東湖山長劉叔謙之京師

一中至道生極先唐虞三代皆自然九疇之五貫萬事吾身養
之玄復玄五雲仙才秦龍子讀書不作迂曲士手持春風行沂
零夢逐帝珠遊赤水華池崑崙日夜旋野人或見光燭天急欲
捫之不可得忽然復返千丈淵左叅虞妃右西母鳳凰翼轅駕
白虎凌風汗漫天地間逢人戲與麒麟脯朝馳潮陽看潮來暮
援北斗酌酒麻姑臺吹笙下招梅子真笑問東湖之水何年開
朔南諸子環逢掖坐擁皋比說周易文章欲挾春濤飛夜夢天
花生鉅筆乃知仙人變化無不為先塵出入相嬉嬉俗緣千劫
徑度盡濁世糠粃秋風吹祗今兩袖珊瑚雨要上清都謁

明主蓬萊道山五百年前身曾宿瑤花園君不見張子房摩挲
編書開八荒又不見李山人白衣騎馬行帝傍古來豪傑盡如
此世人那得譏其狂

送忻都總管第五子歸揚州

沙公昔乘太守車金帶十圍長髯鬚邦民感恩若父母出入第
看填街衢大兒相繼分半符春風甘棠何處無十年父兄不可
見七君風致猶相如身當世賞讓其季直以此意為母娛江南
魚笋江北酥斑衣捧觴綉繞輿自言孝友有至樂金章紫綬非
所須為兄雪冤北燕闕為兄收骨南海隅急難懷死志鐵石塞
風瘴雨埃滿膚韓穆愛弟推厚爵潘郎奉母誇閑居退之念兄
如念父濤瀧萬里携菱孤世言古人不再得古人今人還可徒
清時卓行須論薦明當整翮金華殿山中酒香催別帆五月南

風浪如箭揚州平生未得面寄語二十四橋須一見

律詩五言

送文學山赴召入京二首

禮樂通三極衣冠集九天遂聞嵇紹用益重伯夷賢勸激前朝
少寬弘百代傳蒼生須一出珍重講 經筵

徵召來群望崇高立至難聲名先世重出處後人看丘壑多深
念輿臺給近歡寄詩規頌在未敢效旁觀

歸鄉即事 庚午

七月適故里一涼宜病翁過雲輕弄日飛鳥逆衝風熟面峯巒
碧迎人柿棗紅向來飢載道不擬見年豐

故里夜坐

故里復秋夕客懷誰與同澹雲低近屋涼月緩行空道與身俱

拙愁兼病作翁閱人惟老樹語夢有鳴蛩

促織和工部韻

促織不自苦秋來偏惱人十年夫戍遠萬里客辭親翳 燭頻
燼淒 七月向晨以時應入耳墮淚實情真

省西隱原二首

遺魄戀鄉里斯文委草萊豈無狐兔穴猶有子孫來白日葉自
語秋風客獨哀玉華鐘鼓動欲下更徘徊

四世共丘隴空山幾夕昕斜陽照行影自首愧先墳野水依田
落寒雲到嶺分任温豈不好無力振雲聞 任温嶺二人
子孫皆不振

八月十三夜聽雨

去意久超忽悠 終滯留石柵中夜雨首宿小園秋天地誰相
待燕鴻俱自謀百年寒暑易寒淺實堪羞

山墅中秋有懷諸子姪二首

百里不能返孤村圍碧崖茅廬佳節夜秋雨老人懷多病猶能
賦長貧更寡諧中郎諸子姪今日定誰佳
他夕豈無月中秋偏作陰緬懷人生事安得皆如心夜久鄰
枕息山寒墻葉吟村醪堪一笑恨汝不同斟

山莊阻雪

三日不出戶巷深交馬蹄鳥衝危雪下樓掛濕煙低測_七衣疑
薄荒_七眼欲迷故鄉翻似客買酒短橋西

和蕭孚有二首

蕭子鄉邦彥論交契誼深未應忘共語政自少相尋又客秋風
鬢孤城夜雨心賡酬慙獨後衰朽懶清吟
經春慙簡出門巷草萊深庭樹閑能種山苗病獨尋談多妨養

氣客去得觀心靜聽林間鳥間閑似學吟

和張漢英五日席上自壽二首

曉戒籃輿具出門還待晴不慙衰境至長憶故人生佳節吾堪
醉青年子有名蒲花明似玉偏欲助詩情
應俗疲終日詩書肯興闡才通今世許交又古人難綵服劬勞
報清罇節序歡須知仙道苦九轉始成丹

用呂生韻贊余學正祈雨

舊穀呼庚癸群龍戰戊壬風生廣文座涼入使君琴濟世非無
術回天本在心明時須傑士早報佐商霖

正旦雪凍拈筆

庚午大飢

老去復新年華顛豈更添晴將春意薄霜助雪寒叢酒貴歡無
具庭荒迹可潛尚餘詩興在凍筆不勝拈

用前韻答梁景行

凍涸過常年頻聞物價添雖云為歲瑞政復厄冬嚴安得田園
老無多學問潛少陵應解此酒碧得時拈

用前韻答彭琦初

力作不逢年園荒蔓穉添漢廷從策董桐野有耕嚴衰髮禁寒
燠春机到躍潛啼飢渾不顧書籍賣堪拈

和邵有初遣懷四首

即君東閣貴驥子渥洼生俊譽王文度青年陸士衡江山開官
轍風雨助詩情豈必曾相識相逢可蓋傾
從親古云樂綵服戲青春好學無勤怠論交畧貴貧人從召公
化客過阿戎頻近說乘龍喜文章定有神
每見清談勝豁然人意開書如秋蚓結才擁蜀江來雪盡春生

柳沙晴路有梅柴門長寂寞相過定無猜
經世懷深蘊培風肯小留定知飛食肉早已學為裘我老三
徑君馳九七州徃還慙簡畧正復近天遊

和邵有初郊行

久凍餘趺坐初晴偶意行花濃慙客鬢酒薄勝人情野廟春旗
動山城暮角清悠七百年事倚杖斷雲橫

送鍾子隆夏五歸省親

鍾子後來秀今年客郡時學知三日別樂慰四親思門柳人歸
早塘蒲酒熟遲誥封應少待志養政深期

送醫官林性善歸故鄉

林君妙醫國才氣亦南琛一郡昔無病三年見此心古槐官局
冷新葯野雲深五月禾山雨相思寄短吟

八月七日莞草晚行

半秋仍憚暑中夜問前途地勢平如陷池光澹欲無驚涼蛩亂
語戒險客相呼奕々東方白城遠得疾驅

山觀道中

佛嶺舊嵯峨餘齡却再過行雲粘地濕流水近山多巖屋垂蘿
薜沙田立鶴鷺百年親舊意相見欲如何

故里

以下三十首前至
元壬辰癸巳間作

故里留人住新秋起客悲不知橫笛處遠與此心期夜久風藏
樹天清月動池平生遊射地壯日尚棲遲

正月二日

泥潦無來客題詩受午風功名山色外歲月雨聲中拜跪頻懷
舊悲歡始悟空九州春欲滿未許歎途窮

重到鷓鴣避兵之所回首二十年感慨係之

重入桃源路青山抱草廬兒童俱已壯兵甲未安居禁叟猶迎
客籬門欲礙輿雙親今可恨跋履記從初

九日呈艾幼玉諸公

強笑雜深悲忽々見菊枝腐儒元費日今歲併無詩山作登樓
色天留隔巷思峴中名勝富聊慰此生遲

上元

風雨何堪出今朝已上元巷泥交過履祠鼓屢鳴村鬚髮催吾
少情懷應俗論兒童渾似昔染紙對燈幡

春仲簡郭逢春蕭拱午諸公二首

稍與書相對青燈舊可憐守窓驚逝日聽雨似它年翰墨微生
拙山林薄累牽忘年多勝友持此憫拘攣

平生數君子交誼似輿桑又作今年聚寧知去日長
江花春潰潰山水畫浪々欲整沙邊履泥途可沒韁

城外晚眺

楚色生歸思淹留負日長孤城浮水氣踈雨界虹光
俯檻青裙女維舟白面郎莫忘沙際樹屢見下斜陽

和周叔恭

平生嵇叔夜往々撮皮真政使但三語寧當止半人
江雲難待雪門柳未知春好事詩成帳猶須一笑親

和索鑿翁

病客終何似鬚髯日日深能詩今見子閱世自憐心
濕礎生花氣晴枝墮鵲陰村々風物好我自愛禪林

謝彭道存

忽々今雨聚政似未相知歲暮欲何語秋風尚有詩
庭爐看雪盡門水試春遲如此悠々者非君誰與期

寄古渡諸公

爲謝諸君子長年意未終本無三日語政自與心同
江樹藏晴氣墻條轉好風倚樓觀病息無句寄興公

八月朔暮日有食之

太史崇臺密明君德政勤切知似初月只道點微雲
南國暮稀見中原事不聞春秋三十六麟止竟何云

家兄學翁訪胡宣慰過宿寓所

四方復貧賤相親意何如燈火自深夜風塵尚異居
東行知有遇父坐正忘予請聽高風起應懷落木初

家兄去後一日對雨作

燕楚通倫軌文章老甲兵馮謹思附薛王粲早依荆薄世誰忘
勢他鄉喜見兄遙怜泥雨苦寂寞坐簷楹

舟中

故園春候早有客獨行舟朝氣著華薄野陰鳴遠鳩雲分潭際
樹帆上驛邊洲山水正有會衝風不可留

八月十五夜

去歲當佳節空軒但雨聲百年能幾笑萬里幸同晴身世嗟猶
昨江山自有情何人傳月蝕不寢欲三更

十六夜懷諸兄

相看自非節月是昨宵圓露下江山靜天虛象緯連開樽從到
慶憶弟定三年坐念吳江夜清光滿客船

九日郊行

九日登高處心情歲七同平田初穫稻曠埜屢聞鴻風景悲塵
世江山閱寓公茱萸朝雨濕愁報綠樽空

對客暮坐

危坐高齋夕東來喜友生空庭踈雨後四壁亂蛩鳴燭至瓶花
落秋涼架藥輕西頭動刀尺澹月上簷楹

客途

天低疑即雨野曠况多歧亦有人孤往安知意不悲空山鴻鴈
少薄晚道途疑老僕談前事村深醉宿時

歸鄉

荏苒長似故逢人先自慙輿臺多速化禮樂竟虛談野驛孤雲
去風羶過客酣先人瓜芋地未得理長鏡

春雪

但云陽已盛春雪復霑途修木輝_匕眩遙山漸_匕無雲寒凝不
動雀晚間相呼無復望千里惟應寄一壺

寄友

吾友葉居士三年二已踈每來曾不駐今別復何如歲月同爲
客勲名合著書先朝文獻遠風雨一歎歔

除夕

踈雨孤燈夜相看又歲除江山猶寓客親友絕來書新酒初堪
酌長愁未暫踈艱難吾敢恨百歲定何如

和范國用隱居

此客亦小隱吾生歲月流巷貧初有轍世變得耕丘樓晚憐荆
土湖春夢越舟臨渠見雲影偶坐各悠悠_匕

與江東郭提舉季新

向來梅水上相望路參差久別聞君貴重來長客詩乾坤萬事
隔故舊十年思古道真如此遺簪倘可期

和家兄隱翁久別雨二首

長客有似

萬里風塵遠二年會聚難每憐伯仁

白小長客

勝自作少游看不用聞隣笛相悲正淚潛

去年相望苦風雨獨凭欄故我忻無恙慈闈得問安還鄉春又
半騎馬雪初乾何日離人事相持入碧山

久雨害稼

天下陰氣盛江南秋雨多桑盛吾敢望君相意如何野曠鷹初
鷺江空鴈不過遙聞府中帖昨日已催科

和詩中立二首

始識未逾壯重逢四十餘狂隨春酒盡病與好詩踈有賦堪懲

但云陽已盛春雪復霑途修木輝_匕眩遙山漸_匕無雲寒凝不
動雀晚間相呼無復望千里惟應寄一壺

寄友

吾友葉居士三年二已踈每來曾不駐今別復何如歲月同爲
客勲名合著書先朝文獻遠風雨一歎歎

除夕

踈雨孤燈夜相看又歲除江山猶寓客親友絕來書新酒初堪
酌長愁未輒踈艱難吾敢恨百歲定何如

和范國用隱居

此客亦小隱吾生歲月流巷貧初有轍世變得耕丘棲晚憐荆
土湖春夢越舟臨渠見雲影偶坐各悠_匕

與江東郭提舉季新

向來梅水上相望路參差久別聞君貴重來長客詩乾坤萬事
隔故舊十年思古道真如此遺簪倘可期

和家兄巽翁久別聽雨二首

夜闌不能寐長聽雨聲寒萬里風塵遠三年會聚難每憐伯仁
勝自作少游看不用聞隣笛相悲正淚潛

去年相望苦風雨獨凭欄故我忻無恙慈闈得問安還鄉春又
半騎馬雪初軋何日離人事相持入碧山

久雨害稼

天下陰氣盛江南秋雨多燦盛吾敢望君相意如何野曠鷹初
驚江空鴈不過遙聞府中帖昨日已催科

和詩中立二首

始識未逾壯重逢四十餘狂隨春酒盡病與好詩踈有賦堪懲

咎無成託遂初阿同頻共語時得問何如
諧世非無意斯文亦哢收極知癡見笑尚以味相求落日湖陰
笛涼風水郭秋何時同聞舍高臥未須樓

瘞天

鬚髮忽如此今朝復瘞孫相看知極苦少待亦能言已已成泡
滅脂脂但目存老天均賦受壽夭與誰論

元夕

節夕貧相值流年雪共新一燈遺老鬢四海後元春庭樹猶淹
凍盆花不棄人兒童書蠶卜樂意愧渠真

自和

老境憎寒劇陳人愧歲新梅花如待雪酒盞獨知春時序堪搔
首篇章謾累人悠々供一笑浮世孰爲真

九日憶蕭孚有

故人南浦去近日定何如聞滯鄒陽獄誰移北海書江湖寒信
早風雨遠音踈應對重陽酒何由得寄萸

酬劉以芳見貽二首

其家高園
山中高處

山露沾琴潤山風到鬢寒酌多迷夢覺語又雜悲歡身豈如泥
爪鬚難染石肝不知明月外何處是瑤壇
山中似蓬島高處不勝寒邂逅千年意攜持一笑歡庭花明酒
盞岡月沁人肝詩壘高凌斗猶須更築壇

正月八日會詩人堂和山谷韻

涪翁去不返復此覈空々古寺八泉在遊人百代同樹懸山雨
白門揜佛燈紅諸老詩應好誰當續舊風
遣仲子尚文歸故鄉後雨中獨坐

擾々忽幽寂悠々轉暮遲春濃心獨苦書快睡先宜幽鳥窺癡
客殘花耿夕池兒童行未返微雨最先知

故鄉南嶺相去府城六十里而尚
文又多病故去後見雨而賦此

輓文文溪宣慰

身世從違夢功名毀譽資平生惟客在後死有兄知危涕秋風
遠華顛嶺海期空餘千載意不得盡吾詩

輓劉須溪大博二首

蚤日驚吳洛餘年畏有聞蹉跎臣結策流落大蘇文世外風流
盡人間論議分豈無千載淚不得灑公墳
海南劉夫子堂上尚及吾相知能不淺一失恨何如白日今三
島黃河自八區終然四十誅不足盡款獻

輓鄧中齋侍郎二首

海上青油檄城中白髮簪百年重得老萬事獨餘心過客門嗤
鴈遐荒字抵金平生俱莫料造物意何深
和音回雅誥偉意落群公河岱苞流外兒童好惡中書成慙未
學琴在與誰同獨有任安意深衣哭垆風

又代輓二首

雅望驚南北斯文屬古今艱危魯連意老大管寧心落日空庵
白秋風病髮深大玄當有識流落欲千金
問字酒盈座談玄轍滿門病餘仍托贖客去獨無言世論從妍
醜斯文豈怨恩相從無限意淡盡郭西原

輓李鳳林二首

篤行成迂濶垂言累隱淪儒林多未傳耆舊已無人家學傳衣
重門生負土新未湏生世早相望一沾巾

苦學難酬志知名不為官百年供簡籍四境想衣冠顰笑從浮世窮通得遠觀風流今欲盡滿眼淚沈瀾

輓蕭方厓御史二首

絕域衣冠化南荒繡斧明艱難心獨苦好惡事難平人物增青史風流想素旌悠々行路哭豈盡計私情
歲月無餘分功名不計身世方危獨行天若忌斯人精鬱山川古魂流楚越春遙憐無盡意未必著堅珉

輓文母歐陽夫人二首文丞相夫人雷北子學山學士迎歸

興廢知何與盈虛豈是真閨河餘白髮鄉井記前身世自哀書血天猶合劍神人生俱有母千載獨如新
曾哀穿塚吏又見表瀧碑事遠兒童老傷多感恨衰總麻千里合魂魄故鄉悲樵木秋風後母傷墓木枝

書血用未壽昌事言學山求母之切穿塚用田橫事言文山死節表瀧并歐公事言學山自為墳誌

代輓文母歐陽夫人詩內凡言猶足謂不足猶須為不須此後山所謂曹洞禪不犯正位是也

棄俗寃親盡還家夢寐平鄉鄰無故物天地有餘生起滅身從幻哀榮世自驚人間閨閫意猶足托碑銘

向來蠶織意豈識興與亡萬里心先死三年事已長子孫身外足棺槨里中藏我亦非私慟悠々獨涕滂

哭王昂翁內舍三首

昂翁安成人名梅边少負經濟之畧以賈生馬周自許不肯輕仕事親居客孝過古人蓋才德兼備之士暨死士類成傷悼焉

敏決唐如晦經綸漢賈生豈無才用世終以孝成名誰復網常盡何由造化平無窮人物恨灑淚看銘旌
過從能幾日訣別遂千年語自今朝絕詩應後代傳世亡和氏

壁交廢伯牙絃嗣孝多賢子悠々信有天
少年聞傑譽謂在古人中豈意斯文好相看晚節同論心非苟
合研理似相攻月落聞雞起長疑尚未終

輓胡宗瑞節推三首

高科良易致素志每難行畫諾威靈霽平反朽骨生百年身落
落萬事意平平滿眼方癡點懷公一涕橫
海內多先友如今可幾人高冠餘後死一第是前身雅俗形神
遠窮通表裏醇山陽寒笛斷宿草欲生春
早似何蕃出終成靖節歸机心消古貌世道繫褒衣貴賤元無
與詩書豈悟非悠々興廢事高塚下斜暉

輓潮州教授李以翁二首

白髮居庸塞青衫瘴海濤平生餘志在薄宦累才高罷業庸流
嫉篇章大化勞鄉邦人物盡江漢日滔々
舉世淪邪說公如抵佛韓論當閑暇易學辯死生難旅櫬馳炎
海銘旌表冷官向來知己遠讀狀淚沈瀾

輓楊節父二首

揚學文字節
父官同知

守道疑齊緩忘官似陸沉氣通刑獄命政服鬼神心州郡餘才
傑丘原一古今悠々三命鼎落々四知金
吾里南溪路公今迹又陳閔面猶有族江右欲無人人憶羊公
美天知考叔純空餘雞絮意墓草未知春

輓劉省翁二首

花外青山屋琴書永日風卷舒千載遠談論百夫雄未試長才
用誰能雅志同墓銘公論定應傳逸民中
四海尊經意堂々不可群人言君已死我兒子能文竹簡春風

在梅花晚日曛素車慙已後何日酹高墳

輓蕭吉翁

人生俱志願豐嗇豈天存賓客清時酒臺池故相園濟人高產
乘奉毋效潘軒不盡詩書福懸知在子孫

輓高季遠

嗜學追諸老興門在一身鄉資分粟廩心是濟川入陸縯常流
羨常經百世珍遠山曾約賦愁絕暮雲新季遠有遠山堂曾許作文

酬曾允升

著賦何妨少談經豈必師平生當幾見同里早相知奮迅由頻
挫歡欣出久離苦心須必達猶有托金期

酬巖上人結水延興寺

風挾巖泉急雲分洞雨新寺荒經起滅境靜失寃親堦石藤侵

座庭鐘鼠拂塵楞嚴收未徹半落案頭巾

和彭自遠

出郭俗妨興題詩雨廢春相逢憎易別欲語恨難頻江霧低城
重簷花入牖新踈慵知不怪我自掇皮真

幸從義招賞牡丹不能往用彭韻為謝

趣減仍妨雨詩來始悟春相踈心獨在未老會須頻美酒留人
熟名花似洛新為詢江閣意消息定應真

和張提舉登永新興文閣二首

邂逅成千載春風入鑄顏功名驚破白文采笑窺班絕港行滄
海南荒識泰山如何貞觀治猶恨棄程閑
醜好元無定公心水鑿虛風霆同氣化椿菌自才殊羸馬寒花
外新詩落木餘百年真幾見三歎獨躊躇

和張提舉題安福州書閣

高才成政譜美傳起儒林禮樂乾坤重文章日月臨一官驚道
屈暮月見功深珍重經行地甘棠樹上陰

和劉實翁後中秋

庚子

此地元無約窮年亦倚樓亂雲江市白落木鬢毛秋逢節偏驚
客資身可廢謀天多今夕月有酒未須休

府公召方士蕭山泉請雨約某日雨不雨以身追責是日

果雨

天道遠如此居然雨此時使精疑命達事過覺言危大府資增
傳扁舟取載詩向來脩省意寂寞欲誰知

送劉尚友赴汀州教二首

四海劉賓客儒冠似昔遊文章遠捷徑山水要清流飛雨沾歸

馬傾城望去舟官程元有數早已恨淹留

小坡成譽癖叔弼托門生政爾難為後終然早致名客羶須道
熟人事入閩清珍重明朝路無因數寄聲

送文尚志赴寧州州判二首

盛德宜賢胄榮名起世臣乾坤共少日閑閱信遺民山入名藩
秀春隨別乘新大江清漲起回首愧知津

士患空餘志君今復近民一官開器業二父獨君親茶井行雲
曉蓮亭釀酒春臨分無限意望絕馬蹄塵

春日江上

山市風歌樹花津雨漲泉路分歸越客春入下潮船嗜懶終遠
俗無成數計年殘梅如有待耿耿映青天

和友人

樓月窺寒上林霜到晚
番斯文湏命重白髮為人秋
世味何妨
熟梅花不受愁向來喬木
意鬱鬱在溪頭

和鞏志道憲郎二首

嫉惡思桓典論交慕季心
共知天下獨信有古人
今經濟閑時
用驅馳閱事深朱絃寧小
試清廟待成音
聞譽乖同語觀詩早會心
本非前有約便恐後無今
壯事青雲
濶秋風白髮深猶湏聞
鸞尾千載貴知音

留印岡山中

村旱谿源絕年虛鼠雀飢
庭風扉自語山雨客先知
窮達堪杯
酒暄涼任鬢絲梅花春欲
動不盡歲寒期

故里

兄弟各逾老青林祇舊觀
午煙山驛靜社雨水村寒
燕子風當

戶桃花客倚闌莫論千載
去且共一杯歡

八月十四夜陰更闌月明二客小飲二首

壬申

秋暑過常歲及茲還早涼
無言花外月隨意竹間觴
故友可誰
共佳時良自傷未憂明夕
事聊復此徜徉
城中高列宴我飲不盈觴
二子了無語微風來自長
旱餘雲滿
地酒醒月生廊却憶吾兄
老空山夜更涼

代輓文母歐陽夫人

憂樂三生夢哀榮百世心
生還仍有子死別本無今
風雨餘藤
繡江山照祝金猶湏聞孺
慕行道自霑襟

輓王隱士

學可高儒傳心宜表逸民
百年偕計夢五世未衰身
禮樂垂時
好階庭共席珍一門從似
昔四境欲無人

輓陳隱士

世事寧須古斯人已媿今孝慈千指族飢溺一鄉心路斷書聲在山空隱德深平生大丘長相望一沾襟

輓聶學正

守道成憎忌談經得苦辛斯文元有命今世復何人耆舊頻凋瘵風流絕笑顰明朝春草綠更過大江濱

輓劉天秀貢士

異代賢能士空山禮樂心飛揚知謹厚患難見深沉取忌元違物能言勝遺金哀詩將底用萬一是知音

輓高志翔教授

悟早為才役吟工被墨磨生無百年半天忌一官多嗜古心如獨同塵意自和人生須底物一石兩嵯峨

輓劉子章二首

福澤晚逾盛詩書早自脩剛腸空百懦定力勝群謀客意化前酒書聲竹外樓諸孫今滿眼九地欲何憂才傑古難見鄉邦賴有人相違十年久又作一丘新剪燈山窓雨看雲水檻春南陽慙不送宿草一傷神

輓羅見大二首

官錄事

經術追歐夏科名並愈詹入官身似隱涉世德多潛時竟難行道天如不福謙三春今始葵老淚不勝霑

憶昔過從日清言蚤悟玄柳家從有子王令竟無年親友生前合身棺火後全何時攜絮酒出郭酌荒阡

見大少日過從趣尚與俗異及登第謙約如昔薄俗便謂其不自振舉吾常謂使衣冠士得如見大百數相視成風天下貪傲習當少戢然竟不得年以死家禍隨之不知造物意竟何如也故為之悵惜

輓毛齊芳二首

少壯元難挽天人苦異馳藝高文遽卷科復鬢先衰鄉曲空前
輩功名又一時吾猶尊往行人但信寄碑
少嘗輕筆墨晚欲老田園世改聲名在山深齒德尊教經元自
信閱世與誰論有未知風致惟應視子孫

輓文遜志學士二首

聲名天下士人物玉堂風坐失杜羔孝真成嵇紹忠壽無人世
半論有後來公今古元如此江流日日東
世情貧自陋交道貴方知人共迎天使公仍似昔時相叔猶有
意此別遂無期何必南陽送全勝百里悲

輓解昭子內舍二首

異代膠庠老空山禮樂身世猶尊善賦吾自敬全人縣改遺民
盡科興進士新悠々相送者未解一沾巾
識公無弱冠讀誌亦華顛道寄人耆俊年催輩後先濶踈心獨
在今昔淚潛然夢記東門路惟應樹拂天

輓劉子昭二首

科目心如少山林道自尊百年千變閱四世一經存老佛資玄
悟交游記格言流風何處識彷彿在諸孫
災疢偏成慧功名併作年山深耆舊化德熟子孫賢巨筆頻追
誅孤墳定說玄古來齋志士相望一潛然

輓曾德裕學士二首

家出南公舊才超北學先少年金匱史壯節玉堂仙起仆真成
夢風流自可傳向來終大用端不待長年
丈夫不伊傳當復附楊班學獵千年上名成一日間無誰歌種

豆政自賦囚山短匕如堪恨英匕可復還

哭蕭安國州判二首

二十聲名起秋鷹縱遠空雄文西漢意蘇氣大程風一念無憎
忌平生昔異同悠匕真宰遠好惡若為公
早日分隣燭中年隔宦郵青衫南徼雨白髮洞庭秋風誼真堪
哭交游取次休短修同一夢華寂亦何尤

十五夜無月三首

久待中秋月還成今夕陰感時一盃酒悼往百年心涼鴈去無
影候蟲偏作音姮娥應耐老誰與汝同斟

今夕中秋月親朋各一天群英洪浦酒二老浙江船蕭芳洲劉
申齋考試
擬宇宙同有役山林獨信緣五羊詩尚在搔首更淒然彭冲所

秋雷宦廣州
寄詩時已死

去歲中秋月初歸自故鄉老妻旋具饌稚子屢傳觴閱事多晴
晦吟詩隔在亡麻帷哭聲斷燈影耿空堂

中秋和甥孫李玄時敏

明月不可待好懷誰與傾衰年惟酒盞獨夜更蛩聲風雨孤燈
語親朋四海情得詩還自遣何用計虧成

和羅士奇遊洞巖見示二首

桃花不可見春殿白雲齊世外流泉好人間去路迷神仙遊汗
漫過客愛山溪欲往今衰老誰能此暫棲

昔往興遄盡今遊期未齊天連華蓋起山抱白雲迷樹老時來
鶴星低半在溪故人題筆在遺墨似鴉棲

又和遊龍寂寺二首

境近不能往山神豈見哈不知千載遠定有幾人來古樹含元

氣晴溪轉晚雷老龍今已寂誰復與爭隈
良遊亦邂逅緩轡語相哈寺悟三生熟山從七祖來敲詩聞愈
島入社有宗雷何日橫塘路相從釣水隈

元日試筆示兒孫

已未

酒盞頻番贈鐘聲忽報晨天開元日霽雪度兩年春學貴資身
早心當與歲新科名雖外物未許遜他人

元日和尚文韻

已未

酒為消愁進詩因理病疎倘能家少累未問福何如臘雨催庭
樹春風入案書卷舒寧有道未免學籛餘

送曾學萬入京

郡東有喬木詩禮接雲來昔荷丈人厚今觀此子才南風三楚
潤春日五門開部隗間閭子黃金為築臺

贈劉生季恭

之子恩江秀翩翩筆有神頗能研六籍蚤欲屈千人夜雨蟲燈
暗秋風鶉翻新科名直餘事吾道要知津

故里曉坐用立敬韻

曉起復危坐蕭々聞馬嘶歸雲山色靜宿雨竹枝低客意空山
笛秋聲隔屋雞廣南方盜賊疲卒困山谿

八月十四夜與姪厚對月

丁丑

有酒不嫌薄空庭慰寂寥幸同看好月寧用計明宵驛柳知秋
早階蛩語夜遙仲容差更勝喬木未應凋

中秋夜楊伯允坐間以一年明月今宵多分韻得年字

還往家相近棲遲意自憐賞心宜美酒撫節憶流年薄暮秋初
肅明宵月更圓時十六興闌橫笛起共步小溪邊

十六夜飲道立姪孫小齋齋舊為樓每看雲望雪於此二首

憶昔看雲處如今待月時歌殘林影轉語劇酒盃遲堂構諸孫在桑榆二老衰悠々時序意誰與共心期

月輪明似水病眼看生毛南嶽云月生佳節留鄉好衰年待酒豪星河三極動風露九天高不盡詩書意依々望尔曹

歸城道中

軋々輿穿隴迢々路向城村煙茅屋午籬蝶棘花晴偶見迫田務坐慙踈禮耕遐瞻多内悼一樹白雲生

六言

清明和歐陽山立二首巳丑

江南二月三月野水一村兩村花落人家寒食燕歸山館黃昏細雨海棠成子餘寒江燕初歸立馬橋西沽酒行人未試春衣

鰲溪山行和彭琦初

照袂晴江淺々迎風青髮踈々看山拄杖欲倦得句畫沙共書又

巖上石仙流雨灘頭春壑生雷回首鹿門總角鬚髯如戟重來春日偶賦

官路落花馬過人家高樹鶯啼故里故人何處夕陽長在樓西又

楊柳輕寒水驛棟花小雨官橋回首人間往事孤燈挑盡春宵和龍麟洲題黃次翁黃鶴樓圖

孫曹百戰何在大江千載狂瀾誰倚樓頭呼鶴秋風落日危闌

桂隱詩集卷三終



國家圖書館, NATIONAL CENTRAL LIBRARY, TAIWAN, R.O.C.

本館訂於三月三日

桂隱詩集卷四

律詩七言

和彭贊府琦初新歲陪拜黃堂之什

九州八極共年華未覺天顏萬里賒
雉扇排春塔立笋猊煙泛曉燭生花
侯藩勢重嘶千騎仙樂聲高進九霞
懸想故人袍帶冷頗輸高臥屬儂家
金竹峯前共歲華新詩同賦酒同賒
君如老柳春先綠我似寒梅臘未花
晴日市眉行却月暖風客臉上流霞
小桃忽露牆東萼春色寧遺陋巷家

和友人牡丹

紅紫爭推一剪新世間顏色直湏真
曉風低擁霞窠重晴日濃熏霧氣春
富貴自應高一世風流原不屬陳人
從今宴賞多賓

客來往門前攬馬馴

壽仲兄誠翁八明

故園兄弟昔成雲大耐如君七十春明月欲圓猶五日白頭相
聚偶三人課書要壽傳家脉止酒能安不病身寄語諸孫須用
世不妨巖谷老遺民

和彭琦初見壽 丙寅

陋巷秋風處士家回思千劫等炊沙少年曾似三眠柳老去羞
看一日花白髮夜深燈館字蒲團日晏地爐茶故人騰作飛騰
祝試聽漁陽一搥搥

和曹正中見壽

卜筮從誰問曆家命途難合笑搏沙陳人我似三年艾冲氣君
如二月花奮迅終題司馬柱清貧且共玉川茶明年預買東風

馬行遍長安不用搥

和張漢英見壽

吾里文章小晏家才情欲學賈長沙妙書鴻戲秋江水佳句風
行曉苑花富貴未來歌扣角畸窮相對賦煎茶芳年京國蜚騰
近預想春車墮馬搥

旦日試筆 并自和

爐煙燭影共徘徊手試春風第一盃萬里星辰環極共五更鼓
角挾春來凌寒柳意如先動閱歲梅花不受催坐久不知天向
曙出門爆竹發驚雷

老來節意重徘徊小案猶橫隔歲盃得句定知春未覺開門喜
報客頻來江山萬古晴陰老花柳千林雨露催郡國升平人自
樂城頭畫鼓響輕雷

春日酬友人

閱世情懷雜喜悲未須此意語群兒故人每見逾相憶白髮無
情不肯遲楊柳未高春尚弱海棠欲動雨先知晴江浮舫修魚
美乘興相過會有時

和劉道淵

小巷柴門剥啄聲齋爐相對得詩盟春寒未了花開落山雨頻
來窗晦明我自一經成皓首君方萬里起修名人間變化知何
據危坐東風看馬程

和彭庭發

捲簾危坐似枯株微雨群峯半有無山墓鳥啼寒食近人家花
落暮煙孤病辭美酒空佳節老憶東風識故吾為問隣春餘幾
許嫩黃一寸長圍蔬

再用前韻酬周景叔

暗催紅綠滿高株賞勝閑情未肯無燕子樓臺人影瘦海棠池
館月痕孤酒闌已悟春為客意樂何須土是吾夜久茶餅踈渴
蚓冰壺偏憶甕頭蔬

和王如隱遊劉氏小園有感

曾向園亭醉吐茵重遊滿眼已無春江山慣閱人今古花柳何
知主富貧梅雨颯窗朝夢熟蒲風到酒暮寒新向來談笑俱成
幻世事真成肘屈伸

和友人宴王氏士敬新居

論字吟詩似晉唐兩窗南北誦書長樓臺燕子踈雨院落桃
花短短墻羅扇迎風人入畫朱簾望月夜生香詩晴老退難描
寫獼髓誰能學補粧

謁楊誠齋祠墓

溪水南來合西津小蓬洲渚尚橫陳祠門遺像凝塵網墓道號
兵臥石麟園墅亂畦耕落日子孫殘屋雜編民鄉邦名節嗟何
及每過長途淚滿巾

所居江中立亭歸小蓬萊

二月客愁如蝟馳市頭酒薄無奈何桃花浪起春風濶燕子寒
生社園多畏見餓夫蒙敗袂斷無遊女試輕羅傳聞進士御唐
幾尚要力田回漢科

南隣楊二居士邀飲

故人南麓楊居士薄暮邀客分清罇百年隣里髮俱白異代衣
冠我獨存坐間惟鳥斷空山孤樹悄馬嘶小驛一燈昏先朝文
體浮雲變二仲能來可細論

故園不見經年又花竹手栽能半成雪後山林經浩劫歎餘耆
稚賀重生談經揚子今誰似能賦相如謬有名後世有人尋避
跡祇應指點麓山橫

故居吉文南麓角山下

送劉巨川赴惠州海豐巡檢

大博之孫

須溪孫子好才名百丈龍山繞屋春文學盡交天下士弓刀更
治嶺南民盾頭墨濕長亭雪扇外旗麾列嶂塵若見羅浮蒼爛
熳可能遠寄一枝新

和蕭孚有霽雪

磊砢天河萬玉漚朔風吹散不成毬群僊整駕鳴珂動六合為
盤放汞流少婦凝粧疑可節飢人夢飽誤消愁若教天巧如人
力應費滕神幾刻鏤

庚午上元雨陪學翁兄飲

元夕相看白髮兄燈花應笑兩無成
村醪薄匕客三五踈雨滿
瀟瀟幾更老境情懷多舊感
荒年市井少歡聲興來欲聽祈
賓
項門巷成泥懶復行

再和上元韻答彭琦初

平生相視只數兄文字江河落筆成
時序百年樽酒在風霜萬
里鬢毛更交游依約青燈
夢豪傑銷磨畫角聲見說
教坊歌盡
變無誰能記落梅行

節後數夕再和

少日燈窗共弟兄鼎丹九轉待仙成
文窮敢信辭章好身老偏
驚節序更曠楚星河浮夜氣
高城鐘鼓入春聲若爲勝日能無
事共對梅花酒幾行

閑居即事

庚午

小窓拄頰看雲過不斷東風吹鬢
皤松古何知春至早花濃偏
值雨來多已安薄相食無肉更覺
衰顏酒不醅無力能為移粟
政有愁自賦採薇歌

和蕭孚有新年二首

賀歲千門懷刺漫吟詩一室硯池乾
燈期五日如此雨花信新
年第一寒里巷浮沉逢酒飲江湖
匏落出門難故人賴有蕭公
子肯共過從散恨端
閉門十日雨漫匕詩思隻枯酒盞乾
杜若水生江舫集海棠風
起郡齋寒十年競轉青春易百藥
重回白髮難知子頗憂天下
事可能參錯立朝端

彭琦初用坡翁紙帳韻惠建昌紙衾次韻二首為謝

雪絲揉碎密縈連清臥梅花性更便
茸暖何須蠻客帳座寒但

少廣文擅窗升紅日那知曉夢壓白雲疑近天但恐少陵茅屋
漏雨宵沾破不成眠
盱溪水暖楮藤連練作雲余與老便補幅全勝羊續布畏身疑
是鄧侯醴溫欺奈繁媿霜夜潔與梅花共雪天要識故人淘滌
意可貪一賤但高眠

和彭琦初元日盱江見寄

辛未

木德行春史告迎高蒼細柳動江城麗譙鼓角中天曉黃道星
辰萬里明短褐空懷風雪弊老節慣閱歲年更灌園且飽皇天
賜肯事錢神喚作兄
交道平生雷與陳相看歲晚掇皮真江湖宦客孤舟夜城郭詩
翁白髮春雪塞得晴翔去鴈水池猶凍困蒼鱗須公投老相還
往倘有清樽便不貧

琦初追和余去年上元韻再和爲謝

梅老今為萬卉兄皇天又辦四時成年華不染鬚千戟春氣先
歸鼓五更世與豪英來不盡物隨造化運無声人生得失非真
是倘共花時載酒行

中秋和蕭孚有

早雲捲盡昨宵陰節物偏供酒盞深病骨怯風難久坐衰年見
月易傷心金螺水落千峰笛白鷺城高萬戶砧頗憶五羊臺上
客頻從驛使寄新吟

萬里青天無寸陰酒闌秋氣入衣深百年晴晦中秋月四海悲
歡此夜心佳節有情惟藉酒孤蹤多感更聞砧文章政要追周
雅底用款歡學越吟

中秋和學翁兄

七十老兄生理浮未寒先試木絲裘管絃四海華筵月鐘鼓半
山僧寺秋鷗其年學耐醉裡一樽歌浩七老懷萬事歎休休故人
相棄誰來往惟有殷勤白髮留

南山故居偶成

南山盤鬱走虬龍喬木先盧在眼中明月漸高生夜氣驕陽未
了見秋風塔篁愈淨如莊士墻柳先衰效禿翁謗有河東諸賦
在昔將顛胸擬楊雄

贈陳縣丞子達夫遊廣西

西昌邑丞世偉人鳳雛超七殊不群壯志終乘三級浪高懷且
看九嶷雲炎荒山水能來客盛世賢良際右文見說故人知已
在豈無大闡薦方聞謙書坊

中秋月暗味蕭孚有

郭門望月碧雲涼雲裏吐吞和璧光永夜江山含道氣空庭風
露帶天香有愁惟恨壺觴淺不寢偏聞鼓角長顧我孤生餘短
髮請君一笑解離觴

搗藥姮娥古羿嬪深藏厭逐老天勤孤城涼角自吹夜萬里長
風不破雲簾影蕭七殘燭燼秋聲漱七過鴻群少年呼月狂懷
盡細酌無勞酒十分

春遊和徐錄判

錄事忝軍姓字芳愛民曉出馬蹄忙千門春色歸桃李四海人
才待棟梁闡省清風催玉珮蓬萊白日飲天漿裁詩欲效瓊瑤
報自愧全無時世粧

和蕭孚有午節舟中

槌鼓踏歌江水陽參差人影樹堤長百年佳節孤舟雨兩岸青

山過客觴澤畔猶懷漁父問坐中幸少次公狂懸知北巷今宵
月翻憶南風十日涼

登滕王閣

來往南州老一經登臨轉覺鬢星星
戍兵盡守滕王閣驛馬秋嘶孺子亭
舸艦北連章水白樓臺西映蓼洲青
鵲袍多士誰能賦謾笑王郎筆意輕

古洪舟中

舊懷經濟今頭白猶與群兒共往回
豈有文章拘敵法無誰巖穴訪奇才
秋風白浪粘天去落日高帆逐鴈來
永愧東湖徐孺子柁樓三酌菊花盃

登金竹峯

一峯巋起何竒哉大古削成蒼壁堆
四野雲開墟井見半天鐘

動鬼神來山前戴景全消歇洞口朱陳自往回
誰畫先生心似鐵秋風千丈立崔嵬

飲崔仁卿宅

崔世為軍官仁卿登第

燭出馬嘶人正歡滿堂急管與清彈
紅裙偏勸少年醉白髮先驚暮色寒
海內科名銷武伎坐中諧笑忌儒冠
古來當饋須行樂却學唐人強自寬

送吉水葉教授歸金華

宗廟巍煌百廢修諸生濟上異常流
故家文獻見此老盛世絃歌遍下州
字水春瀾明講席金華涼月弄歸舟
方今天祿須才士浩蕩風雲萬里秋

和李長翁知事宜黃卷雪亭

亭又屬他人至是復歸

李氏園亭汝水濱百年喬木復回春
雲濤不改當時白棟宇何

知兩姓新鶴語已隨丁桂化燕歸猶向謝堂馴明年赤壁江頭
笛吹起天風萬里身

蕭氏母稱壽宴客和蕭芳洲

春苑曾逢一角麟晚為隣巷灌園人百年頻醉瑤池酒四座誰
憐白髮賓地縱勝遊宜入畫天留閑日足娛親蓬蒿滿戶無來
轍時過東家洗渴塵

風流四海一平林其祖安撫喬木參天繫客心燕子池塘詩句

好蒲花簾幕酒盃深仙人宴罷生明月公子歸來長綠陰為報
閒居須續賦不妨徐起任商霖

曉起用麟孫韻

七月今年涼氣高墻東古木夜蕭騷孤城殘月角初動野屋秋
風雞亂啼萬事惟餘雙短髮百齡須用幾緋袍故人莫薦楊雄

賦衰老難勝執戟勞

壬申中秋無月和國通姪

通仕至理問出
為花團王氏後

數客相看坐小庭老來逢節倍閑情江城殘角雨千樹野郎秋
風夜再更萬里新涼今歲早百年佳月幾番明大兄詩句今猶
在無復相攜賦夜晴學耐兄儲
有夜晴詩

甲戌和蕭孚有見壽

少日曾期諸子先如今潦倒且樽前鬢絲夜雨窮東野城屋秋
風老玉川自度新詞傳玉笛莫將舊事問銅仙文章星斗真何
用但把長鏡了暮年

玉頰脩眉入繪圖自騎紫鳳衣霞裾佳時燒筭洋州畫長口臨
流逸少書歲月浮沉羈羽翮風雲變化看鯢魚君家累世堆床
笏未可逢人賦遂初

和涂率脩見壽

衮上高冠盛玉堂，牛衣誰復念王章。百年風雨青燈在，萬里乾坤白髮長。我懶惟應棲畏壘，君才終許奏明光。郭門東轉三泉美，來往還能共酒觴。

和胡履平見壽

閱世千靈復，百霜空餘短髮白。成黃君如劘刃，千牛解我似車輪。四角方城鄙故人，今雨散衣冠。喬木有書香，亦知人爵非真樂。政欠成都八百桑。

和楊貫道見壽

學易未成先退藏，鶴鳧非短亦非長。文章底用追韓孟，富貴元應屬禹光。已老不求方染髻，平生惟有句成囊。星辰劍履危朝露，甘老秋風一草堂。

和張伯溫見壽

憶昔青燈書滿床，如今八尺見身長。故山共聽綿峯雨，客館同傾鷺渚觴。豪傑自應超世美，文章早已帶天香。高門佳氣今如昨，要繼陳家起盛唐。其居唐居長史故居

蕭上短髮不重新，老去何由復競辰。百世光陰消鐵硯，半山風雨語銅人。病餘久看花成霧，醉裡猶驚筆有神。浮世功名無念我，相期早致日邊身。

和蕭公著見壽

少年佳卉發春芒，老大真如凍木僵。天闕曉寒遺太白，魯城夜燼見靈光。嗟余學採雲根藥，知子應攀月窟香。學問無窮功業遠，好騎騾駢騾周行。

和王元帥赴廣東過快閣寄文同予

家世詞林舊子期，旌旗鎮遠路逶迤。
金城老将三軍畧，銅柱功臣絕域碑。
帳下風清環萬卷，眉頭墨濕落千詩。
梅花荔子多高致，寄與中州故舊知。

送蕭公著隨父入京

鄉師蕭公百代名，子孫奕葉更多英。
山河勝覽先蘇轍，政事長書待賈生。
寶硯縱橫催殿對，錦帆唱和記江行。
懸知祖帳南歸日，細馬青緇出帝城。

送瑞州歐陽公源之京師復圭之姪

龍飛萬國慶清平，嚮室猶懸進善旌。
天下文章多賈誼，山中儒宿起溫生。
相君位重開翹館，令族才高侍大明。
好似故家題虎榜，馬頭春色滿都城。

故鄉夜坐有感癸酉

諸兄棄逝有喬木，病妻死別今空帷。
淒涼聽雨夜如此，老大還鄉心轉悲。
風氣百年無舊俗，江山滿目記兒時。
孤燈明滅可誰語，援筆悵然還賦詩。

南山之麓舊詩翁，短褐蕭蕭不禦冬。
壯節癡慵消白日，暮齡憂患謝歡悰。
文章無用空干牘，氣力逾衰託一筇。
喜聽五門新放榜，九州才俊馬如龍。
是年九月初放春榜

中秋陰雨

疾風掠鴈不成行，常歲中秋無此涼。
萬里陰雲圍野郭，中宵落葉響迴廊。
蒼茫天地容吾老，寂寞山林識夜長。
猶似姮娥未忘世，天衢隱遁發孤光。

寄壽永平主簿蕭克有

老呂相期二百年，清風共濟洞庭船。
萬山元是丹砂國，百里爭

看白鳳仙海內衣冠懷舊德人生詩酒是清緣
平反有政須頻報絕勝斑衣舞膝邊

和友人遊永古堂

流水小橋園路迂虛堂午憩息徐々山空轉覺禪
挽寂地勝不知人意舒靜倚脩篁聞鳥語閑尋
敗葉認蟲書輞川金谷餘荒址三兩園翁自結
廬

勝日偶尋山寺幽老僧石鼎沸茶溫市窮路轉
得此地人語經轂在小樓君似淵明來白社我
如蘇子說黃州雪乾沙靜春晴好出郭何妨更
小留小音

海棠和友人

嬌態偏宜夜燭看絳膚欲映曉簾寒雨酣虞帳
千珠淚日轉仙爐萬粒丹華屋幽深來客異名
花寂寞閉門殘請君浮世輕千

變何惜佳時寄一歡

和蕭孚有閑居即事

天氣初宜小扇輕故人不至巷泥深水村鷺去
千畦雨山郭蒼開四月陰愁裡有誰同細酌老
來併欲廢清吟若為共息塵勞意行遍青原處
七岑

和羅起初觀校場剪柳

治世衣冠立九天將軍語勇尚欣然元戎擁帳
孤羆兀萬衆圍風一騎先三箭鶻鳴軍盡賀兩
行柳斷目無全鼓收人散成虧遠惟有牛羊縱
滿阡

遊新塗塔寺

未信明時一士寒却從六合得茲山鼓鐘不了
行人老天地無言古佛閑地迥樹林環掩霽雨
多田澗互潺湲不知今日無登

覽曾有何人此往還

荷花莊小番音

城西郭門白髮人
印峯舊隱歸重尋故人盡化青山雨
古月長懸老樹林
野廟鼓鐘春社過
村家燈火暮寒深
平生謬有相如賦
老大何堪賣一金

和友人病起自壽

藥按常行鼠迹塵
花枝閑結膽瓶春
病餘不放吟詩樂
別久重如識面新
鸚鵡茶香分供客
茶蘼酒熟足娛親
與君共語如銅狄
長作比隣還往人
池水春濃轉蕙光
蒲萄新發過簷長
許家丹熟千年壽
常史詩成百世芳
刺綉簾櫳鶯語倦
讀書院落絮飛忙
舫軒珍重孤琴在
早晚還須奏舜廊

壽友人母

閑居能賦似潘郎
夏枕生風碧玉涼
天餉麻姑千歲脯
春留瑤母九霞觴
綉簾桃實丹雲熟
粉院蒲花白日長
須信高堂衣五綵
絕勝萬里帶雙黃

辛亥上元雨和學翁兄

街鼓鼙上滿暮城年
上風物自依辰
欲穿花市霜生鬢
待得燈期雨妬人
嗟我已應成散櫟
念兄政復坐方輪
燭花故作垂上粟
尚喜先生句法新

翁時贊長塘曾氏於郡城為密迹故每上元與翁會更多於諸兄而贊和亦多

三月三日和丁教授陪拜黃堂三首

絳紗千炬促僊班
兩廡峩上峙竹頽
天上黃雲嚴鶴駕
人間紅日擁鰲山
九州競進千秋鑑
萬里如瞻咫尺顏
與宴簪花沾下

士應無後至立縣間

文武衣冠藹衆賢五更朝馬集鑣騰乾坤昌運重三日海嶽驩
心憶萬年官柳傲風明翠輦簾花醉日麗華筵吾皇祝網多仁
澤行樂無誰更擊鮮

閭闔東風瑞靄晴霞觴欲醉內官迎龍輿駕曉開三殿雉角班
春肅九鄉露重碧桃低太液日高黃鵠下昆明書生無限封人
祝遙想天墀頌太平

友人楊居所往金陵省忠襄公墓學士虞公送以詩壯鬱
沉痛使人流涕因用韻為別次篇遠哀雍公以虞詩序及
此故也

邊陲侵軼尋常事但恨朝臣少寇萊汴水殿荒秋鳥下金陵城
落暮潮來忠臣遺廟長存祀異代諸孫肯一哀理擢又為江海

去不妨覽古更遲迴

窺渡驕兵凌采石撫軍使者出蓬萊東南國勢一朝定吳蜀江
流萬古來諸葛八圖司馬走臨淮孤塚杜陵哀只今貴胄知天
道奎壁光芒與漢迴

寄旌德宰劉粹衷

吾宗令宰才名好別後相望已二年海內舊推晁氏策江東今
誦魯恭賢清臺日月資衡鑑紫筆煙雲發翰篇早晚考功催上
最買船擬待字江邊

簡晏提舉

胸中至寶等隋和鞭鳳曾聞第一歌天地百年喬木在山川萬
里宦途多詩成夜月揚州笛賦罷秋風赤壁波讀徹大編無一
語低頭東野愧如何

辛亥清明日陪彭琦初黃用實八人同登螺山瑞華用仲
子尚文韻

小礪迴碣響石鐘意行忽憶去年重樓光納勝空千境山勢增
高得萬松經紫香銷風動塵禪房花落豈無蜂嘉禾橋外經行
路惟有青山似昔濃

故人新句妙何陰一笑相看得會心勝日從來成邂逅老懷正
復託浮沉山舍萬古春晴薄水挾孤城霧氣深隨意酒家聊復
醉暮歸未用典腰金

再用韻酬同遊諸公

聽盡城鐘聽寺鐘暖風扶醉覺衣重粥魚餉午催僧飯酒榼行
春醉墓松羈客得晴辭攪馬歸人分路各房蜂簪花泥飲田間
老我自不如渠興濃

萬古乘除陽復陰四郊歌哭一傷心天番世外群仙隱地俯城
中萬屋沉人影夕陽山郭迥野花寒食墓亭深古人飲酒元非
達要勝崎嶇利橐金

又酬同遊韻

墓裡何人是可兒生前當復喜吟詩百年風物歸雙鬢樽酒江
山偶一時覓寺憑高人慷慨簪花扶路影透蛇兒童能賦何堪
喜正覺吾生已有涯

送郭可玉肇慶教授

萬里東風送驛帆大堤楊柳照袍藍已觀泰岱行天下要識梅
花過嶺南才氣自堪供盛世文章元不是清談明堂禮樂須公
等學掾遙知不待三

送素從遜赴萍鄉州稅使

春深山路亂花開，賓從徐驅候騎來。要地車航通四境，盛時閤市亦高才。簿書未用妨山水，氣貌終當重省臺。李鄭舊遊知近杏，杖藜携酒試徘徊。

和蕭可則

平生君我掇皮真，閤里相望白髮新。共似顏郎終未遇，誰疑郭解定非貧。盛衰正可亡何飲，還往寧妨見在身。今世翹林須傑士，會看代對筆生春。

送蘇學正

翰墨元如萬選錢，雲霄橫鶩正青年。官花未試郎君馬，門雪相看坐客氈。已覺功名須命分，定知學校要才賢。風鵬變化終難料，眼看青丘九萬天。

送彭宜賓赴潭州學錄

盛年才氣自無雙，振鐸長沙佐泮黌。人物古來推楚產，文章天下說歐鄉。湘江春水雲山近，嶽麓秋風草樹蒼。豪傑功名須異路，定超天馬到長楊。

丁巳上元前一夕留飲蕭氏盤中和友人韻

香篆縈簾九曲盤，清樽對客語更闌。不妨小雨留人住，未覺東風到酒寒。絳燭繞廊春意鬧，玉笙連巷市聲歡。文園元有吟詩渴，更愛茶香透舌端。

飲罷偶賦

雨中簫鼓滿山城，節序偏供感慨增。貪聽清歌行美酒，不辭白

髮看華燈粉登夏果明群壁菜挾春風響碎冰却憶去年山水
夜籠紗醉踏雪稜層

枕上再賦

十二胸中策太平敢從明世歎無成人方走馬穿花市我亦著
書賦鐵檠午夜春寒偏到客百年節意獨閑情天机流轉誰能
識明日千林看發生

元日和尚文韻

爐瓶得火自喧嘩守歲何妨更不眠爆竹四傳知欲旦屠蘇首
飲記它年破愁未許踈椰盃助暖還思買艾氊天運先從梅柳
見向人偏自作清妍

送黃新之教古端

聲名疇昔重南州又著儒冠理驛舟要識海波窮壯觀直尋石

硯亦清遊枕柳葉暗詩筇瘦焦葉花濃講席秋帥府祇今須傑
士知君談笑暮清油

題安成李氏秀野亭

人生役志是虛名富貴誰言勝隱淪數世衣冠前輩意百年亭
榭太平人羨花脩竹隨時勝流水青山繞屋春今世恨無摩詰
畫不妨詩筆發清新

遊新淦興善寺二首

不待前期偶出門酒壺詩擔散郊原樹連山勢高藏屋路挾溪
流曲抱村老遇清遊偏易感醉思往事了無言此生定合重來
否細踏沙頭屐齒痕

欲雨不成雲徃還筍輿穩載度禪關青天四匝高峯外白水交
流亂畝間經論已隨仙客去佛煙長共老僧閑竟忠栢子西來

意惟有溪聲送出山

禾隴高低千萬區野花香麥半蕭疎山深水石含元氣地峻煙
雲接大虛殿牖舊塵扃古佛山門遺簡認尚書茲遊似亦爲天
妬歸路蕭蕭雨滿車

張自翁有詩贊興善之遊用韻爲謝二首

終日居山不見山却須高處共憑闌便尋惠遠覓方外安得孟
君來坐間秋閨風微烏帽穩山深雨足白雲閑平生玉筍勞清
夢爲報先生一破慳

獨樂名園屋上山竹深縹緲見朱闌山林歲月羲黃上詩酒風
流晉宋間列宿高蟠胸次濶奔霆不放筆端閑一時唱和堪成
卷自笑才情老更慳

再和曾學士

平生政自賦因山尚有清遊興未闌勝日酒樽思白下西風世
路笑黃間江山閱歷群賢盡傳註消磨百歲閑嗟我與公當幾
見溪橋來往未須慳

和曾學士見貽之什

求作刊樂府題辭集名
山笛譜中多情話

囊有相如賣賦金笛中一曲可沾襟武夷夜裂千峯石黃鶴秋
吹萬古心天上知音梅柳動山中懷舊歲年深清平進調須君
等不向明時歎陸沉

風水霓裳妙可聽斷雲過鴈筆縱橫揚州杜牧樓中夢淮海秦
郎天下聲駱馬柳枝餘感慨沉香芍藥待才名從今伐梓供新
譜流播梨園與妓營

和婁行所雪

眼看大地盡虛空元氣沉七萬籟風仙鶴曉歸千載柱玉龍夜

戰九霄宮人方羔帳歌初緩我亦漁蓑句未工破蔡騎驢俱有
命燭花開剪小窗中
盛年霞珮簸明珠坐愧前魚不泣魚歲晏多愁仍作客老來厭
事未忘書君宜翰墨收功早我亦田園作計疎莫忘溪頭來往
路筍山微雨水舒舒

上元次學翁兄

春似高人喚不來輕寒鐘鼓自相催年華未了供燈市節意聊
堪託酒盃菜甲半有冰地裂桃花預約雨時開故園風物今何
似惟有初心不受埃

贈蕭克有赴興國稅務

小駐青雲九萬程塗商里販樂寬平古來關市多賢哲盛世舟
車少筭征雨漲玉虹灘石減春深金鯽郡池清看山攜酒吾曹

事定有新詩許共評

贈胡履平偕克有之興國

主賓二美古稱難笑語輕舟十八灘幕有仁言官政善士從知
已旅懷寬文章不肯特科試山水元須勝士看想見鬱孤吟賞
舊渚煙汀樹滿毫端

和友人遊洞巖追用須溪韻

巖裡桃花千歲開巖扉無復老仙推萬山挾洞人間斷一瀑如
川天上來古殿碑橫苔入字忠臣像老月窺臺平生歐尹神清
興爲約秋風更往回

雲峯彷彿畫圖真石戶深藏萬古身山水何知天下事神仙本
亦世間人日高壇樹三門午雨漲源花滿洞春濟勝尋幽平日
意天風吹動華陽中

再和遊洞巖友人韻

白日行雲護碧巖使君應在最高壇江山有景待人勝富貴成
仙自古難夜月飛笙玉母下靈風啼鶴石門寒眼前佳致不常
到更愧高恒萬里寬

和奔元凱

五月輕寒到紵衣小牕坐數晚花稀清時有道微生拙白髮無
情壯事違萬古成虧餘物論百年晴雨看天機知君已是蜚騰
暮欲訪君平問少微

和王觀善賦弟觀光一覽新樓之作

一室高明眼界平東頭正可著難兄青山流水當書案過鳥行
雲落硯泓盛世無人憂會歛高才自古托耘耕蟹肥酒熟君當
醉不用哦詩費度營

謁安成魏君壇留宿其下

一溪抱峽玉潺湲竒草幽花滿古壇干岫月明丹石去萬松風
轉斗垣寒白雲可踏天垂屋老鶴不歸人倚闌定有吹笙玉母
下露淒夢冷欲生翰

網村道中

少日修塗幾往回猶持華髮走塵埃江波滾上晚風急山氣茫
茫白雨來十里陂田寒麥短數家野屋小桃開天機物理誰能
詰且醉春醪淺上盃

發洪州

童稚相催忽白頭西風滿袖古洪州重陽天氣村上雨殘柳人
家處上棲樵牧忘机鴻北去古今無迹水東流卸帆旋買楓林
酒飽睡歸舟十日秋

九日和鞠景中

秋風門巷馬蕭蕭，佳節相看愧寂寥。歲月蹉跎供客老，心胸磊落清誰澆。九州子美猶能健，千載淵明不可招。短髮鄰翁簪菊滿，逢人猶記說前朝。

少年共飲賦華蕭，老去歡悰日寂寥。海內漸驚前輩盡，風流更覺後生沈。紀時尚有篇章在，應俗還從里巷招。坐想清時文物盛，茱萸分賜滿中朝。

重遊青原回途過清都臺和坡韻

門外江流萬里東，青山曾識老仙翁。百年客髮東風裡，兩岸人家落日中。蠟屐平生須凡到，桃花前度有誰同。文章隨意成千古，草樹荒々老屋空。

上元留宜春羅氏

簾外行人曲々迴，雨餘趺坐聽溪雷。語音未覺鄉風異，山水何知此客來。堦鳥飛々行小桁，盆花的々照深盃。兒童不負今宵好，旋作紅燈掛落梅。

遊青原山

百疊青松夾路苔，白坡隱々轉晴雷。霧消萬瓦行空動，鐘靜三門照日開。石似祖師無語答，山如處士待人來。古今湛輩消磨盡，小倚危闌首獨回。

和劉寶翁

出門握手振塵裾，妙語猶能破嘆吁。陌上晴花吹婀娜，牆東風管度喁于。百年有酒春如許，一笑無渠我亦孤。山郭青々何處盡，種松未可待全蕪。

寒食和友人

二月微暄試白團得晴一笑未應難故人不至花頻落好句初
成酒半酣郭外漁樵無世念墓門翁仲看人歡夜歸坐聽瀟
雨自剪西堂寸燭殘

江上清明和友人

北郭山蒼開赤鷓東津榆莢作青錢大江萬里雲連野元氣千
春樹接天豪傑盡隨流水去文章未許俗人憐感時惜別俱常
事莫放清愁到酒邊

喜李伯英至自燕

輦路天寒雪沒靴朝雞夜雜扣牛歌五年相望高堂健萬里歸
來一笑多獻賦未應慚大禮封侯終待取長羅緇塵敗線皆春
色門柳新年已掃蛾

偶成

世事難諧似熱沙朱顏不注轉年華浮生又聽山中雨勝日長
看客裡花遠樹行人峯入畫春泥小巷燕謀家故人不隔東風
外日暮吟詩寄過鴉

暇日至吾廬亭

小池淺上落紅堆猶有茶糜可酒盃種樹十年堪共待扣門一
笑勝頻來楸枰坐久霑危露紈扇晴嬉墮脆梅爲報詩人箋注
苦暖風天棘蔽階苔

渡江

白沙青草接平皋水郭津亭繫釣舸晚市千家紅蜃動秋波萬
頃翠鱗高江山如昨少年去天地無情客子勞一笑同舟屠販
子俯船亦似惜霜毛

和友人小飲鷺州

草樹長洲起夕陰
談經人遠去鴻沈
陌花幾見遺民老
城鶴能言千載今
明月大江秋入笛
涼風萬竹客橫琴
却思少日經行處
沙港揚舲五尺深

和友人遊青原

憶與諸賢共解鞍
重來扣策感羊曇
淵明未了溪邊笑
次律寧知樹下函
騁地祗令供過客
禪梳政復入清談
古今邂逅俱成佛
試向廬陵米價參

送文尚志赴寧州判

天上清風起鳳毛
貳州草屨試英豪
鄉人未老旌旄慣
世故無窮閥閣高
綠鬢朱衣生爽氣
紅粧畫舸下輕濤
政餘閑品新茶味
想見吟情歷楚騷

燕

穿徑迴簷掠沼波
語言擾七竟如何
形骸已外梳心少
天地爲家客路多
五月簾幃毛羽足
百年巷陌子孫過
廢興正爾渠何與
一笑詩人費苦哦

和劉尚友題夏深道南齋

深道祖之父

曲闌橫檻秀無塵
短卷脩琴澹可親
草意欲供新得句
桃花猶記舊來人
江山有待天寧借
客主俱佳筆有神
更愛屏梅丈人行
要論高品不論真

九日同蕭煥有兄弟
蕭安國陳誠伯彭天玉
華明胡篔簹平涂率脩兄弟
泛舟觀橋吉塘飲酒橋庵
順流而下登西臺
赤城岡山復飲山亭
觀先朝所賜廟神劉誥封
及硯泛月而歸和煥有韻

斜日千峯生纈斑
憑高飲酒未知還
百年寒暑朱顏變
萬古興

亡白鳥閑野叟豈知酬令節是日耕高人從昔愛名山回舟月
色寒如水共指城樓杳霽間

老來詩興尚能豪九日登臨不憚勞山挾鷲江千里去人行驚
嶺九霄高蕭蕭掠帽風無力炯炯搖波月有毫更欲縱談歸意
迫高城處處發蒲牢

和涂率脩

出郭意行何所歸史家園裡得新詩野香一選客稀到秋興滿
山僧不知老愛故人鴻得侶愁欺短髮葉辭枝他年尚有經行
約莫忘西門見月時

和友人吉塘橋

曾喚春舟不肯回祇今兩岸縱徘徊人隨飛鳥空中過仙跨長
鯨海上來驅石勢疑秦迹幻濟川事繼禹功開偶然題柱寧慙

老笑倚危闌試一盃

又和登神岡山

俯看人間漸遙群峯在眼不須招大江平楚幾千折老廟空
山五十朝野曠雲鴻風謾天虛秋樹晚調調詰綾賜硯傳看
久不惜歸舟月共宵

又和涂率修黃泥上塚

扶醉行歌日未殘遊人風致路人看山城天氣菊花早郭墓秋
風麥飯寒得句何妨催落帽杖藜豈必遜憑鞍身名盃酒俱從
分邂逅相攜勝素歡

贈何善積

撫州何時字了翁宋名士其
姪人虛復知名善積大虛子

大虛相聞不相識今見其書真國琛豪傑不多留竹帛文章自
古半山林故人狗監誰稱賦賈客雞林定賣金傳業佳兒今喜

見五絃應可得搔心

寄題龍興萬允善竹友堂

萬君隱居湖水濱樓前數竹勝蒲山九州佳士誰可語盡日此
君相對開樽俎風涼琴不斷亭堂月冷鳳初還神交千載徐蘇
近俗駕無勞此款關

十四夜月乙亥

村家薄醪可醉歌瓦卮不用金叵羅世味真如今夕好月明何
待十分多風來古樹疑微雨雲散長空湛碧波須信謫仙貪痛
飲猶勝子美苦長哦

十五夜月暈

西鄰邀飲夜初深四座能歌有幾人淡月外環清浪暈織雲亂
布白龍鱗閑情常恐良辰過老境偏懷故里親雨足墻東丹桂

好清芬亂藹一枝新

故居南山感興

涼風薄日滿天地團作人間一片愁衰柳馬嘶山驛晚冷菰鴈
落野田秋呂安潦倒黃公酒杜子蕭條白帝州欲說舊家無故
老杖藜默數昔經遊

乙亥留故鄉自壽

七十古稀今已迫回頭一一記兒時三生我豈後商隱舊嘗夢
與李商
乃其後身四海今無半子期蓋筆有情聊暢適文章無用祇娛
嬉旁人莫比耆英輩但好商山學采芝

送曾伯璋歲晚歸重侍下

城陌雞鳴夜又晨歸途擾遇柳條新科名興廢渾閑事學業脩
明見古人大雪千山文旆起東風三世綵衣春詩郵來往應非

遠要見窗燈筆有神

伯璋從余學有奇材遠識報料可必而遭逢科廢猶大
肆力於學業歲晚歸首重慶時宜大雪因賦此以別之

送劉高仲考試武昌兼東龍仁夫

又聞鄰省起髯劉還共波龍學海遊天下斯文宗白鷺廬陵道
老尚黃州孤羆誰擅三千字雙鳥高鳴五百秋後夜月明南北
共定知吹笛庾公樓

舊嘗夢雀兔若仙境者樓觀肅然香氣襲人得二句云天
懸桂樹三千界人在梅花萬斛間竟莫省何故偶閑坐憶
此因謾以夢中所見足成之 己丑

珠簾坐捲燭花殘殿上昭儀擁翠鬢紅日牙旗明曉仗青煙雉
扇立仙班天懸桂樹三千界人在梅花萬斛間始信蓬萊司下
土坐繙前史燭忠奸

春日故鄉意行和楊伯允

快士遊從不在多清言雅韻過雲和行春豈爲花三朵買酒恨
無錢西婆丘水迹陳喬木盡兒童學廢古書訛臨溪未可輕相
別藉草何困更共歌

鹿山山下水流多小扇輕衫令節和隔屋高花風婀娜半橋楚
樹日婆婆驛池水減蒲芽短山礪泥乳鳥篆訛鄉里往還吾獨
老喜聽鄰屋晚絃歌

和高方大初度日登中華

仙仗凌風立翠華殿門詩客帽簷斜寬幢曙景來三駕麟脯天
香賜九霞半夜川巖燈作市千年日月鶴還家宴闌闔闔恩
語海屋新籌與壽加

到祠七十二雲扉俯視齊州一粟微萬樹挾風濤湧千峯倚

漢石嶸崎銀河垂屋天如近璠斗當壇夜有輝欲與浮丘談舊
事瓊樓高處未能歸

送龔如逸赴南康學正

秋風千里送飛帆又戴儒冠俎豆間
美教古來無鹿洞清遊天下少廬山
弄鳥綵服三年別騎馬青衫一日還
渤海家嚴元有舊衢雲努力更追攀

和許山立見壽

兩袖秋風酒一中浩歌無復問窮通
極知白髮形如木謾憶青年氣搏叢
隨意文章逃俗諷可人談笑有君同
平生最是鍾情處明月娟娟水館東

和彭叔和見壽

何必致身卿與陪折腰受辱始歸來
歲年不禁衰容改天地猶

容笑口開君似坡仙分鉢杖我如洛老
托春盃郭門西轉青塘路却欠閑田種
芋魁

叔和再用前見壽韻貽詩再和

里巷周旋得屢陪過門兼辱好詩來
清如廬瀑千尋落壯麗衡雲萬里開
佳氣長浮茅屋雨清風猶在菊花盃
錢鏗歲月應分授簸弄明珠到斗魁
庭下菜衣曾共陪城西謝墅許頻來
秋風白髮千莖短暮雨黃花一丈開
鴈背雲寒誰寄字蟹螯霜晚預持盃
小春天氣無多日却報庭梅蚤試魁

九日蕭孚有約諸賢登高遂訪青龍寺
午至桂溪橋飲于小庵晚登庵後山藉
草松下浩歌痛飲舉酒酌野墳又呼
樵童爲山歌行者屬目賦詩二首

朝尋古寺石齧樓暮上崇丘風掠冠狂飲眼看紅日盡高歌
入碧雲寒亂峯猶作太古色野墓不知遊客歡何必龍山爲故
事賦詩留與後人看

九日同登西郭墅古人落帽我巍冠孤城鷓鴣過秋堂迥半嶺
歸暮笛寒歲早黃花難早折年衰美酒強爲歡山歌雅曲相和
發驚倒行人注目看

又和同遊

引盃常在衆人先盃裏青_上見遠天白髮偏驚人少壯黃花不
管世媼妍長雲老鴈如行客落木空山又去年欲喚八仙同醉
飲酒中聊復託逃禪

隨意登臨處_上過何須泰華與岷峨九州佳節吾生老千載清
樽少者多晚日杖頭能一醉秋風棗下不堪歌鳳山_以日荒涼

路曾見黃花擁翠蛾

彭叔和和余九日詩次韻

共醉黃壚無呂安重陽誰與正紗冠百年風雨鳴蛩晚萬里江
山老鴈寒陶令淒涼惟菊對杜陵潦倒奉人歡城西賴有彭居
士來往真能耐又看

羅履貞同遊石洞

髣髴迓秦第幾源寒花流水繞溪田石門千尺閑元氣野屋一
村開洞天高塚鶴歸忘歲月深山樹老識神仙與君共酌簾泉
酒小住人間五百年_{是日履貞初度}

丁巳人日素本清邀諸公郊行次劉尚友韻

古來人日自難晴乘興招邀一笑真山寺徘徊頻避雨路車徐
疾各行春連峯下瞰千家屋絕閣還空一世人花事從今當漸

盛不妨來往更相親

次日再用韻

已雨猶留一日晴東風邂逅謁群真
是日出岫臨執江山又見
新年客城郭曾經百代春能讀殘碑猶我輩
縱談舊事有何人
夜歸未覺沙堤濕爐火窗書更獨親

寄題翠屏晚對齋

幽居縹緲出脩林讀易焚香坐夕陰
歸鳥不知元化役青山俱
是古人心鰲峯雲散天如畫玉峽風來樹亦琴
用世驅馳成底事始知一靜抵千金

送曾韞暉赴京任檀州學正

芳年儒正紫貂裘北出都門亦壯遊
五季山川分漢界太平學
校過檀州禁楊拂禦黃金色泮水通城碧玉流
寄語向來勒碑

客筆雖倘可到封侯

壬子八月十四夜對月

萬里輕陰晚忽收天公有意作風流
今年對月又爲客明日無
雲始是秋多病情懷成老態早涼天氣似中州
少陵兒女癡何似共景懸知不共愁

十五夜再和

銀河垂屋夜氛收
臥看長星一點流
萬古塵勞餘好景
四時風致是中秋
天懸海外三千界
月滿人間幾百州
殷庾升沉俱不見
即時有酒未須愁

林下盃盤夜未收
尊前何必盡名流
人生快意元輕日
客裡中年最感秋
酒滿恨無歌赤壁
月明閑聽說揚州
故人只隔行雲外
剩著新詩寄四愁

送趙光遠道州寧遠稅使

故家喬木鬱衣冠，小試司征第幾班。
鵬翼未搏千仞外，馬蹄初踏萬山間。
門當遠嶠花連務，縣接清溪水遶閑。
詩課書程應不減，東風早送錦衣還。

憶鳳

舉世堂上福祿人，哀門纓咎獨何深。
學違素志元安命，老哭才孫最損心。
暑載漁舟翁挽柁，夜歸僧屋鬼同林。
庭前檜竹陰在陳迹，如今豈可尋。

清姿方頰兩眉揚，從我東西近我長。
諸子誰能高意氣，十年却悔學文章。
眼前言笑疑生死，篋裡詩書半在亡。
坐愧大丘真有德賢孫，迎客立成行。

送宋趙儀赴貴德知州

秋風千騎擁旌麾，畫角高吹出塞詩。
綠水山川唐國界，朱幡人物漢官儀。
信知懷土非男子，更覺專城貴壯時。
三葉郎官人白首，向來顏駟有誰知。

次韻蕭上舍仁叟賦杭州舊遊

帝城鐘鼓雨初晴，御柳春煙繞禁青。
萬落湖山天遠近，百年歌舞夢酣醒。
別離共歎秋雙鬢，興廢惟餘月一庭。
寄語遺編須愛重，清時要聽伏生經。

和學翁兄

以下多前至元戊子巳丑間作

晴閣題詩初振袂，暮山聽雨更懷家。
功名有分可通袖，變化難期本筭沙。
無地早栽它日樹，有愁偏見客中花。
衆綠起滅從來妄，欲掃塵埃看法華。

和孚有

山雪半消如白衣樓高病眼眩
微鐘雨濕依林麓飢鳥天
寒下水涯潦倒醒在那敢醉
蹉跎晚合政如癡十年聚散
今成又長憶江頭共立時

和劉咸吉

飢鳥翻飛欲下池天寒籬落
雪消遲一年又向清談盡
此士能令終日思江水送人
驚草上山雲催句助奇
春深故里桃花路準擬掀髯
讀寄詩

新年簡彭琦初

今日新年春意動梅花一片
隔溪飛樽前風物年
改兵後衣冠處
稀樂意百年能幾遇
故園何日與君歸
昨朝擾攘成何事
惟有埃塵滿素衣

題蕭將軍廟次歐陽山立韻

蕭將軍廟在吉文山
中碑無名字但載其
提兵五百逐寇一日
俱死

將軍汗漫化人城猶得遊人
小隊行海上田橫從有士
山中鄒湛竟無名東風亡國
何曾戰上日空江幾度晴
社鼓粉陰蒼老在陌頭過
馬訝昇平

次友人花朝韻

此日晴暄自不多
聰明遙隱有雲過
山深聽雨人猶臥
病裡逢春意若何
四海交游無古道
百年風雨得狂歌
東林草木多生意
飛杏青上過薜蘿

中秋留故居兄弟對月分韻得多字

棘院功名風雨過
柴門兄弟月偏多
分詩莫作中年語
對酒何妨壯士歌
老桂欲花先撲袂
長空無籟澹橫波
却思高館吹簫罷
臥聽蕭蕭雨打荷

丙子歲除夜坐過半

長街鐘鼓未聞聲，驅耗誰家發小鉦。
世故千端人髮改，天輪萬里歲功成。
燭花似報明年喜，酒味聊供晚節情。
七十古稀欣尚健，戲拈綵筆覺春生。

新元 丁丑

閭巷重逢後，至元却思丁丑亂。
離前藏家雪案三千卷，閱世霜鬚七十年。
枯槁恨無元亮酒，衰慵不著子雲玄。
窗梅賸作新年意，頗覺三生有宿緣。

春雪

開歲雨陰連十日，雪寒兼與舊春同。
乾坤半落窮荒外，樓閣橫陳淡月中。
瑟瑟松篁山屋夜，疎疎鼓角部門風。
梅花慣與清寒敵，却喜群英未放紅。

雨中出郭訪友

驟解冬綿復用綿，江城二月社寒天。
野桃漠漠一村雨，山屋冥冥半塢煙。
燕子未歸風滿面，馬蹄不度水生川。
惜無濁酒供新興，但把新詩答暮年。

次韻龍文環送蕭公著省親池州

楊柳津頭送客行，楊花滿路蕩春情。
江南覽勝重湖大，男子從親萬里輕。
錦舫浮春宜麗日，綵衣趨郡及清明。
嚴君問訊煩多道，要借光塵保至清。
螺川日夜向東行，不放思親頃刻情。
珍饌遠移榆滌美，錦帆順逐柳花輕。
山圍吳楚青春潤，天泛江湖白日明。
好向芳年供世用，直陪鴛鴦立西清。

清明和李亦愚

煮茶閉戶看殘編風味淒涼似玉川春到名花偏又雨人逢佳節恨衰年棠梨野館輕寒燕楊柳人家薄暮煙新水夜來生朝外來畦桑隴下論錢

送周儀道往池州謁蕭經歷

三月江南湖水平周郎理棹舊知津古來多附青雲士秋浦今看白玉人燕子拂波江驛曉楊花撲面楚樓春老親不管離憂苦準擬秋風薦鷄新

和彭天玉雨中牡丹

待得名花值雨寒橫斜粧淡洗鉛丹霓裳仙子泉初浴碧袖宮姬唾不乾絕色從來傷命薄好春不肯借人看鈍才難續酥煎賦三歎君詩似鎖干

次韻龍文環宜遠樓共飲

草樹連洲互短長倚闌搔首感行藏萬家樓閣浮元氣千載城池閱夕陽坐上笑談形獨槁向來歌舞臺猶香宜遠樓舊爲歐陽巽權燕飲歌所舞之公墩我屋俱堪醉寓意何妨學列莊

壽蕭熙績

藥鼎丹爐不試煙繩床塵尾似行仙山林猶見貞元士天地重開絳甲年竹筒滿堂供老讀芷花千斛著高眠旁人却怪酡顏故不是稽山棹酒船

壽蕭熙明

高樹清流四敞軒蒸聲永晝不驚蟬八千戲玩春秋海五十何知富貴年羽扇風流天下士藥壺滿灑地行仙壽觴不用人間釀夜泛荷花露滿船

壽素恭甫

先生無酒自顏酡笑擲人間玉
巨羅金谷樓臺隨地勝銅人歲
月入詩多鄰翁重見三千履
時遷蒲城胡尚書舊府春色分藏十二宮
爲問東海消息好青衫催染楚江荷

庚午春大霰戲作

海風吹雨旋成堅
簌_上瑋_上亂耳邊
一夜白雲俱在地
九州洪水復滔天
已知世上無此潔
誰在空中作許圓
若借齊奴供買妾
不妨列屋貯嬋娟

上巳晴和劉志霖路教

春色蒸人暈肉紅
一盃初許共東風
過時不賞花薄命
又雨得晴天有功
歌舞豈知蠶市過
升平應在麥畦中
詠雩童子今俱壯
不怪鬚髯蚤似翁

寄友

省吾堂後黃梅落
大雪樽前倚紫絲
近會匆匆愁更長
暮山莽莽笛孤吹
揚州他夜帆歸好
崇福看花馬到遲
露下空庭談語絕
偶然入興一題詩

輓周耐軒總管

夢裡諸公歷_上存夕陽
懷抱與誰論
江河春色流天地
城郭居民有子孫
過馬時來廷尉宅
弊裘欲老故侯園
桐鄉遺愛依依在
風珮應歸月下魂

輓趙學聖

程雪樓銘
子昂書

曾從群彥識堂堂
今作哀歌寄白楊
異代風流存寶玦
暮年出處重銅章
褒衣猶起鄉人敬
白髮閑看世故長
柳墨韓碑真不朽
槐陰事業屬諸郎

輓洪菊潭

喬木江南可幾人君如杞梓秀儒林一鄉自重文翁化匹士能
行后稷心道軌異同人百代經畚殖落意千金只今耆舊凋零
盡白髮秋風淚滿襟

輓劉子清

人丁從古混泥塗世論安能定智愚一語全城青史少千金散
衆俗間無管簫無位虛長筭絳灌成功本匹夫見說誅文餘四
十寶珠定慰墓中枯

輓饒玉甫

盛世有志展才賢晚歲逃名托妙玄方外成功偏及物古來策
士每成仙嘗赴都書臺花好春隨履詩屋雲空夜語泉未信經
綸虛一世不妨銘些寄千年

輓瑞州伍興甫總管

豫樟連抱起微苗雨露涵濡托聖朝冶鐵丙君雄郡國以鼓吹
笙秦史立雲霄尚翁松滋學子千年廩洪浦行人萬古橋能救
民飢希富范恨無仙道繼松喬

湖海成名范蠡船鬼神受役尉遲錢門開鐘鼎三千客身閱雲
泥六十年智士經綸無槁項盛時意氣即飛仙柳枝駱馬應猶
在松栢春風綠逸阡

賞梅和劉景行韻

淺淺韶光淡淡梅新年笑口偶然開佳時風物宜詩句老境情
懷托酒盃天地回春如有約明時用世愧無才伏生九十知猶
健倘有求書使者來景行年九十

龍文環和余韻次謝并簡漢英

二妙能詩舊有叢笑人筆退似聞鈺黃金蘇子遊偏遠白首揚

雄宅未成共信他年終用世相逢一笑豈無情梅花池上先春
發穀上微風殘面生

七言絕

題京兆圖後二首

谷擁蔽函水注豐銅人草樹幾秋風山河萬古原如昨歷代成
功自異同

連雲宮闕燹南山遺址荒上白鳥還百代英雄何處去空遺尺
紙在人間

題明皇並簫

青鳥西來大液池霓裳舞影落瑤墀並吹玉管同心調惟有姮
娥月裏知

題張敞畫眉

京兆春風到柳枝翠簾縹緲遠山奇梁鴻亦有齊眉樂不要人
間黛綠施

遊新淦興善寺和彭自強三首

山風閣雨帽簷斜墟落秋陰菊未花豆葉鳴蛩行客跡槿籬吠
犬野人家

流水琮瑋響澗磯棕花芋葉與階齊木魚晝靜山僧出獨遶脩
廊看舊題

紅葉山門半掩秋寺童不悟客清遊楞嚴滿案無人誦庭下黃
花一蝶留

宿荷花莊

晚宿山村待雨晴夜深雲弄月痕明茅廬四面溪田遠半是蛙
聲半水聲

已巳上元日晚入城

鞞屐縱七踏亂冰筓與寶馬出縱橫城中三市紅燈動江外千峰白雪晴

題蕭孚有為羅篔簹所作蘭竹圖二首

劔葉細花萬石間無誰可共此幽寒相纒紉盡秋風佩未必曾來月下看卷中

巖筓橫斜出穉龍林梢偃蹇受清風歲寒石友聊堪共未許山

王著此中卷中

題畫江濤

人心不是巫瞿峽下筆奔騰起怒湍別有一初真止水無誰肯畫與人看

題李鶴田穆陵大事記後

宋自穆陵升遐元氣盡矣時橫宮屬官李珣紀其本末頗詳橋山劍寫歷七如見異代覽之亦為淒然李吉水人蕭鶴田先生以此本今在廬陵羅祖禹家其子中行以示余余因用鶴田先生昔陵下元夕隨以識感慨云
陵寢魏峩十二闌西興吹角浙江寒老臣無限遺弓淚寫與人間異代看

蕭氏文會堂羅漢栢二首

秋風滿眼古人稀虛館重遊愈老衰惟有亭前雙栢樹昔年曾見往來時
葉修如柳色弥正榦堅似檜身難長莫嫌坐世春風少歲晚相期傲雪霜

題劉侯所藏十八學士錫燕圖

天策諸賢佐大功一堂密勿古人風當時上不同心處只在從容錫燕中

癸卯元日晴繼復雪亦不發出穀日復晴歸鄉途宿上元
觀燈野廟隨所賦得千絕

鐘鼓籠銅報曉晴殘燭瑤色近廉明老來最憶兒時樂拜罷新
年處處行

燭痕點點墜紅銀香影明窗綴曲藤春帖自題還坐久梅花瓶
水旋生冰

市門處處繫冰花燈影蛾雲動絳紗走馬城中三日雪不知春
已入誰家

朱門日日泊高車陋巷冰枝積寸芽春色不隨人意薄夜來潛
到小瓶花

瀉山人日馬蹄忙懸勝輕寒剪剪黃閑笑梅花無媚骨至今不
洗壽陽粧廬陵城中人日士女多游瀉為仰寺

杖屨新年第一行江山殘雪盡初成春風歲歲藏何處又與人
間作曉晴

聯袖吟詩不計程暮投村店屢占晴霜濃睡熟無人喚誤待城
頭畫角聲是日自城歸遇學翁兄同宿於途

雪後萬松旋作青村家沽釀白於銀山中未見新年曆閑剪桃
梢試立春

綠麥黃梳染繭絲紙旗戲鼓祭叢祠少年風物今仍在別有傷
心人未知

驛門北女賣蛾兒水屋紅燈出樹枝鄰笛孤吹春未動一簾微
雨似秋時

惜春

西郭桃花蜀錦梳東池楊柳越娥眉少時不惜春光好老大逢

春意始悲

江行春望

萬里春晴萬里風，輕寒漠漠晚推蓬。
江邊篔簹竹，馮夷廟一樹飛花盡意紅。

贈李福元賣書作墨二首

經筵午茗坐白虎，詞館夜燭分隄麋。
人間書墨非無用，泮統天寒我自知。
秋風落落拈書賣，白髮悠悠被墨磨。
莫向朱門癡坐久，小簾歌罷掃濃娥。

題松石圖

受命大夫曾浣節，謬恩三品亦蒙譏。
何如山谷閑松石，閱盡興亡與是非。

題濃淡竹

遠看如淡近看濃，雙立亭亭傲晚風。
俗眼未應輕揀擇，此君清致本來同。

鄰有廢屋久閉，金沙一枝忽穿屋山而出，衆爲驚，顧然亦竟無一賞者。

古屋幽花閉不知，忽穿碧瓦怒橫枝。
辛勤自致高堂外，却得行人立頃時。

炯炯花紅立，斷烟終無把酒爲渠憐。
東風攔檻金鈴護，未必真能絕世妍。

元日

曉街泥淺馬蹄過，元日雖陰氣已和。
處處堯花如二月，東風應比去年多。

五日

中年懷抱漸無餘，節序蹉跎半客中。案上離騷今不讀，一窗清夢臥南風。

乙巳五月過瀘江

抱田曲水走脩蛇，溪勢如鳴萬疊車。山雨挾涼閑客扇，渚雲分暝夫人家。

城歸途中春暮野陰風物蒼然

津橋半斷水如雷，屋角古墳青草堆。三月荒村春最慘，萬山微雨棘花開。

新淦道中

道中老人舊相識，怪我重來鬢似戟。江橋流水今種田，手記垂楊添十尺。

沙坊江上海棠開紅錦，漫七圍古臺死後有花不能看。生前還解看花來。

庚午春夏閑居即事五首

閑居山郭閉柴門，過雨踈花弄晚晴。萬疊松筠春繞屋，日長歌枕聽鶯聲。

老托園林困雪霜，橘株病悴蕙枯黃。茶蘼獨擅春風力，無數新苞出短牆。

梔花梨花爭滿園，金沙玉棠蜂鳥喧。少年看花夜載酒，老子看花春閉門。

雨前種苜一畝畦，雨後柔脆堪作糜。荒年不識瓊酥味，日晏三嚙甘如飴。

門掩薰風小小齋，紫薇幾尺正當階。誰言省掖偏宜種，偶落山

林亦自佳

謁蕭定基墓

至元甲申余客九關殿日從蕭瑞叔諸友過澁塘謁詩
御史蕭定基墓讀王荆公所為神道碑至順辛未八月
六日重過其下則碑字多為樵牧所傷
把剝不完俯仰四十八年感興深之

故舍江邊短麥畦少年履後幾徘徊當時良友今安在滿眼秋

風我獨來

故舍所
墓地名

赤嶺虧剝白水奔江濤高處復為田古人不見文章在皓首看
碑意惘然

戲贈吳存道煉丹

十二秦樓燕子風主人鍾乳借顏紅何如買取吳家樂長與姪

娥住月中

已巳歲晏連雪和學翁兄三首

半月山家雪塞門芋畦菜圃淨無痕呼童高斲梅花凍日貯煎
茶水一樽

天寒絕粒閉柴門曙色滿窓疑月痕起掬大荒澆渴吻恍然氣
象似窪樽

庭雀啾喧下竹門冰花萬疊弄新痕歲除一雪竒如此但恨無
詩無酒樽

題牧童騎牛圖

山中無古亦無今牛背歌眠老樹陰若使讀書如李密豈無机
事到渠心

題僧枯林蘭

短筠峭石共清妍筆裡幽香九畹傳夢到高僧擅蔔國覺來身
在畫圖邊

題春江煙雨圖

春樹蒼々白鳥飛小洲茅屋遠依微一川煙雨無人渡坐看漁舟晚獨歸

題錢謙舉畫馬用尚文韻

馬與故者皆脫

東風驚駘滿帝里顛倒奚官獨如此臨衝未可輕一鳴伯樂死矣世無耳

芻豢區區困騎奇回頭不受馬羈施畫圖尚有飛騰勢未信當年買骨癡

題寒汀小雪二首

幾樹蕭蕭疎密雪一汀澹々有無煙江空鴈落寒如此只欠吟詩孟浩然

天寒老檜濕模糊沙上漁蓑一個無倘有羈人歸未得定應誤

認白頭鳥

有數鳥白頭借用燕丹事

橫石渡候舟有感

沙邊一樹誰家李歲々逢渠白作堆滿眼青山衣袂濕又隨春雨過江來

初秋和友人韻

高齋風竹夜幽々病客無悽早覺秋華髮半簪燈一點著書執筆笑何休

樓上窗扉面面開青山未接大江隈迴風一颯飛花住萬丈晴空白雨來

再和

已將壯事換清幽坐見高槐六日秋佳客不來吾亦睡清風吹竹息休休

漢七秋陰未肯開
澹雲踈雨滿山隈
與君共熟江頭路
要待他年恁裡來

午慵

春步時傾花下酒
午慵却放按間書
倚牕貪聽溪流急
篔簹竹翻翻雨入裾

倚樓

留滯孤城又晚秋
懷來真倚仲宣樓
青山東下連瓜圃
坐看耕人晚未休

客夜秋風

清夢初回心似水
紅塵未了髮生絲
高風捲地干林語
莫忘南山聽雨時

春晴

春暮無人到
草萊荼蘼如雪
過墻來
脩然閑憶人間事
野鳥窺簷夢自回

西園梨雪遠如天
白水鳴田亂不分
野客逢春無一事
獨尋幽草坐着雲

城歸途中

疾風山際西
三騎殘雪回頭無
數鴉一路水泥行
犢迹隔溪篁竹護人家

陪艾幼玉郭逢春諸公郊行

家家墻短花自好
日日春深人不知
行過小橋還酌酒
坐看流水却成詩

向日一出花未開
今辰紅減白皚皚
九州八極春色好
年年村落看春回

晴嬉

晴嬉逐隊未應稀
芳草誰家驥裏肥
人散酒醒成獨感
倚闌看盡白雲飛

題秋日江村圖

黃葉秋風起
蹇驢平洲遠
嶺鴈相呼野舟盡
日閑無用只與人
閒作畫圖

贈墨客羅德輝

老李煙煤後代尊
一生流落價難論
向來貴賤真堪笑
車載街頭漆寺門

漢館隄塵千載重
魏臺螺石四方崇
世間真偽誰能辨
貴在當時出殿中

老屋秋風絡繹蹄
寒膠萬杵擣霜遲
只今天下無真墨
重見潘

郎世未知

題羅宗仲所藏水墨古樹圖

枝如騰龍攫雲外
根若伏虎蟠石間
蒼茫欲與元氣合
萬牛不動安如山

大株枝斷削如鐵
小樹葉茂濃於雲
人間霜雪來未已
貞脆當從晚節分

古梢絡藤霧雨注
長根竄石虬龍奔
山邊新樹雖好在
俯視僅可同兒孫

大陰決滂萬古雪
元氣淋漓千尺絲
豈無仙人食琥珀
吹笙夜踞蒼龍枝

對花偶成

為藥花前閑日坐
海棠枝下醉時眠
自今歲上窮心賞已
負看

花四十年

題宮中所掃除棄餘侍宮中每日所掃糞必
侍宮中每日所掃糞必
承平宮禁無他事點檢猶能到棄餘天下豈無當念慮君王用意定何如

題李陵宴蘇武圖

居延山下馬成群伎樂聲高夜入雲初志消磨如衛律殷勤置酒教蘇君

屬國難酬白髮郎延平誰與弔沙場隴西使者如雲出却要迎歸右校王

開歲六日遊能仁寺

郭外櫻桃已亞枝寺門獨立已多時詩人堂下春寒淺時有居民借絡絲

重涉瀘江

立沙稍稍行人聚踏水悠悠去鳥雙回首十年來往路祇添華髮照寒江
渚籬漁網懸秋日山寺人家起夕煙欲共故人評好句微風吹袖水痕圓

贈曾維新江篆章

風吹鐵筆雪珊珊篆法推尋古意還老去姓名誰記憶若爲錢刻得人間

題羅稚川小景

小樹欹風老樹枯前汀暮靄半模糊騎驢人指高樓去不識渠家可宿無

淵明臨流圖

一童携琴一
張酒一壺

三尺枯桐一斗墨秋風曳杖偶徘徊不知當日臨流意四海何人與共來

蘇武持節圖

朔雪漫沙幾白氍胡風吹凍滿氍衣少鄉駝馬弥山谷何似中郎一節歸

題枯林蘭僧辨枯林

細花幽幽隱道韻劍葉披披吹曉寒城西四月好天氣時過高僧有畫蘭

和趙子昂寄馮海粟長沙易中卿得與卷揭曼石有和易復索余和

古今翰墨散如塵晝夜荒走西輪莫說鍾王今不見湖州學士白楊新

老粟清名雪作宮揭家健筆驥追風閑思海內文章士歌枕蕉

花細雨中

玉筍山中有白鶴花頂翅宛然類鶴王蘭友作詩送至用韻

縞衣玄爪立前除天上人間剪紙糊除却青青三四葉月明滿地却全無

千載蘇仙上帝鄉空餘琪草似人長夜涼環珮不知處夢覺滿山風露香

鄴家舊有牡丹久移植荒圃詩以訊之

十二闌干照日妍此花籬落故依然主人不待姚黃看寒食東風又一年

野蔬采采蔽敬葉惡蔓離七蝕朽根草木升沉春不管人間可獨有長門

和蕭克有主簿沅州竹枝歌

人生結交莫如月人生行路莫嫌熱熱當三伏易宴秋月能萬里長隨客

沅人健飯無盤蔬沅土多熱無雞蘇官船自有龍鳳茗試寫松風班鷓鴣

沅陽江石生波濤南風吹起十丈高勸君上灘牢把舵須要一篙勝一篙

一州一州木有枝一江一江水可炊北人奈事不怕險南人多情易思歸

十月天寒買團蒲五月天熱水可沽窮通隨時不可強富貴有命何悲無

山州多江水如煙篙師不耕船爲田江流避石還易去船行著

篙還易牽

點背取利如斧樵苛法銷骨如膏燒官規難減實布稅縣政莫急蠻人徭

贛州廖氏雲錦亭

義取坡公掃却天孫雲錦段之句

老仙竈語落人窠千載江山未許閑亭下荷花二萬頃疑公猶在往還間

小院疎簾四面垂卧看千載葉間龜天孫爲織秋江景付與年年作好詩

華亭翠瓦水邊家珍簾焚香淺試茶志與齊奴同富貴小舟夜宿最深花

萬柄蕭蕭七浸玉虹夜深銀漢在樓東世間風月無人識長在羅紈綺縠中

題墨梅

歲晚江南霜雪天一枝玉立小窓寒
古來皎潔人多忘少受風埃未可嫌

紅紫相推獨作魁風姿如雪照人開
如何愛近今章額誤染眉間昨夜煤

寒食

鳥語東林萬竹脩輕陰漠漠意如秋
高齋寒食梨花落歌卧書床看水流

上巳獨坐

蕭然門巷野人家山鳥行階啄草芽
上巳焚香看易罷自衝微雨整幽花

春城車馬似長安預恐名花一日殘
鄰屋玉笙吹徹夜開庭危

坐牡丹寒

春晚無情放酒卮藥爐沸似雨來時
柴門晝閉庭花落時有山僧問近詩

秧老歌

效王舟邊錄江南農夫插秧上下田長歌相應和其詞似餘技而如淺直

三月四月江南村村插秧無朝昏
紅粧少婦荷飯出白頭老人驅犢奔

五更負秧栽南田黃昏刈麥渡東船
我家麥田硬如石他家秧田青如煙

昨日田秧亂如毛今朝南風搖翠濤
甕頭濁酒莫厭盡厭酒盡時秧又高

春寒風雨來滿川半蓑走遍東西阡
郎君騎馬莫問渡江頭自有官渡船

前年東家得早禾去年西家糶稻多我家今年定何似努力耕作無柰何

哭蕭孚有

孚有方產密之季子少甚穎異從余遊其為詩短篇高古由遠追逼常王長篇盡騁逸宕別自風致皆與古人爭衡至元三年丁丑七月一日病死士友傷之以其有十而未著其可憐如逢原敦夫九月九日余既送殯城東歸途賦以寄感流云爾

去年九日共登高絕嶺長歌意頗豪今日送君誰共哭一間殯屋大江臯

畫圖摩詰神情遠詩律蘇州句意清身後生前千古恨荒荒白日下高城

水檻蒲萄晁_匕垂方床臥病語移時如何一日纔踈隔永別終無見面期

敦夫短命世同悲伯道無兒天不知白首慈親髮鬢妾一船微雨哭麻帷

文會堂中碧樹柯評詩賭酒客頻過如今深鎖秋風滿想見階苔日日多

翰墨周旋二十春莫年卜宅遂為隣永新門外雙松樹無復相攜踏月人

螺湖橋外草如煙螺子山前水接天應有故人來下馬愁雲溪處是新阡

詩餘

滿庭芳

次韻賦萍

碧唾成花翠璣浮霧水邊裙影知誰半溝未合脂水過生肥小扇迎風試拂翩_匕去還復差池憑闌處怕伊貪見見了却忘歸

橋西青不住乳鴛行破一瞬淪漪看踈如有恨密似相依元是
情根種得更千古欲盡何時重相約章臺春膩還上最長枝

西江月

偏是一春憔悴被人閑
弑陽臺扇
透微雨
傍墻回
花信餘寒柳
外繡果未成
雙荔打鴉
摘盡新梅
暗占蝴蝶
却飛來
睡起斜
陽猶在

憶秦娥

初見
花

春愁淺
窺人忽見
桃花臉
輕寒初透
小牕猶揜
東風裙濕湘波
颭相逢
處處如人面
劉郎老去怕伊重見

謁金門

春睡倦
自揀花枝
行遍昨日新紅
今日變細
按將袖染
翠扇
迎風撲面
雙燕飛來
還轉簾外
楊花簾裡
燕相逢
如未見

青玉案

和友人
壽席

春來十日春多少
扶路金釵
試燈早旋
剪壽幡
飛蝶小
東家墜
柳西家
明月風物
年年好
種桃三千
今餘九
誰道桃花
笑人
老萬事
浮雲如過鳥
浣溪佳句
柴桑新酒
天地何時了

臨江仙

戲留
友人

何必渡江如去歲
載花買酒
山中赤城
風月笑相逢
城中差更
樂佳客
飲千鍾
菊水粼粼
生翠霧
容籬半捲
西風分明不與
畫圖同
不妨歌此曲
君自是司空

桂隱詩集卷四終

桂隱詩刻舊跋

先生平生詩文流落過少年所作多經諸老評泊以爲高逼古人今皆不復序於前者謂其不待序也觀者必自能識之文見陸續刊行今先梓其詩十四卷

至正元年春仲日進士門人羅如箎宗仲謹識



國家圖書館, NATIONAL CENTRAL LIBRARY, TAIWAN, R.O.C.

中華民國八十二年一月一日